

## ኤርማሳ ቲንቢቲ ጊዶ ቆፋ

ቲንቢቲ የቲዛ ኤርማሲ ኪርሰቶስ ዩሌታናፔ ካሴ ላፑን ጾቱ ላይሳ ወርሴላኒኔ ኡሱፑን ጾቱ ላይሌ ዶሜቲዛ ዋዴ ዴኢዴስ። ኤርማሲ ዳሮ ዋዴ ኦሊዳ ባ ኦሶን ኢስታ ኤቃ ጸሳ ጎይኖኒኔ ኢስታ ናጋራ ኦሶ ጋሶን ጸሳ ኣሳ ቦላ ጊታ ባሺ ጋካናይሳ ሚንሊዲ ኤሪሲዴስ፤ ኢዚ የቲዳ ቲንቢቲታፔ ባጋይ ፖሌቲዛ ዋዴ ፓጸ ዲዲ ባ ኣይፌን ቤኢዴስ። ባቢሎኔ ካዎ ናቡካዳናጾሬይ ዩሩሳላሚ ኦይኪዲ ካታማዮኔ ጸሳ ኬላ ላሎይሳ፣ ዩሁዳ ካዎይኔ ኣሳፔካ ዳሪዛ ባጋይ ዲኤቲዲ ባቢሎኔ ቢዳይሳ ቤኢዴስ። ጉጂዲካ ኤርማሲ ኣሳይ ዲኤፔ ሲማናይሳኔ ኢሰራኤሌ ካዎቲሊ ሲሚ ኤቃናይሳ ካሴቲዲ የቲዴስ።

ኤርማሳ ማጻፋ ኦይዲ ኬሲዲ ቤኣናስ ዳንዳዬቲስ። 1። ኢዮሲያሳ፣ ኢዮኣቄሚ፣ ኢዮኣኪኔኔ ሴዴቂያሳ ካዎቲላ ላይላታን ዩሁዳ ኣሳሲኔ ኢስታ ካሌሊዛይታስ ጸሳፌ ዩዳ ቃላ። 2። ዲማ ዲማ ቲንቢቲታ፣ ኤርማሳ ዴኦን ፖሌቲዳ ኣይፌ የኦታኔ ኤርማሳ ጸፌ ባሮኬይ ጸፌ ዋሊዳ የኦታ። 3። ዲማ ዲማ ኣላጋ ቢታ ኣሳስ ጸሳፌ የቲቲዳ ቲንቢቲ ቃላ። 4። ዩሩሳላሚ ኦይኬቲሊኔ ኣሳይ ዲኤቲዲ ባቢሎኔ ባናይሳ የቲዛ ጉጂ ታሪኬታ።

ኤርማሲ ባ ኣሳ ኬሂ ዎዚናፔ ሲቁዛዴኔ ኢስታ ቦላ ባሻ ፒርዳ ቲንቢቲ ኣላናስ ኬሂፔ ዳሮ ኢጺዛ ኣሳ። ናቤቲላን ኢዚ ኦላና ማላ ጸሲ ኢዛ ጸይጊዳ ጊሻስ ባና ጋኪዳ ሜቶ ጋሶን ኢዚ ጩጩዳ ሚኖ ጩጩይ ኢዛ ማጻፋ ጊዶን ዳሮ ሶሆን ጸፌቲ ኡቲዴስ። ጸሳ ቃላይ ኢዛ ዎዚና ጊዶን ታማ ማላ ጸጊዛ ጊሻስ ካሚዲ ዲጋናስ ዳንዳዮንታይሳ ቆንጩሲዴስ።

ሃ ማጻፋን ዲዛ ጊታ ቲንቢቲ ቃላታፔ ኢሶቲ ኢሶቲ ሜቶይ ኩሚዳ ኤርማሳ ላይሳፌ ካንሊዲ ጸሲ ኢስታስ ኢሚዛ ኦራላ ጫቆ ቃላይ ፖሊታና ዋዴዛ ቤሲዛይታ፤ ሄ ኦራላ ጫቆ ቃላይ ኣሳ ዎዚናን ጸፌቲዛ ጊሻስ ኢስታ ኣኬኪሲዛ ኣስታማሬ ኮሾንታ ኢስታ ናጋና። (31:31-34)።

### ሃ ማጻፋይ ኦይኪዲ ኩሚዳ ቆፋ

ጸሳን ኤርማሳ ዶሬቲላ 1:1-19

ዩሁዳ ቦላኔ ኢሰራኤሌ ቦላ ጸሲ ኤሃና ቂጻቲ 2:1—25:38

ዎርዶ ናቤታራ ኤርማሳ ኤቁቲላ 26—29

ጸሲ ባ ዴራ ዲኤቲዳሶፔ ዛራናይሳ 30—33

ዱማ ዱማ ኤርማሳ አሶታ 34—38  
 ዩሩሳላሜ ኩንዴላኔ ዩሁዳን ሜዴቲዳ ሃኖታ 39—42  
 ጊብዴ ቢታን ኤርማሳ 43—44  
 ባርኬስ ኪቴቲዳ ኪታ 45  
 ናቤዚ ዱማ ዱማ ዴሬታስ ዮቲዳ ቲንቢቴ 46—51  
 ዩሩሳላሜ ኩንዴላ ጊሻስ ዮቲቲዳ ዮኦታ 52

1 በኒያሜ ቢታን አናቶቴ ካታማን ዲዛ ቄሴታፔ ኢሳ ኪልቂያሳ  
 ና ኤርማሲ ዮቲዳ ቃላይ ሃይሳፌ ካሊዛይሳ።

2 አሞኔ ና ዩሁዳ ካዎ ኢዮሲያሲ ካዎቲዳ ታማኔ ሄዳንላ  
 ላይላን ጎዳ ቃላይ ኤርማሳኮ ዪዴስ።

3 ቃሴ ኢዮሲያሳ ና ዩሁዳ ካዎ ኢዮአቄሜይ ካዎቲዳ ላይላታን  
 ጎዳ ቃላይ ኤርማሳኮ ዪዴስ። ሄሳፌ ጉዬ ኢዮሲያሳ ና ሴዴቂያሲ  
 ካዎቲን ታማኔ ኢሲንላ ላይላን ሄ ዎዴ ኢቻሻንላ አጊናን  
 ዩሩሳላሜ አሳይ ዲኤቲዲ ባና ጋካናስ ጎዳ ቃላይ ኤርማሳ ባጋራ  
 ኢዛስ ዮቲቲዴስ።

### ኤርማሳ ዶሬቴሐ

4 ጎዳ ቃላይ ታኮ ሂዝጊሼ ዪዴስ።

5 «ኤርማሳ! ታኒ ኔና  
   ኔ አዬይ ኡሎን ሜዳናፔ  
     ካሴ ኤራይስ።  
   ኔኒ ዬሌታናፔ ሲንላን  
     ታ ኔና ዱማሳ ዎላዲስ።  
   ቃሴካ ካዎቲላታስ ናቤ  
     ጊዳና ማላ ሹማዲስ።»

6 ሂሰቲን ታኒ፥ «ኡባ ሃሪዛ ጎዳዉ! ታኒ ቡሮ ና ጊዲዳ ጊሻስ  
 አይ ጋ ሃሳያናኮ ታ ኤሪኬ» ጋዲስ።

7 ጊዶ አቲን ጎዳይ ታና፥ « (ታኒ ና) ጎፓ። ታኒ ኔና ከቲዛ አሳ  
 ኡባኮ ባ። ታኒ አዛዚይሳ ኡባካ ዮታ።

8 ታኒ ኔና አሻናስ ኔናራ ዲዛ ጊሻስ ኔ ኢስታስ ያዮፋ፤ ታኒ  
 ጎዳይ ሃይሳ ኔስ ዮታይስ» ጊዴስ።

9 ጎዳይ ባ ኩሼ ዬዲዲ ታ ሜቴርሻታ ቦቺዲ፥ «ሄኮ ኔ ዮታና  
 ታ ቃላ ኔ ዶናን ዎላዲስ።

10 ኔኒ ሾዳናሲኔ ላላናሰ፡ ጳይሳናሲኔ ሽራ ዩጋናሰ፡ ኬጻናሲኔ ቶካናሰ ዳሬታ ቦላኔ ካዎቴላታ ቦላ ታኒ ሃች ኔና ሹማዲሰ» ጌዴሰ።

11 ጎዳ ቃላይ ታኮ ዪዲ፡ «ኤርማሳ! ኔ ኣይ ቤኣይ?» ጌ ኦይቹዴሰ። ታኒካ፡ «ኦቾሎኔ ሃጋ ቤኣይሰ» ጋዲሰ።

12 ጎዳይ ታና፡ «ኔኒ ሊኬ ቤኣዳሳ። ታኒካ ታ ቃላይ ፖሌታናይሳ ቲሺ ሂሰታ ቤኣይሰ» ጌዴሰ።

13 ጎዳ ቃላይ ቃሴካ ታኮ ዪዲ፡ «ሃራይ ኣዚ ኔሰ ቤቴዜ?» ጌ ኦይቹዴሰ። ታኒካ ዛራዳ፡ «ኢሲ ፔንቴዛ ኦቶይ ፑዴሃ ባጋፌ ሃ ጌዲ ጌ ኡቴዳይሲ ቤቴሰ» ጋዲሰ።

14 ጎዳይ ታሰ፡ «ፑዴሃ ባጋፌ ባሺ ቆቂዲ ሃ ቢታን ዲዛ ኣሳ ኡባ ቦላ ጉካና።

15 ታኒ ፑዴሃ ባጋን ዲዛ ካዎቴላታ ሃ ያና ማላ ጸይጋና፤ ዩሩሳላሜኒኔ ኢዚ ዩቮን ዲዛ ዩሁዳ ካታማታ ቦላ ሜቶ ጋሊዲ ኢሰታ ኦይካና፤ ሂሳፌ ጉዬ ዩሩሳላሜ ጌሊዛ ፔንጌታ ቦላ ባንታ ኣራታ ማጫና።

16 «ዩሁዳ ኣሳይ ታና ኣጊዲ፡

ሃራ ኤቃ ጸሳታሰ

ኤጻኔ ጩዋሲዳ ጊሻሰ፡

ባ ኩሼን ኦሊ ኬሲዳይታ

ጎይኒዳ ጊሻሰ

ታ ዴራ ቦላ ፐርዳ ኣዋጃዲሰ።

17 «ኔኒ ጊዲኮ ጊጌታ! ዴንዳ ኤቃዳ ታኒ ኔና ኣዛዚዛይሳ ኡባ ኢሰታሰ ዮታ፤ ኢሰታሰ ያዮፋ። ኔኒ ኢሰታሰ ያዩኮ ታኒ ኔና ኢሰታ ሲንላን ጉጃ ያሺሳና።

18 «ሃች ታኒ ኔና ሃ ቢታ ኡባ ቦላ፡ ዩሁዳ ካዎታ ቦላ፡ ሃላቃታ ቦላ፡ ቄሴታ ቦላኔ ሃ ቢታ ኣሳ ቦላ ኔ ኤቂታ ዳንዳያና ማላ ጊምቤቲዳ ካታማ፡ ቢራታ ቱሲኔ ጸርቂማላፔ ኦሴቲዳ ቢራታ ዲርሳ ማላ ኦላዲሰ።

19 ኢሰቲ ኔናራ ኦሌታና፤ ጊዶ ኣቲን ታኒ ኣሻናሰ ኔናራ ኢሲፌ ዲዛ ጊሻሰ ኔና ጸኔቴና። ታኒ ጎዳይ ሃይሳ ኔሰ ዮታይሰ» ጌዴሰ።

## 2

ኢሰራኤሌ ኣሳይ ኦሊዳ ናጋራ

1 ጎዳ ቃላይ ዪዲ ታሰ፡

2 «ባ! ባዳ ዋሳ፤

ዩሩሳላሜ ኣሳ

ሃይላን ሲሳ፤  
 ጎዳይ፥ ሳኒ ናቴቴላን  
 ኣይ ኬና ኣማኔቲዳኮ፥  
 ቃሴ ኔኒ ቡሮ ሚሺራን ዳሼ  
 ታና ኣይ ኬና ሲቂዳኮ፥  
 ዜሬሊ ዜሬቶንታ  
 ባዞ ቢታን  
 ኔ ዋሰታ ካሊዳኮ  
 ታ ኣኬካይሰ።

3 ሄ ዋዴ ኢሰራኤሌይ  
 ጎዳሰ ጌሻ፥  
 ኮይሮ ሺሺዛ  
 ጼራ ካላ ማላ፤  
 ኢዞ ሚቲዳይቲ  
 ሞራንቻ ጊዲዳ፤  
 ኢሰታ ቦላ ባሺ ዪዴሰ፥ » ጌሰ።

4 ኢንቴኖ ያቆቤ ኬላ ኣሳቶ!  
 ኢሰራኤሌ ዛሬ ኡባቶ!  
 ጎዳ ቃላ ሰዪቴ!

5 ጎዳይ፥ «ካሴ ኢንቴ ኣዋቲ  
 ታፔ ሃኪዳይ፥  
 ሃዳ ዮኦ ካሊዳይ፥  
 ባ ሁኤሲካ  
 ጎኣይ ባይንዳይታ ጊዲዳይ  
 ታፔ ኣይ ሞሮ ዴሚዲ?»

6 ኢሰቲካ፥ ሓና ጊብጸፔ ኬሲዳይ፥  
 ባዞን ሳሚዳ ኦጌራ፥  
 ኩንዲኩርጮ ቢታራ፥  
 ማላኔ ቋማ ቢታራ፥  
 ኣሲ ኣጵንታሶራ  
 ኦና ካሌሊ ኤሂዳ  
 ጎዳይ ኣዋን ዲዜ?»  
 ጊ ኦይቺቤቴና።

7 ኢንቴ ኢዚ ኣይፌኔ  
 ኢዚ ኣንጆ ማና ማላ  
 ታኒ ኢንቴና ኣራዳ ቢታ ኤሃዲሰ፤  
 ጊዶ ኣቲን ኢንቴ ዪዲ  
 ታ ቢታ ቱኒሲዴታ፤

- ታ ጸንጾኖ  
 ሃራሴታና ማላ ኦሊዴታ።
- 8 ቄሴቲካ፥ ሳዳይ ኣዋን ዲዜ?፡  
 ጌ ኦይቺቤቴና፤  
 ታ ዎጋይ ኢስታ ኩሼን ዲዛ  
 ኣሳቲካ ታና ኤሪቤቴና።  
 ዴሬ ካሌሊዛይቲካ  
 ታ ቦላ ማካሊዳ።  
 ናቤቲ ባኣሌ ሱንፋን  
 ቲንቢቴ ዮቲዳ፤  
 ጎኦንታ ሚሻታካ  
 ካሊዳ» ጌዴስ።
- 9 ቃሴካ ጎዳይ፥  
 «ሄሳ ጊሻስ ታኒ  
 ኢንቴናራ ቡሮ ፒርዴታና፤  
 ኢንቴ ናይታ ናይታራካ ሞቴታና።
- 10 ከቲሜ ፒኒ ጸሊቴ፤  
 ቄዳሬ ከቲዲ  
 ሎኤሊ ጸሞሲቴ፤  
 ሂስቲዲ ኣኔ ሃይሳ ማላ ሃኖይ  
 ካሴ ሃኒ ኤሪዛኮ ቤኢቴ።
- 11 ኢስቲ ቱሙ ጸሳታ  
 ጌዶንታ ኣጊኮካ ባ ኤቃ ጸሳታ  
 ሳሚዳ ካዎቴሊ ዲዜ?  
 ታ ዴሬይ ጌዲኮ  
 ኢስታስ ቦንቾ ጌዲዳይሳ  
 ሳሚዴስ» ጌስ።
- 12 ቃሴካ ኡባፌ  
 ዎልቃማ ጎዳይ፥  
 «ሳሎቶ፥ ሃኖ ፖራ!» ጌቴ፤  
 ኬሂ ዳጋሚዲ ኮኮሪቴ!
- 13 ታ ዴሬይ ናሞኤ  
 ኢታ ሚሻታ ኦሊዴስ፤  
 ዴኦ ሃሳ ፑልቶ ጌዲዳ  
 ታና ኣጌዴስ፤  
 ሃላ ኦይካናስ ዳንዳዮንታ  
 ሉኬቲዳ ኦላታ ባስ ቦኪዳ።

- 14 ኢስራኤሌይ ካሬፔ ዪዳ አይሌ?  
ዎይኮ ሶን ዬሌቲዳ አይሌ?  
ሂስቲን አይሰ  
    ቦንቃሰ አጁ አሜቲዳ?
- 15 ጋሞቲ ኢዛ ቦላን ጸጊዳ፤  
    ኢስቲ ባንታ ቃላ ጽቁ ሂስቲዲ  
    ኢዛ ቦላ ጋርማማዳ፤  
    ኢስቲ ኢዛ ቢታ ቡላ ኬሲዳ፤  
    ኢዛ ካታማቲካ ጸጌቲዳኔ ካይዚዳ።
- 16 ቃሴካ ሜምፒሳኔ  
    ጸፊናሴ አሳቲ  
    ኔ ሁኤ ቡሉሲዳ።
- 17 ኦጌ ኔና ካሌላዛይሳ  
    ኅዳ ኔ ጸሳ አጋዳ  
    ሃይሳ ኔ ቦላ ኤሂዳይ  
    ኔና ጊዲኪ?
- 18 ሺሆሬ ሻፋፔ ሃል ኡያናሰ፥  
    አይ ኤካናሰ  
    ዱጌ ጊብጾ ዎዳዲ? \*  
    ዎይኮ ኤፊራጺሴ ሻፋፔ  
        ሃል ኡያናሰ  
    ዱጌ አሶሬ ቤል  
    አይሰ ኮሺዴ?
- 19 ኔ ኢታቲል ኔ ቦላ  
    ቂጸቲ ጋላና፤  
    ኔ ታና ካዶይሲ ኔ ቦላ  
        ሃንቆ ኤሃና።  
    ኅዳ ኔ ጸሳ ኔ አጊሺን፥  
    ታሰ ያሻቲል  
    ኔ ዉዱ ጎንታ ኢጺሺን  
    አይ ማላ ኢታይኔ  
        ጫሞ ሚሺ  
    ኔ ቦላ ጋካናኮ ቆፓ፤  
    አኔ አኬካ» ጌሰ።
- 20 ኡባ ሃሪዛ ጎዳይ፥  
    «ቤኒፔ ዶማዳ ታኒ

\* 2:18 ሺሆሬ ሻፋይ ናይሌ ሻፋሰ ጋባራ ሃላ።

- ኔ ቃምባራ ሜንላዲስ፤  
 ኔና ቃቺዳ  
 ሚሺካ ዱላዲስ።  
 ሂስቲንካ፥  
 «ታኒ ኔስ ኦሊኬ» ጋዳሳ።  
 ሂስታዳ ጶቃ ዙምቡላታ  
 ኣቻን ሚላ ጋርሳን  
 ላይማታናስ ኢቻዳሳ።
- 21 ታኒ ኔና ሙሩታ  
 ዜሬላፌ ኤካዳ፥  
 ሎኦ ዋይኔ ቱራ ማላ ቶካዲስ።  
 ሂስቲን ኔኒ ዋና ጉዬ ሲማዳ  
 ዋራን ሞኪዲ ሞሬቲዳ  
 ዋይኔ ቱራ ማላ ጊዳዲ?
- 22 ኔኒ ሃዲንጨን ሜጨቲኮካ፥  
 ዋይኮ ዳሮ ሳሙናን ሜጨቲኮካ  
 ኔ ሞሮ ቂታይ ሃኢካ  
 ታ ሲንላን ዴስ» ጌስ  
 ኡባ ሃሪዛ ጎዳይ።
- 23 ኔኒ ዋናዳ፥ «ታኒ ቱናቤኬ፤  
 ታኒ ባኣሌ ኤቃታስ  
 ጎይናናስ ዋጸቤኬ»  
 ጋናስ ዳንዳያይ?  
 ኔኒ ሾባን ኦሊዳይሳ  
 ኣኔ ቆፓ፤  
 ኔኒ ኦሊዳይሳ ኣኔ ኣኬካ፤  
 ኔኒ ያኔ ሃ ዋጸሬቲዛ  
 ጋሚላ ማላ ጊዳዳሳ።
- 24 ኔኒ ባዞ ቢታን ባስ ዶሴ  
 ሂስታዳ ዚታ ኬዛ  
 ሲንጌላሽ ዋጸዛ  
 ሃርዲዳ ማላ ጊዳዳሳ፤  
 ኢዛ ቢራሳስ ኬዛይቺኮ  
 ኦኔ ኢዞ ቲቃናስ ዳንዳይዛይ?  
 ኢዛ ቢራስ ኬዚን  
 ኢዞ ኮይዛይቲ ኡባቲ  
 ዋዮንታ ዳሜቲስ።
- 25 ኔ ቶሆይ ኣርጋጫና

ጋካናስ ወጾፋ፤  
ኔ ደናይ ሳሞን ሜላና  
ጋካናስ ቶይላቶፋ፤  
ኔ ጊዲኮ፡ «ጮ ዳቡሮፓ፤  
ታኒ ኤቃ ጸሳታ ዶሳዲስ፤  
ታኒ ኢስታ ካላና» ጋዳሳ።

- 26 «ካይሶይ ኦይኬቲዲ ዬላቲዛ ማላ  
ኢስራኤሌ አሳይ ዬላቲዴስ፤  
ኢስቲካ፡ ኢስታ ካዎቲ፡  
ኢስታ ሹሜቲ፡  
ኢስታ ቄሴቲኔ ኢስታ ናቤቲ  
ኡባይ ሄሳሶ ዬላታና።

- 27 ኢስቲ ሚሐ፡  
ሳኔ ታ አዋ) ጌቲስ፤  
ቃሴ ሹቶ፡  
ሳኔ ታና ዬላዳሳ) ጌቲስ።  
ኢስቲ ታስ ባ ሲንሐ  
ዛራናይሳ አጊዲ  
ዞኮ ዛሪዳ፤  
ጊዶ አቲን ኢስታ  
ሜቶይ ጋኪዳ ዎዴ፡  
ሪዳ ኦና አሻ) ጌቲስ።

- 28 ሂስቲን አኔ ኢንቴ ኢንቴስ  
ሜጲዳ ጸሳቲ አዋን ዲዞ?  
ዩሁዳ፡ ኢንቴ ሜቶቲዛ ዎዴ  
ኢስቲ ኢንቴና አሻናስ  
ዳንዳይኮ  
አኔ ኢንቴና ዪዲ አሼቶ!  
ኢንቴኖ ዩሁዳ አሳቶ!  
ኢንቴ ጸሳቲ ኢንቴ  
ካታማታ ማላ ጮራ» ጊዴስ።

- 29 ጎዳይ፡ «ኢንቴ ታናራ  
አይስ ሞቲቲቲ?  
ኢንቴ ኡባይካ  
ታ ቦላ ማካሊዴታ።

- 30 ታኒ ኢንቴ ናይታ

- ጮ መላ ቃጸያዲስ፤  
 ኢስቲ ጊዲኮ ባይቤቴና፤  
 ጋፊዳ ጋሞ ማላ  
 ኢንቴ ማሻይ  
 ኢንቴ ናቤታ ሚዴስ» ጌስ።
- 31 ኢንቴኖ ሃ ዋዴ ዩሌታቶ!  
 ጎዳ ቃላ ዩሺ ቆፒቴ፤  
 «ታኒ ኢንቴስ ኢስራኤል  
 አሳስ ባዞ ማላ  
 ዋይኮ ሳካና ቋማይ ዲዛ  
 ቢታ ማላ ጊዳዲና?  
 ሂስቲን አይስ ታ አሳይ፥  
 ሉኒ ኑ ሺኔ ማላ ሃናና፤  
 ሲሚዲካ ኔኮ ዮኮ ጊዜ?
- 32 ጌላኦይ ባ አሌቆ ዋይኮ  
 ሚሺራያ ባ ሚሺራቴላ  
 ማይኦ ባላ ኤራዜ?  
 ታ ዴሬይ ጊዲኮ  
 ታና ዳሮ ዋዴ  
 ጋካናስ ባሊዴስ።
- 33 ዚታን አስ ኦይካናስ  
 ኔ አይ ማላ ኤራንቻ?  
 ሁስኩ ሁስኪዛ  
 ኢታ ማጫሳቲካ  
 ኔ ሃኖቴላፌ ዳሮ  
 ኢታ ሚሽ ታማሬቴስ።
- 34 ኔ ኢስታ ካይሶቴላን ኦይኮንታ  
 ጸሎ ማንቆታ ሱላ  
 ኔ ማይኦ ቦላ ቤቲዴስ።  
 ኔኒ ሃይሳ ኡባ  
 ኦላ ዋላዳካ፥
- 35 ሉኒ ጸሎ፤ ቱማፔ ኢዛ ሃንቆይ  
 ታና ጋኬና ጋሳ።  
 ኔኒ፥ ሉኒ ናጋራ  
 ኦላቤኬ)  
 ጊዛ ጊሻስ  
 ታኒ ኔ ቦላ ፒርዳና።
- 36 ሂስቲን ኔ ኦጌ ላማ ላማ

አይሰ ዋጸይ?  
 ካሴ ኔና አሶሬ ቢታይ  
 ካወሺዳ ማላ  
 ገብጾ ቢታይ ኔና ካወሻና።  
 37 ኔኒ አማኔቲዛይታ  
 ጎዳይ ካወሺዳ  
 ገሻሲኔ  
 ኢስታፌካ ማዶ  
 ዴሞንታ ገሻሰ  
 ሃይሳፌካ ኔ ሁኤ ኩሼን  
 ባቃ አይካዳ ኬዛና።

### 3

አማኔቶንታ ኢጲዳ ኢሰራኤሌ

- 1 «ኢሲ አሲ ባ ኩፋዮ አንጂ ዬዲን  
 ኢዛ ባዳ ሃራ አዚና ጌሊኮ፤  
 ካሴ አንጂ ዬዲዳዴይ  
 ሲሚ ኢዚኮ ቢዜ?  
 ኢዚ ቢኮ ሄ ቢታያ  
 ሙሌ ቱኔኬ?  
 ኔኒ ገዲኮ ኔ ሲቁዛ  
 ጮራ ላጌታራ ላይማታዳሳ፤  
 ሂስታዳካ ሃኢ ኔኒ  
 ታኮ ሲማና ኮያይ?» ጌሰ።  
 2 «አኔ ቶቁ ጋዳ አይኮይ ባይንዳ  
 ዙሞቡላታ ጾላ፤  
 ኔኒ ላይማሰ ኢሻንታሶይ  
 ሂሳን ዲዜ?  
 ቦንቃና ባዘን ኡቲዳ  
 ፓንጋ ማላ  
 ኦጌ ዶናን ኡታዳ  
 ኔ ላጌሶታ ናጋዳሳ፤  
 ሂስታዳ ኔኒ ላይማቴላኒኔ  
 ኢታቴላን ቢታዮ ቱኒሳዳሳ።  
 3 ሄሳ ገሻሰ ፑሴይካ  
 ፑሶንታ ማላ ዲጌቲዴሰ፤  
 ባልጎ ኢራይካ ቡኮንታ ኣጌዴሰ፤

- ኔ ጊዲኮ ሃኖ ጋካናሰ  
 ላይማቴህ ኣጋቤካ፤  
 ኔኒ ዬላቶንታካ ኢጸዳሳ።
- 4 ሃኢ ኔኒ ታና፡  
 ናታ ኣዋው፡  
 ታሰ ናቴቴላ ላጌዞ!
- 5 ኔኒ ኡባቶ ታ ቦላ ሃንቄታኔ?  
 ኔ ሃንቆይ ሜርናሴ? ጋዳሳ።  
 ኤ ኔኒ ሂዘጋሳ፤  
 ጊዶ ኣቲን ኔኒ ዳንዳይዳ ኬና  
 ኢታ ሚሽ ኡባ  
 ኦላሳ» ጌሰ።

### ማርቲላሰ ኢሰራኤልኔ ዩሁዳ ጸይጌቴህ

- 6 ካዎ ኢዮሲያሲ ካዎቲዳ ላይህ ጎዳይ ታሰ፡ «ሃና ኣማኖይ ባይንዳ ኢሰራኤልይ ኦሲዳይሳ ኔኒ ቤኣዲ? ኢዛ ጶቃ ዙምቡላታ ቦላ ኬዛዳ ዳሻ ሚላታ ጋርሳን ላይማታዲሰ።
- 7 ኢዛ ሃይሳ ኡባ ኦላዳካ ታኮ ሲማና ጋዳ ቆፓዲሰ ሸን ሲማቤኩ። ቃሴ ኣማኔቶንታ ኢዚ ሚሹ ዩሁዳይካ ሄሳ ቤያዲሰ።
- 8 ኣማኖይ ባይንዳ ኢሰራኤል ዳሬቲ ላይማቲዳ ገሻሰ ኣንጆ ዋራቃታ ኢማ ዬዳዲሰ፤ ኢሰራኤል ሚሹ ኣማኔቶንታ ዩሁዳይካ ሃይሳ ቤኣሽ ያዮንታ ኬዛዳ ላይማቲሽን ቤኣዲሰ።
- 9 ባ ካዉሻቴላን ቢታ ቴኒሳዲሰ፤ ሚላራካ ሹቻራካ ላይማታዲሰ።
- 10 ሄሳን ኡባንካ ኢዚ ሚሹያ፡ ኣማኔቶንታ ዩሁዳይ ጮ ሲሚዳ ሚሳታዉሲፌ ኣቲን ኩሜላ ዋዚናፔ ታኮ ሲማቤኩ» ጊዳሰ።
- 11 ጎዳይ ታሰ፡ «ኣማኔቶንታ ዩሁዳፔ ኣማኖይ ባይንዳ ኢሰራኤልይ ጸላ ቤታዲሰ።
- 12 «ባ፤ ባዳ ፑደሃ ባጋሰ፡  
 ሳሃኔ ኣማኖይ ባይንዳ  
 ኢሰራኤል ሲማ!  
 ታኒ ማርታይ  
 ኩሚዳዴ ጊዲዳ ገሻሰ  
 ኔና ኢታ ኣይፌን ጸሊኬ፤  
 ሜርናሰካ ሃንቄቴኬ»  
 ጌሰ ጎዳይ።
- 13 ጊዲኮኔ ኔኒ፡

ሳዳ ኔ ጸሳ ቦላ  
 ማካላቴላን፤  
 ኔ ቦንቶካ አላጋ ጸሳታሰ  
 ዳሻ ሚላታ ጋርሳን  
 አላ አሞኒኔ  
 ታሰ አዛዜቶንታ አጽን ኔኒ  
 ሞራንቻ ገዲዳይሳ  
 ጸላ አማና  
 ጌሰ ጎዳይ» ገዴሰ።

- 14 ቃሴካ ጎዳይ፥ «አንቴኖ  
 አማኔቶንታ  
 አሳቶ፥ ሲሚቴ፤  
 ታኒ አንቴሰ አዚና፤  
 ታኒ አንቴ ገዴፌ  
 አሲ ካታማፔ አሳ፥  
 አሲ ቆሞፌ ናሞኣታ ዶራዳ  
 ጸዮኔ ኤሃና።

15 «ሄሳፌ ጉዬ ታኒ ታ ዋዚና ማላ አንቴና ኤራቴላኒኔ አኬካን ሄሚዛ ሄንላንቻታ አንቴሰ አማና።

16 ቃሴካ ጎዳይ አንቴ ቆዳይ ቢታ ቦላ ጮራቲዛ ዋዴ፥ ሳዳ ጫቆ ቃላ ታቦታ» ገ ዴይጌኬታ። አዚ አሰታሰ ቆፊቴናኔ አኬኬቴና፥ ቆዴናኔ ሃራይ ኦሴቴና።

17 ሄ ዋዴን አሰቲ ዩሩሳላሜ፥ ሳዳ አራታ» ገ ዴይጋና። ካዋቴላ ኡባፌ አሳይ ጎዳ ሱንሐ ቦንቻናሰ ዩሩሳላሜ ሺቃና። ሄሳፌ አሰቲ ባንታ አታ ዋዚና ሃኖቴላ ካሌቴና።

18 ሄ ጋላሳታን ዩሁዳ አሳቲ አሰራኤሌ አሳታራ ጋይቲዲ ፑዴሃ ባጋ ቢታፌ ታኒ ካሴ አንቴ አዋታሰ ጸንጾ ሂሰታ አሚዳ ቢታ አሲፌ ያና» ጌሰ።

ጸሳ ዴሬይ ኤቃ ሚሰሌታሰ ጎይኒዳ ጎይኖ

- 19 ጎዳይ፥ «ታኒ ኔና  
 አቱማ ናይታ ማላ  
 ዋሰታ ዋሳናኮ፥  
 ዶሬቲዳ ቢታዮኔ  
 አይ ካዋቴላካ ዴሞንታ  
 ሎኦ ቢታዮ  
 ኔና ላቲሳና ቆፓዲሰ።  
 ቃሴ ታና፥ «ታ አዋዉ!» ጋዳ  
 ዴይጋና ሚሳቲዴሰ፤

- ታና ካሊዛሶፔ  
 ጌዬ ሲሞንታ ሚሳታዳሳ፤
- 20 ጊደ ኣቲን ኢሰራኤል ኣሳዉ!  
 ኢንቴ ባ ኣዚናሰ  
 ኣማኔቶንታ ማጫሳ ማላ  
 ታሰ ኣማኔቲቤኬታ» ጌሰ።
- 21 ኢሰቲ ጎዳ ባንታ ጸሳ ባሊዲ  
 ባንታ ኦጌ ጌላሲዳ ጊሻሰ  
 ኢሰራኤል ዴራ ዋሶይ፥  
 ሚሻ ዬሆይ ኣይኮይ ባይንዳ  
 ዙሞቡላታ ቦላ ሲዬቴሰ፤
- 22 ኢሰቲ፥ «ኢንቴኖ ኣማኖይ ባይንዳ  
 ኣሳቶ! ታኮ ሲሚቴ።  
 ኢንቴ ኣማኔታና ማላ፥  
 ታኒ ኢንቴና ፓፋና» ጊዴሰ።
- ሂሰቲን ኢሰታሰ፥  
 «ኤሮ፥ ኦኒ ኔኮ ሲማና።  
 ኣይሰ ጊኮ ኔኒ ጎዳ  
 ኦ ጸሳ።
- 23 ኦኒ ዙሞቡላታ ቦላኔ  
 ዙማታ ቦላ ኤቃ ጸሳታሰ  
 ጎይኖይ ቱማፔ ኦሰ ባላ፤  
 ቱማፔ ኦሰ ኢሰራኤሌታሰ  
 ኣቶቴሊ ጎዳ ኦ ጸሳፌ።
- 24 ኦኒ ዬላጋቴላፌ ደሚን  
 ኦ ኣዋቲ ዳቡሪ  
 ዴሚዳ ኣይፌታ፥  
 ኢሰታ ደርሳታኔ ሜሄታ፥  
 ኢሰታ ማጫ ናይታኔ  
 ኣቱማ ናይታ  
 ቱና ጸሳቲ ሚ ሓይሲዳ።
- 25 ኦኒ ዬላጋቴላፌ ደሚዲ  
 ሃቕ ጋካናሰ፥  
 ኦኒካ ኦ ኣዋቲካ  
 ጎዳ ኦ ጸሳ ቦላ  
 ናጋራ ኦሊደሰ፤  
 ጎዳሰ ኦ ጸሳሰ  
 ኣዛዜቲቤኮ፤  
 ሄሳ ጊሻሰ ኣኔ ኦኒ ዬላቴላ

ጉሉንቲዲ ኢቾስ፤  
ቃሴ ካወሻቴሉ ኑና  
አፋላ ማላ ካሞ» ጌቴስ።

## 4

### ማሬታናስ ጸይስ

- <sup>1</sup> ጎዳይ፥ «ኢስራኤል አሳዉ!  
ሲሚኮ ሃ ታኮ ሲሚቴ።  
ኢንቴ ሃራሲዛ ሚሻታ  
ታ ሲንፋፌ ዲጊኮ፥  
ያዮንታ ሚኒ ኤቂኮ፥  
<sup>2</sup> ኢንቴ ቱማን፥  
ሱሬቴላኒኔ ጸሎቴላን፥  
«ዴኦ ጎዳይ ቤዪን!»  
ጊዲ ጫቂኮ፥  
ሄ ዎዴ ካዎቴላቲ  
ኢዛን አንጄታናኔ  
ቦንቹታና» ጌስ።  
<sup>3</sup> ጎዳይ ዩሁዳ አሳሲኔ  
ዩሩሳላሚን ዲዛይታስ፥  
«ኦላ ጋዴ ጎዴቴ፤  
አጉንላ ጊዶን ዜሮፒቴ።  
<sup>4</sup> ኢንቴኖ ዩሁዳ አሳቶ፥  
ዩሩሳላሚን ዲዛይቶ!  
ጎዳስ ኢንቴ ቃጸሬቴቴ፤  
ኢንቴ ዎዚና  
ኢታቴላ ዲጊቴ፤  
ሂሰቶንታ አጊኮ  
ኢንቴ ኦሊዳ  
ኢታቴላ ጊሻስ  
ታ ሃንቆይ ታማ ማላ  
ኤጺ ኬዛና፤  
ኦኒካ ኢዛ ቶይሳናስ  
ዳንዳዬና» ጌስ።

### ፑዴሃ ባጋፌ ያና ባሽ

- <sup>5</sup> ጎዳይ፥ « ሳቢታ ኡባን

ዛዬ ፑኒቴ! ›  
 ጊዲ ዩሁዳን ዮቲቴ።  
 ዩሩሳላሜንካ አዋጁቴ፤  
 ሐሲፌ ሸቂቴ!  
 እኔ ገምቤቲዳ ካታማታኮ  
 ባቃቶስ! › ጊ ዋሲቴ።

6 ጸዮኔ ጌላናሰ ባንዲራ ኦይኪቴ!  
 ኤሶን ባቃቲ አቲቴ፤  
 አይሰ ጊኮ ታኒ ፑዴሃ ባጋፌ  
 ሃንቆኔ ባሽ ኤሃና።

7 ጋሞይ ባ ዲዛሶፔ ኬዚዴሰ፤  
 ካዎቴላታ  
 ጳይሲዛይ ከቲቲዴሰ፤  
 ኔ ቢታዮካ ቡላሳናሰ  
 ባ ዲዛሶፔ ኬዚዴሰ፤  
 ኔ ካታማቲ ላሌታና፤  
 ኩንዲዲካ ካይዚ አታና።

8 ሄሳ ጊሻሰ ማቃ ማይኢቴ፤  
 ካዮቲሹ፥ «ወ! ወይ»  
 ጊ ዬኪቴ።  
 አይሰ ጊኮ ጎዳ ሃንቆ ሴላይ  
 ኑ ቦላፌ ሲሚቤና» ጌሰ።

9 ቃሴካ ጎዳይ፥  
 «ሄ ጋላሰ ካዎ ዎዚናይኔ  
 ሹሜታ ዎዚናይ ታሃና፤  
 ቄሴቲ ዳጋማና፤  
 ናቤቲካ ኮኮራና» ጌሰ።

10 ሂሰቲን ታኒ፥ «እቤት ኡባ ሃሪዛ ጎዳዉ! ማሻይ ኢሰታ  
 ቆጴን ዎጲን፥ ሐንቲሰ ሳኦይ ሳር ጊዳና) ጋዳ ሃ አሳኔ ዩሩሳላሜ  
 አይሰ ኬሃ ባሌላዲ?» ጋዲሰ።

11 ሄ ዎዴን ሃ አሳሲኔ ዩሩሳላሜሰ፥ «ባዘን ዲዛ አይኮይ  
 ባይንዳ ዙምቡላታፔ ጽጊዛ ጫርኮይ ታ ዴራ ቦላ ጫርካና፤  
 ጊዶ አቲን ሄሲ ካላ ሱራጋናሲኔ ጌሻናሰ ጊዴና።

12 ሄሳፌካ ኬሂ ዎልቃሚዛ ጫርኮይ ታ አዛዙን ጫርካና፤ ሃኢ  
 ታኒ ኢሰታ ቦላ ፒርዳና» ጌቲቲ ዮቴታና።

**ሞርኬን ዩሁዳ ዶዴቴሰ**

13 ቤኢቴ! ሞርኬይ ሻራ ማላ  
 ቢታ ኩሚዴሰ፤

- ኢዛ ፓራ-ጋሬቲካ  
 ጎቴ ጩርኮ ማላ ዩቴሰ፤  
 ኢዛ ፓራቲካ  
 ጎሌ ካፎታ ማላ ኤሶቴቴሰ፤  
 እዬ እና ኑ ጳያና ጎሰ!  
 14 ኔኖ ዩሩሳላሜ!  
 ኔ አታና ኮይኮ ኔ ዋዚና  
 ኢታቴላ ሜጩታ፤  
 ኢታ ቆፋይ ኔ ዋዚናን  
 እይዴ ጋካናሰ ጋሞእኔ?  
 15 ጩንጉርሲ ዳኔፔ ሴቴቴሰ፤  
 ኤፍሬሜ ዙማታ ቦላ  
 ባሺ አዋጃቴሰ።  
 16 «ካዎቴላታሰ ዮቴቴ፤  
 ዩሩሳላሜሰካ፤  
 ሩዲ ኡንኤሲ ዛይቲ  
 ሃሆ ቢታፌ ያና፤  
 ዩሁዳ ካታማታ  
 ቦላካ ጩቄታና፤  
 17 ኢዛ ታ ቦላ ማካሊዳ ጊሻሰ  
 ካል ናጊዛ እሳ ማላ  
 ኢሰቲ ዩሁዳ ጊዶላና ጊቴ።  
 18 ኔ ሃኖይኔ ኔ ኦሶይ  
 ሄሳ ኔ ቦላ ኤሂዴሰ፤  
 ሄሲ ኔሰ ቂጻቴ፤  
 ሄሲካ እይ ማላ ጫሚዛዜ!  
 እይ ማላ ዋዚና ሜንሳዛዜ!»  
 ጌሰ ጎዳይ።  
 19 ዋኖ ታኒ!  
 ታኒ ሃይሳ ዋሰታ ዳንዳያኔ!  
 ታና ሜቲዴሰ!  
 ታ ዋዚናይ ሂርጌሰ፤  
 ታኒ ጮኡ ጋናሰ ዳንዳይኬ።  
 እይሰ ጊኮ ታኒ ዛዬ  
 ጩንጉርሲኔ  
 ኦላ ጩንጉርሰ ሲያዲሰ።  
 20 ኢታ ሚሺ ኢታ ሚሺ ካሌሰ፤

- ሙሉ ቢታይ ሞሬቲዳስ፤  
 ታ ዲንካኔቲኔ ማጋላሻቲ  
 ኤስን ጳይዳ።
- 21 ታኒ ኣይዴ ጋካናስ  
 ኦላ ማላታ ጸላኔ?  
 ታ ኣይዴ ጋካናስ  
 ዛዬ ጊሪስ ሲያኔ?
- 22 ጎዳይ፥ «ታ ኣሳይ ኤያ፤  
 ኢስቲ ታና ኤሬቴና።  
 ኢስቲ ዩሺ ቆፖንታይታ፤  
 ኢስቲ ኣኬካይ ባይንዳይታ፤  
 ኢስቲ ኢታ ሚሽ  
 ኦላናስ ኤራንቻታ፤  
 ሎኦ ኦላናስ  
 ኤራይ ፓጪዳይታ» ጌስ።
- 23 ታኒ ሳኣ ጸላዳ ሳኣይ  
 ሎኢ ገጎንታይሳኔ  
 ጮ ሜላ ዲዛይሳ ቤኣዲስ።  
 ቃሴ ሳሎታ ጸላዳ ኢስታን  
 ፖኦይ ባይንዳይሳ ቤኣዲስ።
- 24 ታኒ ዙማታ ጸላዳ  
 ኢስቲ ኮኮሪሺኒኔ  
 ዙምቡላቲ ኡባይ  
 ዮንኢዮንኢሺን ቤኣዲስ።
- 25 ታኒ ጸላዲስ ሺን  
 ኣይ ኣሲካ ቤኣቤኬ፤  
 ሳሎ ካፎቲካ ኡባይ  
 ፒራዲዲ ጳይዳ።
- 26 ኣራዳ ቢታይ  
 ባዞ ጊዲዳይሳ ቤኣዲስ፤  
 ጎዳ ሲንሳን፥  
 ኢዛ ሱሌ ሃንቆ ሲንሳን  
 ሄ ካታማቲካ ላሌቲዳ።
- 27 ጎዳይ፥ «ሙሉ ቢታይ ቡላታና፤  
 ጊዶ ኣቲን ታኒ ኢዞ  
 ሙሉራ ጳይሲኬ።

- 28 ሄሳ ገሻሰ ሳኦይ ዩካና፤  
 ሳሎይካ ጹማና።  
 ኦይሰ ገሐ ታኒ ጋዲሰ፤  
 ሄ ቆፋ ታ ላሞንታ ማላ  
 ቃቻዲሰ» ጌሰ።
- 29 ፓራ አሳታኔ ዋንዳፌ  
 አሳታ ካቻ ጋሶን  
 አሳይ ካታማ ኡባፌ ባቃታና።  
 ባጋይ ዋጺዲ ዋራ ጋርሰ ጌላና፤  
 ባጋይ ቃሴ  
 ዛላ ቦላ ኬዛና፤  
 ካታማይ ኡባይ አሲ ባይንዳ  
 ካይዚ አታና።
- 30 ሃኔ ባሻሰ ኡቲዳሬ!  
 ኔኒ አይ አሳይ?  
 ኔ ዘኦ ማይኦ አይሰ ማይአይ?  
 ዋርቃ አሌቆካ አይሰ አሳይ?  
 ኔ አይፌ ጨር አይሰ ቲያይ?  
 ኔኒ ጮ ሜላ  
 ኔና ሎኤላሳ፤  
 ኔ ላጌሶቲ ኔና ካዲዳ፤  
 ኢሰቲ ኔና ዋቆናሰ ኮዬቴሰ።
- 31 ታኒ ኮይሮ ባይራ ና ዩላናሰ  
 ሚጸቲዛ ማጫሳ ማላ  
 ኔ ዋሲሺን ታ ሲያዲሰ፤  
 ዩሩሳላሚ ማጫ ናያ  
 ፔኖይ ቱጩታናሺ  
 ጋካናሰ ዋሲሺኒኔ  
 ባ ኩሺ ሚጫዳ፤  
 «ታ ዋኖ! ሄኮ ታና  
 ዋቆና ጌቴሰ!»  
 ገሺን ሲያዲሰ።

## 5

### ዩሩሳላሚ አሳ ናጋራ

- <sup>1</sup> ጎዳይ፥ «አኔ ዩሩሳላሚ ኦጌታ ቦላ ኬዚዲ  
 ፑዴኔ ዱጌ ዩሺ  
 ጼሊቴኔ አኬኪቴ፤

ዴሬይ ዱላቲዛሶታን  
 ዲሎቴል ኮይዛይኔ  
 ሱሬ ፒርዲዛ ኬዚዲ  
 ኢንቴ ኢሳዴካ ዴሚኮ  
 ታኒ ዩሩሳላሜ ማራና።

- 2 ጊዶ አቲን ኢሰታስ፥  
 ሳዳይ ቤዪን፣ ጊ ጫቂኮካ  
 ኢሰቲ ቱማፔ  
 ዋርዶ ጫቂቴሰ» ጌሰ።

- 3 አቤት ጎዳዉ!  
 ኔ አይፊቲ ቱማ ዴሌቴኔ?  
 ኔኒ ኢሰታ ሾጫዳሳ ሺን  
 ኢሰታ ሳኪቤና።  
 ኔኒ ኢሰታ ከንቹሬላዳሳ፤  
 ጊዶ አቲን  
 ኢሰቲ ሲሚቤቴና፤  
 ኢሰቲ ባንታ ዋዚና  
 ሹቻፌ አሊ ሚንሊዳ፤  
 ባንታ ናጋራፔካ  
 ሲሞንታ ኢዲዳ።  
 4 ሄሳፌ ጉዬ ታኒ ታ ዋዚናን፥  
 «ሃይቲ ማንቆታኔ ኤያታ፤  
 ሄይቲ ጎዳ ኦጌኔ  
 ባንታ ጸሳ ዋጋ ኤሮንታይታ።

- 5 ሄሳ ጊሻሰ ታኒ  
 ጌታ አሳታኮ ባና፤  
 ኢሰታሰካ ዮታና፤  
 ጋሶይካ ጎዳ ኦጌኔ  
 ባንታ ጸሳ ዋጋ ኤሬቴሰ»  
 ጋዳ ቆፓዲሰ።  
 ጊዶ አቲን ኢሰቲ ኡባይካ  
 ኢሲፌ ኢዛ ቃሞባራ ሚንሊዳ፤  
 ቃሾዛካ ዱሊዳ።

- 6 ሄሳ ጊሻሰ ጋሞይ  
 ዋራፔ ኬዚዲ  
 ኢሰታ ሚንሊሬላና፤  
 ኢሰታ ፑዜሬላና፤  
 ማሄይ ኢሰታ ካታማታ ዩሾ

ዛማዲ ናጋና።  
 ሄ ካታማታፔ ኬዚዛ ኡባ  
 ኢዚ ፑዛና።  
 ጋሶይካ ኢሰታ  
 ማካላቴሰኔ  
 ካዶይ ዳሪዴሰ።

- 7 ጎዳይ፥ «ታኒ ኢንቴ ናጋራ  
 ኢይሰ አቶ ጎ?  
 ኢንቴ ናይቲ ታና ኣጊዳ፤  
 ኤቃ ጸሳታንካ ጫቂዳ፤  
 ታኒ ኢሰታ ካልሳ ሚዛዲሰ፤  
 ኢሰቲ ጊዲኮ ላይማቲዳኔ  
 ላይማ ኬል ቢዳ።

- 8 ኢሰቲ ሓኬቲዳ  
 ኮርማ ፓራ ማላ ጊዲዳ፤  
 ኢሰቲ ኢሶይ ኢሶይ  
 አሳ ማቾ  
 ላጌላናሰ ካሊዳ።

- 9 ቱሙፔ ታኒ ሃ ዮኦታ ጊሻሰ  
 ኢሰታ ቃጸያናሰ ቤሴኔ?  
 ታኒ ታ ሁኤራ  
 ሄሳ ማላ ካዎቴላ ቦላ  
 ሃሎ ኬሳና ቤሴኔ?» ጌሰ።

- 10-11 ቃሴካ ጎዳይ፥  
 «ዎይኔ ቱራ ጊዶ ቢዲ  
 ኢዛ ሞሪቴ፤  
 ጊዶ አቲን ሙሌራ ሓይሶፍቴ።  
 ኢሰቲ ጎዳሰ ጊዶንታ ጊሻሰ  
 ኢዚ ሃጋታ ታርሺ ታርሺ ዩጌቴ፤  
 ኢሰራኤሌ አሳይኔ  
 ዩሁዳ አሳይ ሙሌራ  
 ታና ካዲዳ» ጌሰ።

- 12 ኢሰቲ ጎዳ ቦላ ዋርዶ ሃሳይዳ፤  
 «ኢዚ ኡና አይኮካ ኦፊና፤  
 ኢታ ሚሺካ  
 ኑ ቦላ ጋኬና፤  
 ኦላኔ ኮሻ  
 ኑኒ ሙሌካ ቤኦኮ።

- 13 ናቤቲ ጫርኮ ማላ ኣቲን  
ኢስታ ጊዶን ቃላይ ዴና፤  
ኢስቲ ጊዛዚ ኡባይ  
ኢስታ ቦላ ጋኮ» ጌቴሰ።
- 14 ሄሳ ጊሻሰ ጎዳይ  
ኡባፌ ዋልቃማ ጸሳይ፥  
«ኢስቲ ሃ ቃላ ሃሳይዳ ጊሻሰ  
ታኒ ታ ቃላ  
ኔ ዶናን ታማ ኬሳና።  
ሃ ኣሳካ ሚል ኬሳና፤  
ታማይካ ኢስታ  
ሚ ጳይሳና» ጌሰ።
- 15 ጎዳይ ኢንቴና፥  
«ኢንቴኖ ኢሰራኤል ኣሳቶ!  
ታኒ ኢንቴ ቦላ ሃሆ ቢታፌ  
ኢሲ ካዋቴል ኤሃና።  
ኢዚ ዋልቃማኔ  
ቤኒሶፌ ዲዛ ካዋቴል።  
ኢዛ ቃላይ ኢንቴሰ ኤሬቴና፤  
ኢዛ ሃሳያይ ኢንቴሰ ጌሌና።
- 16 ኢስታ ማሻ ኮሆይ ዶያ ዲዛ  
ዲፎ ማላ፤  
ኢስቲ ኡባይካ ዋልቃማ  
ኦላንቻታ።
- 17 ኢስቲ ኢንቴ ካፋኔ  
ቁማ ፒቲ ማና።  
ኢንቴ ኣቲማ ናይታኔ  
ማጫ ናይታ ዋቆና።  
ኢንቴ ዶርሳኔ ሚዛ  
ቦንቂዲ ማና።  
ኢንቴ ዋይኔ ቴራኔ  
ባላሴ ቴራ  
ቦንቂዲ ማና።  
ኢንቴ ኣማኔቲዛ ጊምቤቲዳ  
ካታማታካ ኢስቲ ባንታ  
ማሻን ጳይሳና» ጌሰ።
- 18 ጎዳይ ኤርማሳ፥ «ጊዶ ኣቲን  
ሄ ጋላሳታን

- ታኒ ኢንቴና ሙሌራ ጳይሲኬ።  
 19 አሳይ ኔና፥ ሱ ጎዳ ኑ ጸሳይ  
     ኑ ቦላ ሃይሳ ኡባ  
     ኣይሰ ኦሊዴ? ›  
         ጊዲ ኣይቺዛ ዋዴ  
         ኔኒ ኢሰታሰ፥ ሱንቴ ታና ጎዳ  
         ኣጊዲ ኢንቴ ቢታን  
         ኣላጋ ጸሳታሰ ኦሊዴ ማላ፥  
         ኢንቴካ ኣሳ ቢታን ኣላጋታሰ  
         ሄሳሉ ኦላና ጋ» ጊዴሰ።  
 20 ቃሴካ ጎዳይ፥  
     «ሃይሳ ያቆቤሶ ኣሳታሰ ዮታ፤  
     ዩሁዳ ቢታንካ ሂዘጋ ኣዋጃ፤  
 21 ኢንቴኖ ኣይፌይ ዲሺን  
     ዴሞንታይቶ!  
     ሃይሊ ዲሺን ሲዮንታይቶ!  
     ኤያኔ ዩሺ ቆፖንታይቶ!  
     ሃይሳ ሲዩቴ!  
 22 ኢንቴ ታሰ ያያናሰ ቤሴኔ?  
     ኢንቴ ታ ሲንፋን  
     ኮኮራናሰ ቤሴኔ?  
     ኣይሰ ጊኮ ኢዚ ሜርናሰ  
         ካንሊ ቦንታ ማላ፥  
     ታኒ ኣንጮ ኣባሰ ዛዋ ኦላዲሰ።  
     ዳሞባላይ ቡላኬቲኮካ  
         ዛዋፔ ኣጴና፤  
     ኢዚ ጉሚኮካ  
     ፒናናሰ ዳንዳዬና።  
 23 ጊዴ ኣቲን ሃ ዴራሰ ሙሜኔ  
     ማካላ ዋዚናይ ዴሰ፤  
     ኢሰቲ ኦጌ ኣጊ ዋራ ቢዳ።  
 24 ኢሰቲ ባንታ ዋዚናን፥  
     ሱሰ ሲላ ኢራኔ ጋባ ኢራ  
         ዋዴን ዋዴን ቡኪሲዛ፥  
         ካላ ሺሾ ዋዴ  
         ኑሰ ዋዴራ ኤሂዛ ጎዳ  
         ኑ ጸሳሰ

- እኔ ያዮስን ገቢቴና።
- 25 ሐሲንቴ ኢታ ኦሶይ  
 ሃይታ ኢንቴና ዲጊዴስ።  
 ኢንቴ ናጋራይ ኢንቴና  
 ሎኦ ሚሻፌ  
 ኢሺዴስን ጋ» ጌስ።
- 26 ጎዳይ፥ «ታ ኣሳ ጊዶን  
 ኢታ ኣሳቲ ዴቴስ።  
 ካፎታ ኦይካናስ  
 ናጊዛ ኣሳ ማላ  
 ኢስቲ ዋጺማዴ ዋሊዲ  
 ኣሳ ኦይካናስ ናጌቴስ።
- 27 ካፎ ኬላን ካፎይ ኩሚዳ ማላ  
 ኢስታ ኬላን  
 ባሌላይ ኩሚዴስ።  
 ሄሳ ገሻስ ኢስቲ  
 ዱሬኔ ዋልቃማ ጊዲዳ።
- 28 ኢስቲ ኦርዲዳኔ ሞጲዳ፤  
 ኢስታ ኢታቴላስ ዛዋይ ዴና።  
 ዪኦቲ ሱሬ ፒርዳ ዴማና ማላ  
 ኢስታስ ኤቂቤቴና፤  
 ማንቆታ ማታ ገሻሲካ  
 ሞቴቴቴና።
- 29 ሂስቲን ታኒ ሃይታ  
 ሃ ዮታ ገሻስ፥  
 ኢስታ ቃጸያናስ ቤሴኔ?  
 ሄሳ ማላ ካዋቴላ ቦላ  
 ታ ሃሎ ኬሳናስ  
 ቤሴኔ?» ጌስ።
- 30 ቃሴካ ጎዳይ፥  
 «ዳሮ ባቢሲዛ ሚሺኔ  
 ዳጋንሊዛ ሚሺ  
 ቢታ ቦላን ሃኒዴስ።
- 31 ናቤቲ ዋርዶ ቲንቢቴ ዮቴቴስ፤  
 ቄሴቲካ ኢስታ ዞሬን ኣይሴቴስ።  
 ታ ኣሳይካ ሄሳ ማላ  
 ሚሽ ዶሴስ!  
 ሂስቲን ዉርሴላን

አንቴ አይ ኦላኔ?» ጌሰ።

## 6

ዬሩሳሌም ሞርኬታን ደዴቴል

<sup>1</sup> ጎዳይ፥ «አንቴኖ ቢኒያሜ ዛሬቶ!

ፑዴሃ ባጋፌ አታ ሚሺኔ

ባሺ ያና ጊዛ ጊሻሰ

አንቴ ሸምፖ

አሻናሰ ባቃቲቴ!

ዬሩሳሌም ኬዚቴ!

ቴቁሄ ካታማን ዛዬ ፑኒቴ!

ቤቴ-ሃካሪሜን ማላታ ቤሲቴ!

<sup>2</sup> ታኒ ማላ ሎኦኔ

ኡፋይሲዛ ጸዮኔ

ናዮ ጳይሳና።

<sup>3</sup> ሄንላንቻቲ

ባንታ ዉዴ ኤኪዲ

ኢዚ ቦላ ያና፤

ሂሰቲዲ ኢዚ ዩሾን

ባንታ ዲንካኔ ቶካና፤

ባንታ ዉዴ ባንታ

ሶሆን ሶሆን ሄማና።

<sup>4</sup> ኢሰቲ ኢሶይ ኢሳ፥ «ዬሩሳሌም

ኦሌታናሰ ጊጌቲቴ! ዴንዲቴ!

አኔ ኦኒ ኢዞ ሴታ ጋላሰ ኦሎሰ።

ጊዶ አቲን አዬ አና!

ሳአይ ቃሜሰ፤

ኦማርሳ ኩዋይ

አዲቂ አዲቂ ቤሰ።

<sup>5</sup> ሄሳ ጊሻሰ ዴንዲቴ!

አኔ ኦማርሰ ኦሎሰ፤

ሂሰቲዲ ኢዚ ሚጸካ

አኔ ላሎሰ

ጊዲ ማቄቲዳ» ጌሰ።

<sup>6</sup> ኡባፌ ዋልቃማ ጎዳይ፥

«ሚላታ ቃንጸቴ።

ዬሩሳሌም ገምቤ ላንቄን

ቢታ ዶሪቴ፤

- ሃ ካታማይን ቆሆይ  
 ኩሚዳ ገሻሰ  
 ኢዚሰ ቂጻቴይ ቤሴሰ።  
 7 ኦላፌ ሃሉ ፑልቲዛ ማላ ኢዛካ  
 ባ ኢታቴላ ፑልቲሳዉሰ፤  
 ማካላ ሚሺኔ  
 ባሻ ሚሺ  
 ኢዚ ጊዶን ሴቴቴሰ፤  
 ኡባ ዎዴ ኢዚ ሳኮይኔ  
 ማዴንሉ ታሰ ቤቴሰ።  
 8 ሃኔ ዩሩሳላሜ ናጌታ፤  
 ኔ ኣካይ ጊኮ  
 ታ ኔፔ ሻኬታና፤  
 ቃሴ ኔ ቢታካ  
 ቡላሳና» ጌሰ።  
 ኢሰራኤል ኣሳ ማካላቴል  
 9 ኡባፌ ዎልቃማ ጎዳይ፥  
 «ዎይኔ ቴራ ኢሲኖካ  
 ኣሾንታ ማጺዛ ማላ  
 ኢሰራኤል ኣሳፔ  
 ኣቲዳይታ ሂሳልካ  
 ማጺ ሺሺቴ።  
 ዎይኔ ቴራ ማጺዛ ኣሳ ማላ  
 ኢንቴ ኩሺ ሃጋታ ጊዶ  
 ናሞኣንልካ ዩዲቴ» ጌሰ።  
 10 ታኒ ኦናሰ ዮቶ?  
 ኦና ሴሮ?  
 ኦኒ ታ ጊዛዝ ሲያኔ?  
 ሄኮ ኢሰታ ሃይሉ  
 ቱሌ ጊዲዳ ገሻሰ  
 ኢሰቲ ሲዬቴና፤  
 ጎዳ ቃላይ  
 ኢሰታሰ ቂዴሰ ኬዚዴሰ፤  
 ኢሰቲ ኢዛን ኡፋዬቴቴና።  
 11 ሄሳ ገሻሰ ጎዳ ሃንቆይ  
 ታናን ኩሚ ኡቴዴሰ፤  
 ታኒ ሃ ሃንቆዛ  
 ታ ኡሎን ኦይካና ዳንዳይኬ።

- ሂሰቲን ጎዳይ ታና፥  
 «ታ ሃንቆዛ ኦጌን ዲዛ  
 ጉላ ናይታ ቦላኔ  
 ሺቂዳ ዬላጋ ናይታ ቦላ ጉሳ፤  
 ማቻኔ ኣዚናይ፥  
 ጨሚዳ ኣሳቲካ  
 ከሲ ኤኪ ኣቲቴና።
- 12 ታኒ ሄ ቢታን ዲዛይታ ቦላ  
 ታ ኩሼ ዬዲዛ ዎዴ  
 ኢሰታ ከፋቲ፥ ኢሰታ ጋዴቲኔ  
 ኢሰታ ማቹቲካ ኣቶንታ  
 ኡባይ ሃራታሰ ጊዳና» ጌሰ።
- 13 ቃሴካ ጎዳይ፥  
 «ጉላይካ ጌታይካ  
 ኡባይ ባ ጎኣሰ ዪቁቴሰ።  
 ናቤቲኔ ቁሴቲ ኡባይ  
 ኣሰ ባሌፍቴሰ።
- 14 ኢሰቲ ታ ዴራ ማዲንላ  
 ቄሪ ሚሻ ማላ ዴሊዳ፤  
 ፓጻና ማላ ኮሺዛ  
 ኦሶ ኦሊቤቴና፤  
 ሳሮይ ባይንዳ፥  
 «ሳሮ፤ ሳሮ» ጌቴሰ።
- 15 ሃ ሃራሲዛ ኦሶዛ ጌሻሰ  
 ኢሰቲ ዬላቲዶ?  
 ኣካይ ሙሌካ ዬላቲቤቴና፤  
 ኢሰቲ ዬላይ ኣዛኮ ኤሬቴና።  
 ሄሳ ጌሻሰ ኢሰቲ ኩንዲዛይታራ  
 ኢሲፌ ኩንዳና፤  
 ታኒ ኢሰታ ቃጻዪዛ ዎዴ  
 ኢሰቲ ካዉያና» ጌሰ።
- 16 ጎዳይ፥ «ዳጋላ ኦጌ ቦላ  
 ኤቂ ዴሊቲ፤  
 ቤኒ ኦጌዮ ኦይቹቲ፤  
 ሎኦ ኦጌይ ኣዋሪ? ኢዚራ ቢቴ፤  
 ኢንቴ ኢንቴ ሺምፖሰ  
 ሺምፖ ዴማና፤

- አንቲ ጊዲኮ፥  
 «ኮ ኢዚራ ቦኮ!» ጊዴታ።  
 17 ታ አንቲና ናጊዛይታ ዋዳዲሰ፤  
 «ዛዬይ ፑኔቲሺን ሲዪቱ» ጋዲሰ፤  
 አንቲ ጊዲኮ፥  
 «ኮኒ ሲዮኮ» ጊዴታ።  
 18 ሄሳ ጊሻሰ ካዎቴዋቶ፥ ሲዪቱ!  
 አንቲኖ ማርካቶ!  
 ኢሰታ ቦላ ኣዚ  
 ጋካናኮ ኣኬኪቱ።  
 19 ቢታዬ ሲያ!  
 ኢሰቲ ታ ቃላ  
 ሲዮንታ ኢዲዳ ጊሻሲኔ  
 ታ ዋጋካ ካዲዳ ጊሻሰ  
 ታኒ ዴራ ቦላ  
 ኢሰታ ኢታ ቆፋ ማላ ባሽ ኤሃና።  
 20 ኤጸኔይ ሳባ ቢታፌ  
 ሳዊዛ ቁማማይ  
 ሃኮ ቢታፌ ዪኮ  
 ታና ኣይ ጋኔ?  
 ጸጌቲዛ አንቲ ያርሾዛካ  
 ታ ኤኪኬ፤  
 አንቲ ሺሺዛ ሃራ ያርሾይካ  
 ታና ኡፋይሴና» ጌሰ።  
 21 ሄሳ ጊሻሰ ጎዳይ፥  
 «ታኒ ሃ ዴራ ሲንፋን  
 ቋጲዛ ሚሽ ዋፋና፤  
 ኣዋቲኔ ኣቲማ ናይቲ  
 ኢዛን ቋጴታና፤  
 ሾሮቲኔ ላጌቲ  
 ቋያና» ጌሰ።  
 ፑዴሃ ባጋፌ ዋራጂዛ ኦላንቻታ  
 22 ቃሴካ ጎዳይ፥  
 «ሄኮ ፑዴሃ ባጋፌ  
 ኦላንቻቲ ዬቲሰ፤

- ጌታ ካዎቴሉ ሳኦ ጋጽፔ  
 ዴንሳ ቦላ ዴሰ።  
 23 ኢሰቲ ዋንዳፌኔ ቶራ ኦይኪዳ።  
 ኢሰቲ ሜንጾ ኢታታኔ  
 ቃጂታይ ባይንዳይታ፤  
 ኢሰቲ ባንታ ፓራታ ቶጊዛ ዋዴ  
 ኣባይ ጉሚዛ ማላ  
 ጉሚቴሰ።  
 ኢንቴኖ ጺዮኔ ማጫ ናይቶ!  
 ኢሰቲ ጊጌቲዲ ኢንቴና  
 ኦላናሰ ዩቴሰ» ጌሰ።
- 24 ኦኒ ሄ ዮኦ ሲዪን  
 ኑ ቄሴይ  
 ከምኢሊሽ ጊዴሰ።  
 ማጫሰ ሚጻይ ኦይኪዳ ማላ  
 ኑና ጩጩይ ኦይኪዴሰ።
- 25 ሞርኬይ ማሻ ጊዲዴሰ፤  
 ኡባሶን ሸርይ ኩሚዴሰ፤  
 ሄሳ ጊሻሰ ካሬ ኬዘፒቴ፤  
 ኦጌንካ ሄሜቶፍቴ።
- 26 ታ ዴሬቶ ማቃ ማይኢቴ፤  
 ቢዲንሳ ቦላ ቡሉሌቲቴ፤  
 ሜጺ ኢሲ ናይ ሃይቂዳ ኣሳ ማላ  
 ጫሞ ዩሆ ዩኪቴ፤  
 ጋሶይካ ኑ ቆፖንታ ዲሺን  
 ጳይሲዛይ ኑ ቦላ ያና።
- 27 ጎዳይ ኤርማሳ፥ «ኤርማሳ!  
 ቢራታ ፓጪዛዴ ማላ  
 ኦኒ ታ ዴሬዛ ኦጌኔ  
 ኢሰታ ሄሜታ ፓጫና ማላ  
 ታ ኔና ዋላዲሰ፤
- 28 ኢሰቲ ኡባይ ዚጊርሼ ዩዩዛይታኔ  
 ዮቴን ኤኮንታ  
 ማካላንቻታ፤  
 ኢሰቲ ጳርቂማላ ማላኔ  
 ቢራታ ማላ፤  
 ኢሰቲ ኡባይካ ሞሮ ኦሊዛይታ።

- 29 ቢራታ ሴሪሳናስ ዋምፒና  
 ሎኤላ ፑና፤  
 ጊዶ አቲን ኢታቲ ሙሌራ  
 ፒቴቲ ኬዞንታ ጊሻስ  
 ሄሲ ጮ ሃዳ ዳቡራ።
- 30 ጎዳይ ኢስታ ካዲዳ ጊሻስ  
 ኢስቲ ካዴቲዳ ቢራ  
 ጌቴቲ ዴይጌታና» ጌስ።

## 7

### ኤርማሲ ጸሳ ኬላን ታማርሲዳ ቲሚርቴ

- 1 ጎዳፔ ኤርማሳስ ዪዳ ቃላይ ሃይሳፌ ካሊ ዲዛይሳ፤
- 2 «ኔኒ ጎዳ ጸሳ ኬላ ፔንጌን ኤቃ፤ ሂስታዳ ሃ ቃላ፡ «ኢንቴኖ ጎዳስ ጎይናናስ ሃ ፔንጌታራ ጌሊዛ ዩሁዳ አሳቶ፡ ኡባይካ ጎዳ ቃላ ሲዪቴ!» ጋ አዋጅ።
- 3 ኡባፌ ዋልቃማ ጎዳ ኢስራኤሌ ጸሳይ፡ «ኢንቴ ኦጌ ኢንቴ ኦሶ ሎኤሊቴ፤ ኢንቴ ሂስቲኮ ታ ኢንቴና ሃይሳን ዳና ማላ ኦላና» ጌስ።
- 4 ጨዋ ቃላን፡ «ሃይሲ ጎዳ ጸሳ ኬላ! ሃይሲ ጎዳ ጸሳ ኬላ! ሃይሲ ጎዳ ጸሳ ኬላ!» ጊዲ አማኔቶፍቴ።
- 5 ኢንቴ ኢንቴ ኦጌ ኢንቴ ኦሶ ሎኤሊኮ፡ ኢንቴ ጊዶን ሱሬቴሊ ዲኮ።
- 6 ቤቴ ዪዳ አሳታኔ ዪኦታ፡ አምኤታ ኢንቴ ቆሆንታ ኦጊኮ፡ ሃይሳ ሃ ቢታ ቦላ ደሎ ሱላ ጉሶንታ ኦጊኮ፡ ኢንቴና ቆሂዛ ኤቃ ጸሳታ ኢንቴ ካሎንታ ኦጊኮ።
- 7 ታኒ ኢንቴ አዋታሰ ሜርናስ ዲንጾ ሂስታ ኢሚዳ ሃ ቢታይን ታ ኢንቴና ዋላና።
- 8 ሄኮ ኢንቴ ሃዳ ጊዲዳ ዋርዶ ቃላን አማኔቲዴታ።»
- 9 ጎዳይ፡ «ኢንቴ ካይሶቴታ፡ አሰ ዋዴታ፡ ላይማቴታ፡ ዋርዶ ጫቂ ማርካቴታ፡ ባኣሌ ኤቃ ጸሳስ ያርሾ ያርሼታ፡ ሃይሳፌ ካሴ ኢንቴ ኤርንታ ኤቃ ጸሳታሰ ጎይኔታ።
- 10 ሂስቲዲ ታ ሱንላን ዴይጌቲዳ ጸሳ ኬላ ዪ ታ ሲንላን ኤቂዲ፡ «ኔኒ ሎኦ ዶስ!» ጊሼ ሃይታ ሃራሲዛ ሚሻታ ኦሶን ዴታ።

11 ታ ሱንላን ጸይጌቲዳ ሃ ጸሳ ኬላይ ኢንቴስ ፓንጋቲ ቆቴቲዛ ጎንጎሎ ጊዲዴ? ኢንቴ ኦሊዛይሳ ኡባ ታኒ ታ ኣይፌራ ቤኣዲስ» ጌሰ።

12 ጎዳይ፥ «ታኒ ታ ሱንላይ ኢዛን ዳና ማላ ታ ዶሪዳሶ ሴሎ ቢቴ፤ ታ ኣሳ ኢስራኤሌ ኢታቴላ ጋሶን ታኒ ሄን ኦሊዳይሳ ቢዲ ቤኢቲ።

13 ኢንቴ ሄሳ ኡባ ኦሊሺን ታኒ ኢንቴስ ዛራ ዛራዳ ዮታዲሰ፤ ጊዶ ኣቲን ኢንቴ ሲዮንታ ኢጲዴታ፤ ታኒ ኢንቴና ጸይጋዲስ ሺን ኢንቴ ታስ ኮዪቤኬታ።

14 ሄሳ ጊሻስ ታኒ ሴሎን ኦሊዳይሳ ማላ ሃኢካ ሃይሳን ኢንቴ ኣማኔቲዛ፥ ታ ሱንላይ ኢዛን ጸይጌቲዛ ሃ ጸሳ ኬላ ሶላካ ኦላና፤ ኢንቴሲኔ ካሴ ኢንቴ ኣዋታስ ኢሚዳ ሶሆን ሃይሳን ታኒ ሴሎ ሶላ ኦሊዳይሳ ማላ ዛራዳ ኦላና።

15 ኢንቴ ኢሻታ ኤፍሬሜ ዛሬታ ታኒ ዲጊዳ ማላ ታ ሲንላፌ ኢንቴናካ ዲጋና» ጌሰ።

16 ጎዳይ፥ «ኤርማሳ፥ ኔ ዋሲንካ ታ ሲዮንታ ጊሻስ ኔ ሃይሳ ዴራስ ዋሶፋ፤ ኢስታስ ሾሶፋ ዋይኮ ኢስታስ ጋናቶፓ።

17 ኢስቲ ዩሁዳ ካታማታኒኔ ዩራሳላሚ ኦጌታን ኣይ ኦሊዛኮ ኔ ቤኢኪ?

18 «ሳሎ ጎዳቴዮ» ጌቲቲዛ ጸሳይሲ ኡኬል ኡካናስ ማጫሳቲ ጲሌ ሙኑቁቴስ፤ ናይቲ ሚል ሚጾቴስ፤ ኣዋቲ ታማ ኤፌቴስ። ኢስቲ ታና ቆሃና ጊዲ ኡሻ ያርሾ ሃራ ጸሳታስ ያርሼቴስ።

19 ኢስቲ ሃይሳ ኡባ ኦሊዛይ ታና ቆሃናሴ? ሃይሳን ቆሄቲዲ ዬላታናይ ባንታ ሁኤስ ኢስታ ጊዴቴኔ?» ጊዴሰ።

20 ሄሳ ጊሻስ ኡባፌ ዋልቃማ ጎዳይ፥ «ታ ዪሎይኔ ታ ሃንቆይ ሃ ሶሆ ሶላ፥ ሚዶሳታ ሶላ፥ ጋዴን ዲዛ ሚላ ሶላኔ ካላ ሶላ ጉካና፤ ሂስቲዲ ኤጸና፤ ቶኣናስካ ዳንዳዬና» ጌሰ።

21 ኡባፌ ዋልቃማ ጎዳ ኢስራኤሌ ጸሳይ፥ «ኢንቴ ጸጊ ሺሺዛ ያርሾዛ ጊዲን ሃራ ያርሾታራ ጉጂዲ ኣሾዛራ ኢንቴስ ሚቴ።

22 ታኒ ኢንቴ ኣዋታ ጊብጾ ቢታፌ ኬሲዳ ዋዴ ጸጌቲዛ ያርሾ ጊሻስ ጊዲን፥ ሃራ ያርሾ ጊሻስ ጊዲን፥ ታ ኢስታስ ዮታቤኬ ዋይኮ ኢስታ ኣዛዛቤኬ።

23 ጊዶ ኣቲን ታኒ ኢስታስ፥ «ታስ ኣዛዘቲቴ፤ ሂስቲኮ ታኒ ኢንቴ ጸሳ ጊዳና፤ ኢንቴካ ታ ዴሬ ጊዳና፤ ኢንቴስ ሎኣና ማላ ታኒ ኢንቴና ኣዛዘዛ ኦጌ ኡባራ ቢቴ» ጋዳ ኣዛዛዲሰ።

24 ኢስቲ ጊዲኮ ታ ጊዛዝ ሲጸባብ፤ ወዚናን ዋሊ ሲያናሰካ ኮጸባብ፤ ኢስቲ ባንታ ኢታ ወዚና ቆፋ ሚንሊ ካሊዳ፤ ኢስቲ ሲንሊ ቡስ ኣጊዲ ጉዬ ጉዬ ቢዳ።

25 ኢንቴ ኣዋቲ ጊብጾ ቢታፊ ኬዚዳ ጋላሳፊ ዶሚዲ ሃኖ ጋካናስ ታኒ ታ ኣይሌ ጊዲዳ ናቤታ ኢስታስ ኪታሼ ዳይሰ።

26 ዴሬዚ ጊዲኮ ታ ጊዛዝ ሲጸባብ፤ ወዚናን ዋሊ ሲያናሰካ ኮጸባብ፤ ኢስቲ ባንታ ሞርጌ ሚንሊዳኔ ኢስታ ኣዋቲ ኦሊዳ ኢታ ሚሻፊ ኣፂዛ ኢታ ሚሽ ኦሊዳ።

27 «ሃይሳ ኡባ ኔኒ ኢስታስ ዮታና፤ ጊዶ ኣቲን ኢስቲ ኔ ጊዛይሳ ሲዬቴና፤ ኔኒ ኢስታ ዴይጋና ሽን ኢስቲ ኔስ ኮዬቴና።

28 ሄሳ ጊሻስ ኔኒ ኢስታስ፤ «ሃይሲ ዴሬዚ ጎዳ ባ ጸሳስ ኣዛዜቶንታኔ ኢዛ ዞሬ ኤኮንታ ዴሬ፤ ቱማይ ዴና፤ ኢስታ ኢንጻርሳፊ ጳይዴሰ።

29 ሃንቆይ ኢዛ ቦላ ጋኪዳ ሃ ዬሌታ ጎዳይ ካፂዳ ጊሻሲኔ ኣጊዳ ጊሻስ ኢንቴ ሁኤ ሜዲዲ ዋራ ዬጊቴ፤ ኣይኮይካ ባይንዳ ዙምቡላታ ቦላ ኬዚዲ ዚላሊቴ» ጋ» ጌሰ።

### ሹካ ሹኪዛሶ ሄኖሜ ሾባ

30 ቃሴካ ጎዳይ፡ «ዩሁዳ ኣሳቲ ታ ሲንላን ኢታ ሚሽ ኦሊዳ፤ ሃራሲዛ ኤቃ ጸሳታ ኤሂዲ ታ ሱንላን ዴይጌቲዳ ጸሳ ኬላን ዋሊዲ ቱኒሲዳ።

31 ኢስቲ ባንታ ኣቱማ ናይታኔ ማጫ ናይታ ታማን ጸጊዲ ያርሻናስ፤ ሄኖሜ ና ሾባን ቶፊቴ ጌቲቲዛ ያርሾሆ ገምቢዳ። ጊዶ ኣቲን ሄሲ ታኒ ኢስታ ኣዛዘንታይሳኔ ታ ቆፋን ባይንዳይሳ።

32 ሄሳ ጊሻስ ሄ ሶሆይ ሄኖሜ ና ሾባ ወይኮ ቶፊቴ ጌቲቲዛይሲ ኣቲዲ ሹካ ዙሌ ጌቲቲ ዴይጌታና ጋላሳቲ ዬቴሰ። ጋሶይካ ሞጎሶይ ጳያና ጋካናስ ሃይቂዳ ኣሳቲ ቶፊቴን ሞጌታና።

33 ሄ ወዴ ሄ ኣሳታ ኣሃይ ሳሎ ካፎታሲኔ ሳኣ ዶኣታስ ቁማ ጊዳና፤ ኢስታ ባቢሲዲ ጎዲዛ ሚሺ ዴና።

34 ታኒ ኢሊሲ፡ ኡፋይሳ ጨንጉርሲኔ ሚሺራታ ጨንጉርሰ ዩሁዳ ካታማታፔኔ ዬራሳላሜ ኦጌታፔ ጳይሳና፤ ቢታያካ ቡላ ጊዳ ኣታና» ጌሰ።

## 8

1 ኡባፌ ዋልቃማ ጎዳይ፥ «ሄ ዋዴን ዩሁዳ ካዋታ ሜቄሊ፥ ሹሜታ ሜቄሊ፥ ቄሴታ ሜቄሊ፥ ናቤታ ሜቄሊኔ ዩሩሳላሜን ዲዛ አሳታ ሜቄሊ ኡባይ ዲፎፔ ማጽቲዲ ኬዛና።

2 ሂሰቲዲ ኢሰቲ ሲቂዳ፥ ከቴቲዳ፥ ካሊዳ፥ ዞሬ ኦይቺዳኔ ጎይኒዳ ኣርሼ ሲንፋን፥ ኣገና ሲንፋኒኔ ሳሎ ጸሊንቴታ ኡባ ሲንፋን ሚጩታና። ኢሰታ ሜቄላይ ሸቄና ዋይኮ ሞጌቴና፤ ጊዶ ኣቲን ቢታ ቦላ ኦሌቲዳ ቡራ ማላ ጊዳና።

3 ሃ ኢታ ኣሳ ኩሼፔ ኣቲዳይቲ ኡባይ ታ ኢሰታ ጎዳ ዩዲዳሶ ኡባን ዴኦፔ ሃይቆ ዶራና» ጌሰ።

## ናጋራ ጋሶን ጋኪዛ ቂጻቲ

4 ጎዳይ ታና፥ «ኣሳሰ፥ ኣሲ ኩንዲኮ ኩንዲዳሶሆፔ ሲሚዲ ዴንዴኔ?

ዋይኮ ኣሲ ባሊዳ ጊዲኮ  
ጉዬፔ ባ ባላፔ ሲሜኔ?

5 ሂሰቲን ሃይሲ ዴሬዚ  
ኣይሰ ጉዬ ሲሚ ቢዜ?  
ዩሩሳላሜይ ኣይሰ ኡባቶ  
ጉዬ ሲማዜ?

ኢሰቲ ጌኔ ኦሶ ሚንላ ኦይኪዳ፤  
ሲማናሰካ ኮዬቴና።

6 ታኒ ኢሰታ ሎኤላ ኤዘጋዲሰ፤  
ኢሰቲ ሱሬ ሃሳዬቴና፤  
ታ ኣይ ኦላዲና?» ጌሰ።  
ጊዶ ኣቲን ባ ኢታ ኦሶ  
ፓጺዛይ ኢሶይካ ዴና፤  
ኦላሰ ዲርጊዛ ፓራ ማላ  
ኡባይካ ባሰ ባሰ ዋጾሰ።

7 ሺሚላ ጌቴቲዛ ካፎቲ  
ባንቲ ሲሚዛ ዋዴ ኤሬቴሰ፤  
ሃራጾቲ፥ ዳጊጩቲኔ  
ዋላ ጌቴቲዛ ካፎቲ  
ባ ዴንዲ ቢዛ ዋዴ ኤሬቴሰ፤  
ጊዶ ኣቲን ታ ዴሬይ  
ጎዳ ዋጋ ኤሪቤና። \*

8 ዋርዳንቻ ጳፌቲ ባንታ ቢኢሬን

\* 8:7 ዳጊጩይ ካፎ ቆዋ ጊዲዳይሳ ቆንጢሴሰ።

- ታ ዋጋ ዋርዶራ ጸፊዳ፤  
 ሂሰቲን ዋኒዲ፤  
 ሱኒ እጹ ኤራንቻ፤  
 ጎዳ ዋጋይ  
 ኩናራ ዳሰን ጌቲ?  
 9 እጹ ኤራንቻቲ ዩላታና፤  
 ኢሰቲ ካዉያናኔ  
 ዋጸማዴን ኦይኬታና።  
 ጎዳ ቃላራ  
 ኢሰቲ ኤቄቲቸን  
 ኢሰታሰ ኣዛ ኤራቴሊ ዲዜ?  
 10 ሄሳ ጊሻሰ ታኒ ኢሰታ ማቼታ  
 ሃራ ኣዚናታሰ፤  
 ኢሰታ ቢታታካ  
 ኣላጋታሰ ኢማና፤  
 ጉላይካ ጊታይካ ኡባይ  
 ባንታ ጎኣሰ ጸቄቴቴሰ።  
 ናቤቲኔ ቄሴቲካ ኡባይ  
 ኣሰ ባሌላቴሰ።  
 11 ኢሰቲ ታ ዳሬዛ ማዲንላ  
 ቄሪ ሚሻን ቆዲዲ  
 ማደንታ ጳሌ ኢማቴሰ፤  
 ሳሮይ ባይንዳ፤  
 ሳሮ፣ ሳሮ፣ ጌቴሰ።  
 12 ቱና ኦሶ ኦሊዲ ዩላቲዶ?  
 ቺ! ሙሊካ ዩላቲቤቴና።  
 ኢሰቲ ዩላይ ኣዛኮካ ኤሬቴና።  
 ሄሳ ጊሻሰ  
 ኢሰቲካ ኩንዲዳይታራ  
 ኢሲፌ ኩንዳና፤  
 ታ ኢሰታ ቃጸዪዛ ዋዴ  
 ኢሰቲ ካዉያና» ጌሰ።  
 13 ጎዳይ፥ «ኢሰቲ ጎዪ ኬሲዳ  
 ካላ ኡባ  
 ታ ኢሰታፌ ኤካይቻና፤  
 ኢሰታ ዋይኔ ቱራን

አይፌይ ጳያና፤  
 ባላሴ ሚሊካ አይፌ ኢሜና፤  
 ኢሰታ ቦንጮቲካ ቆካና፤  
 ታኒ ኢሰታስ ኢሚዳይሲ  
 ኢሰታፌ ኤኬቲቻና» ጌሰ።

- 14 ሂሰቲን አሳቲ፥  
 «ኑኒ ሃይሳን አይሰ ኡቲኖ?  
 አኔ ኢሲ ቦላ ሺቂቲ፤  
 ጊምቤቲ ኡቲዳ ካታማታን  
     ባቃቲ ቢዲ ሄን ሃይቆስ፤  
 ጎዳ ኑ ጸሳይ ኑና  
     ሃይቃና ማላ ፒርዲዴስ፤  
 ኑኒ ኢዛ ቦላ  
 ናጋራ ኦሊዳ ጊሻስ  
 ኑ ኡያና ማላ ማርዜራ ዲዛ  
     ሃል ኢሚዴስ።
- 15 «ሳሮይ ያና» ጊዲ  
 ሂዶታ ኦሊዶስ፤  
 ጊዶ አቲን  
 ሎኦ ሚሺ ዪቤና።  
 «ኑኒ ፓጳና» ጊዲ አሞቲዶስ፤  
 ጊዶ አቲን ዳጋማ ጸላ ጊዲዴስ።
- 16 ሞርኬታ ፓራ ፔኖይ  
 ዳኔ ካታማፔ ሲዬቲስ፤  
 ኢሰታ ዋዳላ ፓራታ ጫሻን  
     ቢታይ ኡባይ ቃጾስ፤  
 ቢታዮኔ ቢታይ ቦላ  
 ዲዛ ኡባ፥  
 ካታማዮኔ ኢዚን ዲዛ ኡባ  
     ሚታናስ ዪዳ» ጌቲስ።
- 17 ጎዳይ፥ «ቤኢቲ፥  
 ታኒ ማርዜራ ዲዛ ሾሻታ፥  
 ሙሬኒዛይታ ሂላቴሊ  
     ቴቃናስ ዳንዳዮንታ  
 ሃሶ ሾሻታ  
 ኢንቴ ጊዶ ዬዳና፤

ኢስቲ ኢንቴና ዱካና» ጌስ።

ኤርማሲ ዳራስ ጨጨዳ ጨጨ

- 18 ታ ጨጨዛ ዋዳ  
 ታና ሚንቴሲ ዛይሶ!  
 ታ ዋዚናይ ኬሂ ሜቂዴስ።
- 19 ታ አሳይ ሃሆ ቢታን ዲሼ  
 ዋሲዛ ዋሶ ሲያ።  
 ኢስቲ፥ «ጎዳይ ጸዮኔን ዴኔ?  
 ኢዚ ካዋይካ ሄን ዴኔ?»  
 ጌዲ ዋሴቴስ።  
 ሂስቲን ጎዳይ ኢዛስ፥  
 «ኢስቲ ባስ ማሲዳ ሚስሌታን፥  
 ሃዳ ጌዲዳ ኤቃ ጸሳታን  
 ታና አይስ ሃንቄሊዶ?» ጌስ።

- 20 ሂስቲን አሳይ፥  
 «ሄሶ ካላ ሺሹ  
 ዋዳይ አዲድስ፤  
 ቦኔይካ ዉሪዴስ፤  
 ኩኒካ አቲቤኮ»  
 ጌዲ ዋሴቴስ።

- 21 ታ ዴሬይ ማዲንጸሺን  
 ታኒካ ማዲንጸዲስ፤  
 ዬካዲሲኔ ዳጋማዲስ።
- 22 ጋላአዴን ቲዬዛ ቆሌይ ዴኔ?  
 ዋይኮ ሄን አኪሜይ ዴኔ?  
 ሂስቲን ታ ዴራ ማዲንሊ  
 አይስ ፓጺቤኔ?

## 9

- 1 ሹኬቲዳ ታ ዴራ ጊሻስ ኦማርሲኔ  
 ጋላስ ታ ዬካና ማላ  
 ታ ሁኤይ ሃላ ኦላ፥  
 ታ አይፌቲካ ፑልቶ ማላ  
 አፋንሐ ጎጊሲዳኮ  
 ታ አይ ማላ ዶሳንዲና!
- 2 ታኒ ታ ዴራፔ ሻኬታዳ  
 ሃካ ባና ማላ

- ባዘን ማንዳራይ አቁዛሶሆ  
 ታሰ ኦኔ ኢማናይ!  
 ኢስቲ ኡባይካ ላይማቲዛይታኔ  
 ባለሌዛይታ ጊዲዳ።
- 3 ጎዳይ፥ «ኢስቲ ባንታ ኢንጻርሰ  
 ዋርዶ ሃሳያናሰ  
 ዋንዳፌ ማላ ገግሲዳ፤  
 ቱማን ጊደንታ ዋርዶራ  
 ቢታይ ቦላ ሚኒዳ፤  
 ኢስቲ ኢታ ቦላ ኢታ  
 ጉጂ ጉጂ ቢዳ፤  
 ታናካ ኤሬቴና» ጌሰ።
- 4 ቃሴካ ጎዳይ፥  
 «ኢሻይ ኢሻ ባለሌሰ፤  
 ላጌይ ባ ላጌ ዘጊሬሰ፤  
 ሄሳ ገሻሰ ኢሻይ  
 ኢሻፔ ናጌቶ፤  
 ላጌይ ባ ላጋን አማኔቶፎ።
- 5 ላጌይ ባ ላጌ ጨሜሰ፤  
 ቱማ ሃሳይዛይ ዳና፤  
 ኢስቲ ባንታ ኢንጻርሰ  
 ዋርዶ ሃሳያ ታማርሲዳ።  
 ናጋራ ኦሶን  
 ባንታና ዳቡርሴቴሰ።
- 6 ኔኒ ባለላይ ኩሚዳሶን ዳሳ፤  
 ኢስቲ ባንታ ጨሞ ጋሶን ታና  
 ኤራና ኮዪቤቴና» ጌሰ።
- 7 ሄሳ ገሻሰ ኡባፌ  
 ዋልቃማ ጎዳይ፥  
 «ታኒ ኢስታ ቢራታ ማላ  
 ፓጫዳ ሴሪሳ ጌሻና።  
 ታ ዳራ ናጋራ ገሻሰ  
 ታ ሃይሳፌ ሃራ  
 ኣይ ኦፋና ዳንዳያዚና?
- 8 ኢስታ ኢንጻርሳይ  
 ዋዲዛ ዪሻ ማላ፤  
 ኢስቲ ጨሞ ሃሳያ ሃሳዬቴሰ።  
 ኡባይካ ባንታ ላጌታራ

- ሲቆ ቃላን ሃሳዬቲሰ፤  
 ጌዶ እቲን ባንታ ዋዚናራ  
 ዋጺማዴ ገሊሴቲሰ።
- 9 ሂሰቲን ሃይታ ሃ ዮኦታ ገሻሰ  
 ታ ኢሰታ ቃጸያና ቤሴኔ?  
 ታኒ ታ ሁኤሰ ሃይሳ ማላ  
 ካዋቲፋ ቦላ  
 ሃሎ ኬሲኪና?» ጌሰ።
- 10 ታኒ ቶቃ ዴሬታሰ  
 ዬካናኔ ዋሳና፤  
 ባዘን ሄንፋሶሆታሰ  
 ካዮታና።  
 ጋሶይካ ኢሰቲ ጳይዳ፤  
 ሄራ ኢሲ ኣሲኔ ካንፊና።  
 ማሄ ዋሶይ ሲዬቲና፤  
 ሳሎ ካፎቲኔ ዶኣቲ  
 ባቃቲዲ ቢቺዳ።
- 11 ጎዳይ፡ «ዬሩሳሌም ካታማ  
 ታኒ ቡጴቲ ካይዚዳሶኔ  
 ዋራካናቲ ካኢዘሶ ኦፋና።  
 ዩሁዳ ካታማታካ  
 ኣሲ ባይንዳሶ  
 ቡላ ኬሳና» ጌሰ።
- 12 ሄሳ ኣኩካናሰ ዳንዳይዛ ኣቶ ኤራንቻይ ኦኔ? ጎዳይ ኢዛሰ  
 ቆንጨሲን ሃይሳ ኢዛሰ ዮታና ዳንዳይዛይ ኦኔ? ቢታያ ኣሲ  
 ባይንዳ ካይሰ ኣይሰ ጌዳዴ?
- 13 ጎዳይ፡ «ሃይሲ ሃኒዳይ ኢሰታሰ ታኒ ኢሚዳ ዋጋ ኢሰቲ  
 ኣጊዲ ኣዛዜቶንታ ገሻሲኔ ታ ማራ ካሎንታ ኣጊዳ ገሻሳ።
- 14 ሂሰቲዲ ኢሰቲ ባንታ ዋዚና ሙሙቲፋን ቢዲ ባንታ ኣዋቲ  
 ታማርሲዳ ማላካ ባኣሌ ጌቲቲዛ ኤቃ ጸሳ ካሊዳ» ጌዳሰ።
- 15 ሄሳ ገሻሰ ኡባፌ ዋልቃማ ጎዳ ኢሰራኤሌ ጸሳይ፡ «ቤኢቲ፡  
 ታኒ ሃ ኣሳ ጫሚዛ ቁማ ሚዛናኔ ማርዜራ ዲዛ ሃል ኡሻና።
- 16 ኢሰታ ዋይኮ ኢሰታ ኣዋቲ ኤሮንታ ካዋቲፋታ ጌዶን ታኒ  
 ኢሰታ ላላና። ታኒ ኢሰታ ጳይሳና ጋካናሰ ማሻን ዬዴፋና» ጌሰ።
- ዬሩሳሌም ኣሳ ዚላሰ
- 17 ቃሴካ ኡባፌ ዋልቃማ ጎዳይ፡  
 «ኣኔ ዬሆ ዬኪዛ ማጫሳታ ጸይጊቲ፤  
 ዚላሰ ሎኤላ ኤሪዛ ማጫሳታ ኤሂቲ።

- 18 ኢስቲ ኤሶን ዬቶ፤  
 ኑ አይፌራ አፋንሏ  
 ጎጋናሼ ጋካናሲኔ  
 ኑ ሲጸንፋራ አፋንሏ ፑልታና  
 ጋካናሰ ኑ ጊሻሰ ዚላሌቶ።
- 19 ጸዮኔን ዚላሳ ጨንጉርሲ ሲዬቴሰ፤  
 ሓኒ ጳይዶስ!  
 ኑኒ ከሂ ካዉዪዶስ!  
 ኑ ከሏ ላሌቲቺዳ ጊሻሰ  
 ኑ ቢታ አጊዲ ዴንዲ ቦስ  
 ጊ ዚላሌቴሰ» ጌሰ።
- 20 ኢንቴኖ ማጫሳቶ!  
 ጎዳ ቃላ ሲዪቴ!  
 ኢንቴ ሃይላይ ኢዛ ዶናፔ ከዚዛ  
 ቃላ ኤዘጎ።  
 ኢንቴ ማጫ ናይታ  
 ዚላሰ ታማርሲቴ፤  
 ኢሲኒያ ሃንኮሮ ዬሆ ታማርሱ።
- 21 ሃይቆይ ናይታ ኦጌፔ፤  
 ናቴላ ናይታ ዱቡሻፔ  
 ፒቲ ጳይሲዴሰ፤  
 ኑ ማሰኮቴታራ ጌሊዴሰ፤  
 ኑ ቆልኣ ጊዶ ካንሏዴሰ።
- 22 ሄሳ ጊሻሰ ጎዳይ ታና፤  
 « ሓሳ አሃይ ቡራ ማላ  
 ዴምባን ላሌታና፤  
 ካላ ሺሺዛይቲ ጉዬን አጊዳ  
 ፑሹሎ ማላ አታና፤  
 ኢሰታ ኦኒካ ሺሺና ጋ»  
 ጊዲ አዛዚዴሰ።
- 23 ጎዳይ፥ «አጵ ኤራጉቻይ  
 ባ አጵ ኤራቴላን ጨቄቶፎ፤  
 ዋልቃማይ ባ ዋልቃን ጨቄቶፎ፤  
 ዋይኮ ዱሬይ ባ ዱሬቴላን ጨቄቶፎ።
- 24 ጊዶ አቲን ጨቄቲዛ ኦኒካ  
 ታኒ ጎዳ ጊዲዳይሳ ኤርኒኔ  
 ቢታ ቦላ ሲቆ፥ ቡሬ ፒርዳኔ  
 ጸሎቴላ ኦሊዛይ ታና ጊዳይሳ

እኬኮን ጨቁቶ።

ታኒ ሃይታን ኡፋዬታይሰ» ጌሰ።

<sup>25</sup> ቃሴካ ጎዳይ፥ «ቤኢቴ፥ ባንታ ኣሾ ጸላ ቃጸሬቲዳ ኣሳ ታኒ ቃጸያና ዋዴይ ዩሰ።

<sup>26</sup> ሄይቲካ ጊብጾ፥ ዩሁዳ፥ ኤዶሜ፥ ኣሞኔ፥ ሞኣቤኔ ባንታ ሁኡ ጨሪ ሜዲዲ ባዘን ዲዛ ኣሳ ኡባታ። ሃ ካዎቴላታን ዲዛ ኣሳይ ኡባይ ቱሙካ ቃጸሬቲቤና፤ ኢሰራኤል ኣሳ ኡባ ዋዚናይካ ቃጸሬቲቤና» ጌሰ።

## 10

ጸሴኔ ኤቃ ጸሳታ

<sup>1</sup> ኢንቴኖ ኢሰራኤል ኣሳቶ!

ጎዳይ ኢንቴሰ ዮቲዛ ቃላ ሲዪቴ!

<sup>2</sup> ጎዳይ፥ «ካዎቴላታ ኦጌ

ኢንቴ ታማርፒቴ።

ኢሰቲ ሳሎ ቦላ

ማላታ ቤኢዲ ሺርቲኮካ፥

ኢንቴ ሺርቶፒቴ።

<sup>3</sup> ጋሶይካ ዳሬታ ዋጋይ ሃዳ።

ኢሰቲ ሚላ ዋራፔ ቃንጾቴሰ፤

ሂላይ ማሲ ገጊሴሰ።

<sup>4</sup> ኢሰቲ ቢራኒኔ

ዋርቃን ኣሌቂሴቴሰ፤

ቃጸንታ ማላ ናሪቃራ

ሚሰማሬን ጲሺኪዲ

ኦይፊቴሰ።

<sup>5</sup> ኢሰታ ኤቃ ጸሳቲ

ኢሰታ ካላ ጊዶን

ዶኣ ዳጋንላናሰ

ኤሲዛ ሚሰሌ ማላ።

ሃሳያናሰ ዳንዳዬቴና።

ሄሜታናሰ

ኢሰቲ ዳንዳዮንታ ገሻሰ

ኣሳይ ኢሰታ ቶኬሰ።

ኢሰቲ ኢታ ጊዲን

ዋይኮ ሎኦ ሚሽ

- አንቴ ቦላ ኦፋናሰ  
 ዳንዳዮንታ ገሻሰ  
 ኢሰታሰ ሙሌካ ያዮፍቴ» ጌሰ።
- 6 አቤት ጎዳዉ!  
 ኔ ማላይ ኦኒካ ዳና።  
 ኔኒ ጌታ፤  
 ኔ ሱንሳይካ ጌታኔ ዋልቃማ።
- 7 አቤት ካዋቴላታሰ ካዎ!  
 ኔሰ ያዮንታይ ኦኔ?  
 ኔሰ ቦንቾይ ቤሴሰ፤  
 ጋሶይካ አቶ ኤራንቻታ  
 ጋርሳኒኔ  
 ኢሰታ ካዋቴላታ ኡባ ጋርሳን  
 ኔ ማላይ ዳና።
- 8 ሃዳ ጌዲዳ ሚሳፌ ማሴቲዳ  
 ኤቃ ጸሳታፔ  
 ቲሚርቲ ታማርዛ ኡባይ  
 ኤያኔ ዳማ።
- 9 ሄ ኤቃ ጸሳቲ ታርሴሴፔ  
 ዪዳ ቢራኒኔ  
 ኡፋዜፔ ዪዳ  
 ዋርቃን አሌቂቲዳ።  
 ኢሰቲ ዋይኔ ኡሻኒኔ  
 እቻ ቴራ ሚሳቲዛ  
 ሜዳራ ዲዛ  
 ማይኦን ካሜቲዳ።  
 ኢሰቲ ኡባይ ኩሼ ኦሶ  
 ሂላታን ኦሴቲዳ።
- 10 ጌዶ አቲን ጎዳይ ቱሙ ጸሳ፤  
 ኢዚ ዳኦ ጸሳኔ ሚርና ካዎ።  
 ኢዚ ሃንቂቲዛ ዋዴ  
 ቢታይ ቃጾሰ፤  
 ካዋቴላቲካ  
 ኢዛ ዪሎ ዳንዳዬቴና።
- 11 ጎዳይ፥ «አንቴካ፥ ሂይቲ ሳሎኔ  
 ሳኦ ሜቶንታ ጸሳቲ  
 ሳኦፔኔ ሳሎ ጋርሳፌ

- ጳጳሩን ጌታ» ጌሰ።  
 12 ባ ዋልቃን ሳኦ ሜዲዳይ፥  
     ባ ኣጵ ኤራቴላን  
     ኣላሜ ኤሲዳይ፥  
     ባ ኣኬካን  
     ሳሎ ሚጨዳይ ጎዳ።  
 13 ኢዚ ጉሚዛ ዋዴ፥  
     ሳሎን ዲዛ ኡባይ ቃጼሰ።  
     ኢዚ ሻራ ሳኦ ጋጸፔ  
     ፑዴ ዴንፎሰ።  
     ኢዚ ኢራራ ዳዳ ዩዴሰ፤  
     ጫርኮካ ባ ሚንጃሶፔ ኬሴሰ።  
 14 ኣሲ ኡባይ ኤራ ጳይዲ ዳሚዴሰ፤  
     ዋርቃ ሴሪሲዛ ኣሲ ኡባይ  
     ባ ኦሊዳ ኤቃ ጸሳታን  
     ዩላቲዴሰ።  
     ጋሶይካ ኤቃ ጸሳቲ ዋርዶ፤  
     ኢሰታሰ ሼምፖይ ዴና።  
 15 ኢሰቲ ጮ ቂጼሰ  
     ሜዴቲዳ ሚሻ።  
     ፒርዳይ ኢሰታ ቦላ ጋኪዛ ዋዴ  
     ኢሰቲ ጳጳሩ።  
 16 ጊዶ ኣቲን ያቆቤ ቃዳይ  
     ሄይታ ማላ ጊዴና።  
     ጋሶይካ ኢዚ ኡባ ሜዲዳይሳ፤  
     ኢሰራኤሊይ ዶሬቲዳ ዴሬ።  
     ኢዛ ዶሬዳይሳ ሱንላይ  
     ኡባፌ ዋልቃማ  
     ጎዳ ጸሳ።  
     ቡሮፔ ያና ኢታ  
 17 ኢንቴኖ ሞርኬይ ጊዶሊዳይቶ!  
     ዲዛ ሚሽ ዲዛሶፔ ሺሺቴ።  
 18 ጋሶይካ ጎዳይ፥  
     «ታኒ ሃ ሳኦ ቦላ ዲዛ ኣሳ  
     ሃኢ ጌዴ ካሬ ኬሳዳ ጎዳና።  
     ኢሰታሰ ኤሬታና ማላ  
     ታ ኢሰታ ቦላ ሜቶ ኤሃና» ጌሰ።  
 19 ዋኖ ኣይ ሃኖ!

- ታ ማዲንላይ  
 ፓጸንታ ማዲንላ።  
 ጊዶ አቲን ታ ታና፥  
 «ሃይሲ ታ ሃርጌ፤  
 ታኒ ዳንዳያናሰ ቤሴሰ» ጋዲሰ።  
 20 ታ ዳንካኔይ ላሌቲዳሰ፤  
 ኢዛ ዎዶሮይ ኡባይ ዱጾሬቲዳሰ።  
 ታ ናይቲ ኡባይ  
 ታፔ ሻኬቲዲ ቢቺዳ፤  
 ሃይሳፌ ጉዬ ሲሜቲና፤  
 ታ ዳንካና ዛሪዲ ቶላናሰ  
 ዎይኮ ታ ማጋላሻ ካቃናሰ  
 ሃኢ ኢሲ አሲኔ አቲቤና።  
 21 ሄንላንቻቲ ዳሚዳ፤  
 ኢሰቲ ጎዳ ኦይቺቤቲና።  
 ሄሳ ጊሻሰ ኢሰታሰ አንጃቲቤና፤  
 ኢሰታ ዉዴ ኡባይ ላሌቲዳሰ።  
 22 ሲዪቲ! ኢታ ዮኦይ ዩሳ ቦላ ዳሰ፤  
 ሄሲ፥ «ቼዴሃ ባጋራ ዲዛ  
 ካዎቲላን  
 ጌታ ቡልኦኬቲላ  
 ዩሳን ዳሰ» ጊዛይሳ።  
 ኢዛ ኦላንቻቲ ዪዲ  
 ዩሁዲ ካታማታ ባዞኔ  
 ዎራካናታ ዱሳሶ ኬሳና።  
 23 አቤት ጎዳዉ! አሳ ዴኦይ  
 ኢዛዴ ኩሼን ዶንታይሳኔ  
 ባ ሄሜታካ ባርካ  
 ባ ሼኔ ማላ  
 ሎኤላና ዳንዳዮንታይሳ  
 ታ ኤራይሰ።  
 24 አቤት ጎዳዉ! ታና ሴራ፤  
 ጊዶ አቲን ጊናራ ጊዶ።  
 ታኒ ሙሌራ ጳዮንታ ማላ  
 ኔኒ ሃንቆራ ታ ቦላ ዮፓ፤  
 25 ያቆቤ ሙሊራ  
 ሚ ሚቲዳይታ ቦላኔ  
 ኔ ሱንላ ጴይጎንታ

አሳታ ቦላ ጉሳ።  
 ኢዛ ዱሳሶካ  
 ካይዚሲዳ ገሻሰ  
 ኔኒ ኔ ሃንቆዛ ኔና ኤርንታ  
 ዴሬታ ቦላኔ  
 ኔ ሱንሐ ጸይጎንታ  
 ካዎቴላታ ቦላ ጉሳ።

## 11

### ኤርማሳኔ ጎዳ ጫቆ ቃላ

- <sup>1</sup> ጎዳፔ ኤርማሳስ ዪዳ ቃላይ ሃይሳፌ ካሊዛይሳ፤
- <sup>2</sup> «ሃ ጫቆ ቃላታ ሲያ፤ ሂስታዳ ዩሁዳ አሳሲኔ ዬሩሳላሜ ካታማን ዲዛይታስ ዮታ።
- <sup>3</sup> ጎዳ ኢሰራኤሌ ጸሳይ፤ «ሃይሳ ጫቆ ቃላስ አዛዜቶንታ አሲ ቃንጌቲዳዴ ገዶ።
- <sup>4</sup> « «ሃይሲ አዛዘዚ ቤኒ ኢንቴ አዋታ ገብጾ ቢታፌ፤ ቢራታ ሴሪሲዛ ጮጮፔ ኬሲዛ ዎዴ ታ ቃላ ሲዪዳኮ፤ ታ አዛዘ ናጊዳኮ ኢስቲ ታ ናይታ፤ ታኒ ኢስታ ጎዳ ገዳና ማላ ታኒ ኢስታስ አሚዳ ቃላ።
- <sup>5</sup> ሄሳን ማሊኔ ኤሲ ጎጊዛ ቢታ ካሴ ኢንቴ አዋታስ አማናስ ታኒ ጫቂዳ ጫቆ ፖላና፤ ጋዲሰ» ጌሰ። ታኒካ፤ «ኤር፤ ጎዳው፤ አሚን» ጋዲሰ።
- <sup>6</sup> ሄሳፌ ጉዬ ጎዳይ ታስ፤ «ሃይሳ ታ ቃላ ኡባ ዩሁዳ ካታማታኒኔ ዬሩሳላሜ ኦጌታን፤ «ሃ ጫቆ ቃላ ሲዪቴ፤ ሲዪዲ ኢዛ ካሊቴ።
- <sup>7</sup> ካሴ ኢንቴ አዋታ ታኒ ገብጾ ቢታፌ ኬሶሳፔ ሃቕ ጋካናሰ፤ ዛራ ዛራዳ፤ ታስ አዛዜቲቴ!» ጋዳ ሴራዲሰ።
- <sup>8</sup> ኢስቲ ገዲኮ ባ ዎዚና ኢታቴላ ካሊዳ አቲን ታስ አዛዜቲቤቴና፤ ባ ሃይሊካ ሃ ታኮ ዩጌቤቴና፤ ሄሳ ገሻሰ ኢስቲ ካላና ማላ ታ አዛዚዳ ጫቆ ቃላ ፖሎንታ አጊዳ ገሻሰ ታ ኢስታ ቦላ ቃንጌሐ ኤሃዲሰ» ገደሰ።
- <sup>9</sup> ዛሪዲካ ጎዳይ ታስ፤ «ዩሁዳ አሳ ገደኒኔ ዬሩሳላሜን ዲዛይታ ገደን ኢታ ማቆይ ዴሰ።
- <sup>10</sup> ኢስቲ ካሴ ታ ቃላ ሲዮንታ ኢጲዲ ናጋራ ኦሊዳ ባንታ አዋታ ማላካ ናጋራ ኦሊዳ፤ ኢስቲ ሃራ ጸሳታስ ጎይኒዳኔ ኢስታ ካሊዳ፤ ኢሰራኤሌ አሳይኔ ዩሁዳ አሳይ ታኒ ካሴ ኢስታ አዋታራ ጫቂቲዳ ጫቆ ቃላ ላሊዳ።

11 ሄሳ ጊሻስ ጎዳይ ኢስታስ፥ ለኢስቲ ባቃቲዲ አታናስ ዳንዳዮንታ ማቶ ታ ኢስታ ቦላ ኤሃና። ኢስቲ ታኮ ዋሲኮካ ታ ሲዪኬ።

12 ሄ ዋዴ ዩሁዳ ካታማታ አሳቲኔ ዬሩሳላሜ አሳቲ ቢዲ ባንቲ ኤጸኔ ጨዋሲዛ ኤቃ ጸሳታስ ዋሳና፤ ጊዶ አቲን ማቶ ዋዴ ሄ ጸሳቲ ሙሌካ ኢስታ ማዴቴና።

13 ኢንቴኖ ዩሁዳ አሳቶ! ኢንቴ ጸሳቲ ኢንቴ ካታማታ ኬና ጮራ። ቃሴ ባአሌ ጌቴቴዛ ሄ ዬላቺዛ ጸሳስ ኤጸኔ ጨዋሳናስ ኢንቴ ኤሲዳ ያርሺዛሶሆቲ ዬሩሳላሜ ኦጌታ ኬና ጮራ። ጌስ።

14 «ኤርማሳ፥ ኢስቲ ማቶቲዲ ታና ዋሲኮ ታ ሲዮንታ ጊሻስ ኔ ኢስታ ጊሻስ ታና ዋሶፋ፤ ኢስታ ጊሻስ ጋናቶፓ ዋይኮ ኦይቸፋ።

15 ታ ሲቆያ ባ ኢታቴላ

ዳርታራ ቃጾሬላሽ

ታሳራ ኢዚስ

አዛ ጋይቶቴሌ ዲዛይ?

አዲኔቴሌ ዋይኮ

አሾ ያርሾይ

ኔና ቁጾቴፔ

አሻና ዳንዳይዜ?

ኔ ሄይታንታ ፖላዳ

ኡፋዬታና ዳንዳይይ?

16 ጎዳይ ኔና፥ ለዲጪዛ፥

ሎኦ አይፌ አይፊዛ ዋጋራ ሚሉ።

ጊዲ ሱንሐዴስ።

ጊዶ አቲን ኢዚ ዋልቃማ

ጎቴ ጫርኮ ጊሪሳን ጹጋና፤

ኢዚ ሃጋቲካ ማቄሬቲ ዋዳና።

17 «ኢስራኤሌ አሳቲኔ ዩሁዳ አሳቲ ባአሌስ ኤጸኔ ጨዋሲዲ ታና ዬሎሲዳ ጊሻስ ኢንቴና ቶኪዳ ኡባፌ ዋልቃማ ጎዳይ ኢንቴ ቦላ ኢታ ሚሽ ኤሃናስ አዋጃዲስ» ጊዴስ።

**ኤርማሳ ዋዳናስ ማቄቲዳ ማቆ**

18 ጎዳይ ኢስታ ማቆ ታስ ቆንጨሲዳ ጊሻስ ታኒ ኤራዲስ፤ ሄ ዋዴ ኢስቲ ኢታ ኦሐዛይሳ ኢዚ ታና ቤሲዴስ።

19 ታኒ ሹካስ ካሌሐዲ ኤፊዛ ዶርሳ ላቃ ማላ ጊዳዲስ። ኢስቲ ታ ቦላ፥ «አኔ ኦኒ ሚላ ቃንጺዲ ኢዛ አይፌዛራ ጋሐ ዳይሶስ። ኢዛ ሱንላይ ሙሊካ ሃሳኤቶንታ ማላ፥ አኔ ኦኒ ኢዛ ፓጳ ዲዛይታ ጊዶፌ ቶቃሊዲ ዳይሶስ» ጊዲ ኢስቲ ማቄቲዳይሳ ታኒ ኤራቤኬ።

20 ዋዚናኔ ኪላሆ ፓጫ ጸሊዛ  
ኡባፌ ዋልቃማ ጎዳዉ!  
ታ ዮኦታ ኔሰ ኢማዲሰ፤  
ኔኒ ኢሰታ ቦላ  
ሃሎ ኬሲሺን  
ታ ቤያና።

21 ሄሳ ጊሻሰ፡ «ጎዳ ሱንላን ቲንቢቲ ዮቶፓ፤ ኔ ዮቲኮ ኑ ኩሽን ሃይቃና» ጊዲ ኔና ዋቆናሰ ኮይዛ ኣናቶቲ ኣሳ ጊሻሰ ጎዳይ ጊዛይሲ ሃይሳ።

22 ኡባፌ ዋልቃማ ጎዳይ፡ «ታኒ ኢሰታ ቃጸያና፤ ኢሰታ ናቴላ ናይቲ ማሻን ሃይቃና፤ ኢሰታ ማጫ ናይቲ ኣቲማ ናይቲ ኮሻን ሃይቃና፤

23 ኢሰታፌ ኢሶይኔ ኣቴና፤ ጋሶይካ ታኒ ኢሰታ ቃጸዪዛ ላይሰ ኣናቶቲ ኣሳ ቦላ ኢታ ሚሽ ኤሃና» ጌሰ።

## 12

### ኤርማሳ ኦይሻ

1 ኣቤት ጎዳዉ!  
ታኒ ኔናራ ፓላማቲዛ ዋዴ  
ኡባንካ ኔ ጸሎ።  
ኢታ ኣሳቲ ኦላዛይሲ  
ኢሰታሰ ኣይሰ ኢንጃቲዜ?  
ኣማኔቶንታይቲ  
ኣይሰ ኢሻሎ ዲሰ ዲዞ?

2 ኔኒ ኢሰታ ቶካዳሳ፤  
ሂሰቲን ጸጸ ዬዲዳ፤  
ዲጪዲ ኣይፌ ኣይፊዳ።  
ኢሰቲ ኔና ዶናፔ ዬጌቲና፤  
ኔኒ ጊዲኮ ኢሰታ ዋዚናፔ  
ሃኮን ዳሳ።

3 ጊዳ ኣቲን ኣቤት ጎዳዉ!  
ኔኒ ታና ኤራሳ።  
ታና ቤኣሳ፤  
ታኒ ኔሰ  
ኣይ ቆፒዛኮ ፓጫሳ።  
ሹኬታና ቢዛ ዶርሳታ ማላ  
ኔኒ ኢሰታ ላጋ!

ሹካ ጋላሳስ ኢስታ ዱማ  
ሻካ ዋላ!

- 4 ኢራይ ጳጹን ቢታይ  
ኣይዴ  
ጋካናስ ማላኔ?  
ማታይካ ኣይዴ ጋካናስ ማላኔ?  
ኣሳ ኢታቴላፌ ዴንዲዳይሳን  
ማደሳቲኔ ካፎቲ ጳይዳ።  
ሄሳ ቦላካ ኣሳይ፥  
«ኅዳይ ኑኒ ኦሲዛይሳ  
ዴማና» ጌሰ።

ኅዳይ ኤርማሳ ኦይሻስ ኢሚዳ ዛሮ

- 5 ኅዳይ ኤርማሳስ፥  
«ኔኒ ቶሆን ዋጺዛ ኣሳታራ  
ዋጺዳ ዳቡርኮ  
ፓራራ ዋና ጋዴ ዋጺኔ?  
ኔኒ ሳሮ ቢታን ጳጹቲኮ፥  
ዮርዳኖሴ ዋራ ጋርሳን  
ዋና ሄማታኔ?

- 6 ኔ ኢሻቲኔ  
ኔ ሶሆ ኣሳቲ  
ኔና ሂሊዳ፤  
ኔ ቦላ ዋሲዳ፤  
ሄሳ ጊሻስ ኢስቲ ኔሰ  
ሎኦ ሃሳይኮካ  
ኔ ኢስታ ኣማኖፓ።

- 7 ታኒ ታ ኬላ ኣጋና፤  
ታ ጸንጾዮካ ዬጋ ኣጋና፤  
ታኒ ታ ሰቂዛ ኣሳ  
ኢስታ ሞርኬታ ኩሼን  
ኣላ ኢማና።

- 8 ታ ጸንጾያ  
ዋራ ጊዶን ዲዛ ጋሞ ማላ  
ታ ቦላ ዴንዲዳይስ፤  
ታ ቦላካ ጸጋዲስ፤  
ሄሳ ጊሻስ ታኒ ኢዞ ኢጸዲስ።

- 9 ታ ጸንጾያ ጰርጮቲ  
ማና ጊዶሊዳ

ካፎ ማላ ጊዳቤኬ?  
ቢዲ ዋራ ዶኣታ  
ኡባ ሺሺቴ፤  
ኢሰቲ ኢዞ ዲፌሊ  
ማና ማላ ጸይጊቴ።

- 10 ዳሮ ሄንፋንቻቲ  
ታ ዋይኔ ቱራ ሶሆ ሞሪዳ፤  
ታኒ ኢዛን ኡፋዬቲዛ  
ታ ጋዴዛ ቡላሲዳ።

- 11 ሄ ቢታይ ታ ሲንፋን  
ባዞ፥ ቡላኔ  
ሜላ ቢታ ጊዳና፤  
ኢዚሰ ቆፒዛይ ባይንዳ ጊሻሰ  
ቢታያ ባዞ ጊዳና።

- 12 ባዞን ዲዛ ዙምቡላታ ቦላፌ  
ጳይሲዛይቲ ያና፤  
ጋሶይካ ጎዳ  
ማሻይ ቢታ  
ሃ ጋጸፔ  
ሄ ጋጸ ጋካናሰ ማና።  
ሄሳ ጊሻሰ  
ኦኒካ ኣታናሰ ዳንዳዬና።

- 13 ኢሰቲ ጊሰቴ ዜሪዲ  
ኣጉንሐ ጫካና፤  
ኢሰቲ ዳሮ ዳቡራናሺን  
ኣይኮካ ዳሜቴና፤  
ዳሮ ዜሪዲ ጎዳ ሃንቆ  
ጋሶን ኢንቴ ጉሐ  
ዳሚዲ ዬላታና» ጊዴሰ።

- 14 ጎዳይ፥ «ታኒ ታ ዳሬ ኢሰራኤሌሰ ኢሚዳ ጸንጾ ቢታ ኦይኪዛ  
ኢታ ሾሮታ ታኒ ኢሰታ ኢሰታ ቢታፌ ቶቃላና። ቃሴ ዩሁዳ ኣሳታካ  
ኢሰታ ጊዶፌ ቶቃላና።

- 15 ጊዶ ኣቲን ታኒ ኢሰታ ኢሰታ ቢታፌ ቶቃሊዳፔ ጉዬ ዛራዳ  
ማራና፤ ታኒ ኢሰታ ዳሬኒኔ ኢሰታ ጸንጾን ጸንጾን ዛራ ኤሃና።

- 16 ካሴ ታ ኣሳ ባኣሌ ሱንፋን ጫቃና ማላ ታማርሶይሳዳካ፥  
(ጎዳይ ቤኢን!) ጊዲ ታ ሱንፋን ጫቂኮ ኢሰቲ ታ ኣሳ ጊዶን  
ጸጵዲ ዳና።

17 ታ ጊዛዝ ኤኮንታ ካዎቴሉ ዲኮ ታ ኢዛ ሙሌራ ቋቃላ ቋይሳና» ጌሰ።

## 13

### ላይኖፔ ኦሴቲዳ ዳንጮ

1 ጎዳይ ታና፡ «ባዳ ላይኖፔ ኦሴቲዳ ዳንጮ ሻማዳ ኔ ጸሳን ዳንጮ፤ ጊዶ ኣቲን ሃላን ቦሺሶፓ» ጊዳሰ።

2 ሄሳ ጊሻሰ ታኒ ጎዳይ ኣዛዚዳ ማላ ዳንጮ ሻማዳ ታ ጸሳን ዳንጮዲሰ።

3 ጎዳ ቃላይ ናምእንሉ ታኮ ዪዲ፡

4 «ኔኒ ሻማ ዳንጮዲ ዳንጮዛ ኤካዳ ኤፊራዲሴ ሻፋ ባ፤ ሂሰታዳ ዛላ ዛኣ ጊዶን ቆታ» ጊዳሰ።

5 ሂሰቲን ታኒ ጎዳይ ታሰ ዮቲዳ ማላ ኤፋዳ ኤፊራዲሴ ሻፋ ላንቄን ቆታዲሰ።

6 ዳር ጋላሳፌ ጉዬ ጎዳይ፡ «ዳንዳ ኤፊራዲሴ ሻፋ ባዳ ታኒ ኔና፡ (ሂን ቆታ) ጊዳ ዳንጮዛ ኬሳ» ጊዳሰ።

7 ሂሰቲን ታኒ ኤፊራዲሴ ሻፋ ባ ቦካዳ ዳንጮዛ ታ ቆቲዳሶፔ ኬሳዲሰ፤ ጊዶ ኣቲን ሄ ዳንጮዚ ሞሬቲዲ ሙሌራ ጎኦንታዝ ጊዲዳሰ።

8 ሄሳፌ ጉዬ ጎዳ ቃላይ ታኮ ዪዲ፡

9 «ጎዳይ ታኒ ዩሁዳ ኣሳ ኦቶሬቴሊኔ ዩሩሳላሜ ኣሳ ጨቄቴሉ ሄሳ ማላ ቋይሳና።

10 ታ ቃላ ሲዮንታ ኢዲዲ፡ ባንታ ዎዚና ሙሜቴላ ካሊዲ፡ ኤቃ ጸሳታሰ ኦላናሲኔ ጎይናናሰ ቢዛ ሃ ኢታ ኣሳይ ሃይሳ ዳንጮዛ ማላ ሙሊካ ጎኦንታይሳ ጊዳና።

11 ዳንጮይ ኣሳ ጸሳ ባቂ ኦይኪዛ ማላ ዩሁዳ ኣሳይ ኡባይኔ ኢሰራኤሌ ኣሳይ ኡባይ ታኮ ሺጽ ጋና ማላኔ ታ ሱንላሰ ጋላታኔ ቦንቾ ኢማና ማላ ታ ኦሊን ኢሰቲ ታ ጊዛዝ ሲዩቤቴና» ጌሰ።

### ዎይኔ ኡሻ ኦቶ

12 ቃሴካ ጎዳ ኢሰራኤሌ ጸሳይ፡ «ኤርምያ! ኣሳሰ፡ (ኦቶ ኡባን ዎይኔ ኡሻይ ኩማና) ጌሰ። ኢሰቲ ኔሰ ዛሪዲ፡ (ኦቶ ኡባን ዎይኔ ኡሺ ኩማናይሳ ዋኒ ኦ ኤርኮኒ?) ጌኮ፡

13 ኔኒ ኢሰታሰ፡ (ጎዳይ ታኒ ሃ ቢታን ዲዛ ኣሳ ኡባ፡ ዳዊቴ ካዎቴላ ኣራታን ኡቲዛ ካዎታ፡ ቄሴታ፡ ናቤታኔ ዩሩሳላሜን ዲዛ ኣሳ ኡባካ ታ ዎይኔ ኡሻን ማላና።

14 ታኒ ኢሲ አሰ ሃራ አሳራ፥ አዋ ናራ ኦሻና፤ ታኒ ኢሰታ ዳይሳና አቲን ኢሰታሰ ሚሼቲኬ፤ ቃዴቲኬኔ ማሪኬ፡ ጌሰ ጋ» ጌዴሰ።

ኦቶሬቴሉ ኤሂዛ አይፌ

15 ጎዳይ ዮቲዴሰ፤

ዋዚናን ዋሊ ሲዪቲ፤

አጌቲ ኦቶራንቻ ጌዶፒቲ።

16 ኢዚ ቆማ ኤሆንታ ዲሺን

ቆሚዳ ዙማታ ቦላ ኢንቲ ቶሆይ

ቆዴቶንታ ዲሺን

ጎዳሰ ኢንቲ ጸሳሰ

ቦንቾ አሚቲ፤

ኢንቲ፥ «ፖኦይ ያና»

ጌዲ ናጌታ፤

ጌዶ አቲን

ኢዚ ቆማን ላማና፤

ሳካና ቆማ ኦላና።

17 ኢንቲ ሲዮንታ ኢዲኮ፥

ኢንቲ ኦቶሬቴላ ጌሻሰ

ታ ሼምፖያ ጌማን ዬካና፤

ጎዳ ዉዴይ

ዲኤቲ ቢቺዳ ጌሻሰ

ታኒ ጫሞ ዬሆ ዬካይሰ፤

ታ አይፌፔ አፋንሉ

ሃላ ማላ ጎጌሰ።

18 ጎዳይ ታና፥ «ካዋዛሲኔ

ኢዛ አዮ ጎዳቴይሰ፥

ኢንቲ ቦንቾ ካላቻይ

ኢንቲ ሁኤፔ

ዋቆና ጌሻሰ፥

ኢንቲ ካዋቴላ አራታፔ

ዲጌ ዋቂቲ።

19 ኔጌቤ ቢታን ዲዛ ካታማቲ

ኡባይ ጎርዴታና።

ኢሰታ ዶያናዴይካ ዴና፤

ዩሁዳ አሳይ ኡባይ

ዲኤቲዲ ባና፤

ኢሰታ ኦጌይካ

ጎርዴታና ጋ» ጌዴሰ።

- 20 ቃሴካ ጎዳይ፥ «አኔ ጵቁ ጊዲ  
ፑዴሃ ባጋፌ ዪዛይታ ጴሊቲ፤  
ኢንቴስ ኢሜቲዳ ዉዴይ፥  
ኢንቴ ጨቄቲዛ ዶርሳቲ  
አዋን ዲዞ?
- 21 ኔኒ ኔስ ዳቦ ጊዳና ማላ  
ኮዪዳይቲ ኔና ጸኒዲ  
ሃሪዛ ዎዴ  
ኔ አይ ጋኔ?  
ዬሎ ሚጸይ ኦይኪዳ  
ማጫሳ ማላ  
ኔና ሚጸይ ኦይኬኔ?
- 22 ኔኒ ኔ ዎዚናን፥  
«ሃይሲ ኡባይ ታ ቦላ  
አይስ ጋኪዴ?» ጊኮ፥  
ኔ ማይኦይ ቃሬቲን  
ኔ ሱፔቲዳይ፥  
ኔ አሳ ኩሼን ዋዬ ቤኢዳይ  
ኔ ናጋራይ ዳሪዳ ጊሻሳ።
- 23 ቱሙ ቶጵያ አሲ ባ ሜጳ፥  
ዎይኮ ማሄይ ባ ማሳራቴላ  
ላማናስ ዳንዳይዜ?  
ኢንቴ ኢታ ኦላ ሜዜቲዳይቲ  
ሎኦ አላናስ  
ዳንዳይኬታ» ጊዴስ።
- 24 ጎዳይ፥ «ባዞ ጫርኮይ  
ሱላ ላሊዛ ማላ  
ታኒካ ኢንቴና ላላና።
- 25 ኢንቴ ታና ዶጊዳ ጊሻሲኔ  
ዎርዶ ጸሳታን  
አማኔቲዳ ጊሻስ  
ኢንቴ ሳማይኔ  
ኢንቴ ቃዳይ ሃይሳ።
- 26 ኢንቴ ካሎቴላ  
ቤታናሼ ጋካናስ  
ታኒ ኢንቴ ማይኦ ቃራዳ  
ኢንቴ ሲጎል ካማና።
- 27 ኢንቴ ዙሞቡላታ ቦላኔ

ዴምባን ኦሊዳ ሃራሲዛ ኦሶ  
 ታኒ ቤኣዲሰ፤  
 ኢንቴ ላይማቴላኔ ኢንቴ ዚታ  
 ሃኖታ ታ ቤኣዲሰ፤  
 ዩሩሳላሜ ኔሰ ኣዬ ኣና!  
 ኔኒ ኣይዴ ጋካናሰ  
 ኔ ቱናቴላፌ  
 ጌዮንታ ዳኔ?» ጌሰ።

## 14

ኮሻ፥ ጋፋኔ ኦላ

- 1 ጎዳይ ኮሻ ጊሻሰ ኤርማሳሰ  
 ዮቴዳ ቃላይ ሃይሳፌ ካሊዛይሳ፤
- 2 «ዩሁዳ ቢታይ ዩኬሰ፤  
 ካታማቲካ ፖርቁ ጌቲሰ፤  
 ኣሳይ ቢታ ቦላ ኡቴዲ ጨጩሰ፤  
 ዩሩሳላሜፔካ  
 ዋሶይ ሴቴቲሰ።
- 3 ዱሬቲ ባንታ ኣይሌታ  
 ሃሉ ዱቃናሰ ከቴቲሰ።  
 ኢሰቲካ ሃላ ኦላይ  
 ዲዛሶ ቤቲሰ፤  
 ጊዶ ኣቲን ሃሉ ዴማቴና፤  
 ባንታ ኦቶ ሜላ  
 ቶኪ ኤኪዲ ሲማቴሰ።  
 ዩላቲዲኔ ሂዶታ ቃንጺዲ  
 ባንታ ሁኤ ጉሉንቴቲሰ።
- 4 ኢራይ ቡኮንታ ጊሻሰ  
 ቢታይ ሜሊዲ ዛኤሰ።  
 ጎሻንቻቲ ዩላቲዲ  
 ባንታ ሁኤ ጉሉንቴቲሰ።
- 5 ማታይ ባይንዳ ጊሻሰ  
 ቆርኬይ ባ ዩሊዳ ማራ  
 ዴምባን ዩጋዳ ባጩሰ።
- 6 ሃርዲዳቲ ኣይኮይ ባይንዳ  
 ዙምቡላታ ቦላ ኤቂዳ፤  
 ዋራካናታ ማላ  
 ሃሉ ኮዪዲ ሌሶቴቲሰ።

- ኢስታስ ሚዛ ሚሺ  
 ጳይዳ ጋሶን ኢስታ ኣይፌይ  
 ጸላናስ ዳቡርዴስ» ጊዴስ።
- 7 ኣሳይ፥ «ኣቤት ጎዳዉ!  
 ኔ ሲንፋፌ ባቃታ ዳርሲዶስ፤  
 ኔ ሱንፋ ጊሻስ  
 ኑስ ኢሲ ሚሽ ኦላ፤  
 ኑኒ ኔፔ ዳርቲ  
 ጉዬ ሲሚዶስ፤  
 ኔ ቦላን ናጋራ ኦሊዶስ።
- 8 ኣቤት ኢስራኤል ሂዶታዉ!  
 ሜቶ ዋዴ ኣሺዛይሶ!  
 ኔኒ ቢታን ኢማላ ማላ፥  
 ኢሲ ኦማርስ ኣቂዲ ቢዛ  
 ኦጌ ኣሳ ማላ ኣይስ ሃናይ?
- 9 ኔኒ ሃኒዛዚ ጳይዳ ኣሳ ማላ፥  
 ኣሻናስ ዋልቃይ ጳይዳ  
 ኦላንቻ ማላ ኣይስ ጊዳይ?  
 ኣቤት ጎዳዉ!  
 ኔኒ ኑ ጊዶን ዳሳ፤  
 ኑኒካ ኔ ሱንፋን ጸይጌቲዶስ፤  
 ኑና ኔኒ ኣጎፋርኪ!» ጊዴስ።
- 10 ሃ ኣሳታ ጊሻስ ጎዳይ፥  
 «ኢስቲ ቶይላቴቴል ኬሂ ዶሴቴስ፤  
 ባንታ ቶሆ ናጌቴና።  
 ሄሳ ጊሻስ ጎዳይ  
 ኢስታን ኡፋዬቴና፤  
 ሃኢ ኢዚ ኢስታ ቆሆ ቆፔስ፤  
 ኢስታ ናጋራ ጋሶን  
 ኢስታ ቃጸዬስ» ጌስ።
- 11 ሄሳፌ ጉዬ ጎዳይ ታና፥  
 «ሃ ዴራ ሎኦቴላስ ዋሶፋ።
- 12 ኢስቲ ጸሚ ዋሲኮካ  
 ታኒ ኢስታ ዋሶ ሲዪኬ፤  
 ጸጌቲዛ ያርሾኔ  
 ካላ ያርሾዛ  
 ኢስቲ ያርሺኮካ  
 ታኒ ኢስታ ያርሾዛ ኤኪኬ።

ታኒ ኢስታ ማሻን፥  
ኮሻኒኔ ኢታ ሃርጌን  
ቆይሳና» ጌዴሰ።

13 ሂስቲን ታኒ፥ «አቤት ኡባፌ ዋልቃማ ጎዳዉ! አዬ አና! ናቤቲ ኢስታስ፥ ለኢንቴ ኦላ ቤኤኬታ ዋይኮ ኮሻይ ኢንቴና ዴማና፤ ታኒ ኢንቴስ ዉርሴል ጋካናሰ ሳሮቴል ኢማና» ጌቴሰ» ጋዲሰ።

14 ሂስቲን ጎዳይ ታስ፥ «ናቤቲ ታ ሱንላን ዋርዶ ዮቴቴሰ። ታኒ ኢስታ ኪታቤኬ፥ አዛዛቤኬ፥ ኢስታሰካ ዮታቤኬ። ኢስቲ ኢንቴሰ ዋርዶ አጁታ፥ ሙሬኖ ዮኦ፥ ሃዳ ዮኦኔ ባንታ ዋዚናን ዲዛ ባሌላ ዮኦ ዮቴቴሰ።

15 ሄሳ ጊሻሰ ታ ኪቶንታ ዲሺን፥ ሉላይኔ ኮሻይ ሃ ቢታይ ቦላ ዬና» ጌዲ ታ ሱንላን ዋርዶ ቲንቢቴ ዮቴዛ ናቤታ ታኒ ኦላኒኔ ኮሻን ቆይሳና።

16 ቃሴ ኢስቲ ቲንቢቴ ዮቴዳ ዴሬይካ ኮሻኒኔ ኦላ ጋሶን ዬሩሳላሜ ዱቡሻታን ኩንዳና፤ ኢስታስ፥ ኢስታ ማቼታ፥ ኢስታ አቱማ ናይታኔ ማጫ ናይታ አሃ ሞጊዛይ ቆያና፤ ታኒ ኢስታ ሞሮ ማላ ኢሻታ ቦላ ቂጻቴ ኤሃና» ጌዴሰ።

17 ሃ ቃላ ኢስታስ፥  
« ሩታ ዴሬይ  
ኬሂ ዴሹቴዲ  
ማዲንጺዳ ጊሻሰ፥  
ታ አይፌቲ ኦማርሲኔ  
ጋላሰ ሼሞፖንታ አፋንጾቴሰ።

18 ታኒ ጋጸሬ ቢኮ፥  
ማሻን ሃይቂዳይታ ቤአይሰ፤  
ካታማ ጌሊኮ  
ኮሻይ ዉርሲዳይታ ቤአይሰ።  
ናቤቲኔ ቄሴቲ  
ባ ኤርንታ ዴሬ ባቃቲዳ፥  
ጌሰ ጎዳይ» ጌዴሰ።

19 አቤት ጎዳዉ!  
ኔኒ ዩሁዳ ሙሌካ አጋዲ?  
ጲዮኔ አሳ ሃራሴታዲ?  
ኔኒ ኩና ፓጽንታ ማላ  
ኦላዳ አይሰ ዴቻዲ?  
ኔኒ ሳሮቴል ናጊዶሰ፤  
ጌዶ አቲን ሳሮቴል  
ዴሚቤኮ፤

«ፓጻና ዋዴይ ያና»  
 ጊዲ ናጊደሰ፤  
 ጊደ አቲን ዳጋማ ጸላ ጊዲዴሰ።

20 አቤት ጎዳዉ!  
 ኑኒ ኑ ኢታቴላ ኤሪዶሰ፤  
 ኑ አዋታ ቆሆካ አኬኪዶሰ፤  
 ቱማፔካ ኔ ቦላ  
 ናጋራ ኦሊደሰ።

21 ኑና ኔ ሱንላ ጊሻሰ  
 ጋዳ ካጵፓርኪ!  
 ኔ ቦንቾ አራታ ካዉሾፋ።  
 ኔኒ ኑናራ ጫቄቲዳ  
 ጫቆዛ ቆፓ፤  
 ኔ ጫቂዳ ቃላ ሞፓ።

22 ካዋቴላታ ኤቃ ጸሳቲ  
 ኢራ ቡኪሳና ዳንዳይዞ?  
 ሳሎቲ ባ ሼኔን  
 ፑሴ ዱጌ ዬዳናሰ ዳንዳይዞ?  
 ዳንዳይቲና፤  
 አቤት ኑ ጎዳዉ!  
 ሄሳ ኡባ ኦላና  
 ዳንዳይዛይ ኔና፤  
 ሄሳ ጊሻሰ ኑኒ ኔናን  
 ሂዶታ ኦሶሰ።

## 15

ዩሁዳ አሳ ቦላ ጋካና ፒርዳ

1 ሄሳፌ ጉዬ ጎዳይ ታሰ፡ «መሳይኔ ሳሜሊ ታ ሲንላን  
 ኤቂዳኮካ ታ ዋዚናይ ሃ ዴራሰ ሚሼቴና፤ ኢሰታ ታ ሲንላፌ  
 ዲጋ፤ ኢሰቲ ቤቶ።

2 ቃሴ ኢሰቲ ኔና፡ «ኑኒ አዋ ቢኖ?» ጊ ኦይቺኮ፡  
 ኔ ኢሰታሰ፡ «ሃይቆሰ  
 ፒርዴቲዳይቲ ሃይቃና፤  
 ማሻሰ ፒርዴቲዳይቲ  
 ማሻን ሹኬታና፤

ኮሻስ ፒርዴቲዳይቲ  
ኮሻን ወራና፤  
ዲኤታናስ ፒርዴቲዳይቲ  
ዲኤቲ ባና።)

3 «ጎዳይ፥ ታኒ ኦይዱ ቆሞ ባሽ ኢስታ ቦላ ኤሃና፤ ሄይቲካ ኢስታ ዋዳናስ ማሻ፥ ኢስታ ኦሃ ጎቻናስ ካናታ፥ ኢስታ ኦሾዛ ሚዲ ዳይሳናስ ሳሎ ካፎታኔ ሳኦ ዶኦታ።

4 ሂዘቂያሳ ና፥ ዩሁዳ ካዎ ሚናሴይ ዩሩሳላሜን ኦሴዳ ፓላ ጊሻስ ታኒ ኢስታ ቦላ ሳኦ ካዎቴላታ ኡባስ ዳጋንፊዛዝ ኦላና፤ ጌስ ጋዳ ዮታ» ጊዴስ።

5 «ሃኔ ዩሩሳላሜ!  
ኔስ ኦኔ ቃዴታናይ?  
ኔስ ሚሼታናይ ኦኔ?  
ኔ ሎኤቴላ  
ጌሊ ኦይቻናይ  
ኦኔ?» ጌስ።

6 «ኔ ታና ኦጋዳሳ፤  
ጉዬ ጉዬ ባሳ፤  
ሄሳ ጊሻስ ታኒ ኔ ቦላ  
ታ ኩሼ ዳንላዳ  
ኔና ዳይሳና፤  
ሃይሳፌ ጉዬ ኔስ ቃዴቲኬ።

7 ታኒ ኢስታ ካል ሱራጊዛ ማላ  
ሱራጋዳ ካታማታ  
ፔንጌን ላላና፤  
ኢስቲ ባ ኦጌፔ  
ሲሞንታ ኦጊዳ ጊሻስ  
ታኒ ታ ዴሬዛ ካዮን ኩንላና፤  
ኢስታ ቦላካ ባሽ ኤሃና።

8 ታኒ ኢስታ ኦሞኤታ ቆዳ  
ኦባን ዲዛ ኦጩፔካ ዳርሳና፤  
ሚኖ ኦዬታ ዳይሲዛዝ  
ሴታ ጋላስ ታ ኢስታ ቦላ ኤሃና፤  
ኢስቲ ቆፖንታ ዲሺን  
ዳጋማኔ ሺሮ  
ታ ኢስታ ቦላ ዩጋና።

- 9 ላፑን ናይቲ ሃይቂዳ ኣያ  
 ዳጋማን ዳቡራና፤  
 ፔኖራ ጳያና  
 ኢዚሰ ጋላሳይ ቃማና፤  
 ኢዛ ዩላታናኔ ካዉያና፤  
 ኣቲዳይታካ ሞርኬታ ማሻሰ  
 ኣሓ ኢማና» ጌሰ ጎዳይ።

ኤርማሲ ባ ሜቶ ጎዳሰ ማጋኒዴሰ

- 10 ታ ኣዬ! ሃኖ ፖራ!  
 ታኒ ኣሰ ኡባሰ ኦሻሲኔ  
 ፓላማሰ ጊዳና ማላ  
 ኣይሰ ታና ዩላዲ?  
 ታኒ ኦናሰካ ታልኤ ኢማቤኬ፤  
 ኦናፔካ ታልኤ ኤካቤኬ፤  
 ጊዶ ኣቲን ኣሲ ኡባይ  
 ታና ቃንጌሰ።  
 11 ጎዳይ፡ «ቱማፔ ታኒ ኔና  
 ሎኦ ሚሻሰ ኣሻ ኤካና፤  
 ቱማፔ ኔ ሞርኬቲ  
 ሜቶ ዎዴኔ  
 ዎዬ ዎዴ  
 ኔና ሾባና ማላ  
 ታኒ ኦላና።

- 12 ኣሲ ቢራታ፡ ፑዴሃ ባጋፌ ዩዳ ቢራታ  
 ዎይኮ ጸርቂማላ  
 ሜንላና ዳንዳይዜ?

- 13 ኔ ዴሬ ኡባን ኦሴቲዳ  
 ናጋራ ጊሻሰ  
 ኔ ኣቆታ ኡባ ዲኢዛይታሰ  
 ጮ ኣሓ ኢማና።

- 14 ታ ሃንቆይ ኢንቴ ቦላ  
 ታማ ማላ ኤጸና፤  
 ሄሳ ጊሻሰ ኔኒ  
 ኔ ኤሮንታ ቢታን  
 ኔ ሞርኬታሰ  
 ታኒ ኔና ኣይሌሳና» ጊዴሰ።

- 15 አቤት ጎዳዉ! ኔ ኤራሳ።  
 ታና ቆፓ፤ ሞካካ ያላ፤  
 ታና ዬዴሊዛይታ ቦላ  
 ሃሎ ኬሳ፤  
 ኔ ዳንዳያንቻ ጊዲዳ  
 ጊሻሰ ታና ቆይሶፋ፤  
 ኔ ጋሶን ታና ጋኪዛ ካጼዛ  
 ኔ ቆፓ።
- 16 አቤት ኡባፌ  
 ዋልቃማ ጎዳዉ!  
 ታኒ ኔ ሱንፋን  
 ዴይጌቲዳ ጊሻሰ  
 ኔ ቃላይ ታኮ ዪን ማዲሰ፤  
 ሂሰቲን ኔ ቃላይ ታሰ ፓሽካኔ  
 ዋዚና ኡፋይሰ አሚዴሰ።
- 17 ጉፒዛይታራ ኡታቤኬ፤  
 ኢሰታራካ ጉፓቤኬ።  
 ኔኒ ኔ ኩሼ ታ ቦላ  
 ዴንሊዳ ጊሻሰኔ  
 ኔ ሃንቆ ታ ቦላ ዬዲዳ ጊሻሰ  
 ታኒ ታርካ ኡታዲሰ።
- 18 ታ ቦላ ሃርጌይ አይሰ ሚኒዴ?  
 ታ ማዲንፋይ  
 አይሰ ዳሪ ዳሪ ቢዴ?  
 አይሰ ፓጾንታ ኢጲዴ?  
 ኔኒ ታሰ ባሌሊዛ  
 ሻፋ ማላኔ  
 ጨሚዛ ፑልቶ ማላ  
 አይሰ ጊዳዲ?
- 19 ሄሳ ጊሻሰ ጎዳይ፥  
 «ኔኒ ሲሚኮ ታ ኔና  
 ዛራ ኤሳና፤  
 ኔካ ታሰ ኦፋና።  
 ሃዳ ዮኦ አጋዳ  
 ቦንቾ ቃላ ጸላ ሃሳይኮ  
 ኔኒ ታ ዶና ጊዳና።  
 ኢሰቲ ኔኮ ሲማና ኦቲን  
 ኔ ኢሰታኮ ሲማካ።

- 20 ታ ኔና ሃ ዳራስ  
 ገምቤ ኦላና፤  
 ጸርቂማላፔ ኦሴቲዳ  
 ገምቤ ማላ ሂስታና፤  
 ታኒ ኔና ኣሻናሲኔ  
 ዋላ ኤካናስ  
 ኔናራ ዲዛ ገሻስ  
 ኢስቲ ኔናራ ኦሌታና ሺን  
 ኔና ጸኔቴና።
- 21 ኢታታ ኩሼፔ ታኒ ኔና ዋዛና፤  
 ማንጾ ኢታታ ቆሆፔካ  
 ታ ኔና ኣሻና» ጌሰ።

## 16

### ባሻ ጋላስ

- 1 ጎዳ ቃላይ ታኮ ዩዲ፥  
 2 «ኔኒ ሃይሳን ማቾ ኤኮፋ፤ ኣቱማ ናካ፥ ማጫ ናካ ዩሎፓ»  
 ጌዴሰ።  
 3 ሃ ቢታ ቦላ ዩሌቲዛ ኣቱማ ናይታኔ ማጫ ናይታ ገሻስ፥  
 ኢስታ ዩሊዳ ኣይታኔ ኣዋታ ገሻስ ጎዳይ፥  
 4 «ኢስቲ ኢታ ሃርጌን ሃይቃና፤ ኢስታስ ዩሆይ ዴና፤ ሞኅካ  
 ሞጌቴቴና፤ ኢስታ ኣሃይ ቢታ ቦላን ቡራ ማላ ዩጌቲ ኣታና፤  
 ኢስቲ ማሻኒኔ ኮሻን ዉራና፤ ኢስታ ኣሃይ ሳሎ ካፎታሲኔ ዋራ  
 ዶኣታስ ቆማ ጌዳና» ጌዴሰ።  
 5 ጎዳይ ታስ፥ «ታኒ ታ ኣንጆዛ፥ ታ ሲቆዛኔ ታ ማርቴላ ሃ  
 ዳራ ቦላፌ ዴንላዲስ፤ ሄሳ ገሻስ ዩሆ ኬላ ጌሎፓ፤ ዩካናሲኔ  
 ካዮታናስ ሄ ቦፓ።  
 6 ዱሬቲኔ ማንቆቲ ሃ ቢታይ ቦላ ሃይቃና፤ ኢስቲ ሞጌቴቴና።  
 ኢስታ ዩሆይካ ዩኬቴና፤ ኢስታስ ባ ቦላ ቃጫናይ ዴና፤ ባ ሁኤካ  
 ቡጫናይ ዴና።  
 7 ካዮቲዛይታ ሚንፊላናስ ሾቕ ኤሃናይ ዴና፤ ቃሴካ ኣዋይ  
 ሃይቂዳ ዋይኮ ኣያ ሃይቂዳ ኣስ ሚንፊላናስ ሾቕ ኡሹ ኤሃናይ  
 ዴና።  
 8 «ጊቢራይ ዲዛ ኬላካ ጌሎፓ፤ ማናሲኔ ኡያናስ ኢስታራ  
 ኢሲፌ ኡቶፋ።  
 9 ታኒ ኢስራኤሌ ጸሳይ ኡባፌ ዋልቃማ ጎዳይ፥ ሂኮ፥ ታኒ  
 ኡፋይሲኔ ኢሊሊሳ ጨንጉርስ፥ ሚሺራዛ ጨንጉርሲኔ ሚሺራይ

ጩንጉርሲ ሃይሳፌ ታ ዲጋና፤ ሄሳ ኢንቴ ዋዴን ኢንቴ ኢንቴ ኣይፌራ ቤኣና፤ ጌሰ።

10 «ኔኒ ሃ ቃላ ኡባ ሃ ኣሳሰ ዮቲዛ ዋዴ ኢሰቲ ኔና፤ ሳዳይ ኣይሰ ሃይሳ ማላ ጌታ ባሽ ኑ ቦላ ኣዋጂዴ? ኑኒ ኣይ ዋሪዶኒ? ጎዳ ኑ ጸሳሰ ኣይ ናጋራ ኦሒዶኒ?» ጌ ኦይቻና።

11 ሄ ዋዴ ኔኒ ኢሰታሰ፤ ሳሳ ኢንቴ ኣዋቲ ታና ኣጊዳ ጊሻሳ፤ ኢሰቲ ኤቃ ጸሳታ ካሊዲ ኢሰታሰ ኦሒዳ ጊሻሳ ኣይኒዳ ጊሻሳ፤ ታና ኣጊ ባቃቲዲ ታ ዋጋ ናጎንታ ኢጲዳ ጊሻሳ፤

12 ኢንቴ ካሴ ኢንቴ ኣዋታፔካ ኣጲዳ ኢታ ኦሒዳ ጊሻሳ፤ ቤኢቲ፤ ኢንቴ ኢሶይ ኢሶይ ኢንቴ ዋዚና ኢታቲላ ካሊዳታ፤ ታሰካ ኣዛዜቶንታ ኢጲዳታ።

13 ሄሳ ጊሻሰ ታኒ ኢንቴና ሃ ቢታይፌ ዴንላዳ ኢንቴ ዋይኮ ኢንቴ ኣዋቲ ኤርንታ ቢታ ኤፋ ኦላና፤ ሄን ኢንቴ ኤቃ ጸሳታሰ ጋላሲኔ ኦማርሰ ጎይናና። ታኒ ሙሌካ ኢንቴሰ ቃጴቲኬ፡ ጋና» ጌዴሰ።

#### ዲኤቲላፌ ሲሞ

14 ጎዳይ፡ «ሄሳ ጊሻሰ ኣሳይ፡ ሲሰራኤሌ ኣሳ ጌብጾ ቢታፌ ኬሲዳ ጎዳይ ቤዪን» ጌዲ ጫቆንታ ዋዴይ ያና።

15 ጊዶ ኣቲን ኢሰራኤሌ ኣሳ ፑዴሃ ባጋ ቢታፌኔ ኢሰታ ኢዚ ላሊዳ ቢታታ ኡባፌ ዛሪዲ ኤሂዳ ጎዳይ ቤዪን» ጌዲ ጫቆና ዋዴይ ያና፤ ጋሶይካ ታኒ ካሴ ኢሰታ ኣዋታሰ ኢሚዳ ጸንጾ ቢታን ዛሪዳ ኢሰታ ኤሃና» ጌሰ።

#### ያና ቂጸቲ

16 ጎዳይ፡ «ሃኢ ጌዲኮ ታኒ ሞሌ ኦይኪዛ ዳር ኣሳታ ኪታና፤ ኢሰቲካ ኦይካና። ሄሳፌ ጉዬ ታኒ ዳር ሻንካቲዛ ኣሳታ ዬዳና፤ ኢሰቲካ ዙማቲ ዲዛሶፔ፤ ዙሞቡላቲ ዲዛሶፔኔ፤ ዛላታ ጎንጎሎፔ ሻንካቲዲ ኦይካና።

17 ታ ኣይፌይ ኢሰታ ኦጌ ኡባ ቤኤሰ፤ ኢሰቲ ታፔ ጌሜቲና፤ ኢሰታ ናጋራይካ ታ ኣይፌፔ ጌሚቤና።

18 ኢሰቲ ታ ቢታ ኣሃ ማላ ጌዲዳ ሃራሲዛ ኤቃ ጸሳታን ቱኒሲዳ ጊሻሳኔ ታ ጸንጾካ ዬላቺዛ ሚሻታን ኩንሒዳ ጊሻሰ ታኒ ኢሰቲ ኦሒዳ ቆሆዛ ጊሻሳኔ ናጋራ ጊሻሰ ናሞኡ ኩሼ ቃጸያና» ጌሰ።

#### ኤርማሳ ዋሳ

19 ታሰ ሚኖቴሒኔ ሚጸ ጌዳዳ

- ሜቶ ጋላስ ታ ሺቃ  
 አቲዛሶ ጊዲዳ ጎዳዉ!  
 ካዎቴላቲ ሳኣ ጋጸፔ ኔኮ ዪዲ፥  
 «ካሴ ኑ አዋቲ  
 ባና አይኮካ ማዶንታ  
 ኤቃ ጸሳታስ ጎይኒዳ።
- 20 አሲ ባስ ጸስ  
 ሜቶናስ ዳንዳይዜ?  
 ኤ ዳንዳይናሺን  
 ኢስቲ ሜቶዛይቲ  
 ቱሙ ጸስ ጊዴቴና! » ጋና።
- 21 ጎዳይ፥ «ሄሳ ጊሻስ  
 ሃኢ ታ ኢስታ ታ ዎልቃኔ  
 ታ ጊታቴስ ታማርሳና፤  
 ኢስቲካ ታ ሱንላይ  
 ጎዳ ጊዲዳይሳ ኤራና» ጌስ።

## 17

- የሁዳይ ኦሊዳ ናጋራ ጊሻስ ኢሜቲዳ ቂጻቴ
- 1 ጎዳይ፥ «የሁዳ ናጋራይ  
 ቢራታ ቢኢሬኒኔ  
 ሆጼ አልማዜ ጸራን ጸፊቲዴስ፤  
 ኢስታ ዎዚና ቦላኔ  
 ኢስቲ ያርሺዛሶን ዲዛ  
 ካጩታ ቦላ ጸፊቲዴስ።
- 2 ኢስታስ ናይቲካ ኦቶንታ ጨሊላ  
 ሚላታ ጋርሳኒኔ  
 ቆቃ ዙምቡላታ ቦላ ዲዛ  
 ያርሾሶታኔ  
 አሽፎ ጌቲቲዛ  
 ኤቃ ሚሰሌዮ ቆፔቲስ።
- 3 ኔ ቢታን ኦሴቲዳ ናጋራ ጋሶን  
 ዙማታ ቦላኔ  
 ዙምቡላታ ቦላ ዲዛ  
 ኔ አቆታ፥  
 ኔ ዴሬቴሊኔ ኔ ጎይኖሶታ  
 ታኒ ዲኦስ አላ ኢማና።
- 4 ኔ ሞሮ ጋሶን

ታ ኔሰ ኢሚዳ ጸንጾዛፔ  
 ኔ ሜላ አታና፤  
 ኔና ታኒ ኔ ኤሮንታ ቢታን  
 ኔ ሞርኬታስ ኣይሌሳና።  
 ጋሶይካ ሜርናሰ  
 ታማ ማላ ኤጲዛ  
 ታ ሃንቆዛ  
 ኔ ዴንፊላዳሳ» ጌሰ።

ዱማ ዱማ ሌሚሶታ

- 5 ጎዳይ፥ «ኣሳን ኣማኔቲዛይ፥  
 ኣሾ ማይኢዳ ኣሳን ጨቁቲዛይ፥  
 ባ ዋዚና ጎዳፔ  
 ሃሲዛይ ቃንጌቲዳዴ።
- 6 ኢዚ ባዘን ዲዛ  
 ቄሪ ዋራ ማላ ጊዳና፤  
 ኢዚ ሎኦ ሚሽ ቤኤና፤  
 ኢዚ ኣሲ ባይንዳ ማጺኔ ቢታን  
 ባዘን ሜላ ሶሆን ኡታና።
- 7 ጊዳ ኣቲን ጎዳን ኣማኔቲዛ ኣሲ፥  
 ኢዚ ኣማኔቲዛይ  
 ጎዳ ጊዲዳዴይ ኣንጃቲዳዴ።
- 8 ኢዚ ሃላ ላንቄን ቶኬቲዲ፥  
 ባ ጸጸ ዱጌ ሃላን ዬዲዳ  
 ሚላ ማላ።  
 ኣዋ ሴላሰካ ያዬና፤  
 ኢዛ ሃይላይ  
 ጨሊሊዳ ማላ ዳና፤  
 ኣዋይ ዳሪዳ ላይሊካ ባቤና፤  
 ኣይፌ ኢሞፔካ ፓጩና።
- 9 ኣሳ ዋዚናይ ኡባ ሚሻፌካ ጌኔ፤  
 ኢዛሰ ፓጽቲሊካ ዴና፤  
 ኢዛ ኤራናሰ ኦኒ ዳንዳያኔ?
- 10 ታኒ ጎዳይ ኣሰ ኡባሰ  
 ኢዛ ኦጌ ማላኔ  
 ኢዛ ኦሶ ማላ ኢማናሰ  
 ኣሳ ዋዚና ፒልጋይሲኔ

ኢዛ ካሃ ፓጫይሰ» ጌሰ።

- 11 ቤሶንታ ኦጌራ ኣቆታ ዳጋሲዛ ኣሲ  
ባ ጵቂሶንታ ጨዬ

ሃጽዛ ኩራቾ ማላ።

ኢዛ ላይላይ ቡሮ ባጋቲሺን

ኢዚ ኣቆታ ኣጊ ባና፤

ወርሴላን ኢዛ ኤያቴሌ

ቆንጨፍ ከዛና።

- 12 ኑ ጸሳ ከሌ ዲዛሶይ  
ቤኒፔ ደሚዲ ጵቁ ጊዳ

ቦንቾ ኣራታ።

- 13 ኢሰራኤሌስ ሂደታ ጊዲዳ ጎዳዉ!

ኔና ኣጊ ቢዳ ኡባይ ዬላታና፤

ኔና ዴኦ ሃላ ፑልቶ ጊዲዳ

ጎዳ ኣጊዳ ጊሻሰ

ባ ኣይፌሶ ኔፔ

ሃራሶ ዛሪዛይቲ

ጉዲላ ቦላ

ጸፊቲዳይሳ ማላ ጊዳና።

ኤርማሳ ዎሳ

- 14 ኣቤት ጎዳዉ! ታና ፓላ፤

ታኒካ ፓጸና፤

ታና ኣሻ፤

ታኒካ ኣታና፤

ጋሶይካ ታ ጋላታይ ኔና።

- 15 ኣሳይ ታና ዛሪ ዛሪዲ፥

«ጎዳ ቃላይ ኣዋን ዲዜ?

ኣኔ ሃኢ ፖሌቶ!» ጌቴሰ።

- 16 ሄንላንቻ ጊዲዳ

ኔሰ ኦላናፔ

ጉዬ ጋቤኬ፤

ታ ኢሰታሰ ኢታ ጋላሰ

ኣሞቶንታይሳ ኔ ኤራሳ፤

ታ ዶናፔ ከዚዛይሲ

ኔ ሲንላን ቆንጨፍ።

- 17 ታና ዳጋንሊዛዴ ጊደፓ፤  
ኔኒ ታስ ሜቶ ጋላስ  
ታ ባቃታ ኣቲዛሶሆ።
- 18 ታና ዩዴሊዛይቲ ዩላቴቶ፤  
ታና ዩላሶፓ፤  
ኢስቲ ዳጋሜቶ፤  
ጊደ ኣቲን ታና ዳጋማፔ ቆታ፤  
ኢስታ ቦላ ኢታ ጋላስ ኤሃ፤  
ኢስታ ቦላ ዳኮ ባሽ ኤሃ።

### ሳምባታ ቦንቾ

- 19 ጎዳይ ታና፡ «የሁዳ ካዎቲ ካታማ ጌሊዛሶኒኔ ከዚዛሶ ዴራ ፔንጌኒኔ ሃራ ዩሩሳላሜ ፔንጌታ ኡባን ባዳ ኤቃ።
- 20 ሂስታዳ ኢስታስ፡ «ሃ ፔንጌታራ ጌሊዛ የሁዳ ካዎቶ! የሁዳ ኣሳቶ! ዩሩሳላሜን ዲዛ ኣስ ኡባቶ ጎዳ ቃላ ሲጽቴ!» ጋ» ጌሰ።
- 21 ጎዳይ ታስ፡ «ሳምባታ ጋላስ ቶሆ ቶኪዲ ዩሩሳላሜ ፔንጌታራ ጌሎንታ ማላ ኢንቴስ ናጌቲቴ!
- 22 ሳምባታ ጋላሳን ኢንቴ ከፋፌ ቶሆ ቶኪዲ ከሶፍቴ፤ ዎይኮ ኣይኮ ኦሶኔ ኦፋፍቴ። ካሴ ኢንቴ ኣዎታ ታኒ ኣዛዚዳ ማላ፡ ሳምባታ ጋላስ ዲማሲዲ ቦንቾቴ።
- 23 ኢስቲ ጊዲኮ ሲጸቤቴና፤ ዎዚናንካ ዎሲቤቴና፤ ኢስቲ ሲዮንታ ማላኔ ሲሞንታ ማላ ባ ዎዚና ሙሚሲዳ።
- 24 ጊደ ኣቲን ኢንቴ ታኒ ጎዳይ ዮቲዛይሳ ናጌቲ ኣዛዘቲኮ፡ ሳምባታ ጋላሳን ኣይ ሚሸካ ቶኪዲ ሃኖ ሃ ካታማይ ፔንጌታራ ጌሎንታ ኣጊኮ፡ ሳምባታ ጋላስ ዲማሲዲ ኢዛን ኣይ ኦሶኔ ኦፋንታ ቦንቾኮ።
- 25 ዳዊቴ ካዎቴፋ ኣራታን ኡቲዛ ካዎቲኔ ኢስታ ሹሜቲ ሃ ካታማይ ፔንጌራ ጌላና፤ ኢስቲ ባ ፓራታኒኔ ባ ፓራ-ጋሬታ ቦላ ኡቲዲ የሁዳ ኣሳይኔ ዩሩሳላሜ ኣሳይ ኣዣቢን ያና፤ ሃ ካታማያ ሜርናስ ኣሲ ዲዛ ካታማ ጊዳና።
- 26 ኣሳይ ጹጌቲዛ ያርሾኔ ሃራ ያርሾ፡ ካፋ ያርሾ፡ ኤጻኔኔ ጋላታ ያርሾ ኤኪዲ፡ የሁዳ ካታማታፔ፡ ዩሩሳላሜ የሾን ዲዛ ሞፋታፔ፡ ቢኒያሜ ቢታፌ፡ ጋታፔኔ ጌዜፌ ቃሴካ ኔጌቤ ቢታፌ ጎዳ ከፊ ያና።
- 27 ጊደ ኣቲን ኢንቴ ሳምባታ ጋላሳታ ዲማሶንታ ኢጲዲ ሳምባታ ጋላስ ቶሆ ቶኪዲ ዩሩሳላሜ ፔንጌታራ ጌሊዲ ታ

አዛዙ ሚንፊኮ ታኒ ዬሩሳላሜ ፔንጌታ ቦላ ኢዚ ሚጸታ ሚዛ ቶኦንታ ታማ ታ ኤፋና» ገደሰ።

## 18

ማና ኬፋን ኤርማሳ

1 ጎዳ ማታፔ ኤርማሳኮ፥

2 «ዴንዳዳ ማናሶ ባ፤ ሄን ታ ኔሰ ታ ኪታ ዮታና» ገዛ ቃላይ ዪደሰ።

3 ታኒካ ዱጌ ማናዛሶ ባዲሰ፤ ኢዚ ባ ሜጲዛ ኢርዞ ቦላ ኦቶ ሜጲሺን ቤኣዲሰ።

4 ኢዚ ሜጲሺን ኦቶዚ ኢዛ ኩሼን ሞሬቴደሰ፤ ሂሰቲን ኢዚ ሄ ኡርቃ ዛሪዲ ባ ኮዪዳ ማላ ሜጲደሰ።

5 ሄ ዋዴ ጎዳ ቃላይ፥

6 «ኢሰራኤል አሳዉ! ማናዚ ኦፊዛይሳቶ ታ አንቴና ኦፋናሰ ዳንዳይኪና? ኢሰራኤል አሳዉ! ኡርቃይ ማና ኩሼን ዲዛይሳቶ አንቴካ ታ ኩሼን ዴታ።

7 ታኒ ኢሲ ዴሬይ ዋይኮ ኢሲ ካዋቴል ሾዴታና ማላ፥ ላሌታና ማላኔ ጳያና ማላ ዮቲኮ፥

8 ሄ ታኒ ዮቲዳ ካዋቴላይ ባ ኢታቴላፌ አገዲ ሲሚኮ፥ ታኒ ኢሰታ ቦላ ኤሃና ገዳ ኢታ ሚሽ ኤሆንታ አጋጋና።

9 ቃሴ ሃራ ዋዴካ ታኒ ኢሲ ዴሬ ዋይኮ ኢሲ ካዋቴል ሚንፋ ኤሳናሰ ዮቲኮ፥

10 ታ ሲንፋን ኢታ ሚሽ ኦፊኮኔ ታሰ አዛዜቶንታ ኢጸኮ፥ ታ ኢዛሰ ኦፋና» ገዳ ሎኦ ሚሻ ኡባ አቶንታ አጋጋና» ጌሰ።

11 ጎዳይ፥ «ሄሳ ገሻሰ፥ ኤርማሳ ሃኢ ዩሁዳ አሳታሲኔ ዬሩሳላሜን ዲዛይታሰ ባዳ፥ ሂኮ ታኒ አንቴ ቦላ ባሽ ገገሶ ቦላ ዳይሰ፤ አንቴ ቦላ ኢታ ሚሽ ሜጳሺ ዳይሰ፤ ሄሳ ገሻሰ አንቴ ኡባይካ አንቴ ቢዛ ኢታ ኦጌፔ ሲሚቴ፤ አንቴ ኦጌኔ አንቴ ኦሶ ሱሪሲቴ» ጋ ዮታ።

12 ገዶ አቲን ኢሰታሰ፥ «ዳቡርፓ፤ ኦ ሃልቹዳ ኦጌራ ባና፤ ኦኒ ኢሶይ ኢሶይ ኦ ኢታ ዋዚና ቆፋ ካላና» ጌቴሰ» ገደሰ።

13 ሄሳ ገሻሰ ጎዳይ፥

«አኔ ካዋቴላታ፥

ሃይሳ ማላ ሚሽ

አንቴ ገዶን ሴቴቲ ኤሪዜ?»

ገ አይቹቴ።

ጌላኦያ ኢሰራኤልይ ሃራሲዛ

ኢታ ሚሽ ኦላዲስ።

- 14 ሹቶ ጸላ ጊዲዳ  
 ሊባኖሴ ዙማታ  
 ቦላፌ ሻቺ ጳዪ ኤሪዜ?  
 ላዴ ቦላፌ ዲጌ ጎጊዛ  
 ኢርጸ ሃሊ  
 ጎጌሰ ኣጊ ኤሪዜ?  
 15 ታ ዴሬይ ጊዲኮ ታና ባሊዴስ፤  
 ኢስቲ ጎኦንታ ጸላታስ  
 ኤጸኔ ጨዋሴቴስ፤  
 ባንታ ኦጌራ ቢዲ ጳጳቲዳ፤  
 ቤኒ ኦጌፔ ካሬ ኬዚዳ፤  
 ባሴቶንታ ዲዛ ኩንዱኩርጮ  
 ኦጌራ ቢዳ።  
 16 ኢስታ ቢታይ ቡላኔ  
 ማርናስ ካጴቲዳዝ ጊዳና፤  
 ሄራ ኣጲዛ  
 ኡባይ ማላሌታና፤  
 ባ ሁኤካ ቂጲሼ ቃፋና።  
 17 ኣርሼይ ሞኪዛ ባጋ ጫርኮ ማላ  
 ታኒ ኢስታ ኢስታ  
 ሞርኬታ  
 ሲንላን ላላና።  
 ኢስቲ ጳይዛ ጋላስ ታ ኢስታስ  
 ዞኮ ዛራና ኣቲን  
 ታ ኣይፌሶ ቤሲኬ» ጌሰ።

ኤርማሳ ቦላ ማቄቲዳ ማቆ

- 18 ኢስቲካ፥ «ኣኔ ሃ ዪቴ፤ ኤርማሳ ቦላ ማቄቶስ፤ ዋጋይ  
 ቄሴታ ኣቻን፥ ዞሬይ ኣጼ ኤራንቻታ ኣቻን፥ ቃላይካ ናቤታ ኣቻን  
 ጳዬና፤ ኣኔ ሃ ዪቴ፤ ኑ ኢንጸርሳን ኢዛ ቶቾስ፤ ኢዚ ጊዛይሳካ  
 ኡባ ሲዮኮ» ጊዳ።  
 19 ኣቤት ጎዳዉ! ታ ጊዛዝ ሲያ፤  
 ታ ሞርኬቲ ታ ቦላ  
 ሃሳይዛይሳ ኤዘጋ።  
 20 ሎኦ ኦሉዳዴስ ኢታ ዛሪዞ?  
 ኢስቲ ጊዲኮ  
 ታስ ኦላ ቦኪዳ፤  
 ኔ ሃንቆይ ኢስታፌ ሲማና ማላ

ኔ ሲንላን ኤቃዳ  
ኢሰታ ጊሻሰ  
ታ ዮቲዳይሳ ቆፓ።

- 21 ሄሳ ጊሻሰ  
ኢሰታ ናይታ ኮሻሲኔ  
ማሻሰ ኣላ ኢማ፤  
ኢሰታ ማጫሳቲ ማይኔኔ  
ኣሞኤታ ጊዴቶ፤  
ኢሰታ ኣቱማሳቲካ  
ፓራ ሃይቆን ዉሬቶ፤  
ኢሰታ ናቴላ ናይቲ  
ኦላሶን ማሻሰ ጊዴቶ

- 22 ኢሰቲ ታና ኩንዲሳናሰ  
ኦላ ቦኪዛ ጊሻሲኔ  
ታ ቶሆሰካ ዎጺማዴ  
ዎሲዳ ጊሻሰ  
ኢሰቲ ቆፖንታ ኔኒ ኢሰታ ቦላ  
ቦንቁዛይታ ዬዲን  
ኢሰታ ኬላን ዋሶይ ኬዘ።

- 23 ጊዶ ኣቲን ኣቤት ጎዳዉ!  
ኢሰቲ ታና ዎጳናሰ ማቄቲዳይሳ  
ኡባ ኔኒ ኤራሳ፤  
ኔኒ ኢሰታ ኢታቴላ  
ኣቶ ጎፓ፤  
ዎይኮ ኢሰታ ናጋራ  
ኔ ሲንላፌ ቁጮፋ፤  
ኢሰቲ ኔ ሲንላን  
ጸኔቲዲ ኩንዴቶ፤  
ኔ ሃንቆ ጋላሰ  
ኔ ኢሰታ ማሮፓ።

## 19

ሌሚሶስ ሜቂዳ ጎምቦ

- <sup>1</sup> ጎዳይ ኤርማሳሰ፡ «ባዳ ማናፔ ጎምቦ ሻማ፤ ሂሰታዳ ኔናራ  
ዴሬ ጨማታፔኔ ቄሴታፔ ጉላታ ኤካዳ፤

2 ኮንኣ ሜቆ ፔንጌ ኣቻራ ኣታዳ ሄኖሜ ና ሾባ ባ፤ ሄን ታኒ ነስ የቲዛ ቃላ ኣዋጅ።

3 ሲንቴኖ የሁዳ ካዎቶ! ዩሩሳላሜን ዲዛ ዴሬዘ! ጎዳ ቃላ ሲዩቴ! ኡባፌ ዋልቃማ ጎዳ ኢስራኤል ጸሳይ፡ ሲያናስ ሃይላስ ኢቲዛ ሚሽ ሃ ቢታ ቦላ ታኒ ኤሃና።

4 ጋሶይካ ኣሳይ ታና ኣጊዲ ሃይሳ ሃ ሶሆዛ ኤቃ ጎይኒዛሶሆ ኬሲዴስ፤ ኢስቲ ጊዲን ዋይኮ ካሴ ኢስታ ኣዋቲ፥ ዋይኮ የሁዳ ካዎቲ ኤርንታ ኤቃ ጸሳታስ ያርሺዳ፤ ሃይሳ ሃ ሶሆዛን ጸሎ ሱላ ፕሲዳ።

5 ቃሴ ታኒ ኢስታ ኣዛዘንታይሳ፥ ዋይኮ ኢስታስ የቶንታይሳ፥ ዋይኮ ታ ዋዚናን ቆፖንታይሳ ባንታ ኣቱማ ናይታ ባኣሌስ ታማን ጸጊ ያርሻናስ ጎይኒዛሶሆ ዙዋቡላታ ኦሊዳ።

6 ሄሳ ጊሻስ ኣሳይ ሃ ሶሆዛ ሹካ ሾባ ጋናፔ ኣቲን ቶፊቴ ዋይኮ ሄኖሜ ና ሾባ ጊ ጸይጎንታ ዋዴይ ያና።

7 « ሃ ሶሆን የሁዳ ሃልቾኔ ዩሩሳላሜ ሃልቾ ታ ላላና፤ ኢስቲ ባንታ ሞርኬታ ማሻኒኔ ባንታና ዋቆናስ ኮይዛይታ ኩሼን ሃይቃና ማላ ታኒ ኦላና፤ ኢስታ ኣሃ ሳሎ ካፎታሲኔ ዋራ ዶኣታስ ቁማ ሂስታ ኢማና።

8 ታኒ ሃ ካታማዮ ሙሌራ ቆይሳና፤ ሚቻሰካ ኬሳና፤ ኢዚ ማታራ ኣቋዛ ኣሳይ ኡባይ ሃኖ ፓላ! ጊ ቂቋ ካኣና።

9 ኢስቲ ባንታ ማጫ ናይታ ኣሾኔ ባንታ ኣቱማ ናይታ ኣሾ ማና ማላ ታኒ ኦላና፤ ኢስታ ዋቆናስ ኮይዛ ኢስታ ሞርኬቲ ኢስታ ጊዶሊን ኢስቲ ኡባይ ኢሶይ ኢሳ ኣሾ ማና፤ ጌስ።

10 «ሄሳፌ ጉዬ ኔናራ ኢሲፌ ቢዳ ኣሳታ ሲንላን ሄ ጎምቦዛ ሜንላ።

11 ሂስቲዲ ኢስታስ ኡባፌ ዋልቃማ ጎዳ ጸሳይ፥ ማናዛ ጎምቦይ ሜቂዳይሳሴ ሲሚ ኮሌታና ዳንዳዮንታይሳላ ታኒ ሃ ካዎቲላኔ ሃ ካታማ ሄሳላ ኦላና፤ ኣሳይ ኣሃ ሞጊዛሶይ ባይንዳ ጊሻስ ቶፊቴን ሞጋና።

12 ታኒ ሃ ሶሆዛኒኔ ኢዛን ዲዛ ኣሳ ቦላ ሄሳላ ኦላና፤ ታኒ ሃ ካታማዮ ቶፊቴ ማላ ኦላና።

13 ባንታ ኬላ ካራ ቦላ ሳሎ ሜጴቴላታስ ኤጳኔ ጨዋሲዲኔ ኤቃ ጸሳታስ ኡሹ ሺሺዳይቲ ዩሩሳላሜ ኣሳ ኬላቲኔ የሁዳ ካዎታ ኬላቲ ቶፊቴ ማላ ቱናና፤ ጌስ። \*

19:2 2ካዎ 23:10፤ ኤር 7:30-32፤ 32:34-35    19:5 ለዌ 18:21    \* 19:13 ኬላ ካራ ቦላ ኤጳኔ ጨዋሶይ ኢስራኤል ኣሳይ ባ ኬላ ቦላ ፖቄ ማላ ኦሊዲ ያርሾ ሺሺዛ ዋጋ።

14 «ሄሳፌ ጉዬ ኤርማሲ ጎዳይ ቲንቢቴ የታናሰ ኪቲዳ ቶፌቴ፤ ሲሚ ዩዲ ጎዳ ኬላ ዱቡሻን ኤቂዲ፤

15 ኡባፌ ዋልቃማ ጎዳ ኢሰራኤል ጸሳይ፤ ሳቢቴ! ኢሰቲ ባንታ ዋዚና ሹቻሲዲ ታ ቃላ ሲየንታ ኢጲዳ ጊሻሰ ታኒ ሃ ካታማ ቦላኔ ኢዛ ማታን ዲዛ ሞሳታ ኡባ ቦላ ኤሃና ጊዳ ኢታ ሚሽ ኡባ ኢሰታ ቦላ ኤሃና ጋይሰን ጌሰ» ጊዳሰ።

## 20

### ኤርማሳኔ ፓሽኩሬ

1 ሄ ዋዳ ጎዳ ኬላን ኢሜሬ ና ቄሴ ፓሽኩሬይ ኤርማሲ ቲንቢቴ የቲሺን ሲዩዲ፤

2 ናቤ ኤርማሳ ሾጪዳሰ፤ ጸሳ ኬላፌ ፑዳ ባጋራ ዲዛ ቢኒያሜ ገምቤ ፔንጌ ቦላ አግሪሞቄን ቃቺዳሰ።

3 ዋንቴላ ጋላሰ ፓሽኩሬይ ኤርማሳ ቃሾፔ ቢርሺን ኤርማሲ ኢዛሰ፤ «ሃቺፌ ዶሚን ጎዳይ ኔ ሱንሐ ማጎርሚሳቢቤ \* ጋና አቲን ፓሽኩሬ ጌና።

4 ጋሶይካ ጎዳይ፤ ሓኒ ኔና ኔ ላጌታ ኡባ ዳጋማሰ አላ ኢማና፤ ኢሰቲ ኔኒ ጸሊሺን ባንታ ሞርኬታ ማሻን ወራና፤ ታኒ ዩሁዳ አሳ ኡባ ባቢሎኔ ካዋ ኩሺን አላ ኢማና፤ ኢዚ ኢሰታ ዲኢዲ ባቢሎኔ ኤፋና፤ ሂሰቲዲ ሄን ኢሰታ ማሻን ሲፋና።

5 ሃ ካታማይ አቆታ፤ ኢዛ ኦላ ዳሚዳ ኡባ፤ ዩሁዳ ካዋታ አቆታኔ ኢሰታሰ ዲዛ አልኦ ሚሽ ኡባ ታኒ ኢሰታ ሞርኬታሰ አላ ኢማና፤ ኢሰቲካ ዲኢ ኤኪዲ ባቢሎኔ ኤፋና።

6 ፓሽኩሬ! ኔኒኔ ኔ ሶሆን ዲዛ ኡባይካ ዲኤቲዲ ባቢሎኔ ባና። ኔኒኔ ኔ ኢሰታሰ ዋርዶ ቲንቢቴ የቲዳ ኔ ላጌቲ ኡባይ ሄን ሃይቃናኔ ሞጌታና ጌሰ» ጊዳሰ።

### ኤርማሳ ዙዙንሐ

7 አቤት ጎዳዉ!

ኔኒ ታና ጨማዳሳ፤

ታኒካ ጨሜታዲሰ።

ኔኒ ታፔ ኬሃ ሚናዳ

ታና ጸናዳሳ።

ጋላሰ ኩሜሐ ታኒ አሳሰ

\* 20:3 ማጎርሚሳቢቤ፡ ማጎርሚሳቢቤ ጌቲቲዛይሳ ኢብራቂታ ቃላ ቢርሹሐ ኡባ ሚሻንካ ዳጋማ ጉሳ።

- ሚቻስ አታዲስ፤  
 ኡባይካ ታና ቂጼስ።  
 8 ታኒ ሃሳይዛ ዋዴ  
 ኡባን ዋሳይስ፤  
 «ሺርኔ ባሽ» ጋ አዋጃይስ፤  
 ሄሳ ጊሻስ ጎዳ ቃላይ  
 ታስ ኩሜላ ጋላስ ታ ቦላ  
 ጫሽኔ ቂጼ ኤሂዴስ።  
 9 ታኒ፥ «ሃይሳፌ ጉዬ  
 ጎዳ ሱንላ ዴንሊኬ፤  
 ኢዛ ሱንላንካ  
 ሃሳይኬ» ጊኮ  
 ኢዛ ቃላይ ታ ዋዚና ጊዶን  
 ታማ ማላ፥  
 ታ ሜቄላ ጊዶንካ  
 ሱርቁንቶ ማላ ጊዱዴስ፤  
 ሄሳ ጊሻስ  
 ታ ካማ ኦይካናስ ጸኒዴስ፤  
 ሙሌራካ ኤቄታናዉ  
 ዳንዳያቤኬ።  
 10 «ኡባሶን ሺርይ ዴስ፤  
 ሂሊቲ ኣኔ ኑኒካ ሂሎስ» ጊዱ  
 ዳርቲ ሳሱኬቲሺን ታ ሲያዲስ፤  
 ታ ኩንዴላ ናጌቲሼ ዱዛ  
 ታ ላጌቲ ኡባይ፥  
 «ኦኔ ኤሪዛይ  
 ባሌታና ዳንዳይዛኮ  
 ሂሰቲኮ ኑኒ ኢዛ ጸናናኮኔ  
 ኑ ሃሎ ኬሳናኮ» ጌቲስ።  
 11 ጊዶ አቲን ጎዳይ ያሺሲዛ  
 ቶራ ቃራ ማላ ታናራ ዴስ፤  
 ሄሳ ጊሻስ ታና ዩዴሊዛይቲ  
 ቆጶታና አቲን ታና ጸኔቴና፤  
 ኢሰቲ ኢታ ካዉሽ ካዉያና አቲን  
 ኢሰታስ ጊጌና፤  
 ኢሰታ ካዉሻቲላይ  
 ሙሌካ ዶጌቲና።  
 12 ኣቤት ኡባፌ

- ዋልቃማ ጎዳዉ!  
 ጸሎዛ ፓጪዛይሶ!  
 ዋዚናኔ ካሃ  
 ፒልጋ ጸሊዛይሶ!  
 ታኒ ታ ሞቶ ኔሰ  
 አላ አሚዳ ጊሻሰ  
 ኔኒ ኢሰታ ቦላ ሃሎ ኬሲሺን  
 ታ አይፊን ቤአናሰ ታና ጋላ።
- 13 ጎዳሰ ዩጲቴ!  
 ኢዛሰ ጋላታ ሺሺቴ፤  
 ኢዚ ሜቶታንቻታ ሸምፖ  
 ኢታታ ኩሼፔ አሼሰ።
- 14 ታኒ ዩሌቲዳ ጋላሳያ  
 ቃንጌቲዳሮ ጊዱ!  
 ታ አዩያ ታና ዩሊዳ  
 ጋላሳያ አንጃቱፋ!
- 15 ታ አዋሰ፥ «ኔሰ ሚሺራቾ፤  
 ኔሰ አቱማ ናይ ዩሌቲዳሰ!»  
 ጊ ዮቲዳይ ቃንጌቲዳዳ ጊዶ!
- 16 ሄሳዴይ ጎዳይ ቃጴታይ ባይንዳ  
 ሺሬቺ ዩጊዳ  
 ካታማታ ማላ ጊዶ፤  
 ማላዶ ዋሶ፥ ጋላሳ ሴታን  
 ኦላ ሺሮ ሲዮ።
- 17 ታ አያ ታሰ ዱፎ ጊዳና ማላ፥  
 ኢዚ ኡሎይ ታሰ ሜርና  
 ዱሳሶ ጊዳና ማላ  
 ታና ሄን አይሰ ዋጲቤኔ?
- 18 ታኒ ሜቶኔ ጨጨ ቤአናሲኔ  
 ታ ዴኦ ላይላ ኡባ  
 ካዉሻቲላን  
 ዉርሳናሰ ታ አዩ ኡሎፔ  
 አይሰ ኬዛዲና?

## 21

ዩሩሳላሜ ጸኔቴላ ጊሻሰ ዮቴቲዳ ቲንቢቴ

1 የሁዳ ካዎ ሴዴቂያሲ ማልኪያ ና ፓሽኩሬኔ ማኢሳያ ና ቄሴ ሶፎናሳ ኤርማሳኮ ኪቲዳ ዎዴ ጎዳ ቃላይ ኤርማሳኮ ዪዴስ።

2 ኪቲቲዳይቲካ፥ «ባቢሎኔ ካዎ ናቡካዳናጾሬይ ባ ኦላንቻታራ ሃ ካታማ ጊዶሊዳ ጊሻስ ኣኔ ኑስ ጎዳ ኦይቻ። ጎዳይ ቤኒይሳ ማላ ማላሊሲዛ ኦሶ ኑ ጊሻስ ኦሊዲ ኢዛ ጉዬ ዛራናኮ ኦኒ ኤሪዜ» ጊ ኦይቹዳ።

3 ኤርማሲ ጊዲኮ ኢስታስ፥ «ቢዲ ሴዴቂያሳስ፥

4 ሳዳ ኢስራኤል ጸሳይ ኔና ጊምቤዛፔ ካሬ ባጋራ ዶዲ ኡቲዳ ባቢሎኔ ካዎኔ ኢዛ ኦላንቻታ ኦላናስ ኢንቴ ኩሼን ኢንቴ ኦይኪዳ ኦላ ሚሻ ታኒ ኢንቴ ቦላ ጉዬ ዛራና። ኢስታ ሃ ካታማዮ ዛራ ጌልፋና።

5 ታኒ ታ ሁኤራ ቂጻቴስ ዴንሊዳ ኩሼኒኔ ሚኖ ቄሴን፥ ሃንቆኒኔ ባሻን፥ ጊታ ቦሻን ታ ኢንቴና ጫዳና።

6 ታኒ ሃ ካታማይን ዲዛ ኣሳኔ ሜሃ ሾጫና፤ ኢስቲካ ኢታ ሃርጌን ዉራና።

7 ሄሳፌ ጉዬ የሁዳ ካዎ ሴዴቂያሳኔ ኢዛ ሹሜታ፥ ኢታ ሃርጌፌ፥ ማሻፌኔ ኮሻፔ ኦቲዳ ዴራ ባቢሎኔ ካዎ ናቡካዳናጾሬሲኔ ኢስታ ዎፋናስ ኮይዛ ሞርኬታስ ታኒ ጎዳይ ኣላ አማና። ኢዚ ኢስታ ቃራ ማሻን ዎፋና፤ ኢስታ ማሬና፤ ኢስታስ ሚሼቴናኔ ቃፌቴና) ጌስ» ጊቲ።

8 ጎዳይ ኤርማሳ፥ «ጉጃዳካ ሃይሳ ዴራስ፥ ሳዳይ ሄኮ ታኒ ኢንቴ ሲንፋን ዴኦ ኦኒኔ ሃይቆ ኦኒ ዎፋዲስ።

9 ሃኖ ሃ ካታማይን ታኪዛ ኡባይ ማሻን፥ ኮሻኒኔ ኢታ ሃርጌን ሃይቃና፤ ጊዶ ኦቲን ካታማይፔ ኬዚ ቢዲ ካታማ ዶዲ ኦይኪዳ ባቢሎኔ ኣሳታስ ባ ኩሼ ኢሚዳ ኣሲ ባ ሸምፖ ኣሻናኔ ዴኦን ዳና።

10 ታኒ ሃ ካታማስ ሎኦ ኦፋናስ ጊዶንታ ኢታ ኦፋናስ ቃቻዲስ፤ ኢዛ ባቢሎኔ ካዎስ ኣቆ ኢሜታና፤ ኢዚካ ኢዛ ታማን ጹጋና) ጌስ።

11 «ቃሴካ የሁዳ ካዎ ኬፋ ኣሳስ፥

ሳዳ ቃላ ሲዩቲ!

12 ኢንቴኖ ዳዊቲ ሶ ኣሳዉ!

ኢንቴ ኦሊዳ ኢታ ኦሶ ጋሶን

ኤጺን ኦኒካ ቶይሳና

ዳንዳዮንታ ታማ ማላ

- ታ ሃንቆይ አንቴ ቦላ  
 ኤጸንታ ማላ  
 ዋንታን ዋንታን ሱሬ ፒርዲቴ፤  
 ቦንቄቲዳይታ ኤንኤሊዛይታ  
 ኩሼፔ ኣሺቴ፤ ጌሰ ጋ።
- 13 ሳን ሸባፌ ፑዳ ባጋራ  
 ሹቲ ዳሪ ዲዛሰን ዲዛ  
 ዩሩሳላሜ!  
 ታኒ ኔ ቦላ ዳንዳዲስ፤  
 ኑ ቦላ ኦኔ ዳንዳና?  
 ኑ ኬል ኦኔ  
 ጸሊ ጌላና?<sup>1</sup> ገዛሬ!
- 14 ታኒ ኔና ኔ አሶ ማላ ቃጸያና፤  
 ታኒ ኔ ዋራን ታማ ዩዳና፤  
 ኢዛ ዩሾን ዲዛይሳካ  
 ኡባ ጸጋና፤ ጌሰ።

## 22

ኤርማሲ ዩሁዳ ካዎ ኬላ ኣሳሰ ዮቲዳ ቃላ

- 1 ጎዳይ፡ «ዱጌ ዩሁዳ ካዎ ሶ ባዳ፡  
 2 ሳኖ ዳዊቴ ካዎቴላ ኣራታ ቦላ ኡቲዳ ዩሁዳ ካዎ! ኔኒኔ ኔ  
 ሹሜቲ፡ ሃ ፔንጌታራ ጌሊዛ ኣሰ ኡባይ ጎዳ ቃላ ሲዩቴ፤ ጋ»  
 ጌሰ።
- 3 ጎዳይ፡ «ሱሬ ፒርዳኔ ጸሎ ኦሊቴ፤ ቦንቄቲዳይታ  
 ኤንኤሊዛይታ ኩሼፔ ኣሺቴ፤ ቤቴታ፡ ዩኦታኔ ኣምኤታ ቆሆፒቴ፤  
 ሃ ሶሆንካ ጸሎ ሱል ጉሶፍቴ።
- 4 ሃይታ ኣዛዘታ አንቴ ሎኤሊ ናጊኮ ዳዊቴ ካዎቴላ ኣራታ  
 ቦላ ኡቲዛ ካዎቲ ባ ሹሜታራኔ ባ ዳሬ ኣሳራ ፓራ-ጋሬኔ ፓራ  
 ቶጊዲ ሃይሳ ካዎቴላ ኬላ ፔንጌራ ጌላናኔ ኬዛና።
- 5 ጊዶ ኣቲን አንቴ ታ ኣዛዘታ ናጎንታ ኢጲኮ፡ ሳ ካዎቴላ  
 ኬላይ ሙሉራ ቋያና፤ ጋዳ ታኒ ታርካ ታናን ጫቃይሰ» ጌዳሰ።
- 6 ጎዳይ ዩሁዳ ካዎ ኬላሰ፡  
 «ኔኒ ታሰ ጋላኣዳ ቢታኔ  
 ሊባኖሴ ዙማ ጸራ ማላ  
 ሎኢኮካ ታኒ ኔና  
 ኣዳፌ ባዘኔ  
 ኣሲ ኢዛን ባይንዳ  
 ካታማ ኦላና።

7 ታኒ ኔና ኦሊዛይታ ሁኤን ሁኤን

ኦላ ሚሽ ኦይላዳ

ኔ ቦላ ዩዳና፤

ኢሰቲ ዚጋፔ ማሴቲዳ ቱቄታ

ቃንጾሬሊዲ ታማን ዩጋና።

8 «ዲማ ዲማ ካዎቲላፌ ዩዳ አሳይ ሃ ካታማይራ አጂ ቢሼ፥  
 ሳዳይ ሃኖ ጊታ ካታማዮ አይስ ሃይሳሉ ኦሊዴ?» ጊዲ ባ ጋርሳን  
 ሃሳዬታና።

9 «ኢሰቲ፥ ሳዳ ባንታ ጸሳራ ጫቂቲዳ ጫቆ አጊዲ ኤቃ  
 ጸሳታስ ጎይኒዳ ጊሻሲኔ ኢሰታስ ኦሊዳ ጊሻሳ ጋና» ጌሰ።

ኤርማሲ ሻሉሜ ጊሻሰ ዮቲዳ ቃላ

10 ሃይቂዳ ካዎ

ኢዮሲያሳስ ዩኮፍቲ

ዎይኮ ካዮቶፍቲ፤

ሄሳ አጊዲ ዲኤቲ ቢዳ

ሻሉሜስ ሚሼቲዲ ዩኪቲ።

ጋሶይካ ኢዚ ሙሌካ

ጉዬ ሰሜና፤

ባ ዩሌቲዳ ቢታ

ናሞአንሉ ቤኤና።

11 ባ አዋ ሶሆን

ዩሁዳን ካዎቲዲ ዲሼ

ሃ ሶሆፔ ቢዳ

ኢዮሲያሳ ና ሻሉሜ ጊሻሰ

ጎዳይ፥ «ኢዚ ሙሌካ

ጉዬ ሰሜና።

12 ኢዚ ዲኤቲ ቢዳ ቢታን

ሄን ሃይቃና፤

ሲሚ ዩዲ ሃ ቢታዮ ቤኤና።

ኤርማሲ ኢዮአቄሜ ጊሻሰ ዮቲዳ ቃላ

13 «ባ ካዎቲላ ኬላ

ጌኔን ኬጺዛይሳስ፥

ፒርዳ ጌላሲዲ

ፖቄ ኬጺዛይሳስ፥

አስ ጮ ሜላ ኦሲሲዛይሳስ፥

ኢዛ ዎልቃ ዋጋ ጨጎንታዴስ፥

- 14 ኢዚ፥ ርጊታ ፖቄኔ  
 ኣሆ ካዎቴላ ኬላ  
 ታሰ ኬጸና፡ ጊዛዴሰ  
 ኣዬ ኣና!  
 ኢዚ ባ ኬላሰ  
 ጊታ ማሰኮቴታ ኬሴሰ፤  
 ዚጋ ማላን ኣሌቂሴሰ፤  
 ዞኦ ቃላሚካ ቲዬሰ።
- 15 «ኔ ካዎቴላ ኬላ  
 ዳሮ ዚጋ ማላን ኬጸዳይሲ  
 ኔሰ ካዎቴዳ ማሳቲዜ?  
 ኔ ኣዋይ ሱሬ ፒርዳኔ  
 ጸሎ ኦሒዳ ጊሻሰ  
 ማዛዚኔ ኡዪዛዚ ፓጨዳ?  
 ኢዛሰ ኡባ ሚሺካ ኢንጃቲዳሰ።
- 16 ኢዚ ማንቆታሲኔ ማቶታንቻታሰ  
 ፒርዳ ጌላሲቤና፤  
 ሄሳ ጊሻሰ ኡባ  
 ሚሺካ ኢዛሰ ኤኖ ጊዴሰ፤  
 ታሰ ኤሮ ጉሲ ሄሳ ጊዴኔ?
- 17 ጊዶ ኣቲን ኔ ኣይፌይኔ  
 ኔ ዋዚናይ ሸምፒዳይ  
 ሃ ሄ ሸጮቾን  
 ዴሚዛ ጎኣን፥  
 ጸሎታ ሱላ ጉሶን፥  
 ኣሳ ኡንኤላኒኔ  
 ጌኔ ኦሶና» ጌሰ።
- 18 ሄሳ ጊሻሰ ጎዳይ  
 ዩሁዳ ካዎ ኢዮሲያሳ ና  
 ኢዮኣቄሜ ጊሻሰ፥  
 «ዎ ታ ኢሻዉ!  
 ዋይ ዋይ ታ ሚቹ!  
 ቃሴ፥ ርታ ጎዳዉ ዎ ዎ!  
 ኔ ጊታቴላ ዎ ዎ!»  
 ጊዲ ዚላሌቴና።

- 19 ሃሬይ ሞጌቲዛ ማላ  
 ኢዚ ሞጌታና፤  
 ኢዛ እሃይ ዩሩሳላሜ  
 ፔንጌታፔ ጎሼቲዲ  
 ካሬ ኦሌታና» ጌሰ።

### ዩሩሳላሜ ጊሻስ ኤርማሲ ዮቲዳ ቃላ

- 20 ጎዳይ ዩሩሳላሜ፥  
 «ፑዴ ሊባኖሴ ባዳ ዋሳ፤  
 ኔ ቃላካ ባሳኔን ሲሳ፤  
 አባሪሜን ኤቃዳ ዋሳ፤  
 ጋሶይካ ኔስ ኦላ ላጌቲ  
 ኡባይ ወሪዳ።
- 21 ኔኒ ሳሮ ዲሺን  
 ታ ኔስ ሚንላ ዮታዲስ፤  
 ጌዶ አቲን ኔኒ፥ (ሲዬኬ) ጋዳሳ።  
 ዩላጋቴላፌ ደሚን  
 ኔ ኦጌይ ሃይሳ፤  
 ኔኒ ታስ አዛዜቶንታ ኢጸዳሳ።
- 22 ኔ ሄንላንቻታ ኡባ  
 ጫርኮይ ኤፋና፤  
 ኔ ላጌቲ ኡባይ ዲኤቲ ባና፤  
 ኔ ኢታቴላ ኡባ ጋሶን  
 ዩላታና ካዉያና።
- 23 ሃኔ ሊባኖሴን ዲዛሬ!  
 ኔ ኬላ ዚጋ  
 ሚላፌ ኬጲዳሬ!  
 ሚጸይ ኦይኪዳ ማጫሳ ማላ  
 ሜቶይ ኔ ቦላ ዩሺን  
 ዋና ዋሳንዲ!» ጌሰ።
- 24 ጎዳይ፥ «(ታኒ ታ ዳኦን ጫቃይስ) ዩሁዳ ካዎ ኢዮአቄሜ  
 ና ኢኮኒያኔ ኔኒ ታስ ኡሻቻ ኩሼ ቃላባቲ ማታሜ ጊዲዳኮካ ታ  
 ኔና ኬሳ ኦላና።
- 25 ኔና ዋቆናስ ኮይዛይታስ፥ ኔኒ ያዩዛ ባቢሎኔ ካዎ  
 ናቡካዳናጾሬሲኔ ኢዛ ኦላንቻታስ ታኒ ኔና አላ ኢማና።

26 ታኒ ኔናካ ኔና ዩሊዳ ኔ አዬዮካ አንቴ ዩሌቶንታ አላጋ ቢታን ኦላ አጋና፤ አንቴካ ሄን ሃይቃና።

27 አንቴ ሲማናስ ላሞቲዛ ቢታዮ ሙሉካ ሲሜኬታ» ጌሰ።

28 ሃይሲ ኢኮኒያኔይ ካጴቲዲ

ሜቂዳ ኦቶ ማላ

አኒካ ኮዮንታ ሚሼ?

ኢዚኔ ኢዛ ናይቲ

አይስ ካሬ ኦሌቲ አቲዶ?

ኢስቲ ባ ኤሮንታ አላጋ ቢታን

አይስ ዩጌቲ አቲዶ?

29 ሃኔ ቢታዬ፥ ሃኔ ቢታዬ!

ጎዳ ቃላ ሲያ!

30 ጎዳይ፥ «የሁዳ አይሳናስ

አሲ ባይንዳ ጊሻስ፥

ዳዊቱ አራታን ኡታና

አሳዳይካ ኬኦንታ ጊሻስ፥

ኢሲ ፓጸ አሲ ኬዘንታ ጊሻስ

ኢዛስ ዴኦ ላይላ

ኡባን ኢንጃቶንታ

ጵንላ አስ ጊዲ ጸፍቱ» ጌሰ።

## 23

### ሲንላፌ ያና ሂዶታ

1 ጎዳይ፥ «ታ ሄንላሶሆን ዲዛ ታ ዶርሳታ ጳይሲዛይታሲኔ ላሊዛ ሄንላንቻታስ አዬ አና!» ጌሰ።

2 ጎዳ ኢስራኤል ጸሳይ ባ አሳ ሄሚዛ ሄንላንቻታስ፥ «አንቴ ታ ዶርሳታ ላሊዲ ዋራ ዩዲዳ ጊሻሲኔ አንቴ ኢስታ ሎኤላ ዬሎንታ አጊዳ ጊሻስ አንቴ ኢታቲላስ ቤሲዛ ቁጾቱ ታ አማና።

3 ሃሳፌ ጉዬ ታ ዉዴፔ አቲዳይታ ካሴ ታ ጎዳ ዩዲዳ ዴሬ ኡባፌ ታኒ ታርካ ሽሻዳ ካሴ ታ ሄሚዛሶሆ ዛራ ኤሃና፤ ኢስቲካ ሄሳን ዩሌቲዲ ጮራታና።

4 ታኒ ሎኤላ ሄሚዛ ሄንላንቻታ ኢስታስ ዴንላና፤ ኢስቲ ናሞአንላ ባቤቴና፤ ዴጋሜቴና፤ ኢስታፌ ኢሳዳይካ ጳይና» ጌሰ።

5 ጎዳይ፥ «ታኒ ዳዊቱስ ጸሎ ዛሬ

ዴንላና ዋዴይ ያና፤

ኢዚ ቱሙ ፒርዳኔ

ጸሎቴስ ኦሊዛዴ፥

- እጽ ኤራቴላን ሃሪዛ ካዎ ጊዳና።  
 6 ኢዛ ካዎቴላ ላይላን  
   ዩሁዳይ ኣታና፤  
   ኢሰራኤሌይካ ሳሮን ዳና፤  
   ኢዛ ሱንሲ፤  
   ናገዳይ ኩስ ጸሎቴላን ጌቴታና።  
 7 ሄሳ ጊሻስ ኣሳይ  
   ሃይሳፌ ጉዬ ኢዛ፤  
   «ኢሰራኤሌ ኣሳ ጊብጾ ቢታፌ  
     ኬሲዲ ኤሂዳ ጎዳይ ቤኢን»  
   ጊ ጫቆንታ ዋዳይ ያና ጌሰ ጎዳይ።  
 8 ጊዶ ኣቲን፤ «ኢሰራኤሌ ዛሬታ  
   ፑዴሃ ባጋ ቢታፌኔ  
   ኢዚ ኢስታ ላሊዳ ሃራ ዴሬታፔ  
   ኬሲዳ ዴኦ ጎዳይ ቤኢን»  
   ጊ ጫቃና ዋዳይ ያና፤  
   ሄሳፌ ጉዬ ኢስቲ  
   ባንታ ዴሬን ዳና» ጌሰ።

### ዋርዶ ናቤታ

- 9 ናቤታ ጊሻስ ታ ዋዚናይ ሜቂዴስ፤  
   ታ ሜቁላቲ ኡባይካ ኮኮሪዳ።  
   ጎዳ ጋሶኒኔ  
   ኢዛ ጌሻ ቃላ ጋሶን  
   ዋይኔ ኡሹ ኡዪዲ  
   ማላቲዛ ኣሳ ማላ ጊዳዲሰ።  
 10 ቢታያ ላይማን ጸላ ኩማዲስ፤  
   ቃንጌቲዳ ጊሻስ ዬካዉስ፤  
   ባዘን ዲዛ ሜሄ ሄንላሶሆቲ ሜሊዳ፤  
   ናቤቲካ ጌላ ኦጌ ካሊዳ፤  
   ባሰ ኢሜቲዳ ማታ  
   ዋጋይ ባይንዳ ጎኤቲዳ።  
 11 ጎዳይ፤ «ናቤቲ፤ ቁሴቲ  
   ጸሎቴላ ኦጌራ ቤቴና፤  
   ታ ኬላ ጋርሳንካ ኢስቲ  
   ኦሊዛ ኢታቴላ ታ ቤኣዲሰ።

- 12 ሄሳ ጊሻስ ኢስታ ኦጌይ ሃሊጸና፤  
 ኢስቲካ ቋማን ኩንዳና፤  
 ኢስቲ ጋንዲጋርዲ ኩንዳና፤  
 ኢስቲ ቃጸዬቲዛ ዋዴ  
 ታ ኢስታ ቦላ ፓላ ሚሽ ኤሃና።
- 13 ታኒ ሳማሪያን ዲዛ ናቤታ ቦላ  
 ኡፋይሶንታ ሚሽ ቤኣዲሰ፤  
 ኢስቲ ባኣሌ ሱንፋን  
 ቲንቢቴ ዮቲዳ፤  
 ታ ዴራ ኢስራኤሌካ ባሌሉዳ።
- 14 ዬሩሳላሜን ዲዛ ናቤታ ቦላ  
 ዴጸዛ ኢታ ሚሽ ቤኣዲሰ፤  
 ኢስቲ ላይማቴቲሰ፤  
 ዋርዶቴፋን ዴኤቴሰ፤  
 ኦኒካ ባ ኢታ ኦሶፔ  
 ሲሞንታ ማላ  
 ኢታታ ሚንፊቴሰ፤  
 ታ ማታን ኢስቲ ኡባይካ  
 ሶዶሜ ማላ፤  
 ኢዚን ዲዛ ኣሳይካ  
 ጋሞራ ማላ» ጌሰ።
- 15 ሄሳ ጊሻስ ኡባፌ ዋልቃማ ጎዳይ  
 ሃይታ ናቤታ ጊሻስ፤  
 «ዬሩሳላሜን ዲዛ ናቤታፔ  
 ቱና ሚሽ ኬዚዲ  
 ቤታ ኡባን ላሌቲዳ ጊሻስ  
 ታ ኢስታ ጫሞ ካል ሚዛና፤  
 ቃሴ ማርዜቲዳ  
 ሃል ኡሻና» ጌሰ።
- 16 ኡባፌ ዋልቃማ ጎዳይ፤  
 «ሃይቲ ናቤቲ ቲንቢቴ  
 ኢንቴሰ ዮቲዛይሳ ሲዮፒቴ፤  
 ኢስቲ ኢንቴና  
 ዋርዶ ሂዶታን ኩንፊቴሰ፤  
 ኢስቲ ጎዳፔ ጊዶንታ  
 ባፔ ሜጲ ኤኪ ዮቴቴሰ።

- 17 ታና ካጺዛይታ ኢስታስ፥  
 ሳዳይ ኢንቴስ  
 ሳሮ ጊዳና ጊዳስ፥ ጌቴስ፤  
 ባንታ ዋዚና ሙሜቱፋ  
 ካሊዛይታ ኡባ  
 ኢስታስ፥ ሳታ ሚሺ  
 ኢንቴና ጋኬና፥ ጌቴስ።
- 18 ኢዛ ቃላ ሲያናሲኔ ኣዛዜታናስ  
 ጎዳይ ዳኢዛ ሸቆን ኢስታፌ  
 ኦኔ ኤቃናይ?  
 ኢዛ ቃላ ኤዘጊ ሲዱዳይ ኦኔ?
- 19 ጎዳ ሃንቆይ ጎቴ ጫርኮ ማላ ዴንዳና፤  
 ሚኖ ዳሞባላይ  
 ኢታ ኣሳታ ሁኤ ሸጫና።
- 20 ኢዛ ዋዚና ቆፋ  
 ሙሌራ ፖሎንታ ዲሺ  
 ኢዛ ሃንቆይ ጮ ሃዳ ሲሜና፤  
 ጉዬፔ ዪዛ ላይፋታን ሃይሳ  
 ቆንጩን ኢንቴ ኤራና።
- 21 ሃይታ ሃ ናቤታ ታ ኪታቤኪ፤  
 ጊዶ ኣቲን ኢስቲ ባንታ ኪታ  
 ኤኪ ዋጼቴስ፤  
 ታ ኢስታስ ዮቶንታ  
 ቲንቢቴ ዮቴቴስ።
- 22 ኢስቲ ታ ዘሬን ኤቂዳኮ  
 ታ ቃላ ታ ዴራ ሲሳና፤  
 ኢታ ኦጌፔኔ ኢታ ኦሶፔ  
 ኢስታ ዛራና።
- 23 ታኒ ማታስ ጸላ ጸሴ?  
 ሃሆሰካ ጸስ ጊዲኪና?
- 24 ታኒ ቤኦንታ ማላ ጌማሶን  
 ቆቴቲ ኣታና ኣሲ ዲዜ?  
 ሳሎኔ ሳኣ ኩሚዳይ  
 ታና ጊዲኪና! » ጌስ ጎዳይ።
- 25 ጎዳይ፥ «ታኒ ኣጉሜታዲስ፤ ታኒ ኣጉሜታዲስ» ጊሺ ታ  
 ሱንፋን ዋርዶ ቲንቢቴ ሃሳይዛ ናቤታ ቃላ ሲያዲስ።
- 26 ሃ ዮኦይ ባንታ ዋዚና ባሌፉን ዋርዶ ቲንቢቴ ሃሳይዛ ናቤታ  
 ዋዚናን ኣይዴ ጋካናስ ጋሞኣኔ?

27 ኢስታ አዋቲ ባኣሌ ጌቴቲዛ ኤቃዛ ጋሶን ታ ሱንፋ ዶጊዳ ማላ፡ ኢስቲ ኢሶይ ኢሳስ ዮቲዛ አጉሞን ታ አሳይ ታ ሱንፋ ዶጋና ማላ ኦሊዳ ኢስታስ ሚሳቴስ።

28 አጉሜቲዛ ናቤይ ባ አጉማ ዮቶ፤ ታ ቃላይ ኢዛን ዲዛዴይ ጊዲኮ ሄ ቃላ አማኔቴላን ዮቶ፤ ሃፓሲኔ ካላ አይፌስ እይ ጋይቶቴሊ ዲዜ?

29 «ታ ቃላይ ታማ ማላኔ ሹቕ ቄሪዛ ናሪቃ ማላ ጊዴኔ?» ጌስ።

30 ጎዳይ፡ «ሄሳ ጊሻስ ቃላ ኢሶይ ኢሳፌ ካይሲ ካይሲ ኤኪዲ ታፔ ኤኪዳ ማላ ዮቲዛ ናቤታራ ታ ኤቁታይስ።

31 ባንታ ዶና ጨንጫቴላን፡ ሳዳይ ሂዝጌስ ጊዛ ናቤታራ ታ ኤቁታይስ» ጌስ።

32 ጎዳይ፡ «ታኒ ዋርዶ አጉሞ ካሊዲ ቲንቢቴ ዮቲዛ ናቤታራ ኤቁታይስ፤ ታ ኪቶንታ ዲሺን ዋይኮ ታ ሹሞንታ ዲሺን ጸላቴላን ዋርዶ ዮኦ ዮቴቴስ፤ ታ ዴሬዛካ ባሌፊቴስ፤ ሃይሳ ሃ ዴሬዛ አይኮካ ጎኤቴና» ጌስ።

### ዋርዶ ናቤታ ቲንቢቴ

33 ጎዳይ ታስ፡ «ሃ ዴሬይ፡ ዋይኮ ናቤይ፡ ዋይኮ ቄሴይ፡ ሳዳስ ቶሆ ጊዲዳይ ኣዜ?» ጊዲ ኦይቺኮ፡ ሳዳስ ቶሆይ ኢንቴና፤ ሄሳ ጊሻስ ታኒ ኢንቴና ዋራ ኦላና ጌስ ጋ ዮታ።

34 ናቤይ፡ ዋይኮ ቄሴይ፡ ዋይኮ እይ አሲካ፡ ሳይሲ ጎዳ ቶሆ ጊዲ ሃሳይኮ ታኒ ሄሳዴኔ ኢዛ ሶሆ አሳ ቃጸያና።

35 ኢሶይ ኢሶይ ባ ላጌ ዋይኮ ባ ዳቦ፡ ሳዳይ እይ ዛሮ አሚዴ?» ዋይኮ፡ ሳዳይ ዮቲዳይ ኣዜ?» ጊዲ ኦይቻናስ ቤሴስ።

36 ሃይሳፌ ጉዬን ጊዲኮ፡ ሳዳ ቶሆ ጊዲ ኢንቴ ሃሳያናስ ቤሴና። ጋሶይካ አስ ኡባስ ኢዚ ሃሳይዳ ቃላይ ኢዛስ ቶሆ ጊዲዛ ጊሻስ ዴኦ ጸሳ፡ ኡባፌ ዋልቃማ ጎዳ ኦ ጸሳ ቃላ ኢንቴ ቦኪሴታ።

37 ሄሳ ጊሻስ ናቤዛስ፡ ሳዳይ ኢንቴስ ኣይ ዛሮ አሚዴ?» ዋይኮ፡ ሳዳይ ዮቲዳይ ኣዜ?» ጋዳ ኦይቻናስ ቤሴስ።

38 ጊዶ አቲን ኢንቴ፡ ሳይሲ ጎዳ ቶሆ ጊኮ፡ ጎዳይ ታኒ ኢንቴና፡ ሳይሲ ጎዳ ቶሆ ጎፒቴ ጊንካ ኢንቴ፡ ሳይሲ ጎዳ ቶሆ ጊዴታ።

39 ሄሳ ጊሻስ ኢንቴና፡ ቃሴካ ኢንቴሲኔ ኢንቴ አዋታስ ታ አሚዳ ካታማይራ ጋላዳ ዬጋ ኣጋና፤ ታ ሲንፋፊካ ዋራ ኦላና።

40 ሜርናስ ዶጌቶንታ ሜርና ዩላቴሊኔ ካዉሻቴል ታ ኢንቴ ቦላ ኤሃና» ጊዴስ።

## 24

ኤርማሲ አጁታን ቤኢዳ ናምኡ ኬሼታ

1 ባቢሎን ካዎ ናቡካዳናጾሬይ ኢዮኣቄሜ ና፡ ዩሁዳ ካዎ ኢኮኒያኔኔ ኢዛ ሹሜታ፡ አናጾታኔ ዎጋጩታ ዩሩሳላሜ፤ ዲኢዲ ባቢሎን ኤፊዳ፤ ጉዬ ጸሳ ኬላፊ ሲንሳ ባጋራ ባላሴ ቴራይ ኢዛን ኩሚ ኡቲዳ ናምኡ ኬሼታ ጎዳይ አጁታን ታና ቤሲዴስ።

2 ኢሲ ኬሼዛን ሻቹ ጋኪዳ ኬሂ ሎኢዛ ባላሴ ቴራ ሚሳቲዛይ ዴስ። ናምኣንላ ኬሼዛን ሜቴቶንታ ማላ ዋሬቲዳ ኬሂ ኢታ ባላሴ ቴራይ ዴስ።

3 ጎዳይ ታና፡ «ኤርማሳ፡ ሄሲ ኔኒ ቤኢዛይ አዜ?» ጊዲ ኦይቹዴስ። ታኒካ፡ «ባላሴ ቴራ ቤኢዴስ፤ ሎኦ ቴራይ ኬሂ፤ ሎኦ፤ ጊዶ አቲን ኢታ ቴራይ ሜቴቶንታ ማላ ዋሬቲዳ ኬሂ ኢታ» ጋዲስ።

4 ቃሴካ ጎዳ ቃላይ ታኮ ዩዲ፡

5 «ጎዳ ኢስራኤል ጸሳይ፡ ሃይሳ ሎኦ ባላሴዛ ማላ ታኒ ሃይሳፊ ባቢሎን ቢታ ዩዲዳ ዩሁዳ፤ ዲኤቲዳይሳ ሎኦን ቆፓና።

6 ታኒ ሎኦ አይፊን ኢስታ ጸላና፤ ቃሴ ታኒ ኢስታ ዛራዳ ሃ ቢታ ኤሃና። ታ ኢስታ ጊጊሳና አቲን ላሊኬ፤ ታ ኢስታ ቶካና አቲን ሾዲኬ።

7 ታኒ ጎዳ ጊዲዳይሳ ኤሪዛ ዎዚና ኢስታስ ኢማና፤ ኢስቲ ባንታ ኩሜላ ዎዚና፤ ታኮ ሲማና ጊሻስ ኢስቲ ታ ዴሬ ጊዳና፤ ታኒካ ኢስታ ጸሰ ጊዳና።

8 « ሪዶ አቲን ጎዳይ፡ ሜቴቶንታ ኬሂ ኢታ ባላሴዛ ማላ ዩሁዳ ካዎ ሴዴቂያሳኔ ኢዛ ሹሜታ፡ ቃሴካ ዩሩሳላሜን ጨሻ አቲዳይታኔ ጊብጾን ዲዛይታ ታ ሂሳላ ኦላና።

9 ቢታ ቦላ ካዎቲላታ ኡባ ሲንሳን ሃራሴቲዛይታኔ ጫዬቲዳይታ ጊዳና፤ ኢስታ ላላ ዩዲዛሶ ኡባን ኢስቲ ቂዴስ፡ ለሚሶስ፡ ካዴሲኔ ቃንጌላስ ታ ኢስታ ኦላና።

10 ታኒ ኢስታሲኔ ኢስታ ኣዎታስ ኢሚዳ ቢታፊ ኢስቲ ሙሌራ ጳያና ጋካናስ፡ ማሻ፡ ኮሻኔ ኢታ ሃርጌ ኢስታ ቦላ ዩዳና፡ ጌስ» ጊዴስ።

## 25

## ላፑን ታሙ ዲኤቱላ ላይላታ

1 የሁዳ ካዎ ኢዮሲያሳ ና ኢዮአቄሜይ ካዎቲዳ ኦይዳንሉ ላይላን፤ ባቢሎኔ ካዎ ናቡካዳናጾሬይ ካዎቲዳ ኮይሮ ላይላን የሁዳ አሳ ኡባ ጊሻሰ ኤርማሳኮ ዪዳ ቃላይ ሃይሳ።

2 ናቤ ኤርማሲ የሁዳ አሳ ኡባሲኔ ዬሩሳላሜን ዲዛ ኡባታሰ።

3 «የሁዳ ካዎ አሞኔ ና ኢዮሲያሲ ካዎቲዳ ታማኔ ሄቸንሉ ላይላፌ ዶሚዲ ሃቶ ጋካናሰ ናሞኡ ታማኔ ሄቸ ላይላ ኩሜል ጎዳ ቃላይ ታኮ ዪዴሰ። ሂሰቲን ታኒካ ዛራ ዛራዳ ኢንቴሰ ዮታዲሰ፤ ጊዶ አቲን ኢንቴ ሲዮንታ ኢዲዴታ።

4 «ጎዳይ ባ አይሌ ጊዲዳ ናቤታ ኡባ ዛሪ ዛሪዲካ ኢንቴኮ ከቲዴሰ፤ ጊዶ አቲን ኢንቴ ኢሰታ ሲዮንታ ኢዲዴታ፤ ኢሰታሰካ ዉዲ ጎንታ ኢዲዴታ» ጊዴሰ።

5 ኢሰቲ፤ «ኢንቴ ኡባይካ ኢንቴ ኢታ ኦፔፔኔ ኢንቴ ኢታ ኦሶፔ ሃኢ ሲሚቲ። ሂሰቲኮ ጎዳይ ኢንቴሲኔ ኢንቴ አዋታሰ ሜሪ ሜርናሰ አሚዳ ቢታን ኢንቴ ዳና።

6 ኤቃ ጸሳታሰ ኦላናሲኔ ጎይናናሰ ካሎፍቲ፤ ቃሴ ኢንቴ ኩሼይ ኦሊዳ ሚሻን ታና ዪሎሶፒቲ። ሂሰቲኮ ታ ኢንቴ ቦላ ኢታ ኦሊኬ» ጊዳ።

7 ጎዳይ፤ «ኢንቴ ታና ሲዮንታ አጊዳ ጊሻሰ ኢንቴ ኩሼይ ኦሊዳ ሚሻ ኡባን ታና ሃንቄሊዴታ፤ ሂሰቲዲ ኢንቴ ቦላ ኢታ ሚሻ ኤሂዴታ» ጌሰ።

8 ሄሳ ጊሻሰ ኡባፌ ዋልቃማ ጎዳይ፤ «ኢንቴ ታ ቃላሰ አዛዜቶንታ ኢዲዳ ጊሻሰ።

9 ታኒ ፑዴሃ ባጋ ዴራ ኡባኔ ታ አይሌ ጊዲዳ ባቢሎኔ ካዎ ናቡካዳናጾሬ ጾይጋና። ሂሰታዳ ኢሰታ ሃ ቢታ ቦላ፤ ሃ ቢታን ዲዛ አሳ ቦላኔ ሄራን ዲዛ ካዎቲላታ ኡባ ቦላ ኤሃና፤ ታኒ ኢንቴና ሙሌራ ቆይሳና፤ ቃሴ ሜርናሰ አሲ ካፋዛኔ ቂፋዛ ቡላ ኬሳና።

10 ታኒ ኢሰታፌ ኡፋይሲኔ ኢሊሊሳ ጩንጉርሳ፤ ሚሺራዛኔ ሚሺራይ ጩንጉርሳ፤ ዋጸ ጊሪሲኔ ጾሞፔ ፖኦ ቆይሳና።

11 ሃ ቢታይ ሙሌራ ቡላኔ ካይሰ ጊዳና፤ ሃ ካዎቲላቲካ ባቢሎኔ ካዎሰ ላፑን ታሙ ላይላ ሃሬታና።

12 «ላፑን ታሙ ላይላይ ፖሌቲዳፔ ጉዬ ባቢሎኔ ካዎ፥ ኢዛ ዴራኔ ኢዛ ቢታ ሞሮ ጊሻስ ታኒ ቃጸያና፤ ኢስታ ቢታካ ሜርናስ ቡላ ኦላና።

13 ታኒ ሄ ቢታ ቦላ ሃሳይዳይሳ ኡባ፥ ሃ ማጸፋዛን ጸፊቲዳይሳ፥ ኤርማሲ ካዎቱላታ ኡባ ቦላ ዮቲዳ ቲንቢቲታ ኤሃና።

14 ባቢሎኔ ዴሬይ ዳሮ ካዎቱላታሲኔ ጊታ ካዎታስ ኣይሌ ጊዳና፤ ኢስታ ኩሼ ኦሶ ማላ ታ ኢስታስ ቃንጸና» ጌሰ።

### ጸሓ ሃንቆ

15 ጎዳ ኢስራኤሌ ጸሓይ ታስ፥ «ሃይሳ ታ ሃንቆ ዎይኔ ኡሻዚ ኩሚዳ ዋንጫ ሄይ፤ ኤፋዳ ታኒ ኔና ኪቲዛ ካዎቱላታ ኡባ ኡሻ።

16 ኢስቲ ኡዪዳ ዎዴ ጋንዲጋራና፤ ኢስታ ቦላ ታ ዬዲዳ ኦላ ጋሶን ኢስቲ ጎያና» ጊዴሰ።

17 ሂስቲን ታኒ ጎዳ ኩሼፔ ዋንጫ ኤካዳ ኢዚ ታና ኪቲዳ ካዎቱላታኮ ባዳ ኢስታ ኡሻዲሰ።

18 ሃቕ ሃኒዳይሳ ማላ ኢስቲ ቡላ፥ ኣሲ ሃራሴቲዛይታ፥ ካጺዛይታኔ ቃንጌቲዳይታ ጊዳና ማላ ዬራሳላሜኔ ዩሁዳ ካታማ ኣሳታ፥ ኢስታ ካዎታኔ ኢስታ ሹሜታ ኡባ።

19 ጊብጼ ቢታ ካዎ፥ ኢዛ ኣይሌታ፥ ኢዛ ሹሜታ፥ ኢዛ ዴራ ኡባ።

20 ሄን ዲዛ ዋላካ ዴራ ኡባ፥ ኡጼ ቢታ ካዎታ ኡባ፥ ፊሊሰጾሜ ካዎታ፥ ኣስቄሎናን፥ ጋዛን፥ ኣቃሮኔኒኔ ኣዛጾኔን ኣቲ ዲዛ ዴራ ኡባ።

21 ኤዶሜ፥ ሞኣቤኔ ኣሞኔ፥

22 ጲሮሴኔ ሲዶና ኣባፌ ሄ ፒንላ ጋጸን ዲዛ ካዎታ፥

23 ዳዳኔ፥ ቲማ፥ ቡዜኔ ባንታ ሁኤ ጋሜ ሜዲዛ ኣሳ ኡባታ፥

24 ኣራቢያ ቢታ ካዎታ ኡባኔ ባዞ ቢታን ዲዛ ዋላካ ዴሬ ካዎታ ኡባ።

25 ዘሚራ፥ ኤላሜኔ ሜዶኔ ካዎታ ኡባ ኡሻዲሰ።

26 ሃሆኒኔ ማታን ዲዛ ፑዴሃ ባጋ ካዎታ ኡባ፥ ታራን ታራን ቢታ ቦላ ዲዛ ካዎቱላታ ኡባ ኡሻዲሰ። ኢስታ ኡባፌ ጉዬ ባቢሎኔ ካዎይካ ኡያና።

27 ሄሳ ጊሻስ ጎዳይ ታና፥ «ኡባፌ ዎልቃማ ጎዳ ኢስራኤሌ ጸሓይ ኢንቴና፥ ሉዪቲ፤ ማፉቲ፤ ጮዪቲ ናሞኣንሶ ኢንቴ ዴንዶንታ ማላ ታ ኢንቴ ጊዶ ዬዲዛ ኦላ ሲንላን ኩንዲቲ» ጌሰ።

28 ጊዶ ኣቲን ኢስቲ ኔ ኩሼፔ ዋንጫ ኤኮንታኔ ኡዮንታ ኢጲኮ ኢስታስ፥ ሉባፌ ዎልቃማ ጎዳይ ኢንቴ ዶሶንታ ኡያና።

29 በኢቴ፤ ታ ሱንላይ ደይጌቲዳ ካታማዮ ታ ሳይሶ ደማና፤  
ሂሰቲን ኢንቴ ቃጸዬቶንታ ኣቲ ባኔ? ታኒ ሳኣን ዲዛ ኡባ ቦላ  
ኦላ ደይጌዳ ገሻሰ ኢንቴ ቃጸዬቶንታ ኣቴኬታ ጌሰ» ጌደሰ።

30 ሄሳ ገሻሰ ጎዳይ ኤርማሳሰ፤  
«ሃ ቃላ ኡባ ኢሰታ ቦላ

ቲንቢቴ ዮታ፤

ኅዳይ ቦላፌ ዋሳና፤

ባ ዲዛ ጌሻ ሶሆፔ

ዳዳቲዛ ባ ጉንላ ሲሳና፤

ኢዚ ባ ቢታ ቦላ ኬሂ ዋሳና፤

ዎይኔ ማጺሺ ዬጺዛ ማላ

ሳኣን ዲዛ ኡባ ቦላ ኢዚ ጉማና።

31 ጎዳይ ካዎቴላታ ቦላ ፒርዲዛ ዎዴ

ኢዛ ጨንጉርሳይ

ቢታ ጋጸ ጋካናሰ ሲዬታና፤

ኢዚ ኣሰ ኡባ ቦላ ፒርዳና፤

ኢታታካ ማሻሰ

ኣላ ኢማና » ጌደሰ።

32 ጎዳይ ኡባፌ ዎልቃማ ጸሳይ፤

«ቤኣ፤ ኢታ ሚሺ ካዎቴላፌ

ካዎቴላ ኣኪ ኣኪ ቢደሰ፤

ሳኣ ጋጸፔ ዎልቃማ ጎቴ

ጨርኮይ ዴንዲደሰ» ጌሰ።

33 ሄ ዎዴን ጎዳይ ዎዲዳይታ ኣሃይ

ቢታ ጋጸፔ ቢታ ጋጸ ጋካናሰ

ፖርጩ ጌ ኩንዳና፤

ኢሰታሰ ዬኬቴና፤

ኢሰታ ኣሃይ ሺቄናኔ ሞጌቴና፤

ቢታ ቦላ ቡራ ማላ ኦሌታና።

34 ኢንቴኖ ሄንላንቻቶ!

ዬኪቴኔ ዋሲቴ።

ኢንቴኖ ዉዳ ሄሚዛይቶ!

ቢዲንላን ጌንዴሬቲቴ።

ኢንቴ ሹኬታና

ዎዴይ ጋኪዳ ገሻሰ

ሎኢ ሜዴቲዳ ማና ሚሺ

ቲንቹቲዛ ማላ

ኢንቴ ኩንዲ ቲንቹታና።

- 35 ሄንላንቻቲ ባቃተዛሶይ ዳና፤  
 ወዴ ሄሚዛይቲ ኬሲ ኤኪ  
 ኣቲዛሶይ ባ።
- 36 ጎዳይ ኢስቲ ሄሚዛሶሆ  
 ጳይሲዳ ጊሻስ ሄንላንቻታ ዋሶኔ  
 ወዴ ሄሚዛይታ ዬሆ ሲዪቴ።
- 37 ጎዳ ሃንቆ ሴላ ጋሶን  
 ሳሮ ቢታይ ቡላ ጊዳና።
- 38 ጋሞይ ባ ኣቁዛሶፔ ዬጊ ቢዛ ማላ  
 ኡንኤላዛይሳ ማሻፌኔ  
 ጎዳ ሃንቆፌ ዴንዲዳይሳን  
 ኢስታ ቢታያ ቡላ ጊዳና።

## 26

### ኤርማሳ ቦላ ሸቂዳ ፒርዳ

- 1 ዩሁዳ ካዎ ኢዮሲያሳ ና ኢዮኣቁሜይ ካዎቲዳ ኮይሮ ላይላን ሃይሳፌ ካሊ ዲዛ ቃላይ ጎዳ ኣቻፌ ዪዳስ።
- 2 ጎዳይ ታና፡ «ጎዳ ኬላ ዛጎን ኤቃዳ ጎዳ ኬላን ጎይናናስ ዩሁዳ ካታማታፔ ዪዛ ዳሬ ኡባስ ዮታ፤ ታኒ ኔና፡ «ዮታ» ጋዳ ኣዛዚዳ ቃላ ኡባፌ ኢሲኖካ ኣሾንታ ወርሳ ዮታ።
- 3 ኢስቲ ሲዪዲ ባ ቢዛ ኢታ ኦፔፔ ሲማናኮ ኦኔ ኤሬዛይ? ታኒካ ኢስቲ ኦሊዳ ኢታቴላ ጊሻስ ኢስታ ቦላ ኤሃና ጊዳ ቂጸቴዛ ኣጋና።
- 4 ኔ ኢስታስ፡ ሳዳይ ኢንቴና ኢንቴ ታ ጊዛዝ ሲዮንታ ኢጺኮ፡ ታ ኢንቴስ ኢሚዳ ታ ዋጋ ናጎንታ ኢጺኮ።
- 5 ኢንቴ ሲያና ማላ ታ ኦሳንቻታ ዛራ ዛራ ታ ኢንቴኮ ዬዲዳ ናቤታ ቃላ ኢንቴ ሲዮንታ ኢጺኮ።
- 6 ታኒ ሃ ኬላ ሴሎ ማላ ኦላና፤ ሃ ካታማዮካ ሳኣ ቦላ ዲዛ ካዎቴላ ኡባ ሲንላን ቃንጌቲዳሮ ሂስታና፡ ጌስ ጋ» ጊዳስ።
- 7 ኤርማሲ ጎዳ ኬላን ሃ ቃላ ዮቲሺን ቄሴቲ፡ ናቤቲኔ ዳሬይ ወሪ ሲዪዲ።
- 8 ጊዶ ኣቲን ኤርማሲ ዳሬዛስ ዮታና ማላ ጎዳይ ኢዛስ ዮቲዳይሳ ዳሬዛስ ዮቲ ወርሲዳ ማላ ቄሴቲ፡ ናቤቲኔ ዳሬዚ ወሪ ኢዛ ኦይኪዲ፡ «ኔና ዋሳናስ ቤሴስ!

9 ኔኒ፥ «ሃይሲ ከላዚ ሴሎ ማላ ጊዳና፤ ቃሴ ሃና ካታማያ ቡላኔ ካይሰ ጊዳና፤ ጋዳ ጎዳ ሱንላን ኣይሰ ቲንቢቲ ዮታይ?» ጊዳ። ሂሰቲዲ ጎዳ ከላን ሸቂዳ ኣሳይ ኡባይ ኤርማሳ ጊዳሊዴሰ።

10 ዩሁዳ ሹሜቲ ሄሳ ኡባ ሲዪዳ ማላ ካዎቲላ ከላፌ ከዚዲ ጎዳ ከላ ቢዳ። ሂሰቲዲ ጎዳ ከላሰ፥ «ኦራላ ፔንጌ» ጌቲቲዘሶ ፔንጌዛን ቢ ኡቲዳ።

11 ቂሴቲኔ ናቤቲ ሹሜታሲኔ ዴሬ ኡባሰ፥ «ኢንቲ ኢንቲ ሃይላን ሲዪዳ ማላ ሃ ኣዴዚ ሃኖ ካታማይ ቦላ ቲንቢቲ ዮቲዳ ጊሻሰ ኢዛሰ ሃይቆይ ቤሴሰ!» ጊዳ።

12 ኤርማሲካ ሹሜታሲኔ ዴሬ ኡባሰ፥ «ሃ ኢንቲ ሲዪዳ ቃላ ኡባ ሃ ከላ ቦላኔ ሃኖ ካታማይ ቦላ ታ ዮታና ማላ ጎዳይ ታና ከቲዴሰ።

13 ሃኢካ ኢንቲ ኦጌኔ ኢንቲ ኦሶ ሎኤሊቲ፤ ጎዳ ኢንቲ ጸሳሰ ኣዛዜቲቲ፤ ኢንቲ ሂሰቲኮ ጎዳይ ኢንቲ ቦላ ኤሃና ጊ ዮቲዳ ኢታ ሚሻ ኢዚ ኣጋጋና።

14 «ታኒ ጊዲኮ ሄኮ ኢንቲ ኩሸን ዳይሰ፤ ኢንቲሰ ሎኦኔ ሱሬ ሚሳቲዛይሳ ታ ቦላ ኦሊቲ።

15 ጊዳ ኣትን ሃይሳ ኢንቲ ሲዪዳ ቃላ ኡባ ታኒ ኢንቲሰ ዮታና ማላ ጎዳይ ታሰ ኣዳፌ ዮቲዳ ጊሻሰ ኢንቲ ታና ዎጂኮካ ኢንቲ ጸሎ ሱላ ጉሲዲ ኢንቲ ኢንቲ ሁኤሲኔ ሃኖ ካታማይን ዲዛ ኣሰ ኡባ ሞራንቻ ሂሰቶንታ ማላ ናጌቲቲ» ጊዴሰ።

16 ሂሰቲን ሹሜቲኔ ዴሬዚ ኡባይ ቂሴታሲኔ ናቤታሰ፥ «ሃይሲ ኣዴዚ ጎዳ ኦ ጸሳ ሱንላን ሃሳይዳ ጊሻሰ ሃይቃናሰ ቤሴና!» ጊዳ።

17 ዴሬ ጨማታፔካ ኢሲ ኢሲ ኣሳቲ ዴንዲ ኤቂዲ ሸቂዳ ዴራሰ፥

18 «ሂዝቂያሲ ዩሁዳን ካዎቲዲ ዲዛ ዎዴ ሞሬሼቲፔ ዩዳ ሚኪያሲ ዩሁዳ ዴሬ ኡባሰ፥

«ኡባፌ ዎልቃማ ጎዳ ጸሳይ፥

፡ጲዮኔይ ጎሻ ጋዴ ማላ ጎዴታና፤

ዩሩሳላሜይ ላሊ ኮሪዳ

ከላ ማላ ጊዳና፤

ጸሳ ከላይ ኢዛ ቦላ

ከዴቲዳ ዙማይ

ዎራ ማይኣና፤ ጊዴሰ።

19 «ሂስቲን፡ ዩሁዳ ካዎ ሂዝቂያሲኔ ዩሁዳ አሳይ ኡባይ ኢዛ ዎዲዶ? ሂዝቂያሲ ጎዳሰ ያዪዲ ኢዛፔ ማሮ ዎሲቤኔ? ጎዳይካ ባ ኤሃና ጊ ቆፒዳ ቂጻቴዛ ኣጋጊቤኔ? ጊዶ ኣቲን ኮኒ ኑርካ ኑ ቦላ ፓላ ኢታ ሚሽ ኤሃና ሃኖሰ» ጊዴሰ።

20 ቃሴካ ቤኒ ዎዴ ቂሪያቴ-ዪኣሪሜ ጊዛሶን ዲዛ ሻማኤ ና ኦሪዮይ ዴሰ፤ ኢዚካ ኤርማሲ ዮቲዳ ማላ ሃ ካታማ ቦላኔ ሃ ቢታ ቦላ ጎዳ ሱንፋን ቲንቢቴ ዮቲዴሰ።

21 ካዎ ኢዮኣቄሜይ፡ ኢዛ ኦላንቻቲ፡ ኢዛ ኦላንቻቲ ኦሪዮይ ዮቲዳይሳ ሲዪዳ ዎዴ ካዎዚ ኢዛ ዎዳናሰ ኮዪዴሰ። ኦሪዮይ ሄሳ ሲዪዲ ባቢዳ ጊሻሰ ጊብጼ ቢታ ባቃቲዴሰ።

22 ጊዶ ኣቲን ካዎ ኢዮኣቄሜይ ኣኪቦሬ ና ኤልናታኔኔ ሃራ ኣሳታካ ኢዛ ቦላ ጉጂዲ ጊብጼ ቢታ ከቲዴሰ።

23 ኢሰቲ ኦሪዮ ጊብጼፔ ኦይኪ ኤሂዲ ካዎ ኢዮኣቄሜኮ ኤፊዳ። ካዎዚ ኢዛ ማሻን ዎዲዲ ኢዛ ኣሃ ቤቲዳይ ሞጌቲዛሶን ኤፊ ዩጊዴሰ።

24 ጊዶ ኣቲን ሳፋኔ ና ኣኪቃሜይ ኤርማሳ ባጋ ጊዲዳ ጊሻሰ አሳይ ኤርማሳ ዎዳና ማላ ኣሊ ኢሚቤና።

## 27

### ዩሁዳ ኩንዴል

1 ዩሁዳ ካዎ ኢዮሲያሳ ና ሴዴቂያሲ ካዎቲዳ ኮይሮ ላይፋን ጎዳ ቃላይ ኤርማሳኮ ዪዴሰ።

2 ጎዳይ ታሰ፡ «ሚላፌ ቃምባራ ጊጊሳዳ ዳፎ ኢዛን ጌልፋዳ ኔ ሞርጌን ዎላ።

3 ዩሁዳ ካዎ ሴዴቂያሳኮ ዬሩሳሌሜ ዪዳ ኣሳታ ቦላ ኤዶሜ ካዎስ፡ ሞእቤ ካዎስ፡ ኣሞኔ ካዎስ፡ ጸርሴ ካዎሲኔ ሲዶና ካዎስ ከታ ዬዳ።

4 ኢሰቲ ባንታ ጎዳታ ኤሪሳና ማላ ኢሰታሰ ኡባፌ ዎልቃማ ጎዳ ኢሰራኤል ጸሳይ ኢንቴ ጎዳታሰ ሃይሳ ዮቲቴ።

5 ታ ጊታ ዎልቃኒኔ ሚጩቲዳ ታ ኩሼን ሳኣኔ ሳኣ ቦላ ዲዛ ኣሲኔ ሜሄ ሜዳዲሰ። ኢሰታ ታ ደሲዳዴሰ ኢማና።

6 ሃኢካ ሃይታ ሃ ዴሬታ ኡባ ታ ኣይሌዛ ባቢሎኔ ካዎ ናቡካደናጸሬሰ ኣፋ ኢማና፤ ዎራ ዶኣታካ ታ ኢዛሰ ሃሪሳና።

7 ኢዛ ዴሬይ ሃራሰ ሃሬታና ጋካናሰ ካዎቲፋቲ ኡባይ ኢዛሰ፡ ኢዛ ናሲኔ ኢዛሰ ና ናሰ ሃሬታና። ሄሳፌ ጉዬ ዳሮ ካዎቲፋቲኔ ጊታ ካዎቲ ኢዛ ሃራና።

8 «ጊዶ አቲን አይ ዳሬይ ወይኮ አይ ካዎቴሉኔ ሃ ባቢሎኔ ካዎ ናቡካደናጾሬስ አዛዜቶንታ ኢጲኮኔ ኢዛ ቃምባራን ጌሎንታ ኢጲኮ፡ ታኒ ጎዳይ ሄ ካዎቴላ ኢዛ ኩሼን ቆይሳና ጋካናስ፡ ኦላን፡ ኮሻኒኔ ኢታ ሃርጌን ቃጸያና።

9 ሄሳ ጊሻስ ኢንቴና፡ «ባቢሎኔ ካዎስ ሃሬቴኬታ» ጊዛ ኢንቴ ናቤታ፡ ሙሬኒዛይታ፡ አጉሞ አጉሜቲዛይታ፡ ሞይቲሌ ዴይጊዛይታ ሲዮፒቴ።

10 ጋሶይካ ኢንቴ ኢንቴ ቢታፌ ሾዴታና ማላ፡ ታ ኢንቴና ጎዳና ማላኔ ቆይሳና ማላ ኢስቲ ኢንቴስ ዋርዶ ቲንቢቴ ዮቴቴስ።

11 ጊዶ አቲን አይ ካዎቴሉካ ባቢሎኔ ካዎ ቃምባራን ጌሊዲ ባ ሁኤ ዚቂ ሂስቲዲ ኢዛስ ኦሊዛ ጊዲኮ ታኒ ጎዳይ ሄ ዳራ ሄን ባ ዳሬን አቲዲ ጎዴሼ ዳና ማላ ኦላና» ጊዴስ።

12 ታኒ ዩሁዳ ካዎ ሴዴቂያሳሲካ ሃይሳ ሃ ኪታ ዮታዲስ፤ «ኢንቴ ሞርጌ ባቢሎኔ ካዎ ቃምባራ ጋርሳን ዚቂ ሂስቲቴ፤ ኢዛሲኔ ኢዛ ዳራስ ሃጋዚቴ፤ ሂስቲኮ ኢንቴ ሼምፖራ ፓጻ ዳና።

13 ጎዳይ ባቢሎኔ ካዎስ ሃሬቶንታ ኢጲዛ ካዎቴላታ ቦላ ኤሃና ጊዳ ኦላን፡ ኮሻኒኔ ኢታ ሃርጌን ኔኒኔ ኔ ዳሬይ አይስ ወሬቲ?

14 ዋርዶ ናቤቲ ኢንቴስ፡ «ኢንቴ ባቢሎኔ ካዎስ ሃሬቴኬታ» ጊዛ ዋርዶ ቲንቢቴ ሲዮፒቴ።

15 «ታኒ ኢስታ ኪታቤኬ፤ ኢስቲ ታ ሱንላን ዋርዶ ቲንቢቴ ዮቴቴስ፤ ሄሳ ጊሻስ ታኒ ኢንቴናኔ ኢንቴስ ናቤታ ጎዳ ኬሳና፤ ኢንቴካ ቆያና» ጌስ ጎዳይ።»

16 ሄሳፌ ጉዬ ታኒ ቄሴታሲኔ ሃ ዳሬ ኡባስ፡ «ጎዳይ፡ ሳዳ ኬላ ሚሻይ ባቢሎኔ፤ ኤሌ ሲማና» ጊዛ ናቤታ ቃላ ሲዮፒቴ። ጋሶይካ ኢስቲ ኢንቴስ ዋርዶ ቲንቢቴ ዮቴቴስ።

17 ሄሳ ጊሻስ ኢስቲ ዮቴዛይሳ ሲሲ አጊዲ ባቢሎኔ ካዎስ ሃሬቴቴ፤ ኢንቴ ሼምፖራ ፓጻ ዳና፤ ሃ ካታማያ አይስ ላሊታ አታኔ?

18 ኢስቲ ቱሙ ናቤታ ጊዲኮ፡ ቱሙካ ጎዳ ቃላይ ዲዛ ጊዲኮ ጎዳ ኬላን፡ ዩሁዳ ካዎ ኬላኒኔ ዬሩሳላሜን አቲዳ ሚሻቲ ባቢሎኔ ዲኤቲ ቦንታ ማላ አኔ ጎዳ ኡባፌ ዋልቃማ ጸሳኮ ሾቢ ዋሴቶ።

19 ጎዳይ ኡባፌ ዋልቃማ ጸሳይ ሃ ካታማን አቲዳ ቱሳታ ጊሻስ፡ ጸርቂማላፒ ኦሴቲዳ ጌታ ሳኔዛ ጊሻስ፡ ጋሬታ ጊሻሲኔ ሃራ አቲዳ ኡባ ሚሻታ ጊሻስ፡

20 ሃይቲ ሃ ሚሻቲ ባቢሎኔ ካዎ ናቡካደናጾሬይ ዩሁዳ ካዎ ኢዮአቂሜ ና ኢኮኒያኔ፡ ዩሁዳኒኔ ዬሩሳላሜን ዲዛ ሹሜታ ዲኢዲ ኤፊዛ ዋዴ አቲዳ ጊሻስ፡

21 ጎዳ ኩላን፥ የሁዳ ካዋ ኩላኒኔ ዩሩሳሌምን አቲዳ ሚሻታ ጊሻሰ ኡባፌ ወልቃማ ጎዳ ኢስራኤል ጸሳይ፥

22 «ኢስቲ ባቢሎን ቢታ ዲኤቲ ባና፤ ታኒ ኢስታ ጸሞሳና ጋላሲ ጋካናሰ ሄን ዳና፤ ሄ ወዴ ታ ኢስታ ዛራ ኤሃዳ ካሴ ኢስታሶሆን ዋላና ጌሰ» ጋዲሰ።

## 28

### ኤርምያን ዋርዶ ናቤ ሃናኒያ

1 ሄ ወዴ የሁዳ ካዋ ሴዴቂያሲ ካዋቲዳ ኦይዳንሶ ላይላን ኢቻሻንሶ ኣጊናን ጌባኦኔ ኣሰ ኣዙሬ ና ናቤ ሃናኒያይ ጎዳ ኩላን ቄሴታ ሲንላኒኔ ዴሬ ኡባ ሲንላን ታሰ፥

2 «ኡባፌ ወልቃማ ጎዳ ኢስራኤል ጸሳይ፥ «ባቢሎን ካወይ ኢንቴና ቶሲዳ ቃምባራ ታ ሜንላና።

3 ባቢሎን ካዋ ናቡካዳናጸሬይ ጎዳ ኩላፌ ዲኢ ኤኪዲ ኤፊዳ ሚሻታ ኡባ ታኒ ናምኡ ላይላ ጊዶን ዛራዳ ሃ ሶሆ ኤሃና።

4 ቃሴ ታኒ የሁዳ ካዋ ኢዮኣቂሚ ና ኢኮኒያኔኔ የሁዳፔ ዲኤቲዲ ባቢሎን ቢዳ ኣሳ ኡባ ዛራዳ ሃ ሶሆ ኤሃና። ጋሶይካ ባቢሎን ካወይ ኢንቴና ቶሲዳ ቃምባራ ታ ሜንላና ጌሰ» ጊዴሰ።

5 ሂስቲን ጎዳ ኩላ ጊዶን ኤቂዳ ቄሴታ ሲንላኒኔ ዴሬ ሲንላን ናቤ ኤርማሲ ናቤ ሃናኒያሰ።

6 «ኣሚን! ጎዳይ ኦሶ! ጎዳ ኩላ ሚሻታኔ ዲኤቲዲ ቢዳ ኣሳ ኡባ ባቢሎንፔ ዛሪ ኤሂዲ ጎዳይ ባ ዮቲዳ ቃላ ፖሎ!

7 ጊዲኮካ ኣኔ ታ ኔሲኔ ሃ ኣሳሰ ዮቲዳ ቃላ ሲያ።

8 ኔፔኔ ታፔ ካሴ ሲንላን ዴኢዳ ናቤቲ ዳሮ ዴሬታ ቦላኔ ጊታ ካወቲላታ ቦላ ኦላ ጊሻሰ፥ ባሻ ጊሻሲኔ ኢታ ሃርጌ ጊሻሰ ቲንቢቴ ዮቲዳ።

9 ጊዶ ኣቲን ሳርቲላ ጊሻሰ ቲንቢቴ ዮቲዳ ናቤይ ኢዚ ዮቲዳ ቃላይ ፖሌቲዛ ወዴ ቲማፔ ጎዳይ ኢዛ ከቲዳይሲ ሄሳን ኤሬቲሰ» ጊዴሰ።

10 ሄሳፌ ጉዬ ናቤ ሃናኒያይ ናቤ ኤርማሳ ሞርጌፌ ቃምባራ ኤኪዲ ሜንላዴሰ።

11 ሂስቲዲ ሃናኒያይ ኣሳ ኡባ ሲንላን፥ «ጎዳይ፥ «ታኒ ናምኡ ላይላታ ጊዶን ባቢሎን ካዋ ናቡካዳናጸሬ ቃምባራ ካወቲላታ ኡባ ሞርጌፌ ዴንላዳ ሃይሳሶ ሜንላና ጌሰ» ጊዴሰ። ሄ ወዴ ናቤ ኤርማሲ ኣጋጊዲ ባ ኦጌ ቢዴሰ።

12 ናቤ ሃናኒያይ ናቤ ኤርማሳ ሞርጌፌ ቃምባራ ሜንሊዳ ጉላ ዋዴፔ ጉዬ ጎዳ ቃላይ ናቤ ኤርማሳኮ ዪዲ፤

13 «ባዳ ሃናኒያስ፤ ሳኒ ሚላ ቃምባራ ሜንላዳሳ፤ ታኒ ጊዲኮ ኢዛ ገሻስ ቢራታ ቃምባራ ገገሳና፤ ጌስ ጎዳይ ጋዳ ዮታ።

14 ቃሴካ ኡባፌ ዋልቃማ ጎዳ ኢስራኤሌ ጸሳይ፤ ሳቢሎኔ ካዎ ናቡካዳናጸሬስ ሃጋዛና ማላ ታኒ ሃ ካዎቱላታ ኡባ ሞርጌን ቢራታ ቃምባራ ዋላና፤ ኢስቲካ ኢዛስ ሃሬታና። ሃራይ ኣቶሺን ዋራ ዶኣታ ቦላካ ጎዳቱላ ኢዛስ ኢማና፤ ጌስ» ጊዴስ።

15 ሄሳፌ ጉዬ ናቤ ኤርማሲ ናቤ ሃናኒያስ፤ «ሃናኒያ ሲያ! ጎዳይ ኔና ኪቲቤና፤ ጊዶ ኣቲን ኔኒ ሃ ኣሳይ ዋርዶ ሚሻን ኣማኔታና ማላ ኣላዳሳ።

16 ሄሳ ገሻስ ጎዳይ፤ ሳኒ ኔና ሃ ሳኣ ቦላፌ ዲጋና፤ ኔኒ ጎዳ ቦላ ማካላ ሃሳይዳ ገሻስ ኔ ሃ ላይላ ሃይቃና፤ ጌስ» ጊዴስ።

17 ናቤ ሃናኒያይ ሄ ላይላ ላፑንላ ኣገናን ሃይቂዴስ።

## 29

### ዲኤቲ ቢዳ ኣሳስ ጸፊቲዳ ዳብዳቤ

1 ናቤ ኤርማሲ ዲኤቲ ቢዲ ሃይቆንታ ሸምፖራ ፓጸ ዲዛ ጨማታስ፤ ቄሴታስ፤ ናቤታሲኔ ናቡካዳናጸሬይ ዩሩሳላሜፔ ዲኢዲ ባቢሎኔ ኤፊዳ ሃራ ኣስ ኡባስ ዩሩሳላሜፔ ዩዲዳ ዳብዳቤይ ሃይሳፌ ካሊዲ ጸፊቲዳይሳ።

2 ሃይሲ ሃኒዳይ ካዎ ኢኮኒያኔይ፤ ጎዳቲያ ኢዛ ኣያ፤ ካዎ ኬላ ኦሳንቻቲ፤ ዩሁዳኔ ዩሩሳላሜ ካሌሊዛይቲ፤ ሂላንቻቲኔ ዋጋጨቲ ዩሩሳላሜፔ ዲኤቲ ቢዳፔ ጉዬና።

3 ኤርማሲ ዩሁዳ ካዎ ሴዴቂያሲ ባቢሎኔ ካዎ ናቡካዳናጸሬስ ኪቲዛ ሳፋኔ ና ኤልኣሳ ቦላኔ ኪልቂያሳ ና ጋማሪያ ቦላን ሄ ዳብዳቤዛ ዩዲዴስ።

4 ዳብዳቤዚካ፤ «ኡባፌ ዋልቃማ ጎዳ ኢስራኤሌ ጸሳይ ታኒ ዩሩሳላሜፔ ባቢሎኔ ዲኢሳ ዩዲዳ ኣሳስ፤

5 ሳኤላ ኬዲዲ ኡቲቲ፤ ዶዛታ ቶኪዲ ኢስታ ኣይፌ ሚቲ፤

6 ኤኬቲዲ ማጫ ናይታኔ ኣቱማ ናይታ ዩሊቲ፤ ኢንቲ ኣቱማ ናይታኔ ማጫ ናይቲ ኤኬታና ማላኔ ጌሌታና ማላ ኦሊቲ፤ ኢስቲካ ኣቱማ ናይታኔ ማጫ ናይታ ዩሊቶ፤ ኢንቲ ሄን ቆዳን ጮራቲቲ ኣቲን ጉጸፍቲ።

7 ኢንቲ ዲኤቲ ቢዳ ካታማይስ ሳርቲላኔ ዱሬቲላ ኮዩቲ፤ ሄ ካታማይስ ጎዳ ዋሲቲ፤ ኢዛ ዱሬቲኮ ኢንቲካ ዱሬታና፤ ጌስ።

8 ቱሙካ ኡባፌ ዋልቃማ ጎዳ ኢሰራኤሌ ጸሳይ፥ ሐንቴ ጊዶን ዲዛ ናቤቲኔ ማሮቲ ኢንቴና ባሌዳፌቶ፤ ኢሰቲ ኢንቴ ጊሻሰ ኣጉሜቲዛ ኣጉሞ ሲዮፒቴ።

9 ኢሰቲ ታ ሱንፋን ዋርዶ ቲንቢቴ ዮቴቴሰ ታ ኢስታ ኪታቤኬ፡ ጌሰ።

10 «ጎዳይ፥ ሐንቴ ባቢሎኔን ዳና ላፑን ታሙ ላይሊ ፖሌቲዳፔ ጉዬ ታ ኢንቴና ሞካ ጸላና፤ ታኒ ኢንቴና ሃ ቢታ ዛራ ኤሃና ጊዳ ሎኦ ቃላዮካ ኢንቴሰ ፖላና።

11 ታ ኢንቴሰ ሃልቺዳ ሃልቾ ኤራይሰ፤ ሄ ሃልቾዛሰ ፖሎይ ሎኦኔ ሂዶታ ኢሚዛዛ፥ ኢንቴና ጎኢዛዛ ኣቲን ቆሂዛዝ ጊዳና።

12 ኢንቴካ ታና ጸይጋና፤ ሺቂዲ ታና ዋሳና፤ ታኒካ ሲያና።

13 ኢንቴ ታና ኮያና፤ ኢንቴ ታና ኩሜላ ዋዚናፔ ኮይኮ ዴማና።

14 ታኒካ ኢንቴሰ ቤታና። ታ ኢንቴ ዲኤቲ ቢዳ ቢታፌ ዛራና፤ ታኒ ኢንቴና ላላ ዬዲዳ ካዋቴላፌኔ ሶሆ ኡባፌ ሸሻና፤ ሂስታዳ ታኒ ኢንቴና ዲኦሰ ዬዳናፔ ካሴ ኢንቴ ዴኢዳ ሶሆ ጉዬ ዛራዳ ኤሃና፡ ጌሰ።

15 «ኢንቴካ፥ ሐንቴ ናቤ ኦሰ ባቢሎኔን ዴንሊዴሰ» ጋና።

16 ጊዶ ኣቲን ጎዳይ ዳዊቲ ካዋቴላ ኣልጋን ኡታና ካዋ ጊሻሰ፥ ኢንቴናራ ዲኤቲ ቦንታ ሃን ኣቲዳ ዳቦታ ጊሻሲኔ ሃ ካታማን ኣቲዳ ዴራ ኡባ ጊሻሰ።

17 ቱሙካ ጎዳይ ኡባፌ ዋልቃማ ጸሳይ፥ ታኒ ኢስታ ቦላ ኦላ፥ ኮሻኔ ኢታ ሃርጌ ዬዳና፤ ቃሴ ታኒ ኢስታ ማናሰ ጊጎንታ ሞራቲዳ ባላሴ ቴራ ማላ ኦላና።

18 ታኒ ኢስታ ማሻን፥ ኮሻኒኔ ኢታ ሃርጌን ዬዴላና፤ ሂስታዳ ታኒ ኢስታ ሳኣ ካዋቴላታ ኡባ ሲንፋን ካዴሲኔ ቂዴሰ ኬሳና፤ ቃሴ ታኒ ኢስታ ዬዴላ ዬዲዳ ዴራ ጊዶን ቃንጌላሲኔ ዳጋማሰ፥ ቦራሲኔ ካዴሰ ማላታ ጊዳና።

19 ጋሶይካ ታ ኦሳንቻ ናቤታ ቦላ ታኒ ኢስታሰ ዛራ ዛራዳ ከቲዳ ታ ቃላ ኢሰቲ ሲዮንታ ኢዲዳ። ኢንቴካ ዲኤቲ ቢዳይቲ ሲዮንታ ኢዲዳታ፡ ጌሰ።

20 « ታኒ ዬራሳላሜፔ ባቢሎኔ ዲኢሳ ዬዲዳ ኣሳቶ! ኢንቴ ኡባይካ ጎዳ ቃላ ሲዩቴ» ጌሰ።

21 ኡባፌ ዋልቃማ ጎዳ ኢሰራኤሌ ጸሳይ ታ ሱንፋን ዋርዶ ቲንቢቴ ኢንቴሰ ዮቲዛ ቆላያ ና ኣካቤ ጊሻሲኔ ማኢያ ና

ሴዴቂያሳ ገሻሰ ታኒ ኢሰታ ባቢሎኔ ካዎ ናቡካደናጾሬስ ኣላ ኢማና፤ ኢንቴ ጸሊሺን ኢዚ ኢሰታ ዎቆና።

22 ሄሳፌ ጉዬ ዩሁዳፔ ዲኤቲ ቢዲ ባቢሎኔን ዲዛ ኣሳይ ኡባይ፡ ሳዳይ ኔና ባቢሎኔ ካዎይ ታማን ጸጊዳ ሴዴቂያሳ ማላኔ ኣካቤ ማላ ኦሶ ጊዲ ቃንጋና።

23 ኢሰቲ ባ ላጌታ ማቼታራ ላይማቴላን ታ ኢሰታስ ዮቶንታ ቃላ ታ ሱንላን ዎርዶ ዮቶን ኢሰራኤል ቦላ ቆሆ ጋሊዳ፤ ሄሳ ታኒ ኤራይስ፤ ታኒ ሄሳስ ማርካ» ጌስ ጎዳይ።

### ሻማኤስ ኪቴቲዳ ኪታ

24 ኔሄላሚ ዳሬ ኣስ ሻማኤስ፡

25 «ኡባፌ ዎልቃማ ጎዳ ኢሰራኤል ጸሳይ፡ «ዬሩሳሌምን ዲዛ ኣስ ኡባስ፡ ማኢሳያ ና ቄሴ ሶፎናሳሲኔ ሃራ ቄሴታ ኡባስ ኔኒ ኔ ሱንላን ዳብዳቤታ ዬዳዳሳ» ጌስ። ኔ ሶፎናሳስ፡

26 ጎዳ ኬላን ሃላቃ ጊዳና ማላ ኔና ጎዳይ ዮዳሄ ሶሆን ቄሴ ኦሊዲ ሹሚዳስ፤ «ታኒ ናቤ» ጊሼ ጎዬዲ ቲንቢቴ ዮቲዛ ኣይ ኣሳ ቶሆ ኣግሪሞቄን፡ ኢዛ ቆጵካ ሳንሳላታን ዜጸ ቃቻናስ ቤሴስ።

27 ሂስቲን፡ «ታኒ ናቤ» ኣናቶቴ ዳሬ ኣስ ኤርማሳ ኣይስ ሴራቤኪ?

28 ሃ ኣዳዚ፡ «ኢንቴ ዲኤቴላን ጋሞኣና ዎዳይ ኣዲሳ ጊዲዳ ገሻሰ ኢንቴስ ኬላ ኬጸዲ ኢዛን ዲቴ፤ ዶዛታካ ቶኪዲ ኢሰታ ኣይፌ ሚቴ» ጊዲ ኦስ ባቢሎኔ ኪታ ዬዲዳስ» ጊዳስ።

29 ቄሴ ሶፎናሳ ናቤ ኤርማሳስ ሃ ዳብዳቤዛ ናባቢዳስ።

30 ሂስቲን ጎዳ ቃላይ ኤርማሳኮ፡

31 «ሃይሳ ሃ ኪታ ዲኤቴላን ዲዛይታስ ኡባስ፡ «ኔሄላሚ ዳሬ ኣስ ሻማኤይ ታኒ ኪቶንታ ቲንቢቴ ዮቲዳስ፤ ኢንቴ ዎርዶን ኣማኔታና ማላ ኦሊዳስ» ጋ ኪታ።

32 ጎዳይ፡ «ታኒ ኔሄላሚ ዳሬ ኣስ ሻማኤኔ ኢዛ ሶ ኣሳ ቃጸያና። ታ ቦላ ኢዚ ማካላ ሚሽ ሃሳይዳ ገሻሰ ሃ ዳራ ጊዶን ኢዛስ ዛሬይ ኣቴና፤ ቃሴ ታኒ ታ ዳራስ ኦላና ሎኦ ሚሻካ ጋኪ ቤዬና ጊዳስ» ጊሼ ዬዳስ።

## 30

### ጎዳይ ባ ዳራስ ኢሚዳ ሂዶታ ቃላ

1 ጎዳፔ ኤርማሳኮ ዬዳ ቃላይ ሃይሳፌ ካሊዛይሳ።

2 ጎዳ ኢሰራኤል ጸሳይ ኤርማሳ፡ «ታኒ ኔስ ዮቲዳ ቃላ ኡባ ማጸፋን ጸፋ።

3 ታኒ ታ ዳሬ ኢስራኤሌኔ ዩሁዳ ካሴ ኢስታ አዋታስ ታ ኢሚዳ ቢታ ኢስታስ ዛሪ ኤሃና ዋዴይ ጋኪዴስ፤ ኢስቲካ ላታና» ጌስ።

4 ጎዳይ ኢስራኤሌሊኔ ዩሁዳስ ዮቲዳ ቃላይ ሃይሳፌ ካሊዛይሳ።

5 ጎዳይ፥ «ታኒ ባቦኔ  
ሺሮ ዋሶ ሲያይስ፤  
ሳሮይካ ዴና።

6 እኔ ኦይቺቴኔ እኬኪቴ!  
እዴይ ዩላናስ ዳንዳይዜ?  
ሂስቲን እዴይ ኡባ  
ሚጸይ ኦይኪዳ ማጫሳ ማላ  
ባ ኩሼ ባ ኡሎ ቦላ ዋሊን  
እሳ ኡባ ሲንሐ ካሬቲን  
ታ ቤኢዛይ እዛሴ?

7 ሄ ጋላሳይ አይ ማላ  
ዳጋንሊዛ ጋላስ ጊዳኔ!  
ሄሳ ማላ ጋላሲ ዴና፤  
ሄ ጋላሳይ ያቆቤ  
ዜሬላታስ  
ሜቶ ጋላስ ጊዳና፤  
ጊዶ እቲን ኢስቲ  
ሄ ሜቶዛፔ አታና» ጌስ።

8 ጎዳይ ኡባፌ  
ዋልቃማ ጸሳይ፥  
«ሄ ጋላስ ታኒ ኢስታ ሞርጌፌ  
ቃምባራ ሜንላና፤  
ኢስቲ ቃሺቲዳ  
ሳንሳላታካ ዱላና፤  
ሃይሳፌ ጉዩን  
ኣላጋይ ኢስታ ሃሬና።

9 ጊዶ እቲን ጎዳስ  
ባንታ ጸሳሲኔ  
ታኒ ኢስታስ ካዋሊዳ  
ካዋ ዳዊቲ ዛሬስ  
ኢስቲ ሃሬታና» ጌስ።

10 «ሄሳ ጊሻስ ታ አይሌ  
ያቆቤ ዛሬቶ ያዮፍቴ!

- አንቴኖ ኢስራኤሌቶ ዳጋሞፍቴ!  
 አንቴ ሃሆሶን ዲሺን  
     ታኒ አንቴና አሻና፤  
 አንቴ ዛሬታካ ኢስቲ ዲኤቲዳ  
     ቢታፌ ኬሳ ኤካና፤  
 ያቆቤ ዛሬቲ ሲሚዲ  
     ሳሮኒኔ ዋፓን ኡታና፤  
 ኢስታ ያሺሳና  
     አይ ሚሺካ ዴና።
- 11 ታኒ አንቴና አሻናስ  
     አንቴናራ ዳይስ፤  
     ታኒ አንቴና  
         ካዎቴላታ ጊዶን ላላዲስ፤  
     ሄ ካዎቴላታ  
 ሙሌራ ዳይሳና፤  
     ጊዶ አቲን አንቴና  
         ሙሌራ ዳይሲኬ፤  
     ታኒ ቂጻቴይ ባይንዳ ጮ አጊኬ፤  
     ጊዲኮካ ታኒ አንቴና  
         ጊናራ ቃጸያና» ጌስ ኅዳይ።
- 12 ኅዳይ፥ «አንቴ ሜቆይ ኮሌቴና፤  
     አንቴ ማዲንላይ ፓጾና።
- 13 አንቴ ጊሻስ ሞቴቲዛይ ዴና፤  
     አንቴ ማዲንላስካ ዳሌይ ቤቴና፤  
     አንቴስ ፓጾይ ዴና።
- 14 አንቴ ላጌቲ ኡባይ አንቴና ዶጊዳ፤  
     ኢስቲ አንቴ ጊሻስ ዉዴቴቴና፤  
     ታኒ አንቴና  
         ሞርኬ ሾጪዛ ማላ ሾጫዲስ፤  
     ሜንጾ ኢታ አሳ ማላ  
         ታ አንቴና ቃጸያዲስ።  
         ጋሶይካ አንቴ ቆሆይ ጊታ፤  
         አንቴ ናጋራይካ ዳሮ።
- 15 ዳሌይ ባይንዳ አንቴ ሃርጌሲኔ  
     አንቴ ማዲንላ ጊሻስ አይስ ዋሴቲ?  
     አንቴ ሞርይ ጊታኔ

እንቴ ናጋራይ ዳሮ ጊዲዳ ጊሻሰ  
ሃይታ ኡባ ታ እንቴ ቦላ  
ኦላዲሰ» ጌሰ።

- 16 «ጊዳ ኦቲን እንቴና  
ዲፒ ሂሰቲ ሚዳ ኡባቲ  
ሄሳሶ ሜቲታና፤  
እንቴ ሞርኬ ኡባቲካ ዲኤቲ ባና፤  
እንቴና ቦንቂዳይቲ ቦንቂታና፤  
እንቴና ቦጊዛይቲ ቦጌታና።

- 17 እንቴና ጊዲኮ ታኒ ዛራዳ ፓዪሳና፤  
እንቴ ማዲንሳካ ፓሳና።  
ጋሶይካ ኢሰታሰ፡ «ካዴቲዳሮ፤  
ኦኒካ ኮዮንታ ጸዮኖ»  
ጊዳ ጊሻሳ» ጌሰ ጎዳይ።

- 18 ጎዳይ፡  
«ታኒ ያቆቤ ኬል ዛራ ኬጻና፤  
ኢዚ ዲዛሰሰካ ቃዴታና፤  
ካታማያካ ካሴ ባ ላሌቲዳሶን  
ሲማ ኬጾታና፤  
ካዎቲላ ኬላይካ ካሴ ባ ዲዛሶን  
ሲማ ኬጾታና።

- 19 ኢሰታፌ ጋላታ ዩላይኒ  
ኢሊሊሳ ጨንጉርሲ ሲዬታና፤  
ታኒ ኢሰታ ዳርሳና፤  
ኢሰታ ቆዳይካ ፓጩና፤  
ታኒ ኢሰታ ቦንቹቲዳ ዴሬ ኦላና፤  
ኢሰቲ ካዴቲዳይታ ጊዴቴና።

- 20 ኢሰታ ዜሬላይ  
ቤኒ ዋዴ ዲዛ ማላ ዳና፤  
ኢሰታ ማባራይካ ታ ሲንላን  
ሚኒ ኤቃና፤  
ኢሰታ ኡንኤሊዛ ኡባካ  
ታኒ ቃጸያና።

- 21 ኢሰታ ካሌሊዛይ ኢሰታ ባጋፌ ጊዳና፤  
ኢሰታ ኦይሲዛይ  
ኢሰታ ጊዶፌ ዴንዳና፤  
ታኒ ኢዛ ታኮ ሺሻና፤  
ኢዚካ ታኮ ሺቃና።

- ታ ሺሾንታ ዲሺን ጸሊዲ  
ታኮ ሺቃናይ ኦኔ?
- 22 ሄሳ ጊሻስ አንቴ ታ ዴሬ ጊዳና፤  
ታኒካ አንቴ ጸሰ ጊዳና» ጌሰ።
- 23 ቤአቴ ጎዳ ሃንቆይ  
ዳምባላ ማላ ዴንዴሰ፤  
ቡልኣኬቲዛ ጎቴ ጫርኮይ  
ኢታታ ዋጳና።
- 24 ኢዛ ዋዚና ቆፋ ፖሎንታ ጎዳ ሃንቆይ  
ጮ ሃዳ ጉዬ ሰሜና፤  
ሄሳ ዪዛ ዋዴታን አንቴ ኣኬካና።

### 31

- 1 ጎዳይ፥ «ሄ ዋዴ ታኒ ኢሰራኤሌ  
ቆሞ ኡባታሰ ጸሰ ጊዳና፤  
ኢሰቲካ ታ ዴሬ ጊዳና» ጌሰ።
- 2 ጎዳይ፥ «ማሻፌ ኣቲዳ ዴሬይ  
ባዘ ቢታን  
ታፔ ኪያቴል ዳማና፤  
ታኒካ ኢሰራኤሌስ  
ሽምፖ ኢማናስ ያና» ጌሰ።
- 3 ጎዳይ ኦስ ሃሆሶፔ ቆንጨዲ፥  
«ታኒ አንቴና  
ሜርና ሲቆን ዶሳዲሰ፤  
ሄሳ ጊሻስ ታ ቃጵቴፋን  
አንቴና ታኮ ሺሻዲሰ።
- 4 ኢሰራኤሌ ዴሬዘ!  
ታኒ አንቴና ዛራ ኬጻና፤  
አንቴካ ኬጾታና።  
አንቴ ካራቤ ዛሪ ዴንሉዲ  
ኡፋይሳን ሆምቦጪዛይታራ  
አንቴ ሆምቦጪና።
- 5 አንቴ ዛሪዲ ሳማሪያ  
ዙምቡላታ ቦላ  
ዋይኔ ቶካና፤  
ጎሻንቻቲ ቶካና፤  
ኢሰቲ ኣይፊዛ  
ኣይፊዛንካ ኡፋይታና።

- 6 ኤፍሬሜ ዙምቡላታ ቦላ  
 ናጊዛይቲ፥  
 ሳሃ ዪቲ፤  
 ጎዳ ኑ ጸሳኮ  
     ፑዴ ጲዮኔ አኔ ኬዘሰ፥  
 ጊ ጸይጋና ዋዴይ ያና» ጌሰ።
- 7 ጎዳይ፥ «ያቆቤ ዴራሰ  
 ኡፋይሳን ዬጸቲ፤  
 ካዋቲላታ ሃላቃሰ ኢሊሊ ጊቲ፤  
 አንቲ ጋላታካ ሲሲቲ፤  
     ሳዳዉ ኢሰራኤሌፔ  
 ጫሻ አቲዳ  
     ኔ ዴራ አሻ፥ ጊቲ።
- 8 ቤኢቲ ታኒ ኢሰታ  
 ፑዴሃ ባጋፌ ኤሃና፤  
 ቢታ ጋጽፔካ  
 ታኒ ሺሻና፤  
 ኢሰታ ጊዶን ቆቄቲኔ ዋቤቲ፥  
     አቤይ ባይንዳ ማጫሳቲኔ  
     ሚጸቲዛይቲ ዳና፤  
     ኬሂ ዳሪዲ  
     ባንታ ዴሬ ሲማና።
- 9 ታኒ ኢሰታ ዛራዳ ኤሂዛ ዋዴ  
 ኢሰቲ ዬኪሼኔ  
 ዋሲሼ ያና።  
 ታኒ ኢሰታ ፑልቶ  
 ሃላ አቻራ  
 ሱሬ ኦጌራ ካሌላና።  
     ጋሶይካ ታኒ ኢሰራኤሌሰ አዋ፤  
     ኤፍሬሜይካ ታሰ ባይራ ና።
- 10 «ኢንቴኖ ካዋቲላቶ  
 ጎዳ ቃላ ሲዪቲ!  
 ሃሆን ዲዛ አባ ጋጸታንካ፥  
 ሳኢሰራኤሌ ላሊዳይ  
     ኢዚ ኢሰታ ዛሪ ሺሻና፤  
 ባ ዉዴዛካ  
 ሄንላንቻ ማላ

- ኢዚ ሄማና ጊዲ አዋጁቲ።  
 11 ጋሶይካ ጎዳይ  
     ያቆቤ ዋዛና፤  
     ኢዛፔ ሚኒዛይታ ኩሼፔ  
     ኢዛ ኩሲ ኤካና።  
 12 ኢሰቲ ዪዲ ጸዮን ዙማ ቦላ  
     ኡፋይሳ ማዛሙሬ ዬጸና፤  
     ኢሰቲ ጎዳ ኪያቴላ ጊዲዳ  
     ካላን፥ ዋይኔ ኡሻን፥  
     ዛይቴን፥ ዴይሻኒኔ  
     ደርሳ ላቃታን፥ ዋፋኖታኒኔ  
     ኡሳታን ኡፋይታና፤  
     ኢሰቲ ሃላ ፓጮንታ  
     አታኪልቲ ሶሆ ማላ ጊዳና፤  
     ሃይሳፌ ጉዬ ኢሰቲ ሙዞቴቴና።  
 13 ሄ ዋዴ ጌላኦቲ  
     ኡፋይቲዲ ዬጸና፤  
     ዋዳላቲኔ ጨማቲ ጉፓና፤  
     ታ ኢሰታ ዬሆዛ  
     ኡፋይሳን ላማና፤  
     ታ ኢሰታ ሙዞቴላፌ  
     ሚንሐላና፤  
     ታ ኢሰታሰ ኡፋይሰ ኢማና።  
 14 ታኒ ቄሴታ ኬሃ አንጃና፤  
     ታ ዴሬዛካ  
     ኪያቴላ ካላና» ጌሰ።  
 15 ጎዳይ፥ «ዋሶይኔ ጫሞ ዬሆይ  
     ኤራማ ካታማፔ ሴቴቲዴሰ፤  
     ኢዚ ናይቲ ወሪዳ ጊሻሰ  
     ኤራሄላ ዬካዱሰ፤  
     ሚንቶንታካ ኢጸዱሰ» ጌሰ።  
 16 ጎዳይ፥ «ዬኮፋኔ አፋንጾፋ፤  
     ኔ ዴቡራይ ጮ ሃዳ አቴና፤  
     ሞርኬታ ቢታፌ ኢሰቲ ሲማና።  
 17 ሲንላፌ ኔሰ  
     ሂዶታይ ዲዛ ጊሻሰ  
     ኔ ናይቲ ባንታ

ቢታ ሲማና» ጌሰ።

18 «ኤፍሬሜይ ጫሞ ሚላስ ሚላሊሺን

ኣዳፌ ታ ሲያዲስ፤  
 ለጦሆንታ ዋፋኖ ማላ  
 ታና ቃጸያዳሳ፤  
 ታኒካ ቃጸይታዲስ፤  
 ኔኒ ጎዳ ታ ጸሳ፤  
 ኔኒ ታና ዛራ፤  
 ታኒካ ሲማና።

19 ታ ኔፔ ሃካ ቢዳፔ ጉዬ

ሲማዳ ሞጴታዲስ፤  
 ታ ኣኬኪዳ ዋዴ  
 ታ ሁኤ ባቃዲስ፤  
 ታ ዬላጋቴላ  
 ካዉሻቴላ ቶካዲስ፤  
 ዬላታዳ ጉጻዲስ) ጌዴስ።

20 ኤፍሬሜይ ታ ዶሳዳ

ኤፋይቲዛ ታ ናዛ ጌዴኔ?  
 ዳሮ ዋዴ ታ ኢዛራ  
 ኤቄታ ሃሳይኮካ  
 ዛራዳ ኢዛ ጊሻስ ታ ቆፓይስ፤  
 ታ ማራጨይ ኮኮሬስ፤  
 ታ ኢዛስ ኬሃ ቃጴታይስ»  
 ጌሰ ጎዳይ።

21 ጎዳይ፥ «ኦጌን ማላታ ኤሳ፤

ቢዛሶ ቤሲዛ ማላታ ቶካ፤  
 ኔ ባና ዋጋ ኦጌዛ ኣኬካ፤  
 ጌላኦዬ ኢስራኤሌ ሲማ፤  
 ሂስታዳ ኔ ካታማታ ጌላ።

22 ሃኔ ካዲዳ ናዬ!

ኔ ኣይዴ ጋካናስ ቶይላታኔ?  
 ጎዳይ ሳኣ ቦላ  
 ኦራላ ሚሽ ሜጳና፤  
 ሄሲካ ማጫይ  
 ኣዴ ዶዳና» ጌሰ።

ጸሳ ዴሬስ ሲንላፌ ያና ኢሻሎ ዴኦ

23 ኡባፌ ዋልቃማ ጎዳ ኢስራኤል ጸሳይ፥ «ታኒ ኢስታፌ ዲኤቲዳ ሚሻ ታ ኢስታስ ዛሪዛ ዋዴ ኢስቲ የሁዳ ቢታኒኔ ኢዚ ካታማታን፥ ሩኖ ጸሎቴል ኣቂዛ ጌሻ ዙማዞ! ጎዳይ ኔና ኣነጅ!» ጊዛ ቃላ ዛሪ ጎኤታና።

24 ጎሻንቻቲኔ ሜሄ ሃሮን ኣቂዛይቲ የሁዳኒኔ የሁዳ ካታማታን ኢሲፌ ዳና፤

25 ታኒ ላባኒዳ ሼምፖዮ ኦራዲሳና፤ ዳቡርዳሮካ ሚንፋና» ጌሰ።

26 ሄ ዋዴ ታኒ ጴስኮፌ ቤጋዳ ዩሻ ጸላዲሰ፤ ታኒ ማልኦ ጴስኮ ጴስካዲሰ።

27 ጎዳይ፥ «ታኒ ኢስራኤል ቢታኒኔ የሁዳ ቢታን ኣሲኔ ሜሄ ኩንፊዛ ዋዴይ ያና።

28 ኢስታ ጶቃላናስ፥ ላላናስ፥ ሺራ ዩጋናስ፥ ጳይሳናሲኔ ባሽ ኢስታ ቦላ ኤሃናስ ኬሃ ታኒ ሚኒዳ ማላ ኢስታ ዛራ ኬጸናሲኔ ቶካናስ ኬሃ ሚናና» ጌሰ።

29 «ሄ ዋዴ ኣሳይ፥  
 ሩኣዋቲ ዋይኔ ሚላ ቴራ  
 ጫሊዳይሳ ሚን  
 ኢስታ ናይታ ኣቺ ዚልኢዴስ፥  
 ጌቴቲዛ ለሚሶ  
 ናምኣንፉ ሃሳዬቴና።

30 ጊዶ ኣቲን ኣሳይ ኢሶይ ኢሶይ ባ ናጋራን ናጋራን ሃይቃና፤ ዋይኔ ቴራ ቃወኤ ሚዳ ኣሳ ኣቺ ኡባይ ዚልኣና» ጌሰ ጎዳይ።

31 ጎዳይ፥ «ታኒ ኢስራኤል ዴራራኔ  
 የሁዳ ዴራራ ኦራላ ጫቆ  
 ጫቂታና ዋዴይ ያና።

32 ሄ ጫቆዚ ታኒ ኢስታ ጊብጾፔ  
 ኬሳናስ ኢስታ ኩሼ ኦይካዳ  
 ኢስታ ኣዋታራ ጫቂቲዳ  
 ጫቆዛ ማላ ጊዴና፤  
 ታኒ ኢስታስ  
 ኣዚና ማላ ጊዳ ዲሺን  
 ኢስቲ ታናራ ዲዛ  
 ጫቆ ቃላዛ ላሊዳ» ጌሰ።

- 33 «ጊዶ ኣቲን ታኒ ጎዳይ  
 ሄ ዋዴፔ ጉዬ  
 ኢሰራኤል ዴራራ  
 ታ ጫቄታና ጫቆይ ሃይሳ፤  
 ታኒ ታ ዋጋ  
 ኢስታ ዋዚናን ጸፋ ዋላና፤  
 ታኒካ ኢስታሰ ጸሳ ጊዳና፤  
 ኢስቲካ ታ ዴሬ ጊዳና።
- 34 ሃይሳፌ ጉዬ ኦኒካ ባ ላጌ  
 ዋይኮ ባ ኢሻ፤  
 ሳዳ ኤራ፡ ጊዱ ታማርሴና፤  
 ጋሶይካ ጉላፌ ዶሚዱ  
 ጊታ ጋካናሰ  
 ኢስቲ ኡባይ ታና ኤራና፤  
 ታኒካ ኢስታ ቆሆ ኣቶ ጋና፤  
 ኢስታ ናጋራካ ናምኣንሶ  
 ዛራ ቆፒኬ» ጌሰ ጎዳይ።
- 35 ጋላሳን ፖኢሳና ማላ  
 ኣርሼ ዋሊዳይ፤  
 ኦማርሳን ፖኢሳና ማላ ኣጊናኔ  
 ጸሊንቲታ ኣዛዚዳይ፤  
 ዳምባላይ ጉማና ማላ ኣባ ቃሊዛይ  
 ኢዛ ሱንላይ ጎዳ ኡባፌ  
 ዋልቃማ ጸሳ ጌቴቲዛይሲ፤
- 36 «ሃ ኤቂዱ ዲዛ ሜጼታ ዋጋይ  
 ታ ሲንላፌ ኪቺኮ  
 ሄ ዋዴ ኢሰራኤል ዜሬላቲ  
 ታ ሲንላን  
 ሜርናሰ ካዋቴሰ ጊዱዱ  
 ዱሳይ ኣታና» ጌሰ።
- 37 ጎዳይ፡ «ቦላን ዲዛ ሳሎታ  
 ጋኪ ዋቆናሰ ዳንዳዬቲኮ፤  
 ዋይኮ ጋርሳን ዲዛ ቢታ ጸጸ  
 ጋኪ ፒልጊ ኤራናሰ ዳንዳዬቲኮ  
 ሄ ዋዴ ታኒ ኢሰራኤሌይ ኦሊዳ  
 ኦሶ ኡባ ጊሻሰ  
 ታ ኢስታ ዬጋ ኣጋና» ጌሰ።

38 ጎዳይ፡ «ሃናኒኤሌ ገምቤፌ ደሚዲ ጉላ ፔንጌ ጋካናስ ካታማያ ታስ ጎዳስ ኦሴታና ዋዴይ ያና።

39 ዋጃ ዋድርዚ ሄፔ ደሚ ሲቲ ጊዲ ጋሬቤ ዙምቡላታራ አጂዲ ጎአሃ ጋካናስ ሚጨታና።

40 አሃይኔ ቢዲንሉ ዩጌቲዛ ሾባ ኡባይ ኣርሼይ ሞኪዛ ቄዲሮኔ ሾባራ ቢዲ ፓራ ፔንጌ ጋካናስ ዲዛ ቲጂ ጊዳ ዴምባይ ኡባይ ጎዳስ ዲማቲዳዝ ጊዳና፤ ሄሳፌ ጉዬ ሄ ካታማያ ሾዴቱኩኔ ላሌቱኩ» ጌሰ።

## 32

ኤርማሲ ሻሚዳ ጋዴ

1 ዩሁዳ ካዋ ሴዴቂያሲ ካዋቲዳ ታማንላ ላይላን፡ ባቢሎኔ ካዋ ናቡካደናጾሬይ ካዋቲዳ ታማኔ አስፑንላ ላይላን ጎዳ ቃላይ ኤርማሳኮ ዪዴሰ።

2 ሄ ዋዴ ባቢሎኔ ካዋ ኦላንቻቲ ዩሩሳላሚ ጊደሊዳ፤ ናቤ ኤርማሲ ዩሁዳን ካዋቴላ ኬላ ዛጎን ዲዛ ዛቤታ ኬላን ጎርዴቲ ኡቲዴሰ።

3 ካሴ ዩሁዳ ካዋ ሴዴቂያሲ ኢዛ፡ «ኔ ሃይሳ ማላ ቲንቢቲ ዋና ዮታይ? ጎዳይ፡ ታኒ ሃኖ ሃ ካታማዮ ባቢሎኔ ካዋ ኩሼን አላ አማና፤ ኢዚካ ሃራና።

4 ዩሁዳ ካዋ ሴዴቂያሲ ባቢሎኔ ካዋስ አጂ አሜታና፤ ካዋዛ ሰንላን ኤቁዲ ኢዛ ሃሳይሳና፤ ኢዚካ ባ አይፌራ ቤአና አቲን ባቢሎኔታ ኩሼፔ ኬሲ ኤኪ አቴና።

5 ሄሳፌ ጉዬ ኢሰቲ ሴዴቂያሳ ባቢሎኔ ኤፋና፤ ሂሰቲን ታኒ ኢዛ ቦላ ፒርዳና ጋካናስ ኢዚ ሄን ዳና፤ ኢንቲ ባቢሎኔ አሳታራ ኦሌቲኮ ኢንቲሰ ጊጌና፤ ጌሰ ጋሳ» ጊዲ ሄሳ ጊሻሰ ቃሺሲዴሰ።

6 ኤርማሲካ ጎዳ ቃላይ ታኮ፡

7 «ኔ አዋ ኢሻ ሻሎሜ ና ሃናምኤሌይ ኔኮ ዪዲ፡ ላናቶቲ ካታማን ዲዛ ታ ጋዴዛ ሻማ፤ ጋሶይካ ሻማናስ ዳቦቴሉ ጋሊዛይ ኔና ጌሰ» ጊሼ ዪዴሰ።

8 ጎዳይ ጊዳ ማላ፡ ታ አዋ ኢሻ ና ሃናምኤሌይ ታኮ ዛቤቲ ናጊዛሶ ዛጎ ዪዲ፡ «ቢኒያሜ ቢታን አናቶቲን ዲዛ ታ ጋዴዛ ዋዛናስ ቤሲዛይ ኔና ጊዲዳ ጊሻሰ ኔሰ ቡዞላ ሻማ» ጊዴሰ፤ ሃይሲካ ጎዳ ቃላ ጊዲዳይሳ ኤራዲሰ።

9 ሂሰቲን አናቶቲ ካታማን ዲዛ ጋዴዛ ታ አዋ ኢሻ ና ሃናምኤሌፔ ታማኔ ላፑን ሳቂሌ ቢራ አማዳ ሻማዲሰ።

10 ሂስታዳ ማርካታ ሲንላን ወሌ ዋራቃታ ፓራማዳ ጎርዳዲስ፤ ሚሻካ ሜዛኔን ዋላዳ ቆዳ ኢማዲስ።

11 ሄሳፌ ጉዬ ኑ ሃሳዬቲዳ ፓቲላ ዮኦታ ኦይኪዲ ጎርዳቲዳኔ ጎርዳቶንታ ወሌ ዋራቃታ ታ ኩሼን ኤካዲስ።

12 ሂስታዳ ፓራማቲዳ ወሌ ዋራቃታ ታ አዋ ኢሻ ና ሃናሞኤሌ ሲንላን፤ ፓራማዳ ማርካታ ሲንላኒኔ ዛቤ ናጊዛ ኬላ ዛጎን ኡቲዳ ኡባ አይሁዳታ ሲንላን ማኢሴያ ና፤ ኔሪያ ና ባሮኬስ ኢማዲስ።

13 ሄሳፌ ጉዬ ኢስታ ሲንላን ታኒ ባሮኬስ ኣዛዞ ኢማዲስ፤

14 ኡባፌ ዋልቃማ ጎዳ ኢስራኤሌ ጸሳይ፤ «ጎርዳቲዳይሳኔ ጎርዳቶንታ ዲዛ ናሞኡ ወሌ ዋራቃታቲ ሞሬቶንታ ዲሼ ዳሮ ዋዳ ጋምእና ማላ ኤፋዳ ኦቶ ጊዶን ዋላ» ጌስ።

15 ኡባፌ ዋልቃማ ጎዳ ኢስራኤሌ ጸሳይ፤ «ሃ ቢታን ኣሳይ ኬላ፤ ጎሻ ጋዴኔ ዋይኔ ቶኪዛሶሆ ዛሪ ሻማና» ጌስ።

### ኤርማሳ ዋሳ

16 ታኒ ኔሪያ ና ባሮኬስ ጋዴዛ ሻሚዳ ወሌ ዋራቃታ ኢሚዳፔ ጉዬ ጎዳ፤

17 «ኣቤት ኡባፌ ዋልቃማ ጎዳዉ! ኔኒ ሳሎታኔ ሳኣ ኔ ጌታ ዋልቃኒኔ ሚጨቲዳ ኔ ኩሼን ሜፋዳሳ፤ ኔና ጸኒዛ ኢሲ ሚሺካ ዴና።

18 ኔኒ ኔ ሲቆኔ ኪያቲላ ሺ ዬሌታ ጋካናስ ቤሳሳ፤ ጌዶ ኣቲን ኣዋታ ሞሮ ኢስታ ናይታ ቦላ ዛራሳ። ኣቤት ጌታኔ ዋልቃማ ጸሳዉ! ኔ ሱንላይ ጎዳ ኡባፌ ዋልቃማ ጸሳ።

19 ኔ ሃልቾይ ጌታ፤ ኔኒ ኔ ኦሶን ሚኖ፤ ኔ ኣይፌቲ ኣሳ ኦጌ ኡባ ጸሌቲስ፤ ኢሳስ ኢሳስ ኢዛ ኦጌ ማላኔ ኢዛ ኦሶ ማላ ኔ ኢማና።

20 ኔኒ ጌብጾን ማላታታኔ ኦራላ ሚሽ ኦላዳሳ፤ ሃቕ ጋካናስካ ሃ ኦራላ ኦሶታ ኢስራኤሌ ኣሳ ጌዶኒኔ ሃራ ካዋቲላታ ኡባ ጌዶን ኦላዛይሳ ኣጋቤካ። ሄሳፌ ዴንዲዳይሳን ኔ ሱንላይ ኡባሶን ኤሬቲዳስ።

21 ኔኒ ማላታኒኔ ኦራላ ሚሻን፤ ኔ ሚኖ ቄሴኒኔ ሚጨቲዳ ኩሼን ኬሂ ያሺሲዛ ፑላቲላን ኔ ዴሬ ኢስራኤሌ ጌብጾፔ ኬሳዳሳ።

22 ኢስታ ኣዋታስ ኔኒ ኢማና ጋዳ ጨቂዳ ማሊኔ ኤሲ ኢዚፔ ጎጊዛ ሃኖ ሃ ቢታኖ ኔ ኢስታስ ኢማዳሳ።

23 ሂስቲን ኢስቲ ሄ ቢታ ጌሊዲ ላቲዳ፤ ጌዶ ኣቲን ኔስ ኣዛዜቲቤቴና፤ ኔ ዋጋካ ናጊቤቴና፤ ኢስቲ ኦላና ማላ ኔኒ

እዛዚ ዳይሳ ኡባካ ኦሊቤቴና፤ ሄሳ ገሻሰ ኔኒ ኢስታ ቦላ ሃ ቦሻ ኡባ ኤሃዳሳ።

24 «ሄኮ ባቢሎኔቲ ካታማዮ ኦይካናሰ ገምቤ ዩሾን ቢታ ደሪዲ ገደሊዳ፤ ኦላፔ፡ ኮሻፔኔ ኢታ ሃርጌፌ ዴንዲዳይሳን ካታማያ ኢስታራ ኦሌቲዛ ባቢሎኔታ ኩሼን ኣቆ ኢሜታና ሃናዉሰ፤ ኔኒ ሃኢ ቤኢዛይሳ ማላ ኔ ዮቲዳ ኡባይ ፖሌቲሼ ዴሰ።

25 ኣቤት ኡባፌ ዎልቃማ ጎዳዉ! ካታማያ ባቢሎኔታስ ኣቆ ኢሜቴላ ቦላ ዲሺን፡ ጎዳ ቢራን ሻማ፤ ሻማሼ ማርካ ሲንላን ሻማ፡ ጋሳ» ጋ ዎሳዲሰ።

26 ሄሳፌ ጉዬ ጎዳ ቃላይ ኤርምያሳኮ ዪዲ፡

27 «ታኒ ጎዳይ ኣሰ ኡባሰ ጸሳ፤ ቱማፔ ታና ጸኒዛ ሚሺ ዲዜ?» ገዴሰ።

28 ሄሳ ገሻሰ ጎዳይ፡ «ታኒ ሃ ካታማዮ ባቢሎኔታሲኔ ባቢሎኔ ካዎ ናቡካዳናጸሬሰ ኣላ ኢማና፤ ኢስቲካ ኢዞ ኦይካና።

29 ካታማዮ ኦሊዛ ባቢሎኔቲ ዪዲ ካታማይ ገደ ጌላና፤ ኢዞካ ታማን ጹጋና፤ ታና ሃንቄላናሰ ኣሳይ ባንታ ኬላ ፖቄ ፖቄ ቦላ ባኣሌሰ ኤጸኔ ጨኣሲዳሶሆታኔ ኤቃ ጸሳታሰ ኡሻ ያርሾ ሺሺዳ ኬላታ ኡባ ኢስቲ ጹጋና» ጌሰ።

30 ጎዳይ፡ «ኢሰራኤሌ ኣሳይኔ ዩሁዳ ኣሳይ ባንታ ዩላጋቴላፌ ደሚዲ ታ ሲንላን ኢታ ሚሽ ኦሊዳፔ ኣቲን ሃራ ኢሲ ሎኦ ሚሽ ኦሊቤቴና፤ ኢስቲ ባንታ ኩሼን ኦሊዳ ኦሶን ታና ሃንቄሊዳ።

31 ሃና ካታማያ ኤቂዳሶፔ ሃች ጋካናሰ ታኒ ኢዞ ታ ሲንላፌ ጳይሳና ማላ ታ ሃንቆኔ ባሽ ዴንፊላዲሰ።

32 ኢሰራኤሌ ኣሳይኔ ዩሁዳ ኣሳይ፡ ኢስታ ካዎቲኔ ሹሜቲ፡ ኢስታ ቄሴቲኔ ናቤቲ ኦሊዳ ኢታ ኦሶ ኡባን ታና ሃንቄሊዳ።

33 ኢስቲ ታሰ ባንታ ሲንላ ኣገዲ ዞኮ ዛሪዳ፤ ታኒ ኢስታ ዛራ ዛሪዳ ታማርሲኮካ ኢስቲ ሲዬቴናኔ ሴራካ ኤኬቴና።

34 ታ ሰንሒ ጴይጌቲዛ ኬላ ሃራሲዛ ባንታ ኤቃ ጸሳታ ኤሲዲ ቱኒሲዳ።

35 ኢስቲ ባንታ ኣቱማ ናይታኔ ማጫ ናይታ ሞሎኬሰ ያርሻናሰ ሄሮሜ ና ሾባን ባኣሌሰ ጎይኒዛ ቆቃሶሆታ ገግሲዳ፤ ገደ ኣቲን ኢስቲ ዩሁዳ ናጋራ ኦሲሳናሰ ሃይሳ ማላ ሃራሲዛ ኦሶ ኦላና ማላ ታ ኢስታ ኣዛዛቤኬ፤ ታ ሄሳ ሙሌካ ቆፓቤኬ» ገዴሰ።

### እማንሊዛ ሂደታ

36 ኢንቴ፡ «ኦላን፡ ኮሻኒኔ ኢታ ሃርጌን ባቢሎኔ ካዎ ኩሼን ኣታ ኢሜታና» ጌዳ ሃ ካታማይሰ ጎዳ ኢሰራኤል ጸሳይ፡

37 «ታ ሚኖ ሃንቆኒኔ ጌታ ቦሻን ታ ኢስታ ጎዳ ዩዲዳ ቢታ ኡባፌ ሺሻና፤ ሂስታዳ ሃሶሆ ዛራ ኤሃዳ ሳርቴላን ታ ኢስታ ዋላና፡፡

38 ኢስቲ ታ ዴሬ ጌዳና፤ ታኒካ ኢስታ ጸሰ ጌዳና፡፡

39 ኢስታሲኔ ኢስታፌ ጉዬ ኢስታ ናይታሰ ሎኦ ጌዳና ማላኔ ኢስቲ ታሰ ኡባ ዋዴ ያያና ማላ ታኒ ኢስታሰ ኢሲ ዋዚናኔ ኢሲ ቆፋ ኢማና፡፡

40 ታኒ ኢስታራ ሜርናሰ ጌዲዛ ጫቆ ጫቂታና፤ ታኒ ኢስታሰ ሎኦ ሚሽ ኦሶ ኣጊኬ፤ ኢስቲ ታፔ ዋራ ሲሞንታ ማላኔ ኢስቲ ታሰ ያያና ማላ ታ ኦላና፡፡

41 ታ ኢስታሰ ሎኦ ኦላዳ ኡፋዬታና፤ ቃሴ ታኒ ታ ኩሜላ ዋዚናፔኔ ታ ኩሜላ ሼምፖፌ ቱማፔ ሃ ቢታይ ቦላ ኢስታ ቶካና» ጌሰ፡፡

42 ቃሴካ ጎዳይ፡ «ታኒ ሃ ዴራ ቦላ ሃይሳ ዋልቃማ ባሽ ኡባ ኤሃዳ ማላ ታኒ ኢስታሰ ሎኦ ኦላና ጋዳ ጫቂዳ ቃላ ኡባ ፖላና፡፡

43 ኢንቴካ፡ «ሃ ቢታያ ባቢሎኔታሰ ኣታ ኢሜቲዳ ጊሻሰ ኢዚን ኣሰኔ ሜሄይ ባይንዳ ዲዛ ሜላ ቢታ» ኢንቴ ጌዳ ሃ ቢታይን ጋዴይ ዛልኤታና፡፡

44 ታኒ ኢስታፌ ዲኤቲዳ ሚሽ ዛሪዛ ጊሻሰ ቢኒያሜ ዴሬን፡ ዩሩሳላሜ ዩሽን ዲዛ ጉታታን፡ ዩሁዳ ካታማታኒኔ ጌዜ ቢታን ዲዛ ካታማታን፡ ኣርሼይ ዉሊዛ ባጋን ዲዛ ዙማታሰ ዱጌ ባጋኒኔ ኔጌቤን ዲዛ ቢታይ ሳቂሌ ቢራን ሻሜታና፤ ዉሌዚ ፓራሜቲዲ ማርካታ ሲንላን ጎርዴታና» ጌሰ፡፡

## 33

### ሲሞስ ዲዛ ሂዶታ

1 ኤርማሲ ዛቤ ናጊዛይታ ኪፊሌን ቃሾን ዲሺን ጎዳ ቃላይ ኢዛኮ ናሞኣንሳ ዩዴሰ፡፡

2 ሳኣ ሜቂዳይ፡ ጊገሲዳይኔ ዮች ዩጊዳ ጎዳይ፡ ኢዛሰ ሱንላይካ ጎዳ ጌዲዳይ፡

3 «ኔ ሃ ታኮ ዋሳ፤ ታኒካ ኔሰ ዛራና፤ ኔ ኤርንታ ሚሽ ሄሲካ ዋልቃማኔ ፒልጊን ኤሬቶንታ ሚሽ ታ ኔሰ ቆንጪሳና፡፡

4 ጎዳ ኢሰራኤል ጸሳይ ባቢሎኔታራ ዲዛ ኦላን ቢታ ዶሪዲ ማሻን ቆሂዛ ኦላ ቱቃናሰ ላሌቲዳ ሃ ካታማይ ኬላታሲኔ ዩሁዳ ካዎቲላ ኬላታ ጊሻሰ፡፡

5 «ሃይታንቲ ታ ሃንቆኒኔ ባሻን ዋጂዛ አሳታ አሃን ኩማና፤ ኢስታ ኢታቴላ ጊሻስ ታኒ ታ አይፌሶ ሃ ካታማይፔ ሃራሶ ዛራና፤ ጌስ።

6 «ጊዶ አቲን ታኒ ኢዚስ ፓጻቴሌኔ ፓያቴላ ዛራ ኢማና፤ ታ ዴሬዛካ ፓላና፤ ታ ኢስታ ዳሮ ሳሮቴላኒኔ ዋፓቴላን ዋላና።

7 ታኒ ዩሁዳ አሳኔ ኢስራኤሌ አሳ ዲኤቲ ኢስቲ ቢዳሶፔ ዛራና፤ ኢስቲ ካሴ ዲዛ ማላ ታ ኢስታ ሎኤላ ዋላና።

8 ኢስቲ ታ ቦላ ኦሊዳ ናጋራ ኡባፌ ታ ኢስታ ጌሻና፤ ኢስቲ ማካላቴላን ታና ቆሂዳ ናጋራ ኡባ ታ ኢስታስ አቶ ጋና።

9 ሄሳፌ ጉዬ ሃና ሃ ካታማያ ታ ኢዚስ ኦሊዳ ሎኦ ሚሽ ኡባ ሲዩዛ ካዋቴላታ ኡባ ሲንላን ሳባስ፤ ኡፋይሳስ፤ ጋላታሲኔ ቦንቾስ ጊዳና፤ ታ ኢዚስ ኢማዛ ዳሮ ዱሬቴላፌኔ ሳሮቴላፌ ዴንዲዳይሳን አሳይ ኢዚስ ያሻን ኮኮራና» ጌስ።

10 ጎዳይ፡ «አንቲ፡ «ሃና ሃ ሶሆያ አሲኔ ሜዶሳቲ ባይንዳሶ፤ ጌታ፤ ጊዶ አቲን አሲኔ ሜዶሳቲ ባይንዳ ቡላ ጊዲዳ ዩሁዳ ካታማታኒኔ ዩራሳላሜ ኦጌታን ቃሴ ጩንጉርሲ ሴቴታና።

11 ኡፋይሳ ጩንጉርሲ፡ ሚሽራታ ጩንጉርሲ ሄሳሶካ ቡላቺዛይሳኔ ቡላቺቲዛሪ ቃላይ፡

« ሳዳይ ኪያ፤

ኢዛ ማሮቴላይካ ሜርናሳ፤

ጎዳ ኡባፌ ዋልቃማ

ጸሳ ጋላቲቲ፤

ጊዛ ጋላታ ያርሾ ኤኪዲ

ጸሳ ኬላ ዩዛ

አሳታ ጩንጉርሲ ሴቴታና፤

ሄ ቢታይፌ ዲኤቲዳ ሚሽ

ካሴ ዲዛሶታ ዛራና» ጌስ።

12 ጎዳይ ኡባፌ ዋልቃማ ጸሳይ፡ «አስ ጊዲን ዋይኮ ሜዶሳቲ ባይንዳ ቡላ ሶሆን ካታማታ ኡባን ሄንላንቻቲ ባንታ ዉዴታ ሄማዛሶሆ ዴማና።

13 ጌዜ ቢታን፡ አርሼይ ዉሊዛሶ ባጋን ዲዛ ዙማታ ጋርሳን፡ ኔጌቤን ዲዛ ካታማታን፡ ቢኒያሜ ቢታን፡ ዩራሳላሜ ዩሾን ዲዛ ሄራታኒኔ ዩሁዳ ካታማታን ሄንላንቻቲ ባንታ ዉዴ ሜሄታ ቆዳና።

14 «ታኒ ኢስራኤሌ አሳሲኔ ዩሁዳ አሳስ ኦላና ጊዳ ሂዶታ ቃላ ፖላና ጋላሳቲ ያና።

15 «ሄ ጋላሳታኒኔ ሄ ዋዴታን

- ታኒ ዳዊቱ ዛሬ፤  
ኢሲ ደሎ ሃጋ አጪሳና፤  
ኢዚ ሄ ቢታን ሱሬ ፒርዳኔ  
ደሎቱል አላና።
- 16 ሄ ዎዴ ዩሁዳ አሳይ አታና፤  
ዩሩሳላሜ አሳይካ ሳሮን ዳና፤  
ኢዛካ፡ ሳዳይ ኑስ  
ደሎቱል ጋና።
- 17 «ሳዳይ፡ ሳዊቱ ዜሬላፌ ኢስራኤል ካዎቱል አራታን ኡቲዛ  
አሲ ሙሊካ ዳዬና።
- 18 ለዌ ዛሬ፤ ገዳዳ ቄሴታ፤ ጸጌቲዛ ያርሾ፡ ካላ ያርሾኔ  
ሃራ ያርሾ ሺሻናስ ኡባ ዎዴ ታ ሲንላን ኤቂዛ አሲ ኢስታ ጋርሳፌ  
ዳዬና » ጌስ።
- 19 ጎዳ ቃላይ ኤርማሳኮ ዪዴስ።
- 20 ጎዳይ፡ «ታኒ ጋላሳሲኔ ኦማርሳስ ዎሊዳ ዎጋ ኢንቲ ላሊዲ  
ጋላሲኔ ኦማርሲ ባንታስ ዎዴዳ ዎጋን ኦሶንታ ማላ ታ ጫቆዛ  
ኢንቲ ላላና ዳንዳይኮ።
- 21 ሄ ዎዴ ታኒ ዳዊቱሲኔ ታስ ቄሴቱላን አላና ማላ ለዌታስ  
ጌሊዳ ጫቆ ቃላ ላላና ዳንዳይቱስ፤ ሄሳፌ ጉዬ ዳዊቱ ዛሬ፤  
ካዎቱል አራታን ኡታና አሲ ዳና።
- 22 ታኒ ታ ኦሳንቻ ዳዊቱ ዛሬታኔ ታ ሲንላን ሃጋዚዛ ለዌ  
ቆዎታ ቆዳይ ባይንዳ ሳሎ ጸሊንቲታ ማላኔ ማኪን ዉሮንታ አባ  
ሻማንታ ማላ ዳርሳና» ጌስ።
- 23 ጎዳ ቃላይ ቃሴካ ኤርማሳኮ ዪዲ፡
- 24 «ሃ አሳይ፡ ሳዳይ ባ ዶሪዳ ናምኤ ካዎቱላታ ዬጊ አጊዴስ፤  
ጊ ሃሳይዛይሳ ኔ አኬካቤኪ? ኢስቲ ታ ዴራ ካዲዲ ካዎቱላን  
ቆዲቤቲና» ጌስ።
- 25 ጎዳይ፡ «ጋላሳሲኔ ኦማርሳስ፡ ሳሎሲኔ ሳአስ ዎጋ ኤሲዳይ  
ታና ጊዶንታ አጊኮ።
- 26 ታኒ ያቆቤ ዜሬላታኔ ታ አይሌ ዳዊቱ ዜሬላታ አጋጋና፤  
ዳዊቱ ዛሬ፤ አብራሃሜ፡ ዪሳቃኔ ያቆቤ ዛሬታ ቦላ ካዎታና ማላ  
ዶሪኬ፤ ታኒ ኢስታስ ቃዴታና፤ ኢስታፌ ዲኤቲዳይሳካ ኢስታስ  
ዛራና» ጌስ።

## 34

ካዎ ሴዴቂያሳስ ዮቲቲዳ ሴራ ቃላ

33:16 ኤር 23:5-6

33:17 2ሳሜ 7:12-16፤ 1ካዎ 2:4፤ 1ታሪ 1:11-14

33:18 ታይ 3:5-10

1 ባቢሎን ካዎ ናቡካደናጾሬይ፥ ኢዛ ኦላንቻቲ ኡባይን ኢዚ ሃሪዛ ካዎቲላ ጋርሳን ዲዛ ካዎቲኔ ዳሬ ኡባይ፥ ዩሩሳላሜን ኢዚ ዩሾን ዲዛ ካታማታ ኡባ ኦሊዛ ዎዴ ሃ ቃላይ ጎዳፔ ኤርማሳኮ ዪዴስ።

2 ጎዳ ኢስራኤል ጸሳይ፥ «የሁዳ ካዎ ሴዴቂያሳኮ ባዳ፥ ሓኒ ሃ ካታማዮ ባቢሎን ካዎ ኩሼን ኣላ ኢማና፤ ኢዚካ ሃ ካታማዮ ታማን ጹጋና።

3 ኔኒ ኢዛ ኩሼፔ ኬሳ ኤካካ፤ ኔኒ ዲኤታናን ኢዛስ ኣቆ እማታና፤ ኔኒ ኔ ኣይፌን ባቢሎን ካዎ ቤኣና፤ ኔናራ ኢዚ ቲራን ጋይቲ ሃሳያና፤ ሄሳፌ ጉዬ ኔኒ ባቢሎን ቢታ ባና።

4 « ሂደ ኣቲን የሁዳ ካዎ ሴዴቂያሳ! ጎዳ ቃላ ሲያ! ኔኒ ኦላን ሃይቃካ፤

5 ኔኒ ሳር ሃይቆ ሃይቃና፤ ኔፔ ሲንላን ካዎቲዳ ኔ ኣዎቲ ሃይቂን ኢስቲ ቦንቸስ ታማ ኤሉዳ ማላ ኔኒ ሞጌቲዛ ጋላሲካ ኢስቲ ኔ ቦንቸስ ታማ ኤላና፤ ሂስቲዲ «ዎ! ዎ! ኑ ካዎዙ!» ጊዲ ኔስ ዩካና፤ ሃይሳ ሃ ቃላ ዮቲዳይ ታና ጎዳን ጌስ ጋዳ ዮታ» ጊዴስ።

6 ሄሳፌ ጉዬ ናቤ ኤርማሲ ሃ ቲንቢቱ ኡባ የሁዳ ካዎ ሴዴቂያሳስ ዩሩሳላሜን ዮቲዴስ።

7 ሄ ዎዴ ባቢሎን ካዎ ኦላንቻቲ ዩሩሳላሜ ካታማኔ የሁዳን ኢስታ ዩሾይ ገምቤቲ ኡቲን ኣቲዳ ላኪሼኔ ኣዜቄ ጌቲቲዛ ካታማታ ኦሊሼ ዴቲስ። ገምቤቲ ኡቲዳ ካታማታፔ ኣቲዳይቲ ሃይታ ጸላ።

### ኣይሌቴላፌ ላኣ ኬስ

8 ካዎ ሴዴቂያሲ ኣይሌቴላ ጋርሳን ዲዛይታ ላኣ ኬሳናስ ዩሩሳላሜን ዲዛ ኣሳ ኡባራ ጫቂቲዳፔ ጉዬ ጎዳ ቃላይ ኤርማሳኮ ዪዴስ።

9 ኢሶይ ኢሶይ ኢብራዌ ጊዲ ኡቲዲ ኣቱማ ኣስ ጊዲን ዎይኮ ማጫ ኣስ ጊዲን ኣይሌቴላን ዲዛዴ ላኣ ዩዳና ቤሴስ፤ ኣይሁዳታፔ ኦኒካ ባ ኢሻ ኣይሌ ሂስቲ ሃራናስ ቤሴና።

10 ሃይሳ ሃ ጫቆ ቃላን ኩዪዳ ሹማቲኔ ዳሬይ ኡባይ ባንታ ኣቱማኔ ማጫ ኣይሌታ ኣይሌቴላፌ ኬሳናሲኔ ናምኣንሶ ዛሪዲ ኣይሌቴላን ሃርንታ ኣጋናስ ቃላ ቃቺዳ።

11 ጊደ ኣቲን ባንታ ቆፋ ላሚዲ ኣይሌቴላፌ ላኣ ዩዲዳ ባንታ ኣቱማኔ ማጫ ኣይሌታ ዛሪዲ ኣይሌቴላን ሃሪዳ።

12 ሄሳ ጊሻስ ጎዳ ቃላይ ኤርማሳኮ ዪዴስ።

13 ጎዳ ኢስራኤል ጸሳይ፥ «ታኒ ኢንቴ አዋታ ገብጾፔ አይሌቴላ ቢታፌ ኬሲዳ ዋዴ ኢስታራ፥

14 «ባና አይሌቴላሰ አሊ ኢሚዳ ኢንቴ ዳቦ ኢብራዌታ ኡሱፑን ላይላ ሃሪዳፔ ጉዬ ላፑንላ ላይላን ላኣ ዬዶ፤ ጋዳ ጫቄላዲሰ፤ ጊዶ አቲን ኢንቴ አዋቲ ታ ገዛዝ ሲዮንታ ኢጲዲ ባ ሃይላ ሃራሶ ዩጊዳ።

15 ሃኢ ኢንቴ ማርቴላን ጌሊዲ ታ ሲንላን ሎኦ ኦሶ ኦሊዴታ፤ ኢንቴ ኢሶይ ኢሶይ ኢብራዌ ጊዲዳ ኢንቴ ዳቦቲ አይሌቴላፌ ላኣ ኬዛና ማላ አዋጂዴታ፤ ታ ሱንላይ ኢዛን ጴይጌቲዛ ኬላን ታ ሲንላን ጫቆ ቃላ ጌሊዴታ።

16 ጊዶ አቲን ሃኢካ ኢንቴ ኢንቴ ቆፋ ላሚዲ ታ ሱንላ ቱኒሲዴታ። ኢንቴ ላኣ ዬዲዳ አቲማኔ ማጫ አይሌታ ዛሪዲ አይሌቴላን ሃሪዴታ» ጌሰ።

17 ሄሳ ጊሻሰ ታኒ ጎዳይ፥ «ኢንቴ ታሰ አዛዜቶንታ ኢጲዲ ኢንቴ አሻታኔ ኢንቴ ዳቦታ አይሌቴላፌ ላኣ ዬዲዛ አዋጃ አዋጂቤኬታ፤ ቤኢቴ ታኒ ኢንቴ ቦላ፥ «ላኣ» አዋጃ አዋጃና፤ ሄሲካ ኦላን፥ ኢታ ሃርጌኒኔ ኮሻን ኢንቴ ኩንዳና አዋጃ፤ ታኒ ኢንቴና ሳኣ ቦላ ዲዛ ካዋቴላቲ ሻጴቲዛ ሚሽ ኦላና።

18 ታናራ ጫቄቲዳ ቃላ ሚንሊዳይታኔ ታ ሲንላን ጫቄቲዳ ቃላ ፖሎንታ ኣሳታ ኢሰቲ ማሪ ሹኪ ኢዛ አሾ ናምኡ ኬሲ ሻኪ ዋሊዲ ኢዛ ጊዶራ አጂዳይሳሶ ታኒካ ኢስታ ኦላና።

19 ዩሁዳኔ ዩሩሳላሚ ካሌሊዛይታ፥ ካዋ ኬላ ሹሜታ፥ ቄሴታኔ ማራ አሻ ጊዶራ አጂዳ ዳራ ኡባ፥

20 ታኒ ኢስታ ሼምፖ ዋዳናሰ ኮይዛ ኢስታ ሞርኬታ ኩሼን አላ ኢማና፤ ኢስታ ኣሃይ ሳሎ ካፎታሲኔ ዶኣታሰ ቁማ ጊዳና» ጌሰ።

21 ጎዳይ፥ «ታኒ ዩሁዳ ካዋ ሴዴቂያሳኔ ኢዛ ሹሜታ ኢሰቲ ዋዳና ኮይዛ ኢስታ ሞርኬታ ኩሼን ሄይቲካ ጉላ ዋዴሰ ኢንቴና ኦሎ አጊዳ ባቢሎኔ ካዋ ኦላንቻታ ኩሼን አላ ኢማና።

22 ታኒ ኢስታ አዛዛና፤ ኢሰቲ ሃ ካታማዮ ኦላና ማላ ታኒ ዛራ ኤሃና፤ ኢሰቲካ ካታማዮ ኦሊ ኦይካናኔ ታማን ጹጋና፤ ታኒ ዩሁዳ ካታማታ አሲ ባይንዳሶ ቡላ ኬሳና» ጌሰ።

## 35

ኤሬካቤታ አማኔቴላ

1 የሁዳ ካዎ ኢየሱያሳ ና ኢዮአቄሜ ካዎቴላ ላይላን ጎዳ ቃላይ ኤርማሳኮ ዪዲ፤

2 «ኤሬካቤታኮ ባዳ ኢስታ ሃ ጸሳ ኬላ ኤካ ያ፤ ኢስታ ኪፊሌ ጌልላዳ ኢስታስ ኡያናሰ ዎይኔ ኡሹ ኢማ» ጊዴሰ።

3 ሂስቲን ታኒ ባዳ ኤሬካቤ ና፤ ኤርማሳ ናዛ ያኢዛኔ፤ ኢዛ ኢሻታኔ ኢዛ አቱማ ናይታ ኡባኔ ኤሬካቤ ዛሬታ ኡባ ጾይጋዲሰ።

4 ኢስታ ጸሳ ኬላ ኤሃዳ ሃናኔ ናይታ ኪፊሌ ጌልላዲሰ፤ ሃናኔ አዋ ጌዴሊያይ ጸሳ አሳ፤ ሄ ኪፊሌዚ ፔንጌ ናጊዛ ሻሎሜ ና ማኢሳያ ኪፊሊፔ ቦላ ባጋራ ሹሜታ ኪፊሌ ማታን ዳሰ።

5 ሄሳፌ ጉዬ ታኒ ኤሬካቤታ ሲንላን ዎይኔ ኡሺ ኩሚዳ ኦቶታኔ ዋንጫታ ዋላዳ፤ «ሃይሳ ዎይኔ ኡሻ ኡዪቴ» ጋዲሰ።

6 ጊዶ አቲን ኢስቲ ዛሪዲ፤ «ኮኒ ዎይኔ ኡሹ ኡዮኮ፤ ኦ አዋ ኤሬካቤ ና ኢዮናዳቤይ ኦና፤ ላኒቴካ ኢንቴ ናይቲካ ዎይኔ ኡሹ ሜርናሰ ኡዮፒቴ፤

7 ኬላ ኬጾፍቴ፤ ካላ ዜርፒቴ፤ ዎይኔ ቶኮፍቴ፤ ኡባቶ ዱንካኔን ዲቴ፤ ሃይታፔ ኢሲናካ ኢንቴሰ ዲፑ። ሄሳላ ኢንቴ ኦሊኮ ኢንቴ ኢማላቴላ ዲዛ ቢታን ዳሮ ላይላ ዳና» ጊዴሰ።

8 ኦ አዋ ኤሬካቤ ና ኢዮናዳቤይ ኦና አዛዚዳ ኡባ ኮኒ ፖሊዶሰ፤ ኮኒኔ ኦ ማፑቴ፤ ኦ አቱማ ናይቲኔ ኦ ማጫ ናይቲ ዎይኔ ኡሹ ኡዪ ኤሮኮ።

9 ኦ ኢዛን ዳና ኬሊካ ኬጸቤኮ፤ ዎይኔ ቶኪዛ ጋዴይ፤ ጎሻ ጋዴይ፤ ዜሬላ ካሊካ ኦሰ ዳና።

10 ኮኒ ዱንካኔ ጊዶን ዴኢዶሰ፤ ኦ አዋ ኢዮናዳቤይ ኦና አዛዚዳ ኡባ ኦ ናጊዶሰ።

11 ጊዶ አቲን ባቢሎኔ ካዎ ናቡካዳናጾሬይ ሃ ቢታዮ ዎራጂዳ ዎዴ፤ ሃ ዪቴ ባቢሎኔ ኦላንቻታፔኔ አራሜ ኦላንቻታፔ ባቃቲ አታናሰ ዬሩሳላሜ ቦሰ» ጊዶሰ፤ ሄሳ ጊሻሰ ኦ ዬሩሳላሜን ኡቲዶሰ» ጊዳ።

12 ሄሳፌ ጉዬ ጎዳ ቃላይ ኤርማሳኮ ዪዴሰ።

13 ኡባፌ ዎልቃማ ጎዳ ኢስራኤል ጸሳይ፤ «ባዳ የሁዳ አሳሲኔ ዬሩሳላሜ አሳሰ፤ ታ ቃላ ናጋና ማላ ሃይሳፌ ታማሬኬቲ?» ጋ ዮታ።

14 ኤሬካቤ ና ኢዮናዳቤይ ባ ናይታ ዎይኔ ኡሹ ኡዮንታ ማላ አዛዚዳሰ፤ ሄ አዛዘይካ ናጌቲዳሰ፤ ኢስቲ ባንታ አዋ አዛዘ ናጊዳ ጊሻሰ ሃቶ ጋካናሰ ዎይኔ ኡሹ ኡዬቴና፤ ኢንቴ ጊዲኮ ታ ኢንቴሰ ዛራ ዛራዳ ዮቲንካ አዛዘቲቤኬታ።

15 ታስ አሳንቻ ገዲዳ ናቤታ ዛራ ዛራ እንቴኮ ኪታዲሰ፤ ሂሰታዳ፡ ላንቴ ኡባይካ እንቴ ኢታ ኦጌፔ ሃኢ ሲሚቴ፤ እንቴ ኦሶካ ሎኤሊቴ፤ ኤቃ ጸሳታስ ጎይኖፍቴኔ ኦሶፍቴ። ሂሰቲኮ፡ ታኒ ጎዳይ እንቴሲኔ እንቴ ኣዋታስ ኢሚዳ ቢታን እንቴ ዳና፡ ጋዲሰ። እንቴ ገዲኮ እንቴ ሃይላ ታኮ ዩጊዲ ሲዩቤኬታ።

16 ኤሬካቤ ና ኢዮናዳቤ ዜሬላቲ ኢሰታ ኣዋይ ኢሰታ ኣዛዚዳ ኣዛዘ ፖሊዳ፤ ገደ ኣቲን ሃ ኣሳይ ታስ ኣዛዜቲቤና» ጌሰ።

17 ሄሳ ገሻሰ ኡባሬ ዋልቃማ ጎዳ ኢሰራኤሌ ጸሳይ፡ «ቤኢቴ፤ ታኒ ዩሁዳ ኣሳ ቦላኔ ዩሩሳላሚን ዲዛይታ ኡባ ቦላ ኤሃና ገዳ ኢታ ሚሽ ታ ኤሃና፤ ጋሶይካ ታ ኢሰታስ ዮቲን ሲዩቤቴና፤ ታ ኢሰታ ጼይጊን ኢሰቲ ታስ ኮዩቤቴና» ጌሰ።

18 ሂሳሬ ጉዬ ኤርማሲ ኤሬካቤ ዜሬላታስ፡ «ኡባሬ ዋልቃማ ጎዳ ኢሰራኤሌ ጸሳይ እንቴና፡ ላንቴ ኢታ ኢዮናዳቤሰ ኣዛዜቲዳ ገሻሰ፡ ኢዛ ዋጋ ካሊዳ ገሻሲኔ ኢዚ ኣዛዚዳ ሚሽ ኡባካ ፖሊዳ ገሻሰ።

19 ኤሬካቤ ና ኢዮናዳቤይ ታስ ጎዳሰ ኦሊዛ ኣቱማ ኣሲ ኣይዴካ ሓዩና፡ ጌሰ» ገደሰ።

## 36

### ባርኬይ ዴራስ ናባቢዳ ጸሓ ማጸፋ

1 ዩሁዳ ካዋ ኢዮሲያሳ ና ኢዮኣቄሜይ ካዋቲዳ ኦይዳንሶ ላይላን፡ ጎዳ ቃላይ ኤርማሳኮ ዩዲ፡

2 «ጸሓ ማጸፋ ኤካዳ ታኒ ኢዮሲያሳ ካዋቲላ ዋዴፔ ዶማዳ ታ ኔሰ ዮቶ ኦይኮሶሬ ሃች ጋካናሰ ኢሰራኤሌ ቦላ፡ ዩሁዳ ቦላኔ ሃራ ካዋቲላታ ኡባ ቦላ ሃሳይዳ ቃላ ኡባ ጸፋ።

3 ታኒ ዩሁዳ ኣሳ ቦላ ኤሃና ጋዳ ሃልቺዳ ቦሻ ኡባ ኣሳይ ሲዩዲ ኢሶይ ኢሶይ ባ ቢዛ ኢታ ኦጌፔ ሲማናኮ ኦኔ ኤሬዛይ? ታኒካ ኢሰታ ቆሆኔ ኢሰታ ናጋራ ኣቶ ጋና» ገደሰ።

4 ሄሳ ገሻሰ ኤርማሲ ኔሪያ ና ባርኬይ ጼይጊደሰ፤ ሂሰቲዲ ጎዳይ ኢዛሰ ዮቲዳይሳ ኡባ ባርኬሰ ዮቲን ኢዚ ጸሓ ማጸፋን ጸፊደሰ።

5 ሂሳሬ ጉዬ ኤርማሲ ባርኬሰ፡ «ታኒ ጎዳ ኬላ ጌሎንታ ማላ ዲጌቲዳ ገሻሰ ጌላና ዳንዳይኬ።

6 ሄሳ ገሻሰ ኔኒ ኣሳይ ጸሚዛ ጋላሰ ጎዳ ኬላ ባዳ፡ ታኒ ዮቲን፡ ኔኒ ጸሓ ማጸፋን ጸፊዳ ጎዳ ቃላ ኢሰታስ ናባባ፤ ባንታ ካታማታፔ ዩዳ ዩሁዳ ኣሰ ኡባሲካ ናባባ።

7 ሃይሳ ዴራ ቦላ ጎዳይ የቲዳ ሃንቆይኔ ቦሻይ ዴጾ ጊዲዳ ገሻሽ ኢስታፌ ኢሶይ ኢሶይ ባ ናጋራ ጎዳ ሲንላን ፓጺዲ ባንታ ኢታ ኦጌፔ ኢስቲ ሲማናኮ ኦኔ ኤሪዛይ?» ጊዴስ።

8 ኔሪያ ና ባሮኬይ ናቤ ኤርማሲ ኢዛስ የቲዳይሳ ኡባ ፖሊዴስ፤ ጎዳ ኬላን ጎዳ ቃላ ጸላ ማጻፋፔ ናባቢዴስ።

9 የሁዳ ካዎ ኢዮሲያሳ ና ኢዮአቄሜይ ካዎቲዳ ኢቻሻንሉ ላይላን፣ ኡዱፋንላ አገናን፣ ዬሩሳላሜን ዲዛ ኣስ ኡባሲኔ የሁዳ ካታማታፔ ዪዳ ኣሳስ ጎዳ ሲንላን ጸማና ማላ ኣዋጂዳ።

10 ባሮኬይ ጸላ ማጻፋን ጸፊቲዳ ኤርማሳ ቃላ ጎዳ ኬላፊ ፑዴ ባጋን ዲዛ ዛጎን፣ «ኦራላ ፔንጌ» ጌቲቲዛ ጸላ ኬላ ፔንጌ ኣቻን ዲዛ ሳፋኔ ና ጸፊ ጋማሪያ ኪፊሌን ኤቂዲ ዴሬ ኡባስ ናባቢዴስ።

11 ሳፋኔ ናዛ ጋማሪያ ና ሚኪያሲ ጸላ ማጻፋፔ ናባቤቲዳ ጎዳ ቃላ ኡባ ሲዪዲ።

12 ካዎቲላ ኬላን ጸፊዛ ኪፊሌ ቢዴስ፤ ሹሜቲ ኡባይ ጸፊ ኤልሻማይ፣ ሻማኤ ና ዳላያይ፣ ኣኪቦሬ ና ኤልናታኔይ፣ ሳፋኔ ና ጋማሪያይ፣ ሃናኒያ ና ሴዴቂያሲኔ ሃራ ሹሜቲ ኡባይ ሄን ኡቲዳ።

13 ባሮኬይ ዴራስ ጸላ ማጻፋፔ ናባቢሺን ሲዪዲ ቃላ ኡባ ሚኪያሲ ኢስታስ የቲዳፔ ጉዬ።

14 ሹሜቲ ኡባይ ኩሼ ና፣ ሹሌሚያ ና፣ ናታኒያ ና የሁዳ፣ «ዴራስ ኔ ናባቢዳ ጸላ ማጻፋ ኤካዳ ያ» ጊዲ ባሮኬስ ከታ ዬዲዳ፤ ኔሪያ ና ባሮኬይ ጸላ ማጻፋ ኤኪዲ ኢስታኮ ዪዴስ፤

15 ኢስቲካ ኢዛ፣ «ኣኔ ኡታዳ ኑስ ማጻፋ ናባባ» ጊዳ። ባሮኬይካ ኢስታስ ናባቢዴስ።

16 ኢስቲካ ቃላ ኡባ ሲዪዲ ባ ጋርሳን ኢሶይ ኢሳ ያሻቲላን ጸሊዲ ባሮኬስ ሃይሳ ሃ ቃላ ኡባ፣ «ኑኒ ካዎዛስ የታናስ ቤሴስ» ጊዳ።

17 ቃሴካ ዛሪዲ፣ «ኑኒ ሃ ቃላ ኡባ ዎስታ ጸፊዳኮ ኑስ የታ፤ ኤርማሲ ባ ዶናን የቲን ጸፋዲ?» ጊዲ ባሮኬ ኦይቹዳ።

18 ባሮኬይካ፣ «ኤ፣ ሃ ቃላ ኡባ ኤርማሲ ባ ዶናፔ ታስ የቲዴስ፤ ታኒካ ቃላሜን ጸላ ማጻፋን ጸፋዲስ» ጊ ዛሪዴስ።

19 ሹሜቲ ባሮኬ፣ «ኔኒኔ ኤርማሲ ቢዲ ቆቲቲቲ፤ ኢንቲ ኣዎን ዲዛኮ ኦኒካ ኢንቲና ኤርፖ» ጊዳ።

### ጸላ ማጻፋዛ ጸጌቴሉ

20 ሹሜቲ ጸላ ማጻፋዛ ጸፊ ኤልሻማ ኪፊሌን ዎሊዳፔ ጉዬ ካዎዚ ዲዛ ዛጎ ቢዲ ኢዛስ ሃኒዳ ኡባ የቲዳ።

21 ሂስቲን ሄ ማጻፋ ኤሃና ማላ ካዎዚ የሁዳ ከቲዳስ፤ የሁዳይካ ጸላ ማጻፋ ኤልሻማ ከፊሌፔ ኤሂዲ ካዎዛሲኔ ኢዛ የሾን ኤቂዳ ሹሜታስ ናባቢዳስ።

22 ኡዱፉንፋ ኣጊናን ሳኣይ ባልጎ ጊዲዳ ጊሻስ ካዎዚ ባልጎ ኢዛን ጋሞኢዛ ኬላን ዳስ፤ ሄ ዋዴ ኢዛ ሲንፋን ጮጮ ታማይ ኤጲሼ ዳስ።

23 የሁዳይ ሄቹ ዋይኮ ኦይዲ ሶሆታ ናባቢዳፔ ጉዬ ካዎዚ ሄ ሶሆታ ጸላ ማጻፋፔ ጸፊዛ ማጋላን ቃንጺ ቃንጺዲ ኩሜላ ማጻፋይ ጽጌቲ ዉራና ጋካናስ ታማዛን ዩጊዳስ።

24 ካዎዛ ጊዲን ዋይኮ ሄ ቃላ ሲዩዳ ሹሜቲ ኡባይ ኣይኮካ ያዩቤቲና፤ ባንታ ማይኦካ ዳኪቤቲና።

25 ኤልናታኔይ፥ ዳላያይኔ ጋማሪያይ ካዎዚ ጸላ ማጻፋ ታማን ጸላንታ ማላ ዋሲንካ ኢዚ ኢስታ ዋሳ ሲዩቤና።

26 ሄሳፊካ ቦላራ ጸፊ ባርኬኔ ናቤ ኤርማሳ ኦይኪ ቃቻና ማላ ካዎዛ ና ዩራሂምኤሌ፥ ኣዛሪኤሌ ና ሳራያኔ ኣብዲኤሌ ና ሹሌሚያ ኣዛዚዳስ፤ ጊዶ ኣቲን ጎዳይ ኢስታ ቆቲዳስ።

### ኤርማሲ ናሞኣንፋ ዛሪ ጸፊዳ ማጻፋ

27 ኤርማሲ ዮተሺን ባርኬይ ጸፊዳ ጸላ ማጻፋ ካዎዚ ጽጊዳፔ ጉዬ ጎዳ ቃላይ ኤርማሳኮ ዩዲ፥

28 «ሃኢካ ሃራ ጸላ ማጻፋ ኤካዳ የሁዳ ካዎ ኢዮኣቄሜይ ካሴ ጽጊዳ ጸላ ማጻፋ ጊዶን ዲዛ ቃላ ኡባ ጸፋ።

29 ቃሴ የሁዳ ካዎ ኢዮኣቄሜስ፥ ሳቢሎኔ ካዎይ ቱማፔ ዩዲ ሃ ቢታ ጳይሳና፤ ኢዚን ዲዛ ኣሳኔ ሜሄ ዉርሳና ጋዳ ኣይስ ጸፋዲ?» ጋዳ ጸላ ማጻፋ ጽጋዳሳ» ጌስ ጎዳይ ጋዳ ዮታ።

30 ሄሳ ጊሻስ ጎዳይ የሁዳ ካዎ ኢዮኣቄሜ ጊሻስ፥ «ዳዊቲ ካዎቲላ ኣራታን ኡታናይ ኢዛ ዛሬፔ ቤቲና፤ ኢዛ ኣሃይካ ጋሳ ኣዎ ሴላሲኔ ኦማርሳ ኬንቸስ ዩጌቲ ኣታና።

31 ኢዛኔ ኢዛ ናይታ፥ ኢዛ ሹሜታ ኢስታ ኢታቲላ ጊሻስ ታ ኢስታ ቃጸያና፤ ታ ጊዛዝ ኢስቲ ሲዮንታ ኢጲዳ ጊሻስ ታ ኢስታ ቦላ ኤሃና ጊዳ ባሽ ኡባ ኢስታ ቦላ፥ ዩሩሳላሜኒኔ የሁዳን ዲዛ ኣሳ ቦላ ኤሃና» ጌስ።

32 ሄሳፊ ጉዬ ኤርማሲ ሃራ ጸላ ማጻፋ ኤኪዲ ኔሪያ ና ጸፊ ባርኬስ ኢሚዳስ፤ ሂስቲን ባርኬይ የሁዳ ካዎ ኢዮኣቄሜይ ታማን ጽጊዳ ጸላ ማጻፋ ቃላ ኡባ ኤርማሲ ኢዛስ ዶናን ዮቲን ጸፊዳስ። ቃሴ ኤርማሲ ሄሳ ሚሳቲዛ ሃራ ቃላካ ጉጂን ኡባካ ባርኬይ ጸፊዳስ።

## 37

## ኤርማሳን ካዎ ሴዴቂያሳ

<sup>1</sup> ባቢሎን ካዎ ናቡካደናጆሬይ ኢዮአቄሜ ና ኢዮአኪኔ ሶሆን ኢዮሲያሳ ና ሴዴቂያሳ ዩሁዳ ቢታን ካዎሊዴስ።

<sup>2</sup> ገደ አቲን ሴዴቂያሲ፥ ኢዛ ሹሜቲኔ ዳሬ አሳይ ኡባይ ጎዳይ ናቤ ኤርማሳ ባጋራ ዮቲዳ ቃላስ አዛዜቲቤቴና።

<sup>3</sup> ካዎ ሴዴቂያሲ፥ ሼሌሚያ ና ዩካሌኔ ማኢሳያ ና ቄሴ ሶፎናሳ ናቤ ኤርማሳኮ፥ «ጎዳ ኑ ጸሳ ኑስ ዋሳ» ገዲ ከቲዴስ።

<sup>4</sup> ሄ ዋዴ ኤርማሲ ቡሮ ቃሾ ኬሐ ጌሎንታ ዲዛ ገሻስ ባ ሼኔ ማላ ሰሜሬቲሼ ዴስ።

<sup>5</sup> ገብጼ ካዎ ኦላንቻቲ ገብጼፔ ኬዚዲ ዪዛይሳ ዩሩሳላሚ ገደሊዳ ባቢሎን ኦላንቻቲ ሲዪዳ ዋዴ ኢስቲ ዩሩሳላሚፔ አገዲ ጉዬ ሲሚዳ።

<sup>6</sup> ሄሳፌ ጉዬ ጎዳ ቃላይ ናቤ ኤርማሳኮ ዪዲ፥

<sup>7</sup> ጎዳ ኢስራኤሌ ጸሳይ፥ «ታና ኢንቴ ኦይቻና ማላ ኢንቴና ከቲዳ ዩሁዳ ካዎስ፥ «ቤኢቴ፥ ኢንቴና ማዳናስ ኬዚዳ ገብጼ ካዎ ኦላንቻቲ ባንታ ቢታ ጉዬ ሲሚ ባና።

<sup>8</sup> ባቢሎን ኦላንቻቲካ ሲሚ ዪዲ ሃኖ ሃ ካታማዮ ኦሊ ኦይካናኔ ኢዛ ጹጋና ጌቲ» ጌስ።

<sup>9</sup> ጎዳይ፥ « «ባቢሎን ኦላንቻቲ ኑና ቱማፔ አገ ቢዳ» ገዲ ቆፖፍቴ፤ ኢስቲ አገ ቦንታ ገሻስ ኢንቴና ኢንቴርካ ባሌላፍቴ።

<sup>10</sup> ኢንቴናራ ኦሌቲዛ ባቢሎን ኦላንቻታ ኢንቴ ጸኒን ኢስታ ዲንካኔ ገደን ማዲንጺዳ አሲ ጸላ አቲኮካ ሄይቲ ዪዲ ሃኖ ሃ ካታማዮ ጹጋና» ጌስ።

## ኤርማሳ ቃሼቴሐ

<sup>11</sup> ባቢሎን ኦላንቻቲ ገብጼ ካዎ ኦላንቻታ ጋሶን ዩሩሳላሚ ዩጊ ኬዚዳፔ ጉዬ፥

<sup>12</sup> ሄ ዋዴ ኤርማሲ ዴራ ገደን ባና ጋኪዛ ጸንጾ ኤካናስ ቢኒያሚ ቢታ ባናስ ዩሩሳላሚፔ ዴንዲዴስ።

<sup>13</sup> ገደ አቲን ኢዚ ቢዲ ቢኒያሚ ፔንጌ ጋኪሺን ዛቤታ ሃላቃ ሃናኒያ ናዛ ሼሌሚያ ና ዪሪያይ ኢዛ፥ «ኔኒ ዴራ ካዳዳ ባቢሎን አሳኮ ባና ጋሳ!» ገዲ ኦይኪዴስ።

<sup>14</sup> ኤርማሲካ፥ «ኔኒ ገዛይሲ ዋርደ፤ ታኒ ካዳዳ ባቢሎን ቢዛ አስ ገዲኬ» ገዴስ፤ ገደ አቲን ዪሪያይ ኢዚ ገዛይሳ ሲዮንታ ኢጺዲ ኤርማሳ ኦይኪ ኤኪዲ ሹሜታኮ ኤፊዴስ።

15 ሹሜቲካ ከሂ ሃንቁቲዲ ኤርማሳ ዋጂዳ፤ ሄሳፌ ጉዬ ኢስቲ ቃሾ ኬል ሂስቲዳ ጸፊ ዮናታኔ ኬላን ኤፊ ቃቺዳ።

16 ኤርማሲ ሄን ቢታ ጋርሳን ዲዛ ቃሾ ኬላን ዳር ዋዴ ጋምኢዴስ።

17 ሄሳፌ ጉዬ ካዋ ሴዴቂያሲ አስ ከቲዲ ኤርማሳ ባ ዲዛሶ ካዋ ኬል ጴይጊ ኤሂሲዴስ፤ ኢዛ ጸላ ኤፊዲ፤ «ጎዳፔ ዩዳ ቃላይ ኔኮን ዲዜ?» ጊ ኦይቺዴስ። ኤርማሲ ዛሪዲ፤ «ኤ ዴስ፤ ኔጊ ባቢሎኔ ካዋ ኩሼን አቶ ኢሜታና» ጊዴስ።

18 ቃሴካ ኤርማሲ ካዋ ሴዴቂያሳስ፤ «ኢንቴ ታና ቃሾ ኬላን ዩጋናስ ታኒ ኢንቴ ቦላ፤ ኢንቴስ ኦሊዛ ሹሜታ ቦላ ዋይኮ ሃ አሳ ቦላ አይ ሞሮ አላዲና?

19 ሳኔ ባቢሎኔ ካዋይ ኢንቴናኔ ሃ ቢታዮ ዩዲ ኦሌና» ጊዲ ኢንቴስ ቲንቢቴ ዮቲዳ ናቤቲ ሃኢ አዋን ዲዛ?

20 ሄሳ ጊሻስ ታ ጎዳፌ ካዋ! ታ ጊዛዝ ኤዘጋ! ታ ኔና ዋሳይስ። ታኒ ሄን ሃይቆንታ ማላ ጸፊ ዮናታኔ ሶ ዛራ ዩዶፋ» ጊዴስ።

21 ካዋ ሴዴቂያሲ ዛቤ ናጊዛይታ ዛጎን ዳና ማላኔ ሄ ካታማይን ዲዛ ካሊ ዉራናሼ ጋካናስ ካል ካሊዛይታ ሄራፔ ጋላስ ጋላስ ኢሲ ኢሲ ቡዴናይ ኢዛስ ኢሜታና ማላ አዛዚዴስ፤ ሄሳ ጊሻስ ኤርማሲ ዛቤ ናጊዛይታ ዛጎን ዴኢዴስ።

## 38

### ኦላን ኤርማሳ ዩጌቴል

1 ማታኔ ና ሻፋጺያይ፤ ፓሽኩሬ ና ጎዶሊያሳይ፤ ሼሌሚያ ና ዩካሌይኔ ማልኪያ ና ፓሽኩሬይ ኤርማሲ አስ ኡባስ ዮቲዳ ቃላታ ሲዩዳ።

2 ጎዳይ፤ «ሃና ካታማይን አቲዛ አኒካ ኦላን፤ ኮሻኒኔ ኢታ ሃርጌን ሃይቃና፤ ጊዶ አቲን ባቢሎኔታኮ ቢዛ አኒካ ሃይቁና፤ ባ ሁኤ አሻና፤ ፓጸካ ዳና» ጌስ።

3 ቃሴካ ጎዳይ፤ «ሃና ካታማያ ቱማፔ ባቢሎኔ ካዋ ኦላንቻታ ኩሼን አቶ ኢሜታና፤ ኢስቲካ ኢዞ ሃራና» ጊዴስ።

4 ሄሳፌ ጉዬ ሹሜቲ ካዋዛኮ ቢዲ፤ «ሃይሲ አዴዚ ሃ ካታማይን አቲዳ ኦላንቻታኔ ዴራ ሂዶታ ቃንጺሲዛዴ ጊዲዳ ጊሻስ ኢዚ ሃይቃናስ ቤሴስ፤ ሃይሲ አዴዚ ዴሬይ ቆያና ማላ ኮዬስ አቲን ዴራስ ሎኦ ሚሽ ኮዬና» ጊዳ።

5 ካዋ ሴዴቂያሲ ዛሪዲ፤ «ኢዚ ኢንቴ ኩሼን ዴስ፤ ካዋዚ ኢንቴናራ ኤቁቲዲ አይኮካ ኦላና ዳንዳዬና» ጊዴስ።

6 ሂስቲን ኢስቲ ኤርማሳ ካዎ ከላ ርገዛ ዛቤታ ዱቡሻን ዲዛ ካዎ ና ማልኪያ ሃላ ኦላን ዩጊዳ፤ ኢስቲ ኢዛ ዎዶራ ዱጌ ኦላን ዎሊዳ፤ ሄ ዎዴ ሄ ኦላዛን ኡርቃፌ ኣቲን ሃሊ ዴና፤ ኤርማሲ ሄ ኡርቃን ሚቴቲዴስ።

7 ጊዶ ኣቲን ቶጵያ ኣስ ጊዲዳ ካዎ ከላን ኦሊዛ ኣቢሜሌኬ ጌቴቲዛ ኢሲ ጉንዲላይ ኤርማሲ ኦላን ዩጌቲዲይሳ ሲዱዴስ፤ ሄ ዎዴ ካዎይ ቢኒያሜ ፔንጌን ኡቲ ዲሺን፤

8 ኣቢሜሌኬ ካዎ ከላፌ ከዚዲ፤

9 «ታ ጎዳፌ ካዎ! ሃይቲ ኣሳቲ ናቤ ኤርማሳ ቦላ ከሂ ኢታ ሚሽ ኦሊዳ፤ ሃኖ ካታማይን ካሊ ጳይዳ ዎዴን ኢዚ ኮሻን ሃይቃና ማላ ኦላን ዩጊዳ» ጊዴስ።

10 ካዎዚካ ቶጵያ ኣስ ኣቢሜሌኬስ፤ «ሄቩ ታሙ ኣስ ኔናራ ኤካ ባዳ ኤርማሲ ሃይቆንታ ዲሺን ኦላፌ ከሳ» ጊ ኣዛዚዴስ።

11 ሂስቲን ኣቢሜሌኬይ ኣሳ ባናራ ኤኪዲ ካዎቲላ ሚንጃ ከላን ጋርሳ ባጋራ ዲዛ ከፊላኮ ቢዴስ፤ ሄፔ ጩጋ ጩርቃኔ ጩጋ ማይኦ ኤኪ ዎዶሮን ቃቺዲ ዱጌ ኤርማሳስ ዩጊዴስ።

12 ቶጵያ ኣስ ኣቢሜሌኬይ ኤርማሳ ኦላ ጊዶ ዱጌ ጴይጊዲ፤ «ኔና ቁምኦንታ ማላ ሃይሳ ጩጋ ጩርቃይኔ ጩጋ ማይኦይ ኢዛ ቦላ ጳጴቲዳ ዎዶሮዛ ኔ ሾጳ ጊዶ ጌልላ» ጊዴስ። ኤርማሲካ ኢዚ ጎይሳሶ ኦሊዴስ።

13 ሂስቲን ሄ ዎዶሮዛን ኢዛ ኦላፌ ከሲዳ፤ ኤርማሲካ ዛቤታ ዛጎን ጋምኢዴስ።

### ሴዴቂያሲ ኤርማሳ ናምኣንሶ ኦይቺዳ ኦይሻ

14 ሄሳፌ ጉዬ ካዎ ሴዴቂያሲ ኤርማሳ ከቲ ኤሂሲዲ ጎዳ ከላ ጌሊዛ ሄቫንሶ ፔንጌ ማታን ኢዛስ፤ «ታኒ ኢሲ ሚሽ ኔና ኦይቻይስ፤ ኔኒ ታፔ ኣይኮካ ቆቶፋ» ጊዴስ።

15 ኤርማሲ ዛሪዲ ሴዴቂያሳስ፤ «ታ ኔስ ዛሮ ኢሚኮ ኔ ታና ዎጲኪ? ታ ዞሪን ኔ ኤካካ» ጊዴስ።

16 ካዎ ሴዴቂያሲ ኤርማሳስ፤ «ሼምፖ ኑስ ኢሚዳ ዴኦ ጸሲ ቤኢን ታ ኔና ዎጲኬ፤ ኔና ዎጳናስ ኮይዛይታስካ ታ ኣላ ኢሚኬ» ጊዲ ቆታን ጩቂዴስ።

17 ኤርማሲ ሴዴቂያሳስ ዛሪዲ፤ «ኡባፌ ዎልቃማ ጎዳ ኢስራኤሌ ጳሳይ፤ ሳቢሎኔ ካዎ ኦላ ሃላቃታስ ኔ ኩሼ ኔኒ ኢሚኮ ኔ ሼምፖይ ኣታና፤ ሃና ካታማያካ ጹጌቱኩ፤ ኔኒኔ ኔሶ ኣሳይ ሼምፖራ ፓጻ ዳና።

18 ጊደ አቲን ባቢሎኔ ካዎ ኦላ ሃላቃታስ ኔኒ ኔ ኩሼ ኢሞንታ ኢጲኮ ሃና ካታማያ ባቢሎኔታስ አቋ ኢሜታና፤ ኢስቲካ ኢዞ ጹጋና፤ ኔኒካ ኢስታ ኩሼፔ ኬሳ ኤካካ፡ ጌስ» ጊደስ።

19 ቃሴካ ካዎ ሴዴቂያሲ ኤርማሳስ፡ «ባቢሎኔ ባቃቲ ቢዳ አይሁዳቲ ታ ቦላ ቂጂ ካኦንታ ማላ ታና ኢስታ ኩሼን አሏ ኢማናኮ ጋዳ ባባይስ» ጊደስ።

20 ኤርማሲካ ዛሪዲ፡ «አይኮይ ባዋ! ኢስቲ ኔና አሏ ኢሜቴና፤ ታ ኔስ ዮቲዛ ጎዳ ቃላስ አዛዜታ፤ ሄሲካ ኔስ ሎኦ ጊዳና፤ ኔ ሸምፖይካ አታና።

21 ጊደ አቲን ኔኒ ኩሼ ኢሞንታ ኢጲኮ ጎዳይ ታና ቤሲዳ ሚሺ ዴስ።

22 ዩሁዳ ካዎቴላ ኬላን አቲዳ ማጫሳቲ ኡባይ ዲኤቲዲ ባቢሎኔ ሹሜታስ አቋ ኢሜታና፤ ሄ ማጫሳቲ፡

« ሳኒ ኢስታን አማኔቲዳ

ኔ ሲቆቲ

ኔና ባሌሊዳኔ ጸኒዳ፤

ኔ ቶሆይ ኡርቃን ሚቴቲዴስ፤

ኔ ሲቆቲካ

ኔና ዬጊ ቢዳ) ጋና።

23 «ኔ ማቹቲኔ ኔ ናይቲ ኡባይ ባቢሎኔ አሳስ አቋ ኢሜታና፤ ኔኒካ ባቢሎኔ ካዎ ኩሼን ኦይኬታና አቲን ኢስታ ኩሼፔ ኬሳ ኤካካ፤ ሃና ካታማያካ ታማን ጹጌታና» ጊደስ።

24 ሴዴቂያሲ ኤርማሳስ ዛሪዲ፡ «ሃይሳ ኦ ሃሳይዳይሳ ኦኒካ ኤርፖ፤ አካይ ጊኮ ኔ ሃይቃና።

25 ሹሜቲ ታ ኔናራ-ሃሳይዳይሳ ሲዪ ኔኮ ዪዲ፡ ሳኒ ካዋዛ አይ ጊን ኢዚ ኔና አይ ጊዳኮ ኦስ ዮታ፤ ቆቶንታ ኦስ ዮታ፤ ኔ ሄሰቶንታ አጊኮ ኦ ኔና ዋቆና) ኢስቲ ጊኮ፡

26 ኔኒ ኢስታስ፡ «ታኒ ሄን ሃይቆንታ ማላ ታና ዛራዳ ዮናታኔ ሶ ዬዶፋ ጋዳ ዋሳዲስ) ጋዳ ዮታ» ጊደስ።

27 ሃሳፌ ጉዬ ሹሜቲ ኡባይ ኤርማሳኮ ዪዲ ኢዛ ኦይቹዳ፤ ኢዚካ ካዋዚ ኢዛ አዛዚዳ ቃላ ኡባ ኢስታስ ዮቲዴስ። ኢዚ ካዋዛራ ሃሳይዳይሳ ሲዪዳ ኢሲ አሲካ ባይንዳ ጊሻስ ሃሳፌ ቦላራ ኢዛ ሃሳይሲቤቴና።

28 ዬሩሳላሜይ ኦይኬታና ጋካናስ ኤርማሲ ዛቤታ ዛጎን ጋምኢዴስ።

## 39

ዩሩሳሌም ኩንዴል (2ካዎ 25:1-12፥ ኤርማ 52:4-16)

<sup>1</sup> ሴዴቂያሲ የሁዳን ካዎቲዳ ኡዱፋንሶ ላይላን፥ ታማንላ አገሩን፥ ባቢሎኔ ካዎ ናቡካዳናጆሬይኔ ኢዛ ኦላንቻቲ ኡባይ ዪዲ ዩሩሳሌም ዎራጂ ጊዶሊ ኦይኪዳ።

<sup>2</sup> ሴዴቂያሲ ካዎቲዳ ታማኔ ኢሲንላ ላይላን፥ ኦይዳንሶ አገሩን፥ ኡዱፋንላ ጋላሳን ባቢሎኔ ኦላንቻቲ ካታማይ ገምቤ ሜንሱዳ።

<sup>3</sup> ሄ ዎዴ ባቢሎኔ ካዎ ሹሜቲ፥ ኔቦ ዴሬ ኣሰ ኔሪጋሌ-ሳርሳሬይ፥ ዋና ሹሜ ኔቦ ሳርሲኪኔይ፥ ቋቃ ሹሜ ኔሪጋሌ-ሳርሳሬይ፥ ሄሳሶካ ሃራ ባቢሎኔ ሹሜቲ ጌሊዲ ጊዶ ፔንጌን ኡቲዳ።

<sup>4</sup> የሁዳ ካዎ ሴዴቂያሲኔ ኢዛ ኦላንቻቲ ኡባይ ባቢሎኔ ኦላንቻታ ቤኢዳ ዎዴ ባቃቲዳ፤ ኦማርሳራ ካዎይ ዶዛ ቶኪዛሶሆ ባጋራ ናምኡ ገምቤታፔ ጊዶራ ካታማፔ ኬዚዲ ዮርዳኖሴ ዙሉ ቢዳ።

<sup>5</sup> ጊዶ ኣቲን ባቢሎኔ ኦላንቻቲ ኢስታ ጉዬራ ዬዴሊ ኤኪዲ ኢያርኮ ዴምባን ጋኪ ኦይኪዳ፤ ሴዴቂያሲ ዲኢዲ ሃማቲ ቢታን ኤሬቢላ ካታማን ዲዛ ካዎ ናቡካዳናጆሬኮ ኤፊዳ፤ ሂስቲን ካዎ ናቡካዳናጆሬይ ሄን ሴዴቂያሳ ቦላ ፒርዲዴስ።

<sup>6</sup> ባቢሎኔ ካዎይ ኤሬቢላ ካታማን ሴዴቂያሳ ኣቱማ ናይታ ኢዚ ቤዩሽን ሲፊዴስ፤ የሁዳን ዲዛ ሹሜታ ኡባካ ዎዲዴስ።

<sup>7</sup> ሴዴቂያሳ ኣይፊታ ዎጪ ኬሲዲ ኢዛ ባቢሎኔ ቢታ ኤፋናስ ጸርቂማላ ሳንሳላታን ቃቺዴስ።

<sup>8</sup> ሄ ዎዴ ባቢሎኔ ኦላንቻቲ ካዎ ኬላኔ ኣሳይ ዲዛ ኬላታ ኡባ ታማን ጹጊዳ፤ ዩሩሳሌም ገምቤካ ላሊዳ።

<sup>9</sup> ባቢሎኔ ካዎ ቦንቾ ናጊዛ ዛቤታ ኣዛዚዛ ናቡዛራዳኔይ ካታማን ኣቲዳ ኣሳታኔ ካዲዲ ባናን ጋጊዳ ኣሳታ ኡባ ኢሲፌ ዲኢዲ ባቢሎኔ ቢታ ኤፊዴስ።

<sup>10</sup> ጊዶ ኣቲን ካዎ ቦንቾ ናጊዛ ዛቤታ ኣዛዚዛ ናቡዛራዳኔይ ኣይኮይካ ኢስታስ ባይንዳ ማንቆታፔ ጉላታ የሁዳን ኣጊዲ፥ ኢስታስ ዎይኔ ቱራ ሶሆታኔ ጎዪዛ ጋዴታ ኢሚዴስ።

**ኤርማሳ ቢርሼቴል**

<sup>11</sup> ባቢሎኔ ካዎ ናቡካዳናጆሬይ ካዎ ቦንቾ ናጊዛ ዛቤታ ኣዛዚዛ ናቡዛራዳኔ ባጋራ ኤርማሳ ጊሻስ።

12 «ኢዛ ኤካዳ ቃላያ፤ ኢዚ ኮይዛይሳ ኡባ ፖላ ኣቲን ቆሆፓ»  
ጊዲ ኣዛዛ እሚደሰ። \*

13 ሄሳ ጊሻሰ ናቡዛራዳኔይ፡ ዋና ሹሜ ኔቡሻዚባኔ፡ ቋቃ ሹሜ ኔሪጋሌ-ሳርሳሬ ሄሳፉካ ሃራ ባቢሎኔ ካዎ ሹሜታ ኡባ፡

14 ኪቲዲ ኤርማሳ ዛቤታ ዛጎፔ ኬሲዳ፤ ሂሰቲዲ ሳፋኔ ና፡ ኣኪቃሜ ና ጎዶሊያሳይ ባ ሶ ኤፋና ማላ ሃዳሪዳ፤ ሄሳፌ ዴንዲዳይሳን ኤርማሲካ ባ ዴሬ ኣሳራ ኢሲፌ ዴኢደሰ።

### ኣቢሜሌኬስ ኢሜቲዳ ሂደታ

15 ኤርማሲ ዛቤታ ዛጎን ቃሼቲ ዲዛ ዎዴ ጎዳ ቃላይ ኢዛኮ ዪዴሰ፤

16 ኡባፌ ዎልቃማ ጎዳ ኢሰራኤሌ ጸሳይ ኤርማሲ ቢዲ ቶጵያ ዴሬ ኣሰ ጊዲዳ ኣቢሜሌኬስ፡ «ሃይሳፌ ካሴ ታኒ ዮቲዳ ማላ ሃ ካታማይ ቦላ ዲች ጊደንታ ባሽ ኤሃዳ ታ ቃላ ታ ፖላና፤ ሄሲ ኡባይ ሃኒዛ ዎዴ ኔኒካ ሃ ካታማን ኡቲዳ ኔ ኣይፌን ቤኣና።

17 ጊዳ ኣቲን ሄ ጋላሳን ታኒ ኔና ኣሻና፤ ኔኒ ያዪዛ ኣሳታ ኩሼን ኣቋ ኢሜታካ።

18 ታኒ ኔና ኣሻና፤ ኔኒ ታናን ኣማኔቲዳ ጊሻሰ ሼምፖራ ፓጻ ኣታና ኣቲን ማሻን ሲፌታካ» ጊዲ ዮታና ማላ ኣዛዚደሰ።

## 40

### ጎዶሊያሳ ማታን ኤርማሳ ዱስ

1 ካዎ ቦንቾ ናጊዛ ዛቤታ ኣዛዚዛ ናቡዛራዳኔይ ኤርማሲ ዩሩሳላሜፔኔ ዩሁዳፔ ዲኤቲዲ ባቢሎኔ ቢታ ቢዛ ኣሳታ ጊደን ኤራማን ሳንሳላታን ቃሼቲ ዲዛይሳ ቤኢዲ ኢዛ ቃሾፔ ቢርሺሲዴሰ፤ ሄሳፌ ጉዬ ጎዳ ቃላይ ኤርማሳኮ ዪዴሰ።

2 ካዎ ቦንቾ ናጊዛ ዛቤታ ኣዛዚዛይሲ ኤርማሳ ጸላ ኤኪዲ ኢዛሰ፡ «ጎዳ ኔ ጸሳይ ሃይሲ ባሻይ ሃ ቢታይ ቦላ ያናይሳ ዮቲዴሰ።

3 ሃኢካ ጎዳይ ባ ጊዳ ማላ ኤሂዲ ባ ቃላ ፖሊዴሰ፤ ሃይሲ ኡባይ ሃኒዳይ ኢንቲ ጎዳ ቦላ ናጋራ ኦፊዳ ጊሻሲኔ ኢዛሰ ኣዛዜቶንታ ኢጲዳ ጊሻሳ።

4 ቤያ፡ ሃኢ ኔ ቃሼታ ኡቲዳ ሳንሳላታ ኔ ኩሼፔ ቢርሻዲሰ፤ ታናራ ባቢሎኔ ቢታ ባና ጊኮ ኣቋ፤ ኔ ዶሲዛ ጊዲኮ ታናራ ባቢሎኔ

\* 39:12 ቃላያ ጊዛይሲ ቆሂቲዳ ኣሳሰ ኢሜቲዛ ቃላባ ቤሴስ።

ዬቆ፤ ታኒ ኔና ቃላያና፤ ኔ ዶሶንታ ኣጊኮ ቦፓ፤ ቤኣ ዴሬ ኡባይ ኔ ሲንላን ዴሰ፤ ኔ ዶሲዳሶ ባ» ጊዴሰ።

5 ኤርማሲ ቡሮ ዛሮ ኢሞንታ ዲሺን ናቡዛራዳኔይ ጉጂዲ፡ «ባቢሎን ካዎ ናቡካዳናጾሬይ ኢዛ ዩሁዳ ካታማታ ቦላ ሹሚ ዎሊዳ ሳፋኔ ና፡ ኣኪቃሜ ና ጎዶሊያሳኮ ባ፤ ኢዛራ ኢሲፌ ዴራ ጊዶን ኡታ፤ ዎይኮ ኔና ሎኢዛሶ ባ» ጊዴሰ። ዛቤታ ኣዛዚዛይሲ ኢሞታኔ ሺንቄ ኢሚዲ ኢዛ ሞይዚዴሰ።

6 ኤርማሲ ሚጺጳን ዲዛ ኣኪቃሜ ና ጎዶሊያሳኮ ቢዴሰ፤ ኢዛራ ኢሲፌ ሄን ኣቲዳ ዴራ ጊዶን ዴኢዴሰ።

### ጎዶሊያሳ ሃይቆ

(2ካዎ 25:22-24)

7 ዩሁዳፔ ኢሲ ኢሲ ኣማርዳ ኦላ ቃራቲኔ ኦላንቻቲ ባንታ ኩሹ ባቢሎን ካዎሰ ኢሞንታ ጊሻሰ ዴምባን ላሌቲ ኡቲዲ፤ ባቢሎን ካዎይ ኣኪቃሜ ና ጎዶሊያሳይ ሄ ቢታዮ ሃራና ማላ ሹሚዳይሳኔ ዲኡቲዲ ባቢሎን ቦንታ ኣቲዳ ማንቆ ኣቲማሳታ፡ ማጫሳታኔ ናይታ ቦላ ማታ ኢሚ ዎሊዳይሳ ሲዩዴሰ።

8 ሂስቲዲ ናታኒያ ና ኢሰማኤሌይ፡ ቃሬሃ ናይቲ ዮሃናኔይኔ ዮናታኔይ፡ ታኒሁሜታ ና ሳራያ፡ ናጾፌ ካታማፔ ዩዳ ኤፋያ ናይቲኔ ማኢካቲ ካታማ ኣሰ ያኢዛኔይ ባንታ ኦላንቻታ ኡባራ ጎዶሊያሳኮ ሚጺጳ ዩዳ።

9 ሳፋኔ ና ኣኪቃሜ ና ጎዶሊያሳይ ኢሰታሲኔ ኢሰታ ኦላንቻታሰ፡ «ባቢሎንታሰ ሃሬታናሰ ያዮፍቲ፤ ሃኖ ቢታይን ኡቲዲ ባቢሎን ካዎሰ ሃጋዚቲ፤ ሂስቲኮ ኡባ ሚሺ ኢንቲሰ ሎኦ ጊዳና።

10 ታኒ ሚጺጳን ኡታዳ ባቢሎን ቢታፌ ኦኮ ዩዛ ኣሳታራ ኢንቲ ጊሻሰ ሃሳያና፤ ኢንቲ ጊዲኮ ኢንቲ ዲዛ ሄራን ሄራን ዎይኔ፡ ዎጋራ ዛይቲኔ ቦኔ ካፋ ኣይፌ ኡባ ሺሺቲ» ጊዲ ቃላ ጌሊዴሰ።

11 ሄ ዎዴ ሞኣቤን፡ ኣሞኔን፡ ኤዶሜኒኔ ሃራ ቢታታን ዲዛ ኣይሁዳ ኡባይ ባቢሎን ካዎይ ኣማርዳ ኣሳታ ዩሁዳን ኣሺዳይሳኔ ኢሰታ ቦላ ሳፋኔ ና ኣኪቃሜ ና ጎዶሊያሳ ሹሚዳይሳ ሲዩዳ።

12 ኡባቲካ ባ ላሌቲ ዲዛ ዴሬፔ ዩሁዳ ቢታ ሲሚዳ። ሂስቲዲ ጎዶሊያሳይ ዲዛሶ ሚጺጳ ዩዳ፤ ሄን ዳሮ ዎይኔኔ ቦኔ ካፋ ኣይፌ ዳጋሲዳ።

13 ሄሳፌ ጉዬ ቃሬሃ ና ዮሃናኔይኔ ቡሮ ኩሹ ኢሞንታ ዲዛ ኦላ ቃራቲ ኡባይ ጎዶሊያሳኮ ሚጺጳ ዩዳ።

14 «አሞኔ ካዎ ባኣሊሲ ናታኒያ ና ኢሰማኤሌ ኔና ዎቆና ማላ ዩዲዳይሳ ኤርኪ?» ጌዳ። ጌዶ ኣቲን ኣኪቃሜ ና ጎዶሊያሳይ ኢሰቲ ጊዛይሳ ኣማኒቤና።

15 ሄሳፌ ጉዬ ቃሬሃ ና ዮሃናኔይ ሚጺጸን ዲዛ ጎዶሊያሳኮ ዩዲ፡ «ኦኒካ ኤርንታ ዲሺን ባዳ ናታኒያ ና ኢሰማኤሌ ታኒ ዎቆና፤ ጋሶይካ ባቃቲዲ ኔኮ ዩዲ ኣሳይ ሳሌታና ማላኔ ዩሁዳን ኣቲዳ ኣሳይካ ቆያና ማላ ኣይሰ ኔና ዎቆና ጊዜ?» ጌዲ ጹራን ዮቲዴሰ።

16 ጌዶ ኣቲን ኣኪቃሜ ና ጎዶሊያሳይ ቃሬሃ ና ዮሃናኔ፡ «ኔኒ ኢሰማኤሌ ጊሻሰ ታሰ ዮቲዛይሲ ኡባይ ዋርዶ ጌዲዳ ጊሻሰ ሄሳ ማላ ሚሽ ኦሶፋ» ጌዴሰ።

## 41

1 ዩሁዳን ካዎ ከፋ ኣሳፔ ኦላንቻታ ሹሜታፔ ኢሶይ ኤልሻማ ና፡ ናታኒያ ና ኢሰማኤሌይ ላፑንፋ ኣጊናን ታሙ ኣሳታራ ኢሲፌ ሚጺጸን ዲዛ ኣኪቃሜ ና ጎዶሊያሳኮ ቢዴሰ። ኢሰቲ ኡባይ ካፋ ማዳን ዲሺን።

2 ናታኒያ ና ኢሰማኤሌይኔ ኢዛራ ዲዛ ታሙ ኣሳቲ ባንታ ማሻ ማሻ ከሲዲ ባቢሎን ካዎይ ዩሁዳ ሃራና ማላ ሹሚዳ ሳፋኔ ና ኣኪቃሜ ና ጎዶሊያሳ ዎቂዳ።

3 ሄሳ ቦላካ ቃሴ ኢሰማኤሌይ ሚጺጸን ጎዶሊያሳራ ዲዛ ኣይሁዳታኔ ባቢሎን ኦላንቻታ ኡባ ዎቂዴሰ።

4 ጎዶሊያሳይ ሃይቂን ዎንቴፋ ጋላሰ ኦኒካ ኢዛ ሃይቆ ኤርንታ ዲሺን።

5 ሴኬሜፔ፡ ሴሎፔኔ ሳማሪያፔ ኦሰፑን ታሙ ኣሳቲ ካዮቲሹ፡ ባንታ ቡቕ ሜዲዲ፡ ባንታ ማይኦ ዳኪዲኔ ባንታ ቦላካ ፑዚዲ ካፋ ያርሾኔ ኤጻኔ ጎዳ ከፋ ኤኪ ዩዲ።

6 ናታኒያ ና ኢሰማኤሌይ ሚጺጸፌ ከዚዲ ዩኪሹ ኢሰታራ ጋጋናሰ ቢዴሰ፤ ኢሰታራ ጋጊዲ፡ «ኣኪቃሜ ና ጎዶሊያሳኮ ሃ ዩቲ» ጌዴሰ።

7 ኢሰቲ ካታማይ ጌዶ ጌሊዳ ማላ ናታኒያ ና ኢሰማኤሌይኔ ኢዛራ ዲዛ ኣሳቲ ሄ ኣሳታ ዎቂዲ ሃፋ ኦላን ዩጊዳ።

8 ጌዶ ኣቲን ሄ ሃይቂዳ ኣሳታራ ዲዛ ታሙ ኣሳቲ ኢሰማኤሌ፡ «ኩና ዎቆፓርኪ! ኦኒ ኦ ሾቃን ቆቲዳ ዳሮ ጊሰቲይ፡ ባንጋይ፡ ዎጋራ ዛይቲይኔ ኤሲ ዴሰ» ጌዳ። ኢዚካ ኢሰታ ሃንኮይታራ ዎቆንታ ኣጋጊዴሰ።

9 ኢስማኤሌይ ጎዶሊያሳራ ኢሲ ቦላ ዋጂዳ አሳ ኡባ ኦሊዳ ኦላይ ኢሰራኤል ካዎ ባሽይ ኦላናስ ዪዳ ዋዴ ካዎ አሳይ ኢዛስ ባቢዲ ባና አሻናስ ቦኪሲዳ ጌታ ኦላ። ናታኒያ ና ኢስማኤሌይ ሄ ኦላ አሃን ኩንሊዴስ።

10 ኢስማኤሌይ ካዎ ማጫ ናይታኔ ሚጲጳን አቲዳ አሳ ኡባ ዲኢዴስ። ሄይቲ ካዎ ቦንቾ ናጊዛ ዛቤታ አዛዚዛ ናቡዛራዳኔይ አኪቃሜ ና ጎዶሊያሳራ ኢሲፌ ሚጲጳን ዋሊዳይታ። ኢዚ ኢስታ ዲኢ ባናራ ኤኪዲ አሞኔ ቢታ ባናስ ዴንዲዴስ።

11 ቃሪሃ ና ዮሃናኔይኔ ኢዛራ ኢሲፌ ዲዛ ኦላ አሳ ሹሜቲ ኢስማኤሌይ ኦሊዳ ኢታ ሚሽ ኡባ ሲዪዲ፤

12 ናታኒያ ና ኢስማኤሌ ኦላናስ ባ አሳ ኡባ ኤኪዲ ቢዳ፤ ኢስማኤሌካ ጌባኦኔን ዲዛ ጌታ ኤሌ ሃላ ማታን ጋኪ ኦይኪዳ።

13 ኢስማኤሌይ ዲኢዲ ባናራ ኤፊዳ አሳይ ኡባይ ቃሪሃ ና ዮሃናኔኔ ኢዛራ ዲዛ ኦላ አሳ ሹሜታ ቤኢዳ ዋዴ ኬሂ ኡፋዬቲዳ።

14 ኢስማኤሌይ ሚጲጳፌ ዲኢ ኤፊዳ አሳይ ኡባይ ኬሲ ኤኪ ቢዲ ቃሪሃ ና ዮሃናኔን ጋይቲዴስ።

15 ጊዶ አቲን ናታኒያ ና ኢስማኤሌይኔ ሃራ ኦሰፑን አሳቲ ኢሲፌ ዮሃናኔፔ ኬሲ ኤኪዲ አሞኔ ቢታ ባቃቲዳ።

### ባቃቲ ጊብጼ ቡስ

16 ሄሳፌ ጉዬ ቃሪሃ ና ዮሃናኔይኔ ኢዛራ ዲዛ ኦላ ቃራቲ ኡባይ ናታኒያ ና ኢስማኤሌይ አኪቃሜ ና ጎዶሊያሳ ዋጂ ሲሚዲ ሚጲጳፌ ዲኢዲ ኤሂዳ ኦላንቻታ፤ ማጫሳታ፤ ናይታኔ ካዎ ኬላን ኦሊዛ ሹሜታ ኡባ ጌባኦኔፔ ዛሪዲ ኤኪ ቢዳ።

17 ሄፔ ዴንዲዲ ጊብጼ ቢሽ ቤቴሊሄሜ ማታን ዲዛ ጌሮት-ኬሜአሜ ጋኪ ሹምፒዳ፤

18 ኢስቲ ጊብጼ ቢዳይ ባቢሎኔ አሳፔ ኬሲ ኤኪ አታናሳ፤ ናታኒያ ና ኢስማኤሌይ ባቢሎኔ ካዎይ ቢታዮ ሃራና ማላ ሹሚ ዋሊዳ አኪቃሜ ና ጎዶሊያሳ ዋጂዳ ጊሻስ ኢስቲ ባቢሎኔታስ ባቢዳ።

## 42

### ዴሬይ ኤርማሳ ኦይቺዳ ኦይሻ

1 ኦላ ቃራቲ፤ ቃሪሃ ና ዮሃናኔይ፤ ሆሻኢያ ና አዛሪያሲኔ አሳይ ኡባይ ጉላፌ ጌታ ጋካናስ ዪዲ፤

2 ናቤ ኤርማሳስ፡ «ኮኒ ካሴ ዳሮ፤ ሃኢ ኔ ቤኢዛ ማላ ጉል ኣቲዶስ፤ ሄሳ ጊሻስ ኑ ኔና ዋሲዛ ዋሳ ሲያ፤ ሃይሳ ኣቲዳ ዳራ ጊሻስ ጎዳ ኔ ጸሳ ዋሳ።

3 ኮኒ ቢዛ ኦጌኔ ኑ ኦፋና ሚሽ ኢዚ ኑና ቤሳና ማላ ጎዳ ኔ ጸሳ ዋሳ» ጊዳ።

4 ናቤ ኤርማሲ ዛሪዲ፡ «ሎኦ፤ ኢንቴ ጊዳ ማላካ ጎዳ ኢንቴ ጸሳ ታኒ ዋሳና፤ ቃሴ ኢንቴፌ ኣይኮካ ቆቶንታ ኢዚ ዮቲዳይሳ ኡባ ዛራዳ ታ ኢንቴስ ዮታና» ጊዳስ።

5 ኢስቲ ዛሪዲ ኤርማሳስ፡ «ጎዳ ኔ ጸሳይ ኔ ባጋራ ኑስ ኪቲዛይሳ ኡባ ኮኒ ፖሎንታ ኣጊኮ ጎዳይ ኑ ቦላ ቱሙኔ ኣማኔቲዳ ማርካ ጊዳ።

6 ጎዳ ኑ ጸሳስ ኣዛዜቲን ኑስ ሎኦ ጊዳና ማላ ኑስ ጊጊን ጊንታ ኣጊን ኔና ኑ ኢዛኮ ኪቲዛ ጎዳስ ኑ ጸሳስ ኑ ኣዛዜታና» ጊዳ።

7 ታሙ ጋላሳፌ ጉዬ ጎዳ ቃላይ ኤርማሳኮ ዪደስ።

8 ሂስቲን ኢዚ ቃሬሃ ና ዮሃናኔ፤ ኢዛራ ዲዛ ኦላ ቃራታኔ ኣስ ኡባ ጉፋፌ ጊታ ጋካናስ ጾይጊዲ፤

9 «ኢንቴ ዋሳ ታኒ ኢዛኮ ሺሻና ማላ ኢንቴ ታና ኪቲዳ ጎዳ ኢስራኤሌ ጸሳይ፤

10 ታ ኢንቴ ቦላ ኤሂዳ ባሻ ጋሶን ጨጨዳ ጊሻስ ኢንቴ ሃ ቢታን ኡቲኮ ታኒ ኢንቴና ኬጸናፔ ኣቲን ላሊኬ፤ ቶካናፔ ኣቲን ሾዲኬ።

11 ኢንቴ ሃኢ ባቢሲዳ ባቢሎኔ ካዎስ ባቦፍቲ! ታ ኢንቴና ኢዛ ኩሼፔ ዋፋ ኤካናሲኔ ኣሻናስ ኢንቴናራ ዲዛ ጊሻስ ያዮፍቲ!

12 ኢዚ ኢንቴና ማራና ማላኔ ኢንቴ ቢታ ዛራና ማላ ታኒካ ኢንቴና ማራና» ጌስ።

13 «ጊዳ ኣቲን ኢንቴ፤ «ሃ ቢታይን ኡቶኮ» ጊዲ ጎዳስ ኢንቴ ጸሳስ ኣዛዜቶንታ ኢጲኮ፤

14 ቃሴ ኢንቴ፤ «ኦላ ቤዮንታሶ፤ ኦላ ዛዬይ ፑኔቶንታሶኔ ኮሻይ ባይንዳሶ ጊብጼ ቢዲ ሄን ዳና» ጊኮ፤

15 ኢንቴኖ ዩሁዳን ጫሻ ኣቲዳይቶ! ጎዳ ቃላ ሲዩቲ። ኡባፌ ዋልቃማ ጎዳ ኢስራኤሌ ጸሳይ፤ «ኢንቴ ጊብጼን ዳና ጊዲ ቆፋ ቃቺዲ ቢዛ ጊዲኮ፤

16 ኢንቴ ባቢዳ ማሻይ ኢንቴና ሄን ዳማና፤ ኢንቴ ሂርጊዳ ኮሻይካ ኢንቴና ካሊዲ ጊብጼ ጋካናስ ባና፤ ኢንቴካ ሄን ሃይቃና።

17 ጊብጼን ዳና ጊዲ ቆፋ ቃቺዲ ቢዳ ኣሳይ ኡባይ ኦላን፤ ኮሻኒኔ ኢታ ሃርጌን ሃይቃና፤ ታኒ ኢስታ ቦላ ኤሂዛ ኢታ ሚሻፌ ኢሳዳይካ ኬሲ ኤኪ ኣቲና» ጌስ።

18 «ኡባፌ ወልቃማ ጎዳ ኢሰራኤል ጸሳይ፥ ታሃንቆይኔ ቦሻይ ዩሩሳላሚን ዲዛይታ ቦላ ጉኪዳ ማላ ኢንቴ ጊብጾ ጌሊዛ ወዴ ኢንቴ ቦላካ ጉካና፤ ኢንቴ ዳጋማሰ፥ ቂጴሰ፥ ቃንጌላሲኔ ፓልቄሰ ማላታ ጊዳንዴታ፤ ሃ ቢታ ዛሪ ቤኤኬታ» ጌሰ።

19 «ዩሁዳን ጫሻ ኣቲዳይቶ! ጎዳይ ኢንቴና፥ ረብጾ ቦፒቴ!» ጌዴሰ። ታኒካ ሃቶ ኢንቴሰ ሚንላ ዮቲዳይሳ ኤሪቴ።

20 ኢንቴ ታና፥ ሄኒ ኑ ጊሻሰ ጎዳ ኑ ጸሳ ዋሳ፤ ኢዚ ኔሰ ዮቲዛይሳ ኡባካ ኑሰ ዮታ፤ ኑኒካ ኢዛሰ ኣዛዜታና) ጊዲ ታና ጎዳ ኢንቴ ጸሳኮ ከቲዳ ወዴ ኢንቴ ሹምፖ ጳይሲዛ ባላ ሚሽ ኦሊዴታ።

21 ታኒ ኢዚ ጊዳ ሚሽ ኡባ ሃቶ ኢንቴሰ ቆንጮን ዮታዲሰ፤ ጊዶ ኣቲን ኢንቴ ጎዳይ ታ ባጋራ ኢንቴሰ ከቲዳ ቃላሰ ኢንቴ ሃኢካ ኣዛዜቲቤኬታ።

22 ሄሳ ጊሻሰ ኢንቴ ቢዲ ዳናሰ ኮይዛ ቢታን ኢንቴ ኦላን፥ ኮሻኒኔ ኢታ ሃርጌን ሃይቂዲ ዉራና» ጌዴሰ።

## 43

### ጫሻ ኣቲዳ ኣሳ ባቃታ

1 ጎዳይ ከቲዳ ቃላ ኡባ ኤርማሲ ኢሰታሰ ዮቲዲ ዉርሲዳፔ ጉዬ፥

2 ሆሻኢያ ና ኣዛሪያሲ፥ ቃሬሃ ና ዮሃናኔይኔ ኦቶራንቻቲ ኡባይ ኤርማሳ፥ «ኔኒ ዋርዶ ዮታሳ! ጎዳ ኑ ጸሳይ፥ ሄን ዳናሰ ጊብጾ ቦፒቴ» ጋዳ ኔ ዮታና ማላ ኔና ከቲቤና።

3 ጊዶ ኣቲን ባቢሎኔ ቢታ ኣሳይ ኑና ዋጳና ማላ ወይኮ ዲኢዲ ባንታ ቢታ ኤፋና ማላ ኔኒ ኑና ኢሰታ ኩሼን ኣሳዳ ኢማና ማላ ኔሪያ ና ባርኬይ ኔና ኑ ቦላ ዴንፊሊዴሰ» ጊዳ።

4 ሄሳ ጊሻሰ ቃሬሃ ና ዮሃናኔይ ኦላ ቃራቲ ኡባይኔ ኩሜላ ዴሬዚ ዩሁዳ ቢታን ዳና ማላ ጎዳይ ኢሰታ ኣዛዚዳ ኣዛዛ ፖሎንታ ኢጲዳ።

5 ሂሰቲዲ ቃሬሃ ና ዮሃናኔይ ኦላ ቃራቲ ኡባይ ዩሁዳ ቢታን ዳናሰ ካዋቴላታ ኡባፌ ሲሚዳይታኔ ዩሁዳኔ ጫሻ ኣቲዳይታ ኡባ ኤኪ ቢዳ።

6 ቃሴ ካዋ ቦንቾ ናጊዛ ዛቤታ ኣዛዚዛ ናቡዛራዳኔይ ሳፋኔ ና፥ ኣኪቃሚ ና ጎዶሊያሳ ኩሼን ዋሊዳ ካዋ ማጫ ናይታ፥ ናቤ ኤርማሳኔ ኔሪያ ና ባርኬ፥ ቃሴካ ኣቲማሳታ፥ ማጫሳታኔ ቂሪ ናይታ ኤኪ ቢዳ።

7 ጎዳ ቃላስ አዛዜቶንታ ኢጲዲ ጊብጾ ቢታ ጌሊዳ፤ ጌዴ ጸፊናሴ ጋካናስ ካንፊ ቢዳ።

8 ጸፊናሴን ጎዳ ቃላይ ኤርማሳኮ ዪዲ፥

9 «ጊታ ሹቻታ ኤካዳ ዩሁዳ አሳይ ቤኢሺን ጸፊናሴን ዲዛ ጊብጾ ካዎቴፋ ኬፋ ፔንጌን ጸቤፔ ኦሴቲዳ ወይጌዛን ሞጋ።

10 ኡባፌ ዋልቃማ ጎዳ ኢሰራኤሌ ጸሳይ ታስ፥ ታኒ ኪታዳ፥ ታ ኣይሌዛ ባቢሎኔ ካዎ ናቡካዳናጾሬ ኤሂሳና፤ ሂስታዳ ሃ ሞጌቲዳ ሹቻታ ቦላን ኢዛ ካዎቴፋ አራታ ዋፋና። ሂስቲዳፔ ጉዬ ኢዚ ባ ካዎቴፋ ዲንካና ኢዛ ቦላን ኤሳና።

11 ኢዚ ዪዲ ጊብጾ ኦላና፤ ሃይቆስ ቤሲዛይታ ሃይቆስ፥ ዲኦስ ቤሲዛይታ ዲኦስ፥ ማሻስ ቤሲዛይታ ማሻስ አሊ አማና።

12 ጊብጾን ኤቃ ጸሳታ ኬፋን ታማ ዩዳናኔ ኢስታ ሙሌራ ጹጋና፤ ኢስታ ኤቃ ጸሳታካ ዲኢ ኤፋና። ሄንፋንቻይ ባ ሄንፋ ማይኦ ማይኢዛ ማላ ኢዚ ጊብጾ ቢታፌ ቡሪ ኤኪዲ ሳርን ባና።

13 ጊብጾ ቢታን ሄሊዮፖሊሳ ጌቲቲዛ ካታማን አዋ ኣርሼ ጸስ ጌቲቲዛ ኤቃ ጸሳታ ሃዉልቲታ ኢዚ ሚንፊሬፋና፤ ጊብጾን ኤቃ ጸሳታ ኬፋታካ ታማን ጹጋና ጌስ ጋዳ ኢስታስ ዮታ» ጌዴስ።

## 44

### ኤቃስ ጎይኖይ ኤሂዳ ሜቶ

1 ጊብጾን ፑዴሃ ባጋራ ዲዛ ሚጊዶሌን፥ ጸፊናሴኒኔ ሜምፒሳን ሄሳፊካ ጊብጾፔ ዲጌሃ ባጋን ዲዛ ኣይሁዳ አሳስ ጎዳ ቃላይ ኤርማሳኮ ዪዲ፥

2 ኡባፌ ዋልቃማ ጎዳ ኢሰራኤሌ ጸሳይ፥ «ዩሩሳላሚ ቦላኒኔ ዩሁዳ ካታማታ ኡባ ቦላን ታኒ ኤሂዳ ባሽ ኡባ ኢንቴ ኢንቴ ኣይፌራ ቤኢዴታ፤ ኢስቲ ሃቕ ጋካናስ ኦኒካ ዶንታ ባዞ ቢታ ጊዲ አቲዳ።

3 ሂሲ ሃኒዳይ ኢስቲ ኦሊዳ ኢታ ኦሶ ጊሻሳ፤ ኢስታ ጊዲን፥ ኢንቴና ዋይኮ ኢንቴ አዋታ ጊዲን፥ ባ ኤርንታ ሃራ ኤቃ ጸሳታስ ኤጻኔ ጨዋሴፋኒኔ ኢስታስ ጎይኖን ታና ሃንቁሊዳ።

4 ታኒካ ኢስታስ፥ «ሃይሳ ታና ሃራሲዛ ሚሽ ኦፋፍቴ!» ጋዳ ታስ ኦሊዛ ናቤታ ኢስታኮ ዛራ ዛራ ዩዳዲስ።

5 ኢስቲ ጊዲኮ ኤር ጊ ኤኪቤቴና፤ ኢስቲ ባ ኦሊዛ ኢታ ኦሶፔ ሲሚቤቴና፤ ሃራ ኤቃ ጸሳታስ ኤጻኔ ጨዋሴፋ ኣጊቤቴና።

6 ሄሳ ጊሻስ የሁዳ ካታማታ ቦላኔ ዩሩሳላሜ ኦጌታ ቦላ ታ ሃንቆይኔ ባሺ ዋጂዲ ታማ ማላ ኤጲዴስ፤ ሃች ኢንቴ ቤኢዛ ማላ ኦኒካ ደንታ ማላ ላሌቲዳሶ ጊዲዴስ።

7 «ሃኢካ ኡባፌ ዋልቃማ ጎዳ ኢስራኤል ጸሳይ፡ ሳንቴስ ዜሬሊ የሁዳን አቶንታ ማላ፡ ማጫሳታ ቦላኔ አቱማታ ቦላ፡ ጌታ ናይታ ቦላኔ ቄሪ ናይታ ቦላ ባሺ ያና ማላ ኣይሰ ኮዬቲ?

8 ኢንቴ ዳናስ ጌሊዳ ሃ ጌብጾ ቢታን ሃራ ኤቃ ጸሳታስ ኤጲኔ ጨዋሴላን ኢንቴ ኢንቴ ኩሼን ሜጂዳ ሚሻታን ታና ኣይሰ ሃንቄሉቲ? ቢታ ቦላ ዲዛ ካዎቲላታ ኡባ ጊደን ቃንጌላሲኔ ቂጴስ ማላታ ጊዳና ማላ ኢንቴርካ ኢንቴና ጳይሳና ኮዬቲ?

9 ካሴ ኢንቴ አዋቲ፡ የሁዳ ካዎቲኔ ኢስታ ማቼቲ፡ ቃሴ ኢንቴኒኔ ኢንቴ ማቼቲ የሁዳ ካታማታኒኔ ዩሩሳላሜ ኦጌታን ኦሊዳ ኢታቲላ ኡባ ደጊዴቲ?

10 ኢንቴ ሃች ጋካናስ ኢንቴናቲላ ዘቂሲዲ ታስ ቦንቾ አሚቤኬታ፤ ቃሴ ታኒ ኢንቴሲኔ ኢንቴ አዋታስ ዋሊዳ ዋጋኔ ማራ ካሊቤኬታ» ጌሰ።

11 «ሄሳ ጊሻስ ኡባፌ ዋልቃማ ጎዳ ኢስራኤል ጸሳይ፡ ሳንቴ ኢንቴ ቦላ ሜቶ ኤሃናሲኔ የሁዳ ኡባ ጳይሳናስ ቃቻ ዴንዳዲስ።

12 የሁዳን ጫሻ አቲዳይቲ ጌብጾ ቢዲ ሄን ዳና ቃቹዳ ኡባታ ታኒ ዴንላ ጳይሳና፤ ኢስቲ ኡባይ ጳያና፤ ጌብጾ ቢታን ማሻኒኔ ኮሻን ዉራና፤ ጌታፔ ጋሼ ጋካናስ ዲዛ ኡባይ ማሻኒኔ ኮሻን ሃይቃና፤ ፓልቄስ፡ ዳጋማስ፡ ቃንጌላሲኔ ቂጴስ ኬዛና።

13 ታኒ ዩሩሳላሜ ኦላን፡ ኮሻኒኔ ኢታ ሃርጌን ቃጸይዳ ማላ ጌብጾ ቢታን ዲዛይታካ ቃጸያና።

14 ጌብጾ ቢዲ ዲዛ ጫሻ አቲዳ የሁዳ አሳቲ ሲሚዲ የሁዳ ቢታ ባና አዋቲኮካ ቤቲ ዪዳ ጉላታፔ አቲን ኬሲ ኤኪዲ የሁዳ ቢታ ሲማና ኣሲ ኢሳዴይካ ዴና» ጌሰ።

15 ኢስታ ማቼቲ ሃራ ኤቃ ጸሳታስ ኤጲኔ ጨዋሲዛይሳ ኤሪዛ አቱማሳቲ ኡባይኔ ሄን ዲዛ ማጫሳቲ ኡባይ ሄሲካ ፑዴሃ ባጋ ጌብጾኒኔ ዴጌሃ ባጋ ጌብጾን ዲዛ ዴሬ ኡባይ ኢሲፌ ሺቂዲ ኤርማሳስ።

16 «ኔኒ ጎዳ ሱንላን ኑስ ዮቲዛይሳ ኡባ ኑኒ ሲዮኮ።

17 ኑኒ ኦላና ጊዳ ሚሽ ኡባ ኦሶስ፤ ኑኒ፡ ኑ አዋቲ፡ ኑ ካዎቲኔ ኑ ሃላቃቲ የሁዳ ካታማታኒኔ ዩሩሳላሜ ኦጌታን ካሴ ኦሊዳ ማላ፡ ኑኒካ ሳሎ ካዎኖ ጌቲቲዛ ኤቃ ጸሳይሰ ኤጲኔ ጨዋሶስ፤ ኡሻ ያርሾካ ኢዚስ ያርሾስ፤ ኑኒ ካሴ ሄሳ ኦሊዛ ዋዴ ኑስ ቲርፓ ካሊ ዴስ፤ ኑኒ ሎኦ ዴስ ዴኢደስ አቲን ኣይኮ ኢታካ ቤኢቤኮ።

18 ጊደ አቲን ሳሎ ካዎይስ ኤጻኔ ጨዋሴሊኔ ኡሻ ያርሾ ሺሾ ኑ አጎሶፔ ሃ ሲሚን ኡባ ሚሺ ኑስ ፓጪዴስ፤ ኑኒ ማሻኒኔ ኮሻን ዉሮን ደስ» ጊዳ።

19 ማጫሳቲካ፡ «ኑኒ ሳሎ ካዎይስ ኤጻኔ ጨዋሴሺን፡ ኡሻ ያርሾ ሺሺን፡ ኢዚ ሚስሌ ሚሳቲሲዲ ቄሪ ኡኬል ኑ ሺሺን ሄሳ ኡባ ኑ አዚናቲ ኤሮንታ ዲሺን ኑ ኦሊደኒ?» ጊዳ።

20 ኤርማሲ ባስ ዛሮ ኢሚዳ አቱማሳስ፡ ማጫሲኔ ኡባ አሳስ፡

21 «ኢንቴኒኔ ኢንቴ አዋቲ፡ ኢንቴ ካዎቲኔ ኢንቴ ሹሜቲ፡ ቃሴ ቢታይን ዲዛ አሳይ ኡባይ ዩሁዳ ካታማታኒኔ ዬሩሳላሚ ኦጌታን ኢንቴ ኤጻኔ ጨዋሲዳይሳ ጎዳይ ኤሮንታኔ ዶጊዳ ኢንቴስ ሚሳቲዜ?»

22 ኢንቴ ኦሊዳ ኢታኔ ሃራሲዛ ኦሶ ጎዳይ ጮኡ ጋናስ ዳንዳዮንታ ጊሻስ ሃቕ ኢንቴ ቤኢዛ ማላ ኢንቴ ቢታይ ቃንጌላስ ማላታ፡ አሲ ባይንዳ ባዞ ቢታ ጊዲዴስ።

23 ቤኢቲ፡ ሃቕ ሃ ባሻይ ኡባይ ኢንቴና ጋኪዳይ ኢንቴ ሃራ ኤቃ ጸሳታስ ኤጻኔ ጨዋሲዳ ጊሻስ፡ ጎዳ ቆሃዳ ጊሻስ፡ ጎዳ ቃላ ናጎንታ ኢጲዳ ጊሻስ፡ ኢዛ ዎጋ፡ ማራኔ አዛዞ ቦንቸንታ አጊዳ ጊሻሳ» ጊዴስ።

24 ሄሳፌ ጉዬ ኤርማሲ ዴራስ፡ አቱማሲኔ ማጫስ ኡባስ፡ «ኢንቴኖ ዩሁዳፔ ዪዲ ጊብጾ ቢታን ዲዛ አሳቶ! ኡባይካ ጎዳ ቃላ ሲዪቲ!

25 ኡባፌ ዎልቃማ ጎዳ ኢስራኤሌ ጸሳይ ኢንቴኒኔ ኢንቴ ማቼቲ፡ ሉኒ ሳሎ ካዎይስ ኤጻኔ ጨዋሳናሲኔ ኡሻ ያርሾ ሺሻናስ ኑ አዲኒዳ አዲና አዳፌ ኑ ፖላና ኢንቴ ጊዳ ቃላ ፖሊዴታ፤ ሂስቲኮ ጉዬ ጎፒቲ፤ ኢንቴ አዲኒዳ ቃላ ፖሊቲ።

26 ኢንቴኖ ጊብጾ ቢታን ዲዛ ዩሁዳ አሳቶ! ጎዳ ቃላ ሲዪቲ! ጎዳይ፡ «ሃይሳፌ ጉዬ ጊብጾ ቢታን አዋ ባጋንካ ዲዛ ዩሁዳ አሲ ኦኒካ ዴኦ ጎዳይ ቤኢን!» ጊዲ ታ ሱንል ጾይጊ ጫቆንታ ማላ ታኒ ታ ጊታ ሱንላን ጫቃዲስ።

27 ታኒ ኢስታ ቦላ ሎኦ ሚሽ ኤሃናስ ጊዶንታ ኢታ ሚሽ ኤሃናስ ባጾታና፤ ጊብጾን ዲዛ ዩሁዳ አሳይ ሙሌራ ዉራና ጋካናስ፡ ኦላኒኔ ኮሻን ሃይቃና።

28 ጊደ አቲን ኦላፔ አቲዳ ጉላቲ ጊብጾፔ ሲሚዲ ዩሁዳ ጌላና፤ ሄ ዎጾ ጊብጾን ዳና ቢዲ ሄን አቲዳ ዩሁዳ ጫሻቲ ኡባይ ታ ቃላፔኔ ኢስታ ቃላፔ አዋይሲ ቱሙ ጊዳናኮ ኢስቲ ኤራና።

29 «ታኒ ኢንቴና ሃ ሶሆን ቃጸያናሲኔ ታኒ ኢንቴ ቦላ ኤሃና ጊዳ ኢታ ሚሺ ፖሌታናይሳ ኢንቴ ኤራና ማላ ታ ሃይሳን ኢንቴና ቃጸያናይሳሰ ሃይሳፌ ካሊዛይሲ ኢንቴሰ ማላታ ጊደ።

30 ሄሲካ፡ ታኒ የሁዳ ካዎ ሴዴቂያሲ ኢዛሰ ሞርኬ ጊዲዲ ኢዛ ዎቆናሰ ኮይዛ ባቢሎኔ ካዎ ናቡካዳናጾሬ ዎቆናሰ ኮይዛ ኢዛ ሞርኬታሰ ታ አላ ኢማና፡ ጌሰ ጎዳይ» ጊደሰ።

## 45

### ባርኬሰ ዮቴተዳ ኪታ

1 ኢዮሲያሳ ና ኢዮአቄሜይ የሁዳን ካዎተዳ ኦይዳንሉ ላይላን፡ ኔሪያ ና ባርኬይ ሃ ቃላታ ኤርማሲ ዮቴን ሲዱዲ ማጸፋን ጸፊደሰ። ሄ ዎዴ ኤርማሲ ኢዛሰ ዮቴዳ ቃላይ፡

2 «ባርኬ! ኔና ጎዳ ኢሰራኤሌ ጸሳይ፡

3 ኔኒ፡ ሳዳይ ታ ሳኮ ቦላ ጩጩ ጉጂዳ ጊሻሰ ታሰ እዬ አና! ታኒ ዳሮ ዩኪዳ ጊሻሰ ዳቡራዲሰ፤ ሽምፖይካ ታሰ ባዎ ጋዳሳ» ጌሰ።

4 ጎዳይ፡ «ታኒ ቢታ ቦላ ኬጲዳይሳ ላላና፤ ታ ቶኪዳይሳካ ሾዳና።

5 ሂሰቲን ኔኒ ኔሰ ጊታ ሚሽ ኮያይ? አሳ ናይታ ኡባ ቦላ ታኒ ባሽ ኤሃና ጊሻሰ ኔ ሄሳ ኮዮፓ፤ ጊዶ አቲን ኔኒ ቢዳሶ ኡባን ታ ኔ ሽምፖ አሻና» ጌሰ።

## 46

### ጊብጼ ጊሻሰ ዮቴተዳ ኪታ

1 ካዎቴላታ ጊሻሰ ናቤ ኤርማሳኮ ዪዳ ጎዳ ቃላይ ሃይሳፌ ካሊ ዲዛይሳ፤

2 ጊብጼ ጊሻሰ የሁዳ ካዎ ኢዮሲያሳ ና ኢዮአቄሜይ ካዎተዳ ኦይዳንሉ ላይላን፡ ኤፊራዲሴ ሻፋ ማታን ዲዛ ካርካሚሽን፡ ባቢሎኔ ካዎ ናቡካዳናጾሬይ ጸኒዳ ጊብጼ ካዎ ኒካ ኦላ አሳ ቦላ ዮቴተዳ ኪታይ ሃይሳፌ ካሊ ዲዛይሳ፤

3 «ኢንቴ ዎጋ ጎንዳሌኔ

ቄሪ ጎንዳሌ ጊግሲቴ፤

ሂሰቲዲ ኦላሰ ኬዚቴ!

4 ኢንቴ ፓራታ ኮሪዲ ቶጊቴ፤

ኢንቴ ሁኔን  
 ቢራታ ቆቤ ዋሊዲ፥  
 ኢንቴ ሶሆ ሶሆ ኦይኪቴ!  
 ኢንቴ ቶራ ሌፍቴ፤  
 ኢንቴ ኦላ ማይኦካ ማይኢቴ!

- 5 ጊዶ ኣቲን ሃይሲ  
 ታኒ ቤኢዛይ ኣዜ?  
 ኬሂ ያዪዲ ጉዬ ኡንዲዴቴሰ፤  
 ዋልቃማ ኢሰታ ኦላንቻቲ  
 ጸኔቲዳ፤  
 ጉዬ ሰሚ ጸሎንታ  
 ኤሶን ባቃቴቴሰ፤  
 ኡባሶን ሺሮይ ዴሰ።

- 6 ፒላታይ ባቃቲ ኣቴና፤  
 ሚኖይካ ኬሲ ኤኪ ኣቴና፤  
 ፑዴሃ ባጋን ኤፊራዲሴ ሻፋ  
 ማታን ቋጶቲ ኩንዲዳ።

- 7 ሃይሲ ኣባዬ ሻፋ ማላ  
 ኪጲዲ ጉፒዛይ  
 ቃሴ ዲኦ ሃላ ማላ  
 ጎጊዛይ ኦኔ?

- 8 ጊብጾይ ኣባዬ ሻፋይ  
 ኪጲዲ ጉፒዛ ማላ ጉፔሰ፤  
 ዲኦ ሃላ ማላ ጸንጌቴሰ፤  
 ጊብጾይ፥ ሩታኒ ኬዛዳ  
 ቢታ ካማና፤  
 ካታማታኔ ኢሰታን ዲዛ  
 ኣሳ ቋይሳና ጌሰ።

- 9 ፓራቶ ጉፒ ኬዘቴ፤  
 ፓራ-ጋሬቶ ኣዳራሲቴ፤  
 ጎንዳሌ ኦይኪዳ  
 ቶጵያ ኣሳይኔ  
 ፑጼ ኣሳይ፥  
 ዋንዳፌ ዋጺ ኦይኪዳ  
 ሚኖ ጊዲዳ ሉዲሜ ኣሳቲ፥  
 ኢንቴ ሚኖ ኦላንቻቲ  
 ኦላሰ ዴንዲቴ።

- 10 ሄ ጋላሳይ ጎዳ

ኡባፌ ዋልቃማ  
 ጸሳ ጋላሳ፤  
 ኢዚ ባ ሞርኬታ ቦላ  
 ሃሎ ኬሲዛ ጋላሳ፤  
 ማሻይ ካላና  
 ጋካናስ ማና፤  
 ሳሞ አላና ጋካናስካ  
 ሱሐ ኡያና፤  
 ጎዳይ ኡባፌ ዋልቃማ  
 ጸሳይ ፑዴሃ ባጋን ኤፊራዲሴ  
 ሻፋ ማታን  
 ኢስታስ ያርሾ ገግሲ ዋሊዴስ።

- 11 ሃኔ ጊብጾ ጌላኦ!  
 ፑዴ ጋላኦ ኬዛ፤  
 ቲዬቲዛ ጳሌ ኤካ ያ፤  
 ጌዶ አቲን ኔኒ  
 ጳሌ ጮ ሜላ ዳርሳሳ፤  
 ኔ ፓጻካ።

- 12 ካዋቲላቲ  
 ኔ ዬላቲላ ሲያና፤  
 ኔ ዬሆይ ቢታ ኩማና፤  
 ኦላንቻይ ኦላንቻራ  
 ኦይኬቲ ኩንዳና»  
 ጌስ ጎዳይ።

- 13 ባቢሎኔ ካዎ ናቡካዳናጾሬይ ጊብጾ ቢታ ዪዲ አላናይሳ  
 ጎዳይ ናቤ ኤርማሳስ ዮቲዳ ቃላይ ሃይሳፌ ካሊ ዲዛይሳ፤

- 14 «ሃይሳ ጊብጾን ዮታ፤  
 ቃሴ ጊብጾ ካታማታን  
 ሚጊዶሌን፥ ሜሞፒሳኒኔ  
 ጳፊናሴን አዋጅ።  
 ኢንቲ ዩሾን ዲዛይታ  
 ማሻይ ማና  
 ጊጌቲዳ ጊሻስ  
 ኢንቲ ዲዛሶን ዲዛሶን  
 ጊጌቲ ኡቲቴ።

- 15 ዋልቃማ ጊዲዳ አጽሴ ጌቲቲዛ  
 ኤቃ ጸሳይ ኣይስ ኩንዲዴ?

ጎዳይ ኢዛ ሱጊ ዩጊዳ ጊሻስ  
ኤቃና ዳንዳይቤና።

- 16 ኢዛ ካሊዛ አሳቲ  
ዛሪ ዛሪ ቋጾታና፤  
ኢሶይ ኢሳ ቦላ ኩንዳና፤  
ሐኔ ዴንዲቴ!  
ጌዴ ኑ ዴሬኔ  
ኑ አሳኮ አኔ ሲሞስ፤  
ሞርኬ ማሻፊካ  
አኔ ኬሲ ኤኮስ) ጋና።
- 17 ኢስቲ ሄን፥ ሪብዴ ካዎ ፓሮኔይ  
ባስ ኢሜቲዳ ቃዳን  
ጎኤቶንታ ዲሼ  
ጮ ታ ዳይስ ታ ዳይስ ጊ  
ጩቄቲዛዴ ጊ ጸይጋና) ጊዴስ።

- 18 ኢዛ ሱንሳይ ጎዳ  
ኡባፌ ዋለቃማ  
ጸሳ ጌቲቲዛ ካዎይ፥  
ታኒ ታ ዴኦን ጫቃይስ፤  
ዙማታ ጊዶን ዲዛ  
ታቦሬ ዙማ ሚሳቲዛይ፥  
አባ አቻን ዲዛ  
ቃርሜሎሴ ዙማ  
ሚሳቲዛ ኢሳዴይ ያናስ ዴስ።

- 19 ኢንቴሮ ጊብዴ ቢታን ዲዛይቶ!  
ዲኤቲ ባናስ  
ኢንቴስ ዲዛዝ ጊግሲቴ፤  
ሜሞፒሳ ላሌታዳ ኢዚን  
አሲ ባይንዳ ቡላ ጊዳና።
- 20 ጊብዴ ቢታይ ሎኦ ኡሳ ማላ፤  
ጊዶ አቲን ሳጺዛ  
ቦዴይ ፑዴሃ ባጋፌ ያና።

- 21 ሚሻን ሻሜቲ ዪዳ  
ኢዚ ኦላንቻቲ  
ሞቂዳ ዋፋሮ ማላ።  
ኢስቲ ቃጸዬታና  
ዋዴይ ጋኪዳ ጊሻሲኔ  
ኢስቲ ቋያናስ ዋዴይ

- ማቲዳ ገሻሰ  
 ኢሰቲ ኢሲፌ  
 ጉዬ ሲሚ ባቃታና፤  
 ባ ዲዛሶን ሚኒ ኤቂዲ  
 ኤቂታናሰ ዳንዳዬቴና።
- 22 ሞርኬይ ጸኒ ጸኒ ዩሺን  
 ጊብጼ አሳይ ባቃቲሼ  
 ሾሺ ሱይቂዛ ማላ ሱይቃና፤  
 ሚል ቃንጸና ቢዛ አሳ ማላ  
 ኢዚ ሞርኬቲ ኢዞ ቃንጸና  
 ካልታ ኤኪ ያና።
- 23 ጳፒ ጊዳ ዋራ ጊዲኮካ  
 ዋራይ ቄጾቴሰ፤  
 ኢሰታ ዳሮቴላይ ቦሌ ማላ፤  
 ኢሰቲ ቆዳታናሰ ዳንዳዬቴና።
- 24 ጊብጼ ማጫ ናያ ዩላታና፤  
 ፑዴሃ ባጋ ዴሬሰ  
 አቆ አሚታና።»
- 25 ኡባፌ ዋልቃማ ጎዳ ኢሰራኤሌ ጸሳይ፥ «ቴቤሴ ጸሳ አሞኔ  
 ቦላ፥ ፓሮኔ ቦላ፥ ጊብጼ ቦላኔ ኢዚ ኤቃ ጸሳታ ቦላ፥ ኢዚ ካዎታ  
 ቦላኔ ፓሮኔን አማኔቲዛይታ ቦላ ታኒ ቂጻቴ ኤሃና።
- 26 ኢሰታ ዋቆናሰ ኮይዛ ባቢሎኔ ካዎ ናቡካዳናጌ ኩሼኒኔ  
 ኢዛ ኦላንቻታ ኩሼን ታ አላ አሚና። ጉላ ዋዴፔ ጉዬ ጊብጼይ  
 ካሴይሳላ አሲ ዲዛሶ ጊዳና» ጌሰ።
- 27 «ታ ኦሳንቻ ያቆቤ ያዮፋ፤  
 ኢሰራኤሌ ሺርቶፓ፤  
 ታ ኔና ሃሆ ቢታፌ  
 ኔ ዛሬካ ዲኤቲ  
 ቢዳሶፔ አሻና።  
 ያቆቤይካ ሲሚዲ  
 ሳሮቴላን ዎፑ ጊ ዳና፤  
 ኢዛ ባቢሳና ሚሺካ ዴና።
- 28 ታ ኔናራ ዲዛ ገሻሰ  
 ታ ኦሳንቻ ያቆቤ ባቦፋ።  
 ታ ኔና ኢዛን ላሊዳ ካዎቴል  
 ኡባ ሙሌራ ቆይሲኮካ

ነና ጊዲኮ  
 ሙሉራ ጳይሲኬ።  
 ታ ኔሰ ቤሲዛ ቁጻቱ ቃጸያና አቲን  
 ሜላ አጊኬ» ጌሰ ጎዳይ።

## 47

ፊሊስጴሜ ጊሻሰ ዮቴቲዳ ኪታ

<sup>1</sup> ፓሮኔይ ጋዛ ኦሊ ኦይካናፔ ካሴ ፊሊስጴሜታ ጊሻሰ ጎዳፔ  
 ኤርምያስኮ ዪዳ ቃላይ ሃይሳፌ ካሊ ዲዛይሳ።

<sup>2</sup> ጎዳይ፥ «ቤኢቱ፥ ፑዳሃ ባጋን  
 ሃሉ ኩሚ ኩሚ ቤሰ፤  
 ዋልቃማ ዲኦ ጊዳና፤  
 ዴሬዮኔ ኢዚ ጊዶን  
 ዲዛይታ ኡባ  
 ኢዚ ካታማታኔ  
 ካታማታን ዲዛ  
 አሳ ኡባ ሚታና።  
 ዴሬዚካ ባ ቃላ  
 ጶቁ ሂሰቲ ዋሳና፤  
 ሄ ቢታን ዲዛ አሳይ ኡባይ  
 ጫሞ ዬሆ ዬካና።

<sup>3</sup> ፓራ ቶሆ ጊሪሲ  
 ሞርኬ ፓራ-ጋሬታ ዋሶ፥  
 ፓራ-ጋሬታ ቶሆይ ጌንዴሪሼ  
 ጊሪዛ ጊሪሳ ጋሶን  
 አዋቲ ባንታ ናይታ አሻናሰ  
 ጉዬ ሰሚ ደሌቴና፤  
 ኢሰታ ኩሼይካ ሲላ ጊዳና።

<sup>4</sup> ፊሊስጴሜ አሳ ኡባ ጳይሳናሰ፥  
 ባሰ አቲዲ ሃራታ ማዲዛይታ  
 ኡባ ጸረሴፔኔ  
 ሲዶናፔ ዱላ አሻናሰ  
 ዋዴይ ጋኪዴሰ።  
 ጎዳይ ካፍቶሬ ጋጸን  
 አቲዳ ፊሊስጴሜ አሳ  
 ጳይሳና ዴንዲዴሰ።

5 ጋዛይ ካዮስ  
 ባ ቢናና ሜዴታና፤  
 አስቄሎናይ ባ ዶና ቦላ  
 ኩሼ ዋላና፤  
 አንቴኖ ዴምባ ቦላ  
 ጫሻ አቲዳይቶ!  
 አንቴ አይዴ ጋካናስ  
 አንቴ ቦላ ቃጨሼ ዳኔ?

6 «አንቴ፥ ሩኔኖ ጎዳ ማሻዉ!  
 ኔ አይዴ ሼምፓኔ?  
 ኔ ኮሆን ሲማ ጌላ፤  
 ኔኒ ጮኡ ጋዳ ኡታ፥ ጋና።  
 7 ጊዶ አቲን ጎዳይ አስቄሎናኔ  
 አባ ጋጸ ኦላና ማላ አዛዚሺን  
 ዋኒ ሼምፓናስ  
 ዳንዳዬቲዜ?» ጌሰ።

## 48

### ሞአቤ ጊሻስ ዮቴቲዳ ኪታ

1 ሞአቤ ጊሻስ ኡባፌ ዋልቃማ ጎዳ ኢሰራኤሌ ጸሳይ፥  
 «ኔቦይ ቆያና ጊሻስ  
 ኢዚስ አዬ አና!  
 ቂሪያታይሜይ ካዉያናኔ  
 ኦይኬታና፤  
 ሚጸቲካ ኦይኬታናኔ  
 ላሌታና።  
 2 ሃይሳፌ ጉዬ ሞአቤይ  
 ቦንቹቱኩ፤  
 አሳይ ሃሴቦኔን ኡቲዲ፥  
 ሃዩ ዪቴ! ሃኖ ካታማዮ  
 አኔ ቆይሶስ)  
 ጊዲ ኢዚ ቦላ ዱላታና።  
 ሃኔ ማዲሜኔ!  
 ኔና ቡሮ ጮኡ ሂስታና፤  
 ማሻይ ኔና ጎዳና።

- 3 ሆሮናይሜፔ ኬዚዛ ሳይሳ  
 ዋሶኔ ጌታ ባሻ ዋሶ  
 ጌሪሰ ሲዩቴ፤
- 4 ሞኣቤይ ሜቃና፤  
 ኢዚ ናይቲካ ዋሶ ሲሳና።
- 5 ጫሞ ዬሆ ዬካና፤  
 ሉሂቴ ፑዱንሰ ኬዛና፤  
 ባና ጋኪዳ ኢታ ሜቶፔ  
 ዴንዲዳይሳን ጫሞ ዬሆ  
 ዬኪሺ ሆሮናይሜ  
 ዱጉንላ ዋሳና።
- 6 ባቃቲዲ ኢንቴ ሽምፖ ኣሺቴ፤  
 ባዞን ቱሻ ዋራ ጌዲቴ።
- 7 ኢንቴ ኦሉዳ ኦሶኒኔ  
 ኢንቴ ኣቆታን  
 ኢንቴ ኣማኔቲዛ  
 ጌሻሰ ኢንቴካ ዲኤታና፤  
 ካሞሼይካ ባ ቄሴታራኔ  
 ባ ሹሜታራ ዲኤቲ ባና።
- 8 ካታማ ኡባ ቦላ  
 ሳይሲዛይ ያና፤  
 ኢሲ ካታማይካ  
 ኬሲ ኤኪ ኣቴና፤  
 ጎዳይ ዮቲዳ ጌሻሰ  
 ሾባይ ሳያና፤  
 ዴምባቲካ ሳያና።
- 9 ሞኣቤይ ፒራታ ኣታና ማላ  
 ኢዚሰ ቄፌ ኣሚቴ፤  
 ኢዚ ካታማቲ ኣይኮይ ባይንዳ  
 ቡላ ጌዳና።
- 10 «ጎዳ ኦሶስ ዉዱ ጎንታዴይ  
 ቃንጌቲዳዴ ጌዶ!  
 ኢዛ ማሻይ  
 ሱሰ ጉሶንታ ማላ  
 ዲጌዛዴይ ቃንጌቲዳዴ ጌዶ።
- 11 «ሞኣቤይ ዬላጋቴላፌ

- ደሚዲ ጋጩቶንታ  
 ቶጩራ ዲዛ ዋይኔ  
 ኡሻ ማላ ዋፓን ዳስ፤  
 ኦቶፔ ኦቶን ላሜቲቤና፤  
 ኢዚ ዲኤቲ ቢ ኤሬና፤  
 ኢዛ ማልኦይ  
 ካሴ ዲዛ ማላ ዳስ፤  
 ኢዛ ሳዎይካ ላሜቲቤና።
- 12 ጊዶ ኣቲን ኦቶዛ ላሚዛ ኣሳታ  
 ታ ኪታና ዋዴይ ያና፤  
 ኢስታካ ዋራ ጉሲዲ  
 ኦታ ጸላ ኣሻና፤  
 ዲቂዛ ሚሻታካ  
 ሜንፌሬሴ ዬጋና።
- 13 ኢሰራኤሌ ኣሳይ ቤቴሌን  
 ኣማኔቲ ዲሼ  
 ዬላቲዳይሳፉ  
 ሞኣቤ ኣሳይካ  
 ባ ጸሳን  
 ካሞሼን ዬላታና።
- 14 «ኢንቴ፥ ሱኒ ሚኖ ኦላንቻታ»  
 ጋናስ ዋኒ ዳንዳይዴቲ?
- 15 ቤኢቴ ሞኣቤ ቢታይ ቋያና፤  
 ኢዚ ካታማቲካ ዋራጄታና፤  
 ዶሬቲዳ ኢዚ ዬላጋ ናይቲካ  
 ሹኬታናስ ዱጌ ዋቋና፤  
 ኢዛ ሱንሳይ ጎዳይ ኡባፌ  
 ዋልቃማ ጸሳይ፥
- 16 «ሞኣቤስ ኩንዴሳ  
 ዋዴይ ጋኪዴስ፤  
 ባሺ ኢዛ ቦላ ኤሶን ያና።
- 17 ኢዛ ዩሾን ዲዛ ኡባይ  
 ኢዛ ጊታቴላ ኤሪዛይቲ ኡባይ  
 ኢዛስ ዬኪቴ፤  
 ኢንቴ፥ ሪሚኖ ኢዛ ጨካይ፥  
 ቦንቹቲዳ ጸንባርይ

ዋኒ ሜቂዴ?› ጌቲ።

- 18 «ሞክሮ ጳይሳናይ  
ኔ ቦላ ያና፤  
ገምቤቲዳ ኔ ካታማታ  
ኢዚ ጳይሳና፤  
ሃኔ ዲቦኔ ናዬ!  
ኔ ቦንቸዛፔ  
ዲጌ ዋዳ፤  
ሜላ ቢታ ቦላ ዋዳ ኡታ።
- 19 ሃኔ ኣሮኤሬን ዲዛሬ!  
ኔኒ ኦጌ ዶናን ኤቃዳ ዪላ፤  
ባቃቲዛ ኣቲማሰ፥  
ኬሳ ኤካ ቢዛ ማጫሰ፥  
(ኣዜ ሜዴቲዳይ?)›  
ጋዳ ኦይቻ።
- 20 ሞክሮይ ላሌቲዲ ካዉዪዳሰ፤  
(ዉ! ዉይ) ጌዲ ዋሲቲ፤  
ሞክሮይ ሙሌራ ጳይዳይሳ  
ኣርኖኔ ሻፋ ኣቻን ኣዋጂቲ!
- 21 ፒርዳይ ቦላ ጌዜ ቢታን  
ሆሎኔ ቦላ፥  
ያሃዬ ቦላኔ  
ሜፋኣቲ ቦላ፥
- 22 ዲቦኔ ቦላ፥  
ኔቦ ቦላኔ  
ቤቲ-ዲቢላታይሜ ቦላ፥
- 23 ቂሪያታይሜ ቦላ፥  
ቤቲ-ጋሙሌ ቦላኔ  
ቤቲ-ማኦኔ ቦላ፥
- 24 ቂሪያቲ ቦላኔ ቦዲራ ቦላ፥  
ሃሆኒኔ ማታን ዲዛ ሞክሮ  
ካታማታ ኡባ ቦላ ዪዳሰ።
- 25 ሞክሮ ካጨይ ቃንጾቲዳሰ፤  
ኢዛ ቄሴይካ ሜቂሬቲዳሰ።
- 26 «ኢዚ ጎዳ ካዲዳ ገሻሰ  
ሞክሮ ኡሻን ማሉቲ፤

ሞአቤይ ባ ጮሻ ቦላ ጌንዳሬቶ፤  
ቂጂስ አቶ።

27 ኔኒ ካሴ ኢሰራኤሌ ቂጂቤኪ?  
ኢዚ ጊሻሰ ኔ ሃሳይዛ ዎዴ  
ኔኒ ኔ ሁኤ ቃላቤኪ?  
ኢዛ ካይሶታራ ካይሶታሾ  
ኦይኬታዴ?

28 ኢንቴኖ ሞአቤን ዲዛይቶ!  
ካታማፔ ኬዚ ቢዲ  
ዛላ ጊዶን ዲቴ፤  
ኣፎ ዶናን ባ ኬሐ ኬጺዛ  
ሃራጺይ ማላ ጊዲቴ።

29 ሞአቤ ኦቶሬቴሐ፤  
ባና ጶቁ ሂሰቴሐ፤  
ጨቄቴሊኔ  
ዎዚና ሙሜቴሐ  
ኑ ሲዩዶስ።

30 ታኒ ኢዛ ዎልቃ ኤራይስ፤  
ጊዶ አቲን ሄሲ ሃዳ፤  
ኢዛ ጨቄቴላሰ ጎአይ ዶና።

31 ሄሳ ጊሻሰ  
ታኒ ሞአቤስ ዩካይስ፤  
ሞአቤ ዳሬ ኡባስ፤  
ፋዉ! ዉይ፡ ጋይስ፤  
ቂሬ-ሄሬሴ አሳሲካ  
ዩሆ ጨንጉርስ ሲሳይስ።

32 ኔና ሴባማ ዎይኔ ሚላዞ!  
ኢያዜሬስ ዩኮይሳፌ  
አላዳ ታኒ ኔስ ዩካይስ።  
ኔ ሃጋቲ ዳዩዲ አባ ፒኒዲ  
ኢያዜሬ ጋኪዳ፤  
ጊዶ አቲን ኔስ ማጸ ጋኪዳ  
ካላ አይፌኔ  
ዎይኔ ጳይሳናይ ዩዳስ።

33 ሞአቤን አታኪልቴሶፔኔ  
ጎሻ ጋዴፔ  
ሃሹ ሂሰቲዛዚኔ  
ኡፋይሲ ጳይዳስ፤

ዎይኔ ኡሺ ጉምኢን  
 ዎጵንታ ማላ ሜሊሳዲስ፤  
 ኦኒካ ኢዛ ኢሊሊሺ ጉምኤና፤  
 ሄን ኣሳ ቃላይ ሲዬቲኮካ  
 ኢሊሊሳ ጨንጉርሰ ጊዳና።

- 34 «ሃሴቦኔፔ ቢዲ ኤልኤሌኔ  
 ያሃጼ ጋካናስ፤  
 ዘኣሬፔ ቢዲ ሆርናይሜ፤  
 ኤጊላቴ-ሻሊሺያ ጋካናስ  
 ኢስታ ዋሶይ ኬሂ ሴቴቴስ፤  
 ኒሚሪሚ ሃሊ ሜሊዴስ።
- 35 ጶቃሶሆታ ቦላ ያርሺዛይታኔ  
 ባንታ ኤቃ ጸሳታስ  
 ኤጳኔ ጨዋሲዛይታ  
 ታኒ ዋኣቤ ቢታፌ ጳይሳና።

- 36 «ታ ዎዚናይ ዋኣቤሲኔ  
 ቂሬ-ሄሬሴ ኣሳስ ዛዬን  
 ዩኪዛ ኣሳ ማላ ዩኬስ፤  
 ጋሶይካ ኢስታ ዲሬቴሊ  
 ጳይዴስ።

- 37 ኣስ ኡባ ሁኤይኔ  
 ቡቺ ሜዴቲዴስ፤  
 ባንታ ኩሺካ ጫዴሬሊዳ፤  
 ቃሴ ማቃ ማይኢዳ።

- 38 ዋኣቤን ዲዛ ኬላ  
 ኡባኒኔ ዳባባን  
 ዩሆፔ ኣቲን  
 ሃራይ ዳና፤  
 ጋሶይካ ታኒ ዋኣቤ ዳሬ  
 ዋሆ ኦቶ ማላ  
 ሜንጮሬላ ዩጋዲስ።

- 39 «ዋኣቤይ ኣይ ሜቆ ሜቂዴ!  
 ኣሳይ ኣይ ዩሆ ዩኪዜ!  
 ዋኣቤይ ኣይ ማላ  
 ዩላቲዲ ዘኮ ዛሪዴ!  
 ዋኣቤይ ባ ሄራን ዲዛ

- አሳ ኡባሰ  
 ጫሻሲኔ ሻባርሳሰ  
 ማላታ ጊዲዴሰ» ጌሰ።
- 40 ጎዳይ፥ «ጎሌይ ባ ቄፌ  
 ፒዲ ሂሰቲ  
 ፒራዲ ዋዲዛ ማላ፥  
 ሞክሴ ቦላ ዋዳና።
- 41 ኢዛ ካታማቲኔ  
 ኢዛ ሚጻቲ ኦይኬታና፤  
 ሄ ጋላሰ ሞክሴ  
 ኦላንቻታ ዋዚናይካ  
 ሚጻ ኦይኬቲዳ ማጫሳ  
 ዋዚና ማላ ጊዳና።
- 42 ሞክሴይ ጎዳ  
 ካዉሺዳ ጊሻሰ ዳያና፤  
 ኢዛ ካዋቱላይካ አታና።
- 43 ኔና ሞክሴ ዴሬዘ!  
 ኔና ሻባርሲ፥ ኦላይኔ  
 ዋዲማዴይ ናጌሰ።
- 44 «ሻባርሳፌ ባቃቲ አቲዳ ኡባይ  
 ኦላን ጌላና፤  
 ኦላፌ ኬዚዳይ  
 ዋዲማዴን ኦይኬታና፤  
 ታኒ ሞክሴይ ቃጻዬቲዛ  
 ላይሐ ኤሃና ጊሻሳ።
- 45 «ሃሴቦኔፔ ሞክሴ ሊጴ፥  
 ጩቄቲዛይታ ፒዲ  
 ጸጊዛ ታማይ፥  
 ታማ ላጮይ ሲሆኔ  
 ኬላፌ ኬዚዴሰ፤  
 ባቃቲ ቢዳይቲ  
 ሃሴቦኔ ኩዋ ጋርሳን  
 ባናሶ ዳይዲ ኤቂዳ።
- 46 ሞክሴ ኔሰ አዬ አና!  
 ካሞሽሰ ጎይኒዛ  
 ዴሬይ ዉሪ ዉሪዴሰ።

ኔ አቱማ ናይቲ ኡባይ ዲኤቲዳ፤  
ማጮ ናይቲ ኡባይካ ዲኤቲ ቢዳ።

- 47 «ጊዶ አቲን ወርሴላን ሞአቤፕ  
ዲኤቲ ቢዳይታ ታ ዛራና» ጌሰ።  
ሞአቤ ቦላ ፒርዴቲዳ  
ፒርዳይ ሄላ።

## 49

አሞኔ ዳሬሰ ዮቴቲዳ ኪታ

- 1 አሞኔ አሳ ጎዳይ፥  
«ኢሰራኤሌይ አቱማ  
ናይታ ዩሊቤኔ?  
ዎይኮ ኢዛ ላታናይቲ ባዌ?  
ሂሰቲን ሚልኮሚይ \*  
ጋዴ አይሰ ላቲዳ?  
ኢዛ አሳቲ አይሰ ካታማይን ዲዛ?
- 2 አሞኔ ካታማ ኤራባ ቦላ  
ኦላ ዋሶ ጩንጉርሲ  
ሴቲታና ዎዳይ ያና።  
ኢዛ ቡጂታዳ ዶሬቲዳ  
ዶሬ ጊዳና፤  
ኢዚ ጉታቲ ኡባይ ጸጌታና፤  
ኢሰራኤሌይ ባና ኬሲ ጎዲዳይታ  
ባ ዳሬፔ ኬሳ ጎዳና።
- 3 ሃኔ ሃሴቦኔ!  
አዬ ካታማይ  
ቆይዳ ገሻሰ ዩካ፤  
ኤራባ ማጮ ናይቶ ዋሲቲ፤  
ማቃ ማይኢዲ ዩኪቲ፤  
ጋሶይካ ሚልኮሚይ  
ባ ቄሴታራኔ  
ባ ሹሚታራ ዲኤቲዲ ባና፤  
ዲርሳ ጊዶን  
ያኔ ሃ ዎጾሬቲቲ።

\* 49:1 ሚልኮሚይ አሞኔቲ ጎይኒዛ ኤቃ ጸላታፔ ኢሳ።  
25:1-7፤ አሞ 1:13-15፤ ሶፎ 2:8-11

- 4 ሃኔ ካዲዳሬ!  
 ኔኒ ኔ ሾባታን  
 አይሰ አማኔታይ?  
 ኔኒ ሎኦ ካላ አሚዛ  
 ኔ ሾባን አይሰ ጨቄታይ?  
 ኔኒ ኔ ዱሬቴላን ጨቄታዳ፥  
 «ታና ኦኔ ቦቻናይ?» ጋሳ።
- 5 ታኒ ኔ ዩሾን ዲዛይታፔ  
 ኔ ቦላ ሺሮ ኤሃና፤  
 አንቴ ኡባይካ ጎዴታና፤  
 ባቃታ ቦላ ዲዛይታ  
 ሺሻና አሲ ቤቴና።
- 6 «ሄሳፌ ጉዬ ታኒ  
 አሞኔ አሳፔ ዲኤቲዳ  
 ሚሻ ዛራና» ጌሰ።
- ኤዶሜ ጊሻሰ ዮቴቲዳ ኪታ
- 7 ኤዶሜ ጊሻሰ ጎዳይ ኡባፌ ዋልቃማ ጸሳይ፥  
 «አጵ ኤራቴላ  
 ቱማኔ አሳፔ ጳይዴ?  
 ዞሬይ አኬካንቻታፔ  
 ሃኪዴ?  
 ኢሰታ አጵ ኤራቴላይ ጨንጌዴ?
- 8 ታኒ ኤሳዊ ቃጸዪዛ ዋዴ  
 ታ ኢዛ ቦላ ባሻ  
 ኤሂዛ ጊሻሰ  
 አንቴ ዲዳኔን ዲዛይቲ  
 ጉዬ ሲሚ ባቃቲቴ፤  
 ጨማ ኦላ ጊዶን ቆቴቲቴ።
- 9 ዋይኔ ማጺዛይቲ አንቴኮ ዪዲ  
 ማጺሼ ፑሹሎ  
 አሺ ኤሬቴኔ?  
 ካይሶቲ ካይሶታና ጌሊኮ  
 ባ ኮዪዳይሳ ጸላ  
 ኤኬቴሰ ዳቴኔ?
- 10 ጊዶ አቲን ታኒ ኤሳዊ

ፓጸ ካሎ አሻና፤  
 ኢዚ ቆቴቲ አቶንታ ማላ  
 ኢዚ ቆቴታናሶሆታ  
 ታኒ ቆንጨኛ ኬሳና፤  
 ኢዛ ናይቲ፥ ኢዛ ዳቦቲኔ  
 ኢዛ ሾሮቲ ጳያና፤  
 ኢዚካ ባ ሁኤሰ ዴና።

11 «ዬሊዳ አያኔ አዋይ ባይንዳ  
 ኔ ጋርሳን ዲዛ ናይታ  
 ኔ አጋጋ፤

ታ ኢሰታ ዲቻና፤  
 አምኤቲካ ታናን  
 አማኔቲቶ» ጌሰ።

12 ጎዳይ፥ «ጸዋ ኡያና ቤሶንታይታሰ ጸዋ ኡሺ አቶንታይሳ  
 ጊዲኮ ኔኒ ዋና ቂጻቴፔ አታኔ? ኔሰ ቃጸዬቴሉ አቴና፤ ኔ ኡያናሰ  
 ቤሴሰ።

13 ቦጺራይ ላሌታዳ ዳጋማሰ፥ ቂጼሲኔ ቃንጌላሰ ማላታ ጊዳና  
 ማላ ታኒ ታናን ጫቃዲሰ፤ ኢዚ ካታማቲ ኡባይ ሜርናሰ አይኮይ  
 ባይንዳ ቡላ ጊዳና» ጌሰ።

14 ጎዳፔ ዪዳ ኢሲ ኪታ ሲያዲሰ፤  
 «ኤዶሜ ቦላ

ዋራጃናሰ ሸቂቲ፤  
 ኦሌታናሰ ዴንዲቲ!» ጊ ዮቲዛ  
 ቃሰታኔይ ካዋቴላታኮ  
 ከቴቲዴሰ።

15 ጎዳይ፥ «ሃኢ ታኒ ኔና  
 ካዋቴላታ ጊዶን ላፋ፤  
 አሳ ጊዶንካ  
 ካጼቲዳዴ አላና።

16 ኔኖ ዛላ ጎንጎሎ  
 ጊዶን ዲዛይሶ!  
 ኔኖ ጶቃ ዙምቡላ  
 ሁኤን ኡቲዳይሶ!  
 ኔ ዮምቢዛ ዮምባይኔ  
 ኔ ዋዚና  
 ኦቶሮይ ኔና ባሌሉዴሰ፤  
 ኔኒ ኔ ኬላ ጎሌ ማላ  
 ጶቃሶሆን ኬጺኮካ

- ታኒ ኔና  
 ሄፔ ዱጌ ኦላና» ጌሰ።  
 17 ጎዳይ፥ «ኤደሜይ  
 ዳጋማስ ማላታ ጊዳና፤  
 ሄራ ኣጲዛ ኣስ ኡባይ  
 ኢዚ ቦላ ጋኪዳ ባሽ ቤኢዱ  
 ማላሌቲሼ ቁጳና።  
 18 ሶዶሜይኔ ጋሞራይ  
 ባንታ ዩሸን ዱዛ ካታማታራ  
 ኢሲፌ ጳይዳ ማላ  
 ኤደሜይ ጳያና፤  
 ኦኒካ ሄ ቢታን ዴኤና፤  
 ኢሳዴይካ ኢዚን ኡቴና» ጌሰ።  
 19 ጎዳይ፥ «ጋሞይ  
 ዮርዳኖሴ ዋራታፔ  
 ሜሄ ሄሚዛ ዴሞባን  
 ኬዚ ዋጲዛ ማላ  
 ታኒካ ኤደሜይ ቆፖንታ  
 ዲሺን ኬዛ ዋጳና፤  
 ኢዛ ቢታፌ ታ ኢዛ ጎዳና፤  
 ታ ዶሪዳይሳ  
 ኢዛ ቦላ ሹማና፤  
 ታ ማላይ ኦኔ?  
 ታናራ ኤቄታና  
 ዳንዳይዛይ ኦኔ?  
 ታናራ ኤቄታና ዳንዳይዛ  
 ሄንፋንቻይ ኦኔ?» ጌሰ።  
 20 ሄሳ ጊሻስ ታኒ ጎዳይ  
 ኤደሜ ቦላ ፖላናስ ሃልቺዳ ሃልቺኔ  
 ቲማኔን ዲዛይታ ቦላ  
 ታ ቆፒዳ ቆፋ ሲዪቴ!  
 ጉላ ዉዴቲ ጎሼቲ ባና፤  
 ሄሳ ጋሶን ዉዴይ ሄሜቲዛሶ  
 ሙሌራ ጳይሳና።  
 21 ኤደሜ ኩንዴላ ጊሪሲ  
 ቢታ ቃላና፤

- ኢስታ ዋሶይካ  
 ዞኦ ኣባ ጋካናስ  
 ኮሹሚስ።  
 22 ጎሌ ማላ ዱጌ ሲቲ ጊ  
 ኢዚ ቦላ ዋቆና፤  
 ባ ቄፌታካ ቦጺራ ቦላ ሚጫና፤  
 ሄ ዋዴ ኤዶሜ ኦላንቻቲ  
 ሚጸይ ኦይኪዳ  
 ማጫሳ ማላ ሂርጋና።

- ዳማስቆ ጊሻስ ዮቴቲዳ ኪታ  
 23 ጎዳይ ዳማስቆ ጊሻስ፤  
 «ሃማቴ ኣሳይኔ ኣርፋዴ ኣሳይ  
 ዳማስቆ ካታማ  
 ቆዮ ሲዪዲ ዳጋሚዴስ፤  
 ኣባ ዳምባላ ማላ ሺርቲዴስ፤  
 ኢስታ ዋዚናይካ ሴሪዴስ።  
 24 ዳማስቆይ ዳቡራዲስ፤  
 ባቃታናስ ጉዬ ሲማዲስ፤  
 ኮኮራዲስ፤  
 ሚጸይ ኦይኪዳ  
 ማጫሳ ማላ ጨጨይኔ  
 ቱጋይ ኢዞ ኦይኪዴስ።  
 25 ታ ኢዚን ኡፋዬቲዛ ኤሬቲዳ ካታማያ  
 ዋና ዩጌታ ኣታዴ?  
 26 ሄ ዋዴ ኢዚስ ናቴፋ  
 ኣቱማ ናይቲ ኡባይ  
 ኬኢዳሶን ኬኢዳሶን  
 ኦጌ ቦላ ኩንዳና፤  
 ኦላንቻቲ ኡባይካ  
 ሃይቂ ዉራና።  
 27 ታኒ ዳማስቆ ካታማ ዩሾን ዲዛ  
 ጊምቤ ቦላ ታማ ዩዳና፤  
 ሄ ታማይ ቤኒ-ሃዳዴ  
 ሻኮ ማና» ጌስ።

- ቄዳሬ ጊሻሲኔ ሃጾሬ ጊሻስ ዮቴቲዳ ኪታ።  
 28 ባቢሎኔ ካዎ

ናቡካዳናጆሬይ  
 ኦሊ ጸኒዳ ቄዳሬ  
 ካዎቴላ ጊሻሲኔ  
 ሃጆሬ ካዎቴላ ጊሻሲ  
 ጎዳይ፥ «ዴንዲዲ ቄዳሬ ኦሊቲ!  
 ኦርሼይ ሞኪዛ ባጋራ ዲዛ  
 ዴራ ዲፒ ሂሰቲቴ።

- 29 ኢስታ ዲንካኔታኔ  
 ኢስታ ዉዴታ ኤኪቲ!  
 ኢስታ ኦቆሶይኔ ኢስታ ጋሜላቲ  
 ኡባይ ኦቶንታ ኤኬታና፤  
 ሂሰቲዲ ኢስታሰ፥ ሓስታ ቦላ  
 ሺሮ ቦላ ሺሮይ ዪዴሰ፥  
 ጊዲ ዋሳና።

- 30 «ኢንቴኖ ሃጆሬን ዲዛይቶ!  
 ባቢሎኔ ካዎ  
 ናቡካዳናጆሬይ  
 ኢንቴ ቦላ ኢታ ሚሽ ኦላና  
 ማቄቲ ኡቲዳ ጊሻሲ ባቃቲቴ፤  
 ቢዲ ጨማ ጎንጎሎን ቆቴቲቴ።

- 31 «ዴንዲቲ! ሂርጋይ ባይንዳ  
 ባዲ ጊ ኡቲዳ  
 ባናን ኦማኔቲ ኡቲዳ  
 ካዎቴላ ኦሊቲ!  
 ኢቢሊ ዋይኮ ኮላታይ  
 ባይንዳ ዲሺን ባርካ ዲዛ  
 ዴራ ቦላ ዋራጂቲ» ጌሰ።

- 32 ጎዳይ፥ «ኢስታ ጋሜላቲ ቦንቄታና፤  
 ኢስታ ዉዴታካ ቡሪ ኤኪ ባና፤  
 ባንታ ሁኤ ጋሜ ሂሰቲ  
 ሜዴቲዳይታ  
 ታኒ ጫርኮን ላላና፤  
 ታኒ ኡባሶራ ኢስታ ቦላ  
 ቦሻ ኤሃና።

- 33 «ሃጆሬይ ዋራካናታ

ዱሳሶ ጊዳና፤  
 ማርናስ ቡላ ጊዳና፤  
 ኦሪካ ሄን ዳኤና፤  
 ኦይ ኦሪካ ኢዚን ኡቴና» ጌሰ።

- ኤላሜ ጊሻስ የቴቲዳ ኪታ
- 34 የሁዳ ካዎ ሴዴቂያሲ ካዎቲዳ  
 ኮይሮ ላይሐ ጎዳፔ  
 ኤላሜ ጊሻስ  
 ታኮ ዪዳ ቃላይ፥
- 35 ኡባፌ ዋልቃማ ጎዳይ፥  
 «ሄኮ ኢዚ ዋልቃቴላስ  
 የች ጊዲዳ  
 ኤላሜ ዋንዳፌታ  
 ታ ማንላና።
- 36 ኦይዱ ባጋ ጉላታፔ  
 ታኒ ኤላሜ ቦላ  
 ኦይዱ ጫርኮታ ኤሃና፤  
 ኢሰታ ሄ ኦይዱ ባጋ ጫርኮታን  
 ታ ላላና፤  
 ኤላሜፔ ዲኤቲ ቢዳይቲ  
 ጋኮንታ ካዎቴላይ ዴና።
- 37 ኢሰታ ሸምፖ ዋቆና ኮይዛ  
 ኢሰታ ሞርኬታ ሲንላን  
 ታኒ ኤላሜ ያርኪያርኪሳና፤  
 ኢሰታ ቦላ ባሽ ኤሃና፤  
 ሄሲካ ታ ኢሰታ ቦላ  
 ኤሃና ሃንቆ፤  
 ታኒ ኢሰታ ሙሌራ  
 ቆይሳና ጋካናስ  
 ማሻን ዬዴላና።
- 38 ታኒ ኦራታ ኤላሜን ቶካና፤  
 ታኒ ኢዚ ካዎታኔ  
 ሹሜታ ቆይሳና።
- 39 «ጊዶ ኦቲን ወርሴላ ዋዴታን  
 ታኒ ኤላሜ ዛራ  
 ኢሻልሳና» ጌሰ።

## 50

ባቢሎን ገሻሰ የቴቲዳ ኪታ

<sup>1</sup> ባቢሎን ቢታን ባቢሎን አሳ ገሻሰ ጸሲ ናቤ ኤርምያ ባጋራ  
የቴቲዳ ቃላይ ሃይሳፌ ካሊዛይሳ፤

<sup>2</sup> «ካዎቴላታ ኡባ

ጊደን አዋጁቴ!

ባንዲራ ቶቆ ሂሰቲ

አይኪዲ አዋጁቴ!

አይኮካ አሾንታ ዲሼ፥

ኦሄኮ ባቢሎንይ አይኬታና፤

ቤሌይ ካዉያና፤

ማርዲኬይ ሺሮን ኩማና፤

ኢዚ ኤቃ ጸሳቲ ካዉያና፤

ኢዚ ኤቃ ሚሰሌቲ

ሜቄሬታና፤ ጌቱ።

<sup>3</sup> ፑዴሃ ባጋፌ

ኢሲ ካዎቴላይ ዪዲ

ባቢሎን ቢታ ኦላና፤

ሄሳፌ ዴንዲዳይሳን

አሲን ሜሄይ ባቃታና፤

ቢታዮካ ቡላ ኬሳና፤

ኦኒካ ኢዚን ዴና።»

ኢስራኤልን የሁዳ አሳ ሲሞ

<sup>4</sup> ጎዳይ፥ «ሄ ዋዴኒኔ ሄ ጋላሳታን

ኢስራኤል አሳይኔ

የሁዳ አሳይ ኢሲፌ ያና፤

ጎዳ ባንታ ጸሳ

ኮዪሼኔ ዬኪሼ ያና።

<sup>5</sup> ኢሰቲ ጸዮን ኤፊዛ ኦጌ ኦይቻና፤

ባንታ ሲንሐ ሄ ዛራና፤

ዪዲ ሙሌራ ዶጌቶንታ ሜርና

ጫቆ ቃላን

ጎዳራ አይኬታና።

<sup>6</sup> «ታ ዴሬይ ቶይዳ

ዶርሳ ማላ ጊዲዴስ፤

ኢስታ ሄንፋንቻቲ

ኢስታ ባሌሊዲ

ዋራ ካሌሊዲ፤

ዙማታ ቦላኔ

ዙምቡላታ ቦላ ቶይላቲዳ፤

ባ ኣቁዛሶካ ደገዳ።

7 ዴሚዳ ኡባይ ኢስታ ቆሂሰ፤

ኢስታ ሞርኬቲ፥

ኅቱ ቦላ ሞሮይ ባ፤

ሃይሲ ሜቶይ ኢስታ ጋኪዳይ

ባንታ ኣዋታስ

ሂዶታ ገዲዳ ጎዳ፥

ቱማፔ ኢስታስ ዲሳሶ ገዲዳ

ጎዳ ቆሂዳ ገሻሳ ገዳ።

8 «ባቢሎኔፔ ባቃቲቴ!

ኢስታ ቢታካ ዬዲቴ!

ዉዴ ካሌሊዛ

ዴይሻ ኦርጌ ማላ ገዲቴ።

9 ታኒ ፑዴሃ ባጋፌ

ዋልቃማ ካዋቲላታ

ባቢሎኔ ቦላ

ዴንሌላና፤

ኢስቲካ ኢዚ ቦላ ሳልፋና፤

ሂሰቲዲ ኢዞ ሄፔ ኦይካና፤

ኢስታ ዋንዳፌይ ዬዶንታ

ሎሂዳ ኦላንቻታ ማላ።

10 ባቢሎኔ ቢታይ ቦንቄታና፤

ኢዞ ቦንቄዛይቲ ባስ ገዳናሼ

ጋካናስ ቦንቃና» ጌሰ።

**ባቢሎኔ ኩንዴል**

11 «ኢንቴኖ ታ ጸንጾ

ቦንቄ ኤኪዳይቶ!

ኢንቴ ኡፋዬቲዳ ገሻሲኔ

ኡፋይሳን ማጉሊዳ ገሻሰ፥

ዴምባን ጸኪቲዛ ኡሳ ማላ

ኢንቴ ሊፍጾቲዳ ገሻሰ፥

ዎዳላ ፓራ ማላ

እንቴ ጫጊዳ ጊሻስ፥

12 እንቴ ኣያ ኬሃ ዩላታና፤

እንቴና ዩሊዳራካ ካዉያና፤

ካዎቴላታ ኡባ ጊዶን

ኢዛ ጉሐ ጊዳና፤

ኢዛ ኣሲ ባይንዳሶ፥

ሃሊ ባይንዳ ቢታኔ

ባዞ ጊዳና።

13 ጎዳ ሃንቆ ጋሶን

ኢዛ ባዞ ጊዳና ኣቲን

ኣሲ ኢዚን ዴና፤

ኢዚ ቦላ ጋኪዳ ባሻ ጋሶን

ባቢሎኔራ ኣጂ ቢዛ

ኡባይ ማላሌቲሼ ኢዛ ቂዳና።

14 «እንቴኖ ዩሻን ዱኪዛይቶ!

ባቢሎኔ ኦላናሰ

ኢዚ ዩሾን ሳልፍቴ፤

ናጋራ ኦሊዳ ጊሻስ

እንቴ ዩሽ ኢሲኖካ ኣሾንታ

ኢዚ ቦላ ዩዲቴ።

15 ኡባ ባጋራካ

ኢዚ ቦላ ማጉሊቴ!

ኢዛ እንቴሰ ኩሼ ኢማና፤

ኢዚ ሚጻቲኔ

ጊምቤቲ ላሊታና፤

ሃይሲ ጎዳይ ሃሎ ኬሲዛ

ኦጌ ጊዲዳ ጊሻስ

እንቴ ኢዚ ቦላ ሃሎ ኬሲቴ፤

ኢዛ ሃራታ ቦላ ኦሊዳ ማላ

እንቴ ኢዚ ቦላ ኦሊቴ።

16 ባቢሎኔፔ ዜሬሊ ዜሪዛይሳ፥

ካላ ሺሾ ዎዴ ጫካናሰ

ባጫ ኦይኪዳይሳ ዳይሲቴ፤

ኡንኤሊዛይታ

ማሻፌ ዴንዲዳይሳን

ኢሶይ ኢሶይ

- ባ አሳኮ ሲሞ፤  
 ባ ዴሬካ ባቃቶ።
- 17 «ኢስራኤሌይ ጋሞይ ጎዲዲ ላሊዳ ዉዴ ማላ ጊዲዴስ፤  
 ኮይሮ አሶሬ ካዎይ  
 ፑዜሬሊ ሚዴስ፤  
 ጉዬፔ ባቢሎን ካዎ ናቡካዳናጾሬይ  
 ሜቄላ ቶጊዴስ»  
 ጌስ ጎዳይ።
- 18 ሄሳ ጊሻስ ኡባፌ ዎልቃማ  
 ጎዳ ኢስራኤሌ ጸሳይ፥  
 «አሶሬ ካዎ ታኒ ቃጸይዳ ማላ  
 ባቢሎን ካዎን  
 ኢዛ ቢታ ቃጸያና።
- 19 ጊዶ አቲን ታኒ ኢስራኤሌ  
 ካሴ ኢዚ ሄሜቲዛሶ ኢዛ ዛራና፤  
 ቃርሜሎሴኒኔ ባሳኔ ዴሬን  
 ኢዚ ሄሜታና፤  
 ቃሴ ኢዚ ኤፍሬሜ  
 ዙሞቡላታ ቦላኔ  
 ጋላኣዴ ዙሞቡላታ ቦላ  
 ካላናሼ ጋካናስ  
 ማና» ጌስ።
- 20 ሄ ዎዴታኒኔ ሄ ጋላሳታን ጎዳይ፥  
 «ኢስራኤሌ ሞሮይ ኮዬታና፤  
 ጊዶ አቲን ኢሲናካ ቤቱኩ፤  
 ዩሁዳ ናጋራይካ ኮዬታና፤  
 ጊዶ አቲን ሙሌካ ቤቱና፤  
 ሃይቆፔ ታ አሺዳ ሾጌታ  
 ታ ማራና» ጌስ።
- ባቢሎን ቦላ ያና ፒርዳ
- 21 «ሚራታይሜኒኔ ፓቆዴን ዲዛ አሳ ጎዲቴ፤  
 ዎቋቴኔ ሙሌራ ቆይሲቴ፤  
 ታኒ ኢንቴና አዛዚዳይሳ  
 ኡባ ኦሴቴ።
- 22 ሄ ቢታን ኦላ ሺሮይኔ  
 ጌታ ባሻ ዋሶይ ሴቴቲዴስ።
- 23 አላሜ ኡባ ሊቂሲዛ ማዶሻይ  
 ዋኒ ሜቄዴ?

- ዋኒ ሊቂዳ?  
 ካዋቴላታ ጊደን ዋና  
 ባቢሎኔይ ቡላ ጊዳዳ?  
 24 ሃኔ ባቢሎኔ!  
 ታ ኔሰ ዋዲማዴ ዋላዲሰ፤  
 ኔካ ኤርንታ ዳሼ ኦይኬታዳሳ፤  
 ኔኒ ጎዳራ ኤቄቲዳ ጊሻሰ  
 ቤታዳ ኦይኬታዳሳ።  
 25 ጎዳይ ባ ኦላ ማሳራ ዋሒዛ  
 ሚንጃ ኬላ ደይዳሰ፤  
 ባ ሃንቆ ኦላ ማሳራ ኬሲዳሰ፤  
 ጎዳይ ኡባፌ  
 ዋልቃማ ጸሳይ  
 ባቢሎኔ ቢታን ኦሒዛ  
 ኦሶይ ዳሰ።  
 26 ያራ ሃራ ኢዚ ቦላ ዋራጂቲ፤  
 ኢዚ ጎታራታ ላሊቲ፤  
 ዲኤቲዳ ሚሻ  
 ካላ ማላ ደሪቲ፤  
 ሙሌራ ኢዞ ሳይሲቲ፤  
 ኢዚን ኣይኮይካ ኣቶፎ።  
 27 ኢዚ ዋፋኖታ ኡባ ሹኪቲ፤  
 ዲጌ ሹኬቲዛሶ ዋጄቶ!  
 ኢሰቲ ቃጸዬታና ዋዴይኔ  
 ጋላሳይ ጋኪዳ ጊሻሰ  
 ኣዬ ኣና!  
 28 «ጎዳ ኑ ጸሳይ  
 ሃሎ ኬሲዳይሳ፥  
 ጸሳ ኬላ ጊሻሰ  
 ሃሎ ኬሲዳይሳ  
 ባቢሎኔፔ ቤቲዳይቲኔ  
 ጎዴቲዳይቲ  
 ጸሊዮኔን ሃሳይዛይሳ ሲዪቴ።  
 29 «ዋንዳፊን ኦሊዛይታ  
 ባቢሎኔ ቦላ ጸይጊቲ፤  
 ኢሳዴይካ ኬሲ ኤኪ ቦንታ ማላ

ኢስታ ጊዶሊዲ ዲንካኒቴ፤  
 ጎዳ ኢስራኤል ጌሻ  
 ካወሸዳ ጊሻስ  
 ኢዚ ኦሶ ማላ ኢዚስ ዛሪቴ፤  
 ኢዛ ሃራታ ቦላ ኦሊዲያላ  
 ኢዚ ቦላ ኦሊቴ።

30 ሄሳ ጊሻስ  
 ኢዚ ናቴላ ኣቱማ ናይቲ  
 ኣጵሶን ኣጵሶን  
 ሃይቃና፤  
 ኢዚ ኦላንቻቲ ኡባይ  
 ሄ ጋላስ ኩንዳና» ጌስ ጎዳይ።

31 ጎዳይ ኡባፌ ዋልቃማ ጸሳይ፥  
 «ኔኖ ኦቶራንቻዞ!  
 ታኒ ኔ ቦላ ዴንዲዲስ፤  
 ኔኒ ቃጸዬታና ዋዴይኔ  
 ጋላሳይ ጋኪዴስ።

32 ኦቶራንቻይ ጳጳቲዲ ኩንዳና፤  
 ዴንላናይካ ዴና፤  
 ኢዛ ዩሾን ዲዛይታ  
 ኡባ ሚዛ ታማ  
 ኢዛ ካታማታ ቦላ  
 ዬዳና» ጌስ።

33 ጎዳይ ኡባፌ ዋልቃማ ጸሳይ፥  
 «ኢስራኤል ኣሳይኔ ዩሁዳ ኣሳይ  
 ኢሲ ቦላ ቆሄቲዴስ፤  
 ዲኢዲይቲ ኡባይ  
 ኢስታ ሚንላ ኦይኪዳ፤

ኢስታ ዬዳናስ ኢጺዳ።  
 34 ጊዶ ኣቲን ኢስታ ዋዚዛይ ሚኖ፤  
 ኢዛ ሱንላይካ  
 ጎዳ ኡባፌ  
 ዋልቃማ ጸሳይ፤  
 ኢስቲ ቢታስ ሸምፖ ኢማናስ  
 ኬሂ ባጼቴስ፤  
 ጊዶ ኣቲን ባቢሎንን ዲዛይታስ  
 ሸምፖ ጳይሴስ» ጌስ።

- 35 ጎዳይ፥ «ማሻይ  
 ባቢሎን ኣሳ ቦላ ዪደሰ፤  
 ኢዚን ዲዛ ኣሳታ ቦላ፥  
 ማታይ ዲዛ ኣሳታ ቦላን  
 ኣቶ ኤራንቻታ ቦላ  
 ሲፋናስ ሾዴቲዴሰ።
- 36 ማሻይ ዋርዶ ጊዲዳ  
 ኢዚ ናቤታ ቦላ ዪደሰ፤  
 ኢሰቲ ኤያታ ጊዳና፤  
 ማሻይ ኢሰታ  
 ኦላንቻታ ቦላ ሾዴታና፤  
 ኢሰቲካ ሺርታና።
- 37 ኢሰታ ፓራታ ቦላን  
 ኢሰታ ፓራ-ጋሬታ ቦላ  
 ቃሴ ኢዚ ጊደን ዲዛ  
 ሃራ ዴሬ ዋታዳራታ ቦላ  
 ማሻይ ያና፤  
 ኢሰቲካ ማጫሳታ ማላ ጊዳና፤  
 ማሻይ ኢዚ ኣቆታ  
 ኡባ ቦላ ያና፤  
 ኢሰቲካ ቦንቄታና።
- 38 ቢታያ ባቢሲዛኔ ኣሰ ጎሺዛ  
 ኤቃ ጸሳታን ኩሚዳ ጊሻሰ  
 ኢዚ ሃላታ ቦላ  
 ኣርሼይ ኬዛና፤  
 ኢሰቲካ ሜላና።
- 39 «ሄሳ ጊሻሰ ባዞ ዶኣታሲኔ  
 ጎዳሬሰ ዲሳሶ ጊዳና፤  
 ጉቶሰ ኣቆሶ ጊዳና፤  
 ሃይሳፌ ጉዬ ኦኒካ  
 ኢዚን ዴና፤  
 ዬሌታፔ ዬሌታ ጋካናስ  
 ኢዚን ኡታናይ ቤቴና።
- 40 ሶዶሜኔ ጋሞራ ካታማ  
 ኢሰታ ዩሾን ዲዛ ዴሬታ

እሲ ደንታ ማላ ኦሴዳሰ፤  
 ሄሳሶካ ኦኒካ  
 ሄን ዴና፤  
 ኢዚን ኡታናይካ ቤቴና» ጌሰ።

- 41 «ቤኢቴ! ፑዴሃ ባጋፌ  
 ኦሳይ ዩላ ቦላ ዴሰ፤  
 ኢሲ ዋልቃማ ካዋቴሊኔ  
 ዳሮ ካዋቲ  
 ሳኦ ጋጸፔ ዴንዲዳ።
- 42 ኢሰቲ ዋንዳፌታኔ  
 ማሻታ ኦይኪዳ፤  
 ኢሰቲ ማሮንታ ሜንጼ ኢታታ፤  
 ማሮካ ኦሴቴና፤  
 ኢሰቲ ፓራታ ቶጊሺን  
 ኢሰታ ጊሪሳይ  
 ኦባ ዳምባላ ማላ ጉሜሰ፤  
 ሃኔ ባቢሎኔ ማጫ ናዬ!  
 ኦላሰ ጊጌቲዳ ኦላንቻታ ማላ  
 ኔ ቦላ ያና።
- 43 ባቢሎኔ ካዋይ  
 ኢሰታ ጊሻሰ ሲዱዳሰ፤  
 ኢዛ ኩሺቲካ ዶጪዳ፤  
 ኢዛ ጩጩይ ኦይኪዳሰ፤  
 ሚጻይ ኦይኪዳ  
 ማጫሳ ማላ ሳኩቲዳሰ።
- 44 ጋዋይ ዮርዳኖሴ ዋራታፔ  
 ሜሄ ሄሚዛ ዳምባን  
 ኬዚ ዋጲዛ ማላ  
 ታኒካ ባቢሎኔይ ቆፖንታ  
 ዲሺን ኬዛ ዋጲና፤  
 ኢዚ ቢታፌ ታ ኢዞ ጎዳና፤  
 ታ ዶሪዳይሳ ኢዚ ቦላ ሹማና፤  
 ታ ማላይ ኦኔ?  
 ታናራ ኤቄታና  
 ዳንዳይዛይ ኦኔ?  
 ታናራ ኤቄታና ዳንዳይዛ

ሄንሳንቻይ ኦኔ?

- 45 ሄሳ ገሻስ ጎዳይ  
 ባቢሎኔ ቦላ  
 ሃልቺዳ ሃልቻ፥  
 ባቢሎኔ ቢታ ቦላ  
 ቆፒዳ ቆፋ ሲዪቲ!  
 ጉላ ዉዴይ ጎሼቲ ባና፤  
 ኢስታ ጋሶን ሄሚዛሶሆዛ  
 ሙሌራ ሳይሳና።
- 46 ባቢሎኔ ኩንዴላ ጌሪሲ  
 ቢታ ቃሳና፤  
 ኢዚ ዋሶይ ካዋቲላ  
 ኡባ ጋርሳን ኮሹማና» ጌሰ።

## 51

ባቢሎኔ ሳዮ ገሻስ ዮቲቲዳ ኪታ

- 1 ጎዳይ፥ «ቤኢቲ! ባቢሎኔኔ  
 ኢዚን ዲዛይታ ቦላ  
 ሳይሲዛ ጫርኮ ታኒ ዬዳና።
- 2 ኢዘ ሱራጋናሲኔ  
 ኢዘ ሳይሳናስ አላጋታ  
 ታ ባቢሎኔ ቦላ ኪታና፤  
 ኢዛ ሜቶቲዳ ጋላስ  
 ኢዘ ደዲ ኦይኪዲ ኡንኤላና።
- 3 ዋንዳፌ ዲኪዛይቲ  
 ባ ዋንዳፌ ዲካናስ፥  
 ባ ኦላ ማይኦ  
 ማይኦና ጋካናስ  
 ሸምፖ ኢሞፍቲ፤  
 ናቲላ ኢዚ ናይታስ ቃዴቶፍቲ፤  
 ኢዚ ኦላንቻታ ሙሌራ ሳይሲቲ።
- 4 ኢስቲ ባቢሎኔ ቢታን ሲፊቲዲ፥  
 ኢዚ ኦጌታን ሃይቃና ጋካናስ  
 ማዲንጺዲ ኩንዳና።
- 5 ኢስታ ቢታያ ኢስራኤሌ  
 ጌሻ ሲንላን  
 ሞሮን ኩሚዳ ጌዲኮካ  
 ኢስራኤሌኔ ዩሁዳ ኡባፌ

ዋልቃማ ጎዳይ ኢስታ ጸሳይ  
ኢስታ ዬጊ ኣጊቤና።

6 «ባቢሎኔፔ ባቃቲ ኬዚቲ!  
ኤሌሊዲ ኢንቲ ሼምፖ ኣሺቲ፤  
ኢዚ ናጋራ ጋሶን ቆዮፒቲ፤  
ሃይሲ ጎዳይ ሃሎ ኬሲዛ ዋዴ  
ኢዚ ኦሶ ማላ ኢዚስ ኢማና።

7 ባቢሎኔይ ጎዳ ኩሼን  
ዋርቃ ጸኣ፤  
ቢታ ኡባ ማሶሳዲስ፤  
ካዋቲላቲ ኡባይ  
ኢዚ ዋይኔ ኡሻ ኡዱዳ፤  
ሄሳ ጊሻስ ሃኢ ጎዱዳ።

8 ባቢሎኔይ ቆፖንታ ዳሼ  
ኩንዳ ሜቃና፤  
ሄሳ ጊሻስ ኢዚስ ዋሲቲ!  
ኦኔ ኤሪዛይ ኢዛ ፓጻናኮ  
ኢዚ ማዲንሳስካ ቆሌ ኮዪቲ።

9 «ኣሳይ፥ ሱኒ ባቢሎኔ  
ፓላናስ ባጼቲዶስ፤  
ኢዛ ጊዲኮ ፓጻና ዳንዳዩኩ፤  
ኢዚ ፒርዳይ  
ፑዴ ሳሎ ጋኪዳ ጊሻስ  
ሻራን ጋካናስካ  
ቆቁ ጊዳ ጊሻስ  
ኢዛ ኣጋጊዲ ኣኔ  
ኮ ዴሬ ዴሬ ሲሞስ።

10 ጎዳይ ኦ ሱሪቲላ ጊሻስ  
ማርካቲዶስ፤  
ኣኔ ሃ ዪቲ፤ ጎዳ ኦ ጸሳይ  
ኦሊዳይሳ  
ጸሊዮኔን ኣዋጀስ፡ ጊዴስ።

11 «ቶራታ ሌፍቲ፤

ጎንዳሌታካ ገግሲቴ፤  
 ጎዳይ ባቢሎኔ ዳይሳና  
 ቆፒዳ ገሻሰ  
 ሜዶኔ ካዎታ ዴንፌሊዴስ፤  
 ጎዳይ ሃሎ ኬሳና፤  
 ባ ኬፋ ገሻሰ  
 ሃሎ ኬሳና።

- 12 ባቢሎኔ ገምቤታ ቦላ  
 ማላታ ኤሲቴ፤  
 ሚንሊ ናጊቴ፤  
 ዛቤ ናጊዛይታ ኤሲቴ፤  
 ዛማዲ ኡቲዲ ኦሊዛይታ ገግሲቴ።  
 ጎዳይ ባቢሎኔ ኣሳ ቦላ  
 ቆፒዳ ቆፋኔ ባ ሃልኛ ፖላና።

- 13 ሃኔ ዳሮ ሻፋታ  
 ማታን ዲዛሬ!  
 ኣቆታን ኬሃ ዱሬቲዳሬ!  
 ኔ ዳያና ዋዴይ ጋኪዴስ፤  
 ኔስ ወርሴሊ ጋኪዴስ» ጌስ።

- 14 ጎዳይ ኡባፌ  
 ዋልቃማ ጸሳይ፥  
 «ቦሌይ ቢታ ኩሚዛ ማላ  
 ዳሮ ኣስ ታ ኔ ቦላ ዬዳና፤  
 ሄይቲ ኔና ጸኒዳ ኡፋይሳፌ  
 ዴንዲዳይሳን ኔ ቦላ  
 ጨቁታና» ጊዲ  
 ባ ሱንፋን ጫቂዴስ።

### ጋላታ ዬፋ

- 15 «ጸሲ ባ ዋልቃን  
 ሳኣ ሜዲዴስ፤  
 ባ ኣጵ ኤራቴፋን  
 ኣላሜ ገግሲዴስ፤  
 ሳሎታካ ባ ኣኬካን ሚጨዴስ።
- 16 ኢዚ ባ ጨንጉርሳ ሲሲዛ ዋዴ  
 ሳሎን ዲዛ  
 ሃፋቲ ጉሜቲስ፤  
 ሻራታ ኢዚ ሳኣ ጋጾፔ ኤሄስ፤

ኢራራ ዋልቃንሰ ኪቴሰ፤  
ባ ሚንጃሶሆፔካ  
ጫርኮ ኪቴሰ።

- 17 «አሰ ኡባይ ዳማኔ  
ኤራቴሉ ባይንዳይሳ ጊዲዴሰ፤  
ዋርቃ ሴሪሲዛይቲ ኡባይ  
ባ ኦሉዲ  
ኤቃ ሚሰሌታን ዬላቲዳ፤  
ኢሰቲ ገግሲዳ ሚሰሌቲ ዋርዶኔ  
ሼምፖይ ባይንዳይታ።

- 18 ኢሰቲ ሃዳኔ ካጴቲዳይታ፤  
ኢሰታ ቦላ ፒርዲይ ዪዛ ዋዴ  
ኢሰቲ ቆያና።

- 19 ያቆቤ ቃዳይ ጊዲኮ  
ሄይታንታ ማላ ጊዴና፤  
ኢዚ ኡባ ሚጲዳይሳ፤  
ኢሰራኤሌ ኣሳይ  
ኢዚ ባሰ ዶሪዳ ዴሬ፤  
ኢዛ ሱንሉ ጎዳ  
ኡባፌ ዋልቃማ ጸሳ» ጌሰ።

### ጸሳ ጸምኣ

- 20 ጎዳይ፥ «ባቢሎኔ  
ኔኒ ታ ጸምኣኔ ኦላ ማሳራ፤  
ኔናን ጎኤታዳ  
ታኒ ዴሬ ኡባ  
ሚንሴሬላዲሰ፤  
ቃሴ ካዋቴላታካ  
ቆይሳዲሰ።
- 21 ኔናን ፓራታኔ  
ፓራ ቶጊዛይታ ቆይሳዲሰ፤  
ፓራ-ጋሬታኔ  
ኢሰታ ላጊዛይታ  
ሚንሴሬላዲሰ።
- 22 ኔናን ማጫሳታኔ  
ኣቱማሳታ ሚንሴሬላዲሰ፤  
ጨማታኔ ናቴላታ  
ሚንሴሬላዲሰ፤

- ፓንሳታኔ ጌላኦታ  
 ማንጮሬላዲስ።  
 23 ኔናን ሄንሳንቻታኔ  
 ወዴታ ማንጮሬላዲስ፤  
 ጎሻንቻታኔ ቦራታ  
 ማንጮሬላዲስ፤  
 ዴሬ ሃሪዛይታኔ ሹማታ  
 ማንጮሬላዲስ» ጌስ።

- ባቢሎኔ ቦላ ዪዛ ቂጽቴ  
 24 ጎዳይ፥ «ጲዮኔ ቦላ  
 ኢስቲ ኦሊዳ ኢታ ኦሶ ጊሻሰ  
 ባቢሎኔሲኔ ኢዚን ዲዛ ኡባሰ  
 ኢንቴ ኢንቴ ኢይፌን ቤኢሺን  
 ኢስታ ኦሶ ማላ  
 ታ ኢስታሰ ኢማና» ጌስ።  
 25 ጎዳይ፥ «ሃኔ ዳይሲዛ ዙማዬ!  
 ቢታ ኡባ ዳይሲዛሬ!  
 ታ ኔ ሁኤ ቦላ ዳይስ፤  
 ታኒ ታ ኩሽ  
 ኔ ቦላ ዴንላና፤  
 ታ ኔና ኣፎ ሁኤፔ  
 ዲጌ ቡሉላና፤  
 ታ ኔና ጸጌቲዳ  
 ዙማ ሂሰታና።  
 26 ኔፔ ዮቻ ሹቺ ቤቴና፤  
 ጉላሰ ጊዲዛ  
 ሹቺ ኤኬቴና፤  
 ኔኒ ማርናሰ ቡላ ጊዳና» ጌስ።

- 27 «ቢታ ኡባ ቦላ  
 ባንዲራ ዴንሊቴ፤  
 ካዎቴላታ ጊዶን  
 ዛዬ ፑኒቴ፤  
 ካዎቴላታ ኢዚ ቦላ  
 ኦላሰ ጊግሰቴ፤  
 ኣራራቴ፥ ሚናኔኔ  
 ኣሽኬናዜ ካዎታ  
 ኦላሰ ኢዚ ቦላ ጴይጊ ሺሺቴ፤

- ኦላ ጋዳዋ ኢዚ ቦላ ሹሚቲ፤  
 ቦሌ ወዴ ማላ  
 ፓራታ ኢዚ ቦላ ዬዲቲ።
- 28 ሜዶኔ ካዎታ፤  
 ኢዞ ኣይሲዛይታኔ  
 ኢዚ ሹሚታ ኡባ፤  
 ኢሰቲ ሃሪዛሶን ዲዛ  
 ካዎቲባታ ኡባ  
 ኢዚ ቦላ ኦላሰ ጊግሲቲ።
- 29 ባቢሎኔ ኦኒካ ደንታ  
 ባዞ ቢታ ሂሰታናሰ  
 ጎዳይ ቆፒዳ ቆፋይ  
 ፖሌታና ዎዴይ ጋኪዳ ጊሻሰ  
 ቢታይ ኮኮሬሰ፤  
 ሜቶንካ ፖፖርቁ ጌሰ።
- 30 ባቢሎኔ ኦላንቻቲ ኦላ ኣጊዳ፤  
 ባንታ ሚጸን ኡቲዳ፤  
 ኢሰታሰ ዎልቃይ ወሪዴሰ፤  
 ኢሰቲ ማጫሳ ማላ ጊዲዳ፤  
 ኢሰታ ኬፋቲካ ጸጌቲዳ፤  
 ኢዚ ፔንጌ ኮላታቲ ሜቄሬቲዳ።
- 31 ካታማያ ሙሌራ ኦይኬቲዳይሳ  
 ባቢሎኔ ካዎሰ ዮታናሰ  
 ኢሲ ዮሞባይ ሃራ ዮሞባሰ፤  
 ኢሲ ቃሰታኔይ ሃራ ቃሰታኔሰ  
 ሄራካ ቶሆ ቦላ ካሌሰ።
- 32 ሻፋ ፒኒዛ ፑርዴቲ  
 ኦይኬቲዳይሳ፤  
 ሻፋ ማታን ዲዛ ሚጸቲ  
 ጸጌቲዳይሳ፤  
 ኢሰታ ዎታዳራቲ ባቦን  
 ቡልኣኬቲዳይሳ፤  
 ዳጋሚዳይሳ ዮታናሰ  
 ዎጼሬቲቴሰ» ጌሰ።
- 33 ኡባፌ ዎልቃማ ጎዳ  
 ኢሰራኤሌ ጸሳይ፤  
 «ባቢሎኔ ማጫ ናይቲ  
 ካል ቡካናሰ ጊኒዛ ባሌ ማላ፤  
 ካል ሺሾ ዎዴይ ኢዚ ቦላ

ኤሶን ጋካና» ጌሰ።

- 34 ባቢሎኔ ካዎ  
 ናቡካደናጾሬይ  
 ዬሩሳላሜ አቆታ ቦንቂዴሰ፤  
 ጋጪ ሊቂሲዴሰ፤  
 አይኮይ ባይንዳ  
 ካይሳ ኦቶ ኬሲዴሰ፤  
 ዳዌይ ሚቲዛ ማላ  
 ዴራ ሚቲዴሰ፤  
 ማልኦ ሚዛ ማላ ሚዲ  
 ጉዬፔ ኩና ኬሲ ጩቲዴሰ።
- 35 ሄሳ ጊሻሰ ጸዮኔ አሳይ፥  
 «ኑ ቦላ ጋኪዳ ጌኔይ  
 ባቢሎኔ ቦላ ጋኮ» ጌሰ፤  
 ዬሩሳላሜይ፥ «ኑ ሱሴ  
 ባቢሎኔን ዲዛ  
 አሳታ ቦላ ጊደ» ጋዉሰ።
- 36 ሄሳ ጊሻሰ ጎዳይ፥  
 «ኔ ጊሻሰ ታ ሞቲታና፤  
 ኔ ሃሎካ ኬሳና፤  
 ኢዚ አባኔ ፑልቶ ሃላታ  
 ታ ሚሊሳና።
- 37 ባቢሎኔይ ላሌሴ  
 ደሬቲዛሶ ጊዳና፤  
 ዎራካናቲ ካኢዛሶ ጊዳና፤  
 ዳጋማሲኔ ቂጼሰ  
 ማላታ ጊዳና፤  
 ኦኒካ ኢዚን ዴና።
- 38 ኢዘን ዲዛ አሳይ  
 ዎዳላ ጋዎ  
 ማላ ጸጌሰ፤  
 ጋዎ ማራ ማላ ዳሬሰ፤  
 ኢሰቲ ሆኤቲ ዴንዴቲሺን  
 ታ ኢሰታሰ ጊቢራ ጊጊሳና፤  
 ኢሰቲ ማሶታና ማላ ኦላና።
- 39 ሚጨሽ ሜርናሰ ቤጎንታ  
 ጺሰኮ ጺሰካና።
- 40 ላቃ ማላ፥ ጳርሾ ማላኔ

ኮርቤ ማላ  
ታ ኢሰታ ሹካሰ ኤፋና።

- 41 «ሼሻካ ዋና ዲኤታዬ! \*  
ሳኣ ኡባይ ኢዚን ጨቄቲዛራ  
ዋና ኦይኬታዬ!  
ባቢሎኔይ ካዎቴላታ  
ኡባ ሲንፋን  
ኣይ ማላ ዳጋንፊዛዝ ጊዳዬ!
- 42 ኣባይ ባቢሎኔ ቦላ ኬዛና፤  
ዳምባላይካ ጉሚሽ  
ኢዘ ሚታና
- 43 ኢዚ ካታማቲ ኣሲ ባይንዳሶ፥  
ኣሲ ሞኪ ጴሎንታሶ፥  
ሜላኔ ባዞ ቢታ፥  
ኣይኮይ ባይንዳ  
ቡላ ቢታ ጊዳና።
- 44 ቤሌ ታኒ ባቢሎኔን ቃጸያና፤  
ኢዚ ሚቲዳይሳካ ታ ሮሻና፤  
ሃይሳፌ ካዎቴላይ  
ኢዛኮ ጎጌና፤  
ባቢሎኔ ገምቤይ ኩንዳና።
- 45 ታ ዳሬቶ! ኢዚፔ ኬዚቴ፤  
ኢንቴ ሼምፖ ኣሺቴ፤  
ያሺዛ ጎዳ ሃንቆፌ  
ኬሲ ኤኪ ኣቲቴ።
- 46 ዋሬይ ቢታይን ሴቴቲሺን  
ሂደታ ቃንጸፍቴኔ ባቦፍቴ፤  
ካዎይ ካዎ ቦላ ዳንዲዛይሳ፥  
ማካላቴሉ ቢታይ ቦላ  
ዲዛይሳ ኢሲ ዋሬይ ሃ ላይላን፥  
ሃራይ ላይሳ ካሊዲ ያና።
- 47 ቱማፔ ታኒ ባቢሎኔ  
ኤቃ ጸሳታ  
ቃጸያና ዋዴይ ያና፤  
ቢታያ ኩሜሳ ካዉያና፤  
ሲፌቲዳይቲ ኡባይ

\* 51:41 ሼሻካይ ባቢሎኔ ካታማ ጉሳ።

ኢዚን ፖርጩ ጌ ኩንዳና።  
 48 ጳይሲዛይቲ ፑዴሃ ባጋፌ ዪዲ  
 ኢዞ ኦሊዛ ጌሻሰ  
 ሳሎይኔ ሳኣይ  
 ቃሴ ኢሰታ ጌዶን ዲዛ ኡባይ  
 ባቢሎኔ ቦላ  
 ኢሊሊ ጋና» ጌሰ።

49 ጎዳይ፥ «ቢታ ኡባን ሲፌቲዳይቲ፥  
 ባቢሎኔ ጋሶን ኩንዲዳ ማላ  
 ኢሰራኤልን ሲፌቲዳይታ ጋሶን  
 ባቢሎኔይ ኩንዳና  
 ቤሳዉሰ» ጌሰ።

ባቢሎኔን ዲዛ ኢሰራኤል ኣሳሰ ኪቲቲዳ ኪታ

50 ኢንቴኖ ማሻፌ ኬሲ ኤኪ ኣቲዳይቶ!  
 ቤቴ፤ ሃይሳን ታኮፍቲ፤  
 ሃኮ ቢታን ዲዛይቶ  
 ጎዳ ኣኬኪቲ፤  
 ዩሩሳላሜካ ቆፒቴ።

51 «ኣላጋቲ ጌሻሶሆ  
 ጎዳ ኬል ጌሊዳ  
 ጌሻሰ፥ ሓኒ ጫዬቲዶሰ፤  
 ዩላይ ኦ ሲንል ካሚዶሰ፤  
 ካዉሻቴሊካ  
 ጉሉንቲዶሰ» ጌቲ» ጌሰ።

52 ጌዶ ኣቲን ጎዳይ፥  
 «ባቢሎኔ ኤቃ ጸሳታ  
 ቃጸያና ዋዴይ ያና፤  
 ኢዚ ቢታ ኡባን  
 ማዴንዲዳይቲ ጎታራና።

53 ባቢሎኔይ ፑዴ ሳሎ ኬዚኮካ፥  
 ቶቄ ጌዳ ሚኖ ሚጸ  
 ኦሊኮካ ታኒ ጳይሲዛይታ  
 ኢዚ ቦላ ዩዳና» ጌሰ።

ባቢሎኔ ጳዮ

- 54 «ባቢሎኔፔ ዋሶይ ሲዬታና፤  
 ኢሰታ ቢታፌ ጌታ ባሻ  
 ጨንጉርሲ ሲዬታና።
- 55 ጎዳይ ባቢሎኔ ዳይሳና፤  
 ኬሃ ዋሲዛ ኢዚ ዋሶዛ  
 ጮኡ ሂሰታና፤  
 ኢሰታ ዋርኬቲ  
 ጌታ ሃላ ማላ ጉማና፤  
 ኢሰታ ዋሶይካ ኮሹማና።
- 56 ባቢሎኔ ዳይሲዛ ሚሺ ያና፤  
 ኢዚ ኦላንቻቲ ዲኤታና፤  
 ኢሰታ ዋንዳፌይካ ሜቃና፤  
 ጎዳይ ጌኔ ኦሶ ጊሻሰ  
 ሃሎ ኬሲዛዴኔ  
 ኢዚ ሃኒዛ ሚሽ ኡባሰ  
 ቤሲዛ ዋጋ ቃንጺዛ ጸሳ።
- 57 ኢዚ ሹሜታኔ ኣጵ ኤራንቻታ  
 ኢዞ ሃሪዛይታኔ ጌታ ኣሳታ፥  
 ኢዚ ኦላንቻታ ታኒ ማሶሳና፤  
 ኢሰቲ ሜርናሰ ኢቻና፤  
 ሲሚዲካ ቤጌቴና» ጌሰ  
 ኢዛ ሱንሉ ጎዳ  
 ኡባፌ ዋልቃማ  
 ጸሳ ጌቴቲዛ ካዎይ።
- 58 ጎዳይ ኡባፌ ዋልቃማ ጸሳይ፥  
 «ጉባይ ዳልጋ ጌዲዳ  
 ባቢሎኔ ገምቤቲ ላሌታና፤  
 ጵቁ ጌዳ ኢዚ ፔንጌቲካ  
 ታማን ጹጌታና፤  
 ኣሳይ ሃዳ ዳቡሬሰ፤  
 ካዎቴላታ ዳቡሬይ  
 ታማሰ ጸላ ጌዳና» ጌሰ።
- 59 የሁዳ ካዎ ሴዴቂያሲ ካዎቲዳ ኦይዳንሶ ላይላን ካዎዛ  
 ጊቤ ዛቤዚ ማኢሴያ ናዛ ኔሪያ ና ሳራያይ ካዎዛራ ባቢሎኔ ቢዳ  
 ዋዴ ናቤ ኤርማሲ ኢዛሰ ዮቲዳ ኪታይ ሃይሳ።
- 60 ኤርማሲ ባቢሎኔ ጊሻሰ ካሴ ጸፊ ዋሉዳይሳ ኡባ ባቢሎኔ  
 ቦላ ያና ባሽ ኡባ ጸላ ማጸፋን ጸፊዴሰ።

61 ሳራያሰካ፥ «ኔኒ ባቢሎኔ ጋኪዳ ማላ ሃይሳ ቃላ ኡባካ ኔ ቃላ ቶቄ ሂስታዳ ናባባናይሳ ባሎፓ።

62 ኔኒ፥ ለቤት ጎዳዉ! ኔኒ ሃኖ ሃ ሶሆዪን ኣስ ጊዲን ሜሄይ ሙሌራ ቆያና ጋካናስ ሜርናስ ቡላ ኬሳና ጋዳሳ። ጋ።

63 ኔኒ ሃይሳ ጸላ ማጸፋዛ ናባባ ዉርሲዳፔ ጉዬ ኢዛ ጊደን ሹቶ ቃቻዳ ኤፊራዲሴ ሻፋን ኤፋ ዬጋ።

64 ሂስታዳ፥ ለባቢሎኔይካ ታ ኢዚ ቦላ ኤሂዛ ባሻፌ ዴንዲዳይሳን ሃይሳሉ ሚቲታና፤ ናምኣንሉ ሲማ ዴንዲኩ፤ ኢዚ ኣሳይካ ኩንዳና። ጋ» ጌሰ። ኤርማሲ ሃሳይዳ ቃላይ ሃይሳን ፖሌቲዴሰ።

## 52

### ዬሩሳላሜ ኩንዴሰ

(2ታሪ 24:18-20፤ 25:1-7)

1 ሴዴቂያሲ ካዎቲዛ ዎዴ ኢዛስ ላይላይ ናምኡ ታማኔ ኢሲኖ፤ ኢዚ ዬሩሳላሜን ታማኔ ኢሲ ላይሰ ካዎቲዴሰ፤ ኢዛ ኣዬይ ሰንሒ ኣምጸሎ ጊዲሺን ኢዛ ሊቢና ዴሬ ኣስ ኤርማሳ ና።

2 ሴዴቂያሲካ ኢዮኣቄሚይ ኦሳይሳላ ጎዳ ሲንላን ኢታ ሚሽ ኦሊዴሰ።

3 ጎዳይ ዬሩሳላሜ ቦላኔ ዩሁዳ ቦላ ሄሳ ኡባካ ጋሊዳይኔ ዉርሴላን ኢዚ ባ ሲንላፌ ዲጊዳይ ሃንቄቲዳ ጊሻሳ።

ሴዴቂያሲካ ባቢሎኔ ካዎ ቦላ ማካሊዴሰ።

4 ሄሳ ጊሻሰ ሴዴቂያሲ ካዎቲዳ ኡዲፋንላ ላይላን ታማንላ ኣጊናን ታማንላ ጋላስ ባቢሎኔ ካዎ ናቡካዳናጸሬይ ባ ኦላ ዎታዳራታ ኡባ ሺሺ ኤኪዲ ዬሩሳላሜ ቦላ ዎራጂዴሰ። ካታማዮካ ጊደሊዴሰ፤ ዩዩ ኣቆናስ ኬላ ኬሊዴሰ።

5 ካታማያካ ካዎ ሴዴቂያሲ ካዎቲን ኢዛስ ላይላይ ቢዲ ታማኔ ኢሲ ላይሰ ጊዳና ጋካናስ ጊደሊዳ ማላ ጋምኣዲሰ።

6 ኦይዳንላ ኣጊናን ኡዲፋንላ ጋላስ ሄ ካታማይን ኮሻይ ሚኒዳ ጊሻሰ ዴሬዛስ ማና ካሊ ቆይዴሰ።

7 ሄ ካታማይ ጊምቤይ ላሌቲዴሰ፤ ኦላ ኣሳይ ኡባይካ ኬዚ ባቃቲዴሰ። ባቢሎኔ ዴሬ ኣሳይ ሄ ካታማይ ዩሻን ዲኮካ ካዎዛ ኣታኪልቲ ኣቻን ናምኡ ጊምቤታ ጊደን ዲዛ ፔንጌዛራ ጊደሰ ካታማይፔ ኬሲ ኤኪ ባቃቲዲ ኣራቤ ጌቲቲዛሶ ቢዳ።

8 ባቢሎን ዳሬ ኦላንቻቲ ካዎ ሴዴቂያሳ ዩዳሊዲ ኢያርኮ ደምባን ኢዛ ጋኪዳ፤ ዎታዳራቲ ኡባይካ ኢዛፔ ሻኬቲዲ ላሌቲላን ዲሺን ካዎዛ ኦይኪዳ።

9 ኢዛ ሃማቲ ዳሬን ኤሬቢላ ጌቴቲዛሶን ዲዛ ባቢሎን ካዎኮ ኤፊዳ፤ ባቢሎን ካዎይ ሄን ኢዛ ቦላ ፒርዲዴሰ።

10 ኤሬቢላን ባቢሎን ካዎይ ሴዴቂያሳ ኦቱማ ናይታ ኢዛ ሲንላን ሹኪዴሰ፤ ዩሁዳ ዳሬ ሹሜታ ኡባካ ዎጂዴሰ።

11 ሴዴቂያሳ ኦይፊታካ ዎጪ ኬሲዴሰ፤ ጸርቂማላ ሳንሳላታን ኢዛ ቃቺዲ ባቢሎን ኤፊዴሰ፤ ሂሰቲዲ ኢዚ ሃይቃና ጋካናሰ ሄን ቃሾ ኬላን ጋምኢሲዴሰ።

12 ባቢሎን ካዎ ናቡካዳናጾሬይ ካዎቲዳ ታማኔ ኡዲፋንላ ላይላን ኢቻሻንሶ ኦጊናን ታማንላ ጋላሰ ባቢሎን ካዎዛ ቦንቾ ናጊዛ ዎታዳራታ ሃላቃይ ካዎ ሹሜ ናቡዛራዲኔይ ዩሩሳላሜ ዩዴሰ።

13 ጎዳ ኬላዛኔ ካዎቴላ ኬላ ሄሳሶካ ዩሩሳላሜን ዲዛ ኬላ ኡባካ ታማን ጸጊዴሰ፤ ሃራ ዎልቃማ ኬላታካ ዲፒ ሂሰቲ ጸጊዴሰ።

14 ካዎዛ ቦንቾ ናጊዛ ዎታዳራታ ሃላቃፔ ጋርሳራ ዲዛ ባቢሎን ኦላንቻቲ ኡባይ ዩሩሳላሜ ዩሾን ዲዛ ጊምቢዛ ኡባ ላሊዳ።

15 ናቡዛራዲኔይ ኢሲ ኢሲ ማንቆታ፥ ካታማይ ጊዶን ኦቲዳ ኦሳታ፥ ሂላንቻታኔ ባቃቲዲ ባቢሎን ካዎሰ ኩሼ ኢሚዳይታ ዴንላ ኤፊዴሰ።

16 ጊዶ ኦቲን ናቡዛራዲኔይ ሃንኮ ሄ ቢታን ዲዛ ማንቆታ ዎይኔ ቶካናሲኔ ጎሻንቻታ ጊዳና ማላ ሄን ኦጊዴሰ።

17 ባቢሎን ዳሬ ኦሳይ ጎዳ ኬላን ዲዛ ጸርቂማላ ቱሳታ፤ ሚሻታ ኢሰታ ቦላ ዎሊዲ ኢሲ ሶሆፔ ሃራሶ ኤፊዛ ጋሬታኔ ጸርቂማላፔ ኦሴቲዳ ሃላ ጎንጌታ ሜንፎሬላ ዩጊዳ፤ ጸርቂማላ ኡባካ ባቢሎን ኤኪ ቢዳ።

18 ሄይታፔ ሃራካ ጸርታ፥ ታማ ካሺዛ ኮንኦታ፥ ቃጴታ፥ ኬሬታ፥ ጨልፋታኔ ጎዳ ኬላ ጊዶን ኦሶሰ ጎኢዛ ጸርቂማላፔ ኦሴቲዳ ሚሻታ ኡባካ ኤኪ ቢዳ።

19 ካዎ ቦንቾ ናጊዛ ዎታዳራታ ሃላቃይ ሙሩታ ዎርቃፊኔ ሙሩታ ቢራፔ ኦሴቲዳ ሚሻታ ኡባ፥ ጉቃ ሳኔታ፥ ኤጻኔ ጨዋሲዛ ጸርታ፥ ኬሬታ፥ ቄሬ ጸርታ፥ ጸምፔ ኢሰታ ቦላ ዎሊዛ ሚሻታ፥ ጨልፋታኔ ኡሻ ያርሾ ኢሰታን ሺሺዛ ጽኦታ ኤኪ ቢዴሰ።

20 ካዎ ሶሎሞኔይ ጎዳ ከሐሰ ጸርቁማላፔ ኦሲሲዳ ናምኡ ቱሳቲ፥ ሃላ ጎንጌ፥ ኢዛፔ ጋርሳ ባጋራ ዲዛ 12 ዎፋኖቲኔ ሚሻታ ኢስታ ሶላ ዎሊዲ ኢሲ ሶሆፔ ሃራሶ ኤፊዛ ጋራቲ ከሂ ዴጼቲስ።

21 ኢሲ ኢሲ ቱሳ ጌሳይ 18 ዎቶ፥ ጎምፓይ ዩዩ አቆናሰ 12 ዎቶ፤ ኢዛስ ጊዶይ ዶያ ጊዲዳ ጊሻስ ኢሳ ኢሳ ዶና ኦርዴቲላይ ኦይዱ ቢራዴይ ዎቶዛ ከና።

22 ኢሲ ቱሳ ሁኤ ሶላ ዎቶዛ ጸርቁማላፔ ኦሴቲዳ ቁስቲይ ዴስ፤ ኢሲ ኢሲ ጸርቁማላፔ ኦሴቲዳ ቁስቲ አዲሳቲላይ 5 ዎቶ ጊዲሺን ዩዩ አቆናሰ ኦርማኔ ሚላ አይፌ ሚሳቲዛ ጌጶን ጌጶቲዴስ፤ ሃንኮ ቱሳይካ ሄ ኦርማኔ አይፌ ሚሳቲዛ ጌጶን ጌጶቲ ካሴይሳራ ኢሲኖ ሚሳቲዴስ።

23 ኡዱፋን ታማኔ ኡሱፑን ኦርማኔ ሚላ አይፌቲ ሚሌ ባጋራ ዎዩይ ባይንዳ ቤቲዛይታ ጊዲሺን ዩሾዛን ዲዛ ኦርማኔ ሚላ አይፌታ ቆዳይ ጶታ።

24 ካዎዛ ቦንቾ ናጊዛ ዎታዳራታ ሃላቃይ ካሴ ቄሴታ ሃላቃ ሳራያ፥ ኢዛፔ ጋርሳራ ዲዛ ቄሴ ሶፎናሳኔ ፔንጌ ናጊዛ ሄቩ ዛቤታ ቃቺ ኤፊዴስ።

25 ካታማ ጊዶን አቲዳ አሳፔ ኦላንቻታስ አላፌ ጊዲዳ ኦላ ጋዳዎ፥ ካዎ ዙሪዛ ላፑናታ፥ ዴሬዛ ጊዶፌ ኦላንቻታ ዶሪዛ ኦላ ጋዳዎ፥ ጸፊዛኔ ካታማ ጊዶን ቤቲዳ ሃራ 60 አሳታ ኤኪ ቢዴስ።

26 ካዎዛ ቦንቾ ናጊዛ ዎታዳራታ ሃላቃ ናቡዛራዳኔይ ሄይታንታ ኡባ ኤኪዲ ባቢሎኔ ካዎይ ዲዛሶ ኤሬቢላ ጋሊዴስ።

27 ካዎዚካ ኢስታ ሄን ኤሬቢላን ዲፒ ሂስቲ ዎቶዴስ፤ ዩሁዳይካ ሄሳ ማላን ባ ቢታፌ ዲኤታ ባዲስ።

28 ናቡካዳናጾሬይ ዲኢ ኤፊዳ ዴሬዛ ቆዳይ ሃይሳፌ ካሊ ዲዛይሳ፤

ኢዚ ባ ካዎቲዳ ላፑንላ ላይላን 3,023 አይሁዳታ፥

29 ባ ካዎቲዳ ታማኔ ኦስፑንላ ላይላን

ናቡካዳናጾሬይ 832 አስ፥

30 ባ ካዎቲዳ ናምኡ ታማኔ ሄቩንላ ላይላን

ናቡዛራዳኔይ 745 አይሁዳታ ዲኢ ኤፊዴስ፤

ኢዚ ዲኢ ኤፊዳ አሳ ቆዳይ ኢሲ ሶላ 4,600።

### ኢዮአኪኔ ቢርሼቴላ

31 ዩሁዳ ካዎ ኢዮአኪኔይ ዲኤቲዳ ሄቩ ታማኔ ላፑንላ ላይላን ዮራ-ማርዴቄይ ባቢሎኔን ካዎቲዴስ፤ ሄ ላይላንካ ታማኔ ናምኡንላ አጊናን ናምኡ ታማኔ ኢቻሻንላ ጋላሳን ዩሁዳ ካዎ ኢዮአኪኔ ቆፒዴስ፤ ቃሾ ከላፊካ ኢዛ ከሲዴስ።

<sup>32</sup> ኢዛ ሎኦ ቃላን ሃሳይሲዴስ፤ ባቢሎኔን ኢዛራ ቃሾሶን ዲዛ ካዎታ ኡባታፔ ቦላራ ኣሉዲ ኢዛ ቦንቾሶን ዋሊዴስ።

<sup>33</sup> ኢዮኣኪኔይ ቃሾሶን ዲሼ ማይኢዳ ማይኦዛ ኢዛፔ ቃሪ ዬጊዴስ፤ ሄሳፌ ቢዲ ሃይቃና ጋካናስ ባ ዲዛ ዋዴ ኡባን ካዎዛ ማዳፌ ሚሼ ጋሞኢዴስ።

<sup>34</sup> ባቢሎኔ ካዎ ኢዮኣኪኔይ ቢዲ ሃይቃና ጋካናስ ፓጩይ ባይንዳ ኡባ ዋዴ ኢዛስ ማና ቃላባ ኢሚዴስ።

## ጌሻ ማጸፋ

### **Gamo: ጌሻ ማጸፋ Bible of Ethiopia, Ethiopic script**

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

---

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b